

南宋禱事詩

國立中央圖書館 國家圖書館 NATIONAL CENTRAL LIBRARY, TAIWAN, R.O.C.

南宋禱事詩

提要

臣等謹案南宋禱事詩七卷

國朝沈嘉轍吳焯陳芝光符曾趙昱厲鶚  
趙信全撰嘉轍字藥城焯字尺鳧曾字  
幼魯鶚字太鴻皆錢塘人芝光字蔚九  
昱字功千信字意林皆仁和人惟曾以  
薦舉官至戶部郎中鶚以康熙庚子舉



於鄉餘皆終於諸生是書以其鄉為南  
宋故都故撫摺軼聞每人各為詩百首  
而以所引典故註於每首之下意主紀  
事不在修詞故警句頗多而牽綴填砌  
之處亦復不少然援據浩博一字一句  
悉有根柢萃說部之菁華采詞家之腴  
潤一代故實巨細兼該頗為有資於考  
證蓋不徒以文章論矣乾隆四十二年

十一月恭校上

少詹事臣陸費墀

侍讀學士臣陸錫熊

侍講學士臣紀昀

南宋襟事詩總目

卷一

沈嘉轍字樂城一百首

卷二

吳焯字尺鳧一百首

卷三

陳芝光字蔚九一百首

卷四



國立中央圖書館藏 NATIONAL CENTRAL LIBRARY, TAIWAN, R.O.C.

符曾字幼魯一百首

卷五

趙昱字功千一百首

卷六

厲鶚字太鴻一百首

卷七

趙信字意林一百首

南宋禠事詩

卷一 一百首

錢塘沈嘉轍撰

龍蔥佳氣儷山川南渡開基大寶傳為有文章  
京樣好中興留得幾遺編

宋會要紹興元年内殿宣示大宋受命中興  
之寶中興御府藏玉寶十有一一曰鎮國神  
寶二曰受命寶三曰天子之寶四曰天子信  
寶五曰天子行寶六曰皇帝之寶七曰皇帝



信寶八曰皇帝行寶九曰大宋受命之寶十  
曰定命寶十一曰大宋受命中興之寶 方  
輿勝覽殮月香水影之清文章京樣覽雲陣  
銀山之壯意氣天豪 玉海建炎三年胡安  
國上中興策十四篇紹興二年權邦衡獻中  
興十議四年江藻上建炎中興詔旨三十七  
冊七年林保獻中興龜鑑八年李昌言進中  
興要覽十篇九年汪伯彥上建炎中興日曆

五卷十二年漢州布衣陳靖獻中興論統淳  
熙十二年上中興禮書先是紹興元年趙子  
書上言政和宣和因革禮渡江後皆失請事  
加修纂至是書成賜名中興禮書嘉泰二年  
費士寅等續纂中興禮書八十卷又李綱編  
建炎中興記三卷張浚進中興備覽四十一  
篇李壁中興戰功錄叙云中興十二處戰功  
列於銓法熊克撰中興紀事本末一名中興

小歷文獻通考梁克家等上中興會要二百  
卷何異撰中興百官題名五十卷 案以上  
諸目惟禮書續禮書備覽戰功錄紀事本末  
會要百官題名並見於文淵閣書目而文淵  
閣所藏更有中興聖政中興百官年表中興  
編年備要中興繫年錄中興政要中興大事  
記內閣書目有施清臣中興三朝聖訓焦氏  
經籍志有陳均中興編年舉要萊竹堂書目

有中興目錄絳雲樓書目有中興繫年要錄  
大抵中興諸書見於諸簿錄者可考也其不  
錄者皆佚已惟焦氏所載高宗實錄五百卷  
孝宗實錄五百卷光宗實錄一百卷寧宗實  
錄三百卷此據宋史藝文志而列之未必有  
完書也

炎炎大詔下彤階摩勒青珉兩壁排喜得華恩  
加上舍明朝宰相送光齋



宋元通鑑宋高宗幸學手詔朕聞周建外史  
掌五帝三皇之書漢選諸儒定九流七略之  
奏文德之盛後世推焉仰惟祖宗開建冊府  
凡累朝名世之士由是以興而一代致治之  
原蓋出於此朕嘉與學士大夫共宏斯道乃  
一新史觀親御榜題肆從望幸之忱以示右  
文之意嗚呼士習為空言而不為有用之學  
久矣爾其勉修術業益勵猷為一德一心以

共赴亨嘉之會用丕承我祖宗之大訓顧不  
善歟 曝書亭集宋高宗御書石經紹興十  
三年知臨安府張璪摹石淳熙四年詔知府  
趙礪老建閣於太學題曰光堯石經之閣元  
時扎木揚喇勒智造白堍於行宮故址取石  
壘塼杭州路廉訪經歷申屠致遠力持不可  
已損其什一明嘗熟吳訥乾州宋廷佐先後  
按浙或覆之廊或甃以甌甌崇禎末廊圯嵌

諸壁中左易二書六詩十有二禮向有學記  
經解中庸儒行大學五篇今惟中庸片石存  
爾其南則理宗大書御製序四碑右則春秋  
左氏傳四十八碑闕其首卷通計八十七碑  
非足本矣秦檜一跋吳訥推碎其詞見學士  
院中興紀事本末君子無取也 楓窻小牘  
思陵以萬幾之暇御書六經論語史記列傳  
刊石立於太學 王宗沐續資治通鑑紹興

十三年作太學以岳飛宅為之在前洋街  
宋史紹興十三年七月國學大成殿告成奉  
安廟像明年二月國子司業高閎請幸學上  
從之帝遂作先聖及七十二子贊冠以序文  
親灑宸翰揭之大成殿上二十六年石刻於  
國子監淳熙四年孝宗幸太學嘉泰三年寧  
宗幸太學淳祐元年理宗幸太學咸淳三年  
度宗幸太學 朝野雜記太學養士最盛於

崇寧間紹興中詔以七百人為額上舍生三十員內舍生百員外舍生百七十員每三年科場率四人而一若即行校藝而升上者則不待選舉而徑釋褐焉 癸辛襟識太學先達歸齋各有光齋之禮宰執則送純金碗一隻狀元送鍍金魁星杯棹一副漕帥新除各齋有十八界送二百千酒十尊又學規輕者闕暇重者前廊闕暇又重則遷齋

百寮印信久無存遺得龍章守子孫三百餘年十五押誰知制詔代天言

朱子語錄南渡後印信散失諸司往往借用舊印有以不便請者又因費重而止或問朱子奏狀借縣印否曰豈惟縣印尉印亦可借嘗見縣丞借用漕使印諸司舊印借用上下彼此皆所不計 篋齋雜著余家蓄有建炎勅文一紙孟御史陸銑安撫兩河時所受書

以淡墨可二寸許筆勢飛動題建炎元年七月十八日璽識分明正思陵手筆蓋此時兩河尚在版圖也 篁墩文集有題蘄水程氏所藏南宋錄用伊川先生子孫誥 癸辛雜志宋十五帝御押 太祖 太宗 真宗 仁宗 英宗 神宗 哲宗 徽宗 欽宗 高宗 孝宗 光宗 寧宗

且理宗 度宗 霏雪錄嘗聞宋故事惟押字上親書有押字則不用寶 說略宋勅俱草書後用三省長官僉押 三朝北盟會編高宗得開圖書匠舒通能刊金銀銅圖書取縷塵白字令刊白文為璽由是人皆效之

雄才始事氣方酣一尺書函懇再三可惜聲聲蘇武令至今遺恨諭江南

朝野襍記靖康末高宗與李忠定公書構頓首頓首天未悔禍乘輿蒙塵聞之心焉如割已令會兵返擊冀遂奉迎而歸方今生民倒懸諒非不世之才何以協濟閣下學窮天人忠貫金石是用盡復公舊職澤被斯人功垂竹帛乃公素志想投袂而起以振天人之溺以副蒼生之望所祝道中倍加保護謹啟構頓首觀此則高宗屬意於忠定可見矣 詞

譜紹興初都下盛傳蘇武令一詞聲韻淒楚言是李綱丞相作 歷代臣鑑王倫使北還綱疏曰今倫之歸與金使偕來乃以招諭江南為名不著國號而曰江南不云通問而曰招諭此何禮也陛下其勿輕許 按李綱伯紀撰梁溪集一百八十卷 蒲室集題高宗書云高宗為中興之主不能用李綱宗澤深為可惜然慈仁謹儉可謂守文之主肇運中

興亦有由也

小臣觸諱玉墀東聖主天懷寫至公一點君心  
千古事兒孫何地敢忘忠

吹劍錄高宗策進士有犯御名者上曰朕豈  
以已妨人進取 歷代臣鑑韓世忠得疾戒  
家人曰吾名世忠汝曹毋諱忠字諱而不言  
是忘忠也 玉海例言宋時極重廟諱如桓  
譚為亘譚荀勗為荀勉魏徵為魏證及貞觀

作正觀胤征作嗣征宮縣作宮垂桓圭作植  
圭姤卦作遇卦此類甚多 日知錄朱子周  
易本義姤卦下以故為姤作故為遇避高宗  
嫌名也 鼠璞本朝避嫌名如勾姓本避高  
宗諱故改音鈎後或加金於傍或加絲於傍  
或加草於上或改為句或增為勾龍實同一  
勾也今讀勾踐作平聲者本此 史緯勾龍  
如淵永康軍人勾姓本古勾芒高宗即位避

御名更勾為龍因呼為勾龍氏 五襍組真  
德秀原姓慎因避孝宗諱而改 又宋時避  
君上之諱最嚴宋版諸集中凡嫌名皆闕不  
書如英宗名曙而署樹皆云嫌名不知樹音  
原不同曙也欽宗名桓而完亦云嫌名不知  
完音原不同桓也仁宗名貞而貞觀改作正  
觀魏徵改作魏證不知徵貞不同音也又可  
怪者真宗名恒而朱子於書中有恒獨不諱

不知其解或以親畫而祧耶

太清樓本無完字匱紙撫來已再傳不愛女官  
元祐脚墨皇新搨紹興年

書史往見藏蘇耆家蘭亭懷字內折筆抹筆  
皆轉側褊而見鋒 法帖譜系舊見太清樓  
帖自開禧以後有權場中來者已磨去亮字  
無右邊轉脚蓋避金主諱也 清河書畫舫  
高宗本效黃庭堅書後以偽豫遣能庭堅書

者為間遂改從右軍 又法帖譜系南宋紹興中以御府所藏淳化舊帖刻板寘之國子監稱紹興國子監本其首尾與淳化閣本略無少異御府拓者多用匱紙蓋打金銀箔者也字畫精神極有可觀淳熙修內司本淳熙奉旨刻石禁中卷帙規模悉同淳化閣本而卷尾乃楷書題云淳熙十二年乙巳歲二月十五日修內司恭奉聖旨模勒上石 淳熙

奇字訓釋云撫與模同 墨皇出米芾寶晉英光集詩

築室南班傍帝畿仙源家寶已芳菲淒涼望斷中天路朔雪橫空雁影稀

愧郊錄嘗考典故祖宗袒免親以上備環衛冠屬籍謂之南班 通志略有本朝仙源積慶圖一卷 宋史不怠嗣濮王宗暉曾孫也 孝宗嘉其忠諒飲之酒顧太子曰此賢家寶



也又史浩等上三祖下第六世仙源類譜仁宗玉牒朝野禱記故事玉牒以首相領之紹興十六年初復玉牒所以秦會之提舉又宗正寺仙源類譜其見數者三祖以下合二萬一千六十有六人靖康以來隔異域者遙為排連而已又宗室為狀元者乾道初汝愚中宏辭科者淳熙初彥中中童子科者慶元中崇祿三年六月己卯崇祿亦能誦六經免

文解云 譚輅宋理宗寶祐四年登科錄凡五甲共六百一人其中自玉牒者第一甲二人第二甲二人第三甲十八人第四甲五十一人獨未有在第五甲者可見宋室待宗藩之禮 經世奇謀留遇僧者礪山人也金人見之曰全似趙家少帝遇僧竊喜紹興十年三京路通詔求宗室遇僧自言少帝第二子守臣遣赴行在乃詔劾治遇僧服罪後有自

北至者曰淵聖小大王訓見居五國城 朝  
野襟記建炎五年有自稱徐王棣者聞於朝  
上遣使逆之既至審驗則富順男子李悖也  
遂坐誅有婦人自稱榮德姬者按驗則婦人  
易氏也亦杖死上曰吾寧受百欺冀得一真  
紹興三年詔皇族有來歸者令州縣驗實以  
聞

一朝姦細竟南奔和議終為保舉恩已見秦家

錯招樣莫將冠冕付空言

金國南遷錄天會八年諸臣慮宋復讎思有  
以止之魯王曰惟遣彼臣先歸使其臣順我  
佯不從而勉以聽或可以定忠烈王曰惟張  
孝純可忠獻王曰此事在我心裏三年矣只  
有秦檜可用我喜其人置之軍中試之以事  
外雖拒而中嘗委曲順從而檜始終言南自  
南北自北因說許某著手時只依這規模分

別今若縱之歸國彼喜慷慨說事必是得志

宋元通鑑達蘭舊作達懶改後仿此今攻楚州檜與

妻王氏自軍中趨漣水軍自言殺金監已者

奪舟而來欲赴行在遂航海至越州帝命先

見宰執檜首言欲天下無事須是南自南北

自北朝士多疑其與何臬孫傅等同被拘執

而檜獨還自燕至楚二千八百里踰河越海

豈無譏訶之者安得殺監而南惟范宗尹李

回二人素與檜善盡破羣疑力薦其忠檜入

對首奏所草與達蘭求和書又翟汝文雖

為檜所薦然性剛不為檜屈至對案相詬目

檜為金人姦細故不得久居位老學菴筆

記秦太師作相時裹頭巾當面偶作一摺謂

之太師錯摺樣

簪花書法註劉希金翠輕搖玉腕圍誰說芙蓉

江上貌紅顏一代有危機

談薈宋宮人有柳金簡翠腕闌是景陽宮胭脂井物註似今之手釧 清河書畫舫劉夫人名希建炎間嘗主內翰文字及寫宸翰高宗甚眷之 金小史金主亮嘗有圖宋之意曰向者梁說嘗為朕言宋有劉貴妃天下之絕色也今一舉而兩得之所謂因行掉臂也 集賢臺閣接飛檐九朽還摹土筆尖天慶喜存原粉本金章曾是弟兄兼

妃古錄趙伯駒與弟伯驥並以畫名高宗嘗命二人合畫集賢殿稱旨賞與特厚 畫繼畫家於人物必九朽一罷謂先以土筆撲取形似數次修改故曰九朽繼以淡墨一描而成故曰一罷罷者畢也 清河書畫舫按伯驥乃伯駒之兄高宗時嘗奉詔寫天慶觀樣命吳中依樣造之今玄妙觀是也 圖繪寶鑑趙伯駒善畫山水花鳥竹石高宗極愛之

仕至浙西兵馬鈐轄趙伯驩善畫山水人物尤長於花禽點染輕盈頓有生意仕至觀察使

書法申韓孰並肩饒歌鼓吹似前賢太常錦瑟還驚訝律呂而今不再傳

研北襟志趙子固目姜堯章為書家申韓又周公謹云姜堯章饒歌鼓吹曲乃步驟魯師尹宙合編姜夔上書乞正樂赴太常同官

校正樂師上錦瑟姜問曰此何樂衆官已有漫文之歡又令樂師曰語云鼓瑟希未聞彈之衆官咸笑而散去 吳興掌故堯章長於音律嘗著大樂議欲正廟樂慶元三年詔付奉常有司收掌令太常寺與議大樂時嫉其能是以不獲盡其所議人大惜之 按姜夔字堯章有白石詞五卷

野溪亭市列柴門陶戶家家作酒樽縱有龍紋

南宋雜事 卷一  
白瓷碎新瓷青器已無倫

太平寰宇記杭州亭市山餘石鄉亭市村多陶戶善作大甕今謂之浙甕 四部彙南宋時處州章生兄弟皆作瓷兄所作者視弟色稍白而斷紋多號白瓷碎又考古括遺世稱兄所作為哥瓷 稗編渡江後修內司造青器名內瓷澄泥為範極其精緻油色瑩徹為世所珍後郊壇下別立新瓷餘如烏泥瓷餘

杭瓷續瓷皆非官瓷比所謂舊越瓷不復見矣 五襍組柴瓷之外有定汝官哥四種皆宋器也傳流至今者惟哥瓷稍易得蓋其質厚頗耐藏耳定汝白如玉難於完璧宋時宮中所用率銅鈴其口以是損價 六研齋筆記南宋時餘姚有秘色磁甌撲而耐久今人率以官瓷目之不能別白也

絲鞵供御喚莊生雪藕抽鍼瑩緝成一尺繡茵

南定禮事言 卷一 十一  
塵不動退朝禹步寂無聲

老學菴筆記禁中舊有絲鞋局專挑供御絲鞋不知其數嘗見蜀將吳玠被賜數百緡皆經奉御者壽皇即位惟臨朝服絲鞋退即以羅鞋易之遂廢此局 夢窻甲豪瑞鶴仙贈絲鞋莊生云藕心抽瑩蠶引翠鍼行處冰花成片金門從迴輦兩玉鳧飛上繡絨塵輦末云待宣供禹步宸遊退朝燕殿 按莊生蓋

當時供奉者

廂庭雖設莫紛拏和氣常生百姓家為報臨安破落戶東宮昨日坐南街

洛水集城南廂官題名記粵自東幸於今百年錢唐版籍百倍往昔南北二廂設於闕外而五方襍居水陸互市人滋衆市滋夥訟於廂庭者率繫縲累日吏屬饜乃得去 兩浙名賢錄趙立夫知臨安府入對理宗語之曰

京師細民當一意摩撫使常在春風和氣中  
遂於府西建春和樓推廣德意 咸淳臨安  
志紹興二十三年上謂大臣曰近今臨安府  
收捕破落戶編置外州治本為民間除害而  
謂小火下者乃為人訴其恐嚇取錢令有司  
子細根治務得其實先是行在號破落戶者  
巧於通衢竊取人物故有是命 續資治通  
鑑建炎三年升杭州府為臨安府 愧郊錄

乾道七年詔皇太子判臨安府珂案本朝親  
王為南衙故實自有明據然則周必大所制  
詞有所謂肆考南衙之故實一新大尹之多  
儀及名稱未正者皆誤也

駐蹕錢唐奈數何風光京洛過江多後門艤得  
龍舟好歌舞銷鎔是此鍋

羣談採餘陳圖南莫知所出藝祖名之闕問  
天下始終事對曰一汴二杭三閩四廣再問



則曰非臣所知也 青泥蓮花記江浙間路  
岐女有慧黠知文墨能於席上指物題咏應  
命輒成者謂之合生其滑稽含翫諷者謂之  
喬合生蓋京都遺風也 七修類稿城中語  
音好於他郡蓋初皆汴人扈宋南渡遂家焉  
故至今與汴音頗相似惟江干人言語躁動  
為杭人之舊音教諭張傑嘗戲曰高宗南渡  
止帶一百過來 按百音擺 近峯聞略今

人呼謔之語皆有所本如宋都汴有何家數  
者其下行貨惡濫故呼何數今越人云數頭  
者當是南渡之遺也 留青日札劉豫金人  
入寇高宗親禦之趙鼎因喻樗留後門之策  
乃起張浚為閩浙江淮宣撫備退保之地  
高孝璠詩朱簾白舫亂湖光隔岸龍舟艤夕  
陽今日歡遊復明日便將京洛看錢唐 西  
湖遊幸記西湖杭人無時而不遊凡締姻賽

南齊書 卷一 二十一  
社會親送葬經會獻神無不在焉故抗諺有  
銷金錫之號

偏愛黃冠祀紫都為仙為帝總虛無馬遷也強  
宗元教誰續華陽位業圖

齊東野語女冠吳知古用事內宴演參軍教  
坊輩請簽文書參軍怒曰我方聽感粟請至  
三四胥前擊其首曰甚事不被感粟壞了又  
俗呼黃冠為感粟 清河書畫舫宋徽宗為

東華帝君高宗為元載孔昇天帝下生 筠  
溪牧潛集余居臨安有持大板史記列傳以  
老子為首心甚怪之莫知其本所出問諸博  
書者亦莫知也因閱國朝會要見宣和間有  
旨升老子於列傳首乃悟所見蓋宣和本今  
不行也

心事誰知默禱間滿朝敢道相公姦九年伍伯  
無人識去訪東南何處山

江湖襍記檜既殺武穆向靈隱祈禱有一行者亂言譏檜檜問其居址僧賦詩有相公問我歸何處家在東南第一山之句檜令隸何立物色立至宮殿見僧坐決事立問答曰地藏王決檜殺岳飛事數卒引檜至身荷鉄枷囚首垢面呼告曰傳語夫人東窓事發矣昨非菴日纂錢一為皂隸因秦檜酷刑責人嘗至死後雖少悔只以流血為度隸乃汙猪

血在板如是九年忽一日立班中見足離地而起檜呵其為妖隸述前情曰某今日應上昇遂乘雲而去

古牋葉葉染松煙監本猶珍後代傳歐瘦顏肥生態別官囊須辦買書錢

朝野襍記監本書籍紹興末年所刊也九月張彥實侍制為尚書始請下諸道州學取舊本書籍鏤板頒行從之然所取諸書多殘缺

故胄監刊六經無禮記正史無漢唐二十一年輔臣復以為言上謂秦益公曰監中缺書亦令次第鋟板雖重有所費不惜也由是經籍復全先是王瞻叔為學官常請募印諸經疏及經典釋文許郡縣以贍學或省係錢各市一本置之於學上許之今士大夫仕於朝者率費紙墨錢千緡而得書於監云 五襍組書所以貴宋版者不惟點畫無訛亦且鐫

刻精好若法帖然凡宋刻有肥瘦二種肥者學顏瘦者學歐行款疎密任意不一而字勢皆生動箋古色而極薄不蛀

中興詞翰坐春風科第繽紛出學宮花月平章二百載詩名終是首文公

癸辛襟志乾淳文淳厚謂之乾淳體端平江萬里自成一家淳祐徐霖魁南省尚性理時競趨之以釣科第咸淳未諸人倡為變體謂

之換字文章內多用莊列語 文獻通考淳  
熙十四年鄉試得進士王容以下上天姿英  
明大廷策士多自陞黜不盡由有司是舉王  
容蓋自第三親擢為榜首時儒生迭興辭章  
雅正號乾淳體 少室山房詩藪大抵南宋  
古體當推朱元晦近體無出陳去非此外略  
有三等尤揚四子元和體也徐趙四靈大中  
體也劉戴諸人自為晚宋而謝翹七言古時  
有可採焉

雲漢昭回奎宿明巖菴猶記大蘇名從來國運  
關文運莫誤文章喫菜羹

庚溪詩話徽宗幸寶籙宮醮筵其主疏道流  
伏地久之方起上詰之答曰值奎宿奏事上  
問何神對曰本朝臣蘇軾也上大驚 萬曆  
杭州府志東坡菴在錢唐縣西六里東坡為  
守時止此後人鑿石為室名曰東坡菴 洵

詞記事續鈔南宋之文氣浮而詞細靡故國益弱如葉水心之譎周平園之漫陳平齋之雜農田餘話宋南渡後文體破碎詩體卑弱惟石湖放翁為平正至晦菴諸子始一變時習模仿古作故有神頭鬼面之論老學菴筆記建炎以來尚蘇氏文章學者翕然從之有語曰蘇文熟吃羊肉蘇文生吃菜羹春衫新翦瑞香羅插座頻宣小妓歌四色饅頭

紅白酒花茶坊裏喚厮平波

夢梁錄蒸作麩行賣四色饅頭薄皮春蠶孝仁坊口水精紅白燒酒曾經宣喚其味香美入口便消大街有三五家開茶肆樓上專安著妓女名曰花茶坊一等不奉色業藝專為探聽妓家賓客趕趁唱喏飲宴所在以獻香送歡為由謂之厮波

南瓦邀棚北瓦過繡中小妓舞婆娑遊人不盡

香塵擁簫鼓開場打野呵

市肆記或有路妓不入勾欄只在要鬧寬闊處做場謂之打野呵 又如北瓦羊棚樓等謂之邀棚 咸淳臨安志南瓦在清冷橋西有熙春樓北瓦在衆安橋之南亦名下瓦有羊棚樓

明遠高樓夜半鐘書聲蚤已聽潛龍凡塵留得  
天人像願泱春風遍九農

剡源集佑聖觀記觀有明遠樓阜陵嘗讀書其中 朝野襟記佑聖觀淳熙三年建以奉佑聖真武靈應真君十二月落成或曰真武像盖肖上御容也 庚溪詩話孝宗春賦泱土膏之流潤將勸功於九農碧草淒其帶露游絲飄其曳空丹綠衆芳超遙兮春風春風兮歸來信吹萬之不同 埤雅廣要孝宗母

張氏夢崔府君擁一羊丁未生孝宗於秀州

小名羊高宗選養宮中賜名瑗適與崔府君  
同名

難將肥瘦定官家總屬天潢貌似花從此中興  
開七葉狸奴偏是判龍蛇

合璧事類紹興詔令訪求伯字號七歲以下  
者十人入宮十人中擇一肥一癯留肥而遣  
癯未出思陵云更子細觀令二子叉手立忽  
一猫走前肥者足蹴之上曰此猫偶過何踢

之安能勝重耶遂留癯而遣肥者癯者即孝  
宗也

誰主西湖造化功總相宜咏畫圖中四時分判  
拈題日不見蘇公與白公

學吟載有遊西湖詩誰主西遊造化功峰分  
南北境相通四時風物絃歌裏兩岸人家圖  
畫中堤柳送迎忘爾汝棹聲來往自西東風  
波便作恩波看此樂君王與我同 逃禪詞



趙祖文畫西湖圖名曰總相宜作水龍吟詞  
咏之 方輿勝覽西湖在州西周迴三十里  
山川秀發四時畫舫遨遊歌鼓之聲不絕好  
事者嘗命十題有曰平湖秋月蘇堤春曉斷  
橋殘雪雷峯落照南屏晚鐘麴院風荷花港  
觀魚柳浪聞鶯三潭印月兩峰插雲 案此  
為十景之始可知出於南宋其來已久 道  
州苔衣集西湖詩山氣又晴晴又雨樓臺依

寺寺依山 無聲詩一作兩峰出雲孤山梅

雪

堅壁長城慕勇功中興想望野人同醫身醫國  
皆司命星陷無如奴僕宮

漁隱叢話高宗南渡有稱中興野人題詞吳  
江橋上有云敵騎長驅三犯闕誰作長城堅  
壁 四朝聞見錄臺臣有論列秦檜王繼先  
二人者上曰檜國之司命繼先朕之司命自

此言者遂沮 又高宗自能推步星命或臣  
下不能始終仰副聖懷則曰吾奴僕宮星陷  
也

栢子池邊弱柳新珠簾十二列宮嬪耕夫織婦  
排香几不問蒼生問鬼神

楊太后宮詞雲影低涵栢子池秋聲輕度萬  
年枝 玉海紹興中於潛令樓璿畫耕織二  
圖高宗召對宣示後宮 貴耳錄憲聖在南

內愛神怪幻誕等書郭象睽車志始出洪景  
盧夷堅志繼之

梅粉松黃作湯餅銀鱗青蟹供芳醺冰天不愛  
花交菜玉肺朝朝出御厨

山家清供紫帽山人作梅花湯餅初浸白梅  
檀香末和麵作餛飩皮每一疊用鐵鑿如梅  
花樣者鑿取之可想一食不忘西湖 又云  
大理寺訪陳秋巖評事留飲二童歌歸去來

辭以松黃餅侑酒 又云真粉油餅芝蔴松  
子胡桃蒔蘿六者為末拌和入甑蒸熟切作  
肺樣後苑名曰御愛玉灌肺以此見九重崇  
儉不嗜殺之意 蟹略有湖蟹潮蟹 月令  
廣義引武林遺事云每年五月富春江上鱖  
魚最盛數人捕之移時百里達於城市 戒  
菴漫筆杭州俗呼黃矮菜為花交菜謂諸菜  
多變成異種俗多南渡遺風賣冰者叫大雪  
以大雪收者佳糴芝麻者叫何何舊姓何者  
鬻此故也

蹴得金爐動地驚旋看鐵塢起佳城九重相與  
殷勤問想道卿兒已長成

宋史紀事本末太子屬疾宮人蹴地上金爐  
有聲驚悸疾轉劇遂不起初張浚以勇嘗姦  
帝位議去之 朝野雜記建康初太子得疾  
未瘳有金香爐宮人誤觸之仆地有聲太子

應時驚搐不止上命斬宮人於廡下少頃太子薨年三歲 朝野遺記方伯彥潛善養安之際外傳北風極勁而汪黃傲然謂無事故上亦不甚虞比江都宮中方有所御幸而張浚告變者遽至矍然驚惕遂病薰腐故明受殂後二宮皆絕孕苗劉之變植虛器於前星盖特二凶狂妄耳春宮未辦庚申而浚在建言乃建議殞之過矣今明受之殤在鐵塢下

父老尚能言盖當時併乳媪皆掩之云 鶴林玉露高宗問張魏公卿兒想甚長成對曰臣子年十四脫然可語聖人之道

為國掄才費蓋思雖於簡牘亦無遺誰知淪落天街客三十青錢一首詩

四朝聞見錄趙忠定商確駢儷以為此最不可忽居政地間以此觀人至尺牘小簡亦然此掄才報國之端也 漁隱叢話仇萬頃未

達時挈牌賣詩每首三十文停筆磨墨罰錢

十五

符離一敗盡南奔道士空傳相法明聞說相公  
多睡語休將心學誤蒼生

何氏備史張魏公素輕銳喜功好合虛譽符  
離軍潰國家數十年所積資械蕩棄無餘方  
其甘寢晏然稱是心學然當萬衆崩解時一  
人心法遽能收拾否 夷堅志張魏公冀夫

人日齋道人一員有一客曰夫人當生貴子  
既見公揖公行數步即呼為相公 齊東野  
語張魏公出督陞辭與高宗約曰臣先驅清  
道約至汴京作上元岳飛聞之曰相公得非  
睡語乎 史緯張浚屢奏欲取山東德壽謂  
孝宗曰毋信張浚虛名將來必誤大計至符  
離師潰可謂知臣莫若君矣

落魄人傳王實之盛朝多見石湖詩釀錢說虎

南齊書 卷一  
邀馱子不似狂生勅賜時

齊東野語王實之莆田人有文名落魄不羈  
為正字日因輪對及故相理宗曰姑置衛王  
王曰何容保之至上怒曰此狂生也後歸鄉  
里自稱勅賜狂生 白獺髓石湖范參政初  
官其同參者聞為吳郡人即云馱子 又後  
因醪會日云請馱子 清賞錄范文穆好談  
虎構一軒曰談虎

敢與陽烏一體尊河山影出已黃昏清冷泉底  
銀牀上籀法曾書明眎孫

螢雪叢說詩僧上秦師垣壽曰不祝公兮椿  
與松椿松老大空無用不祝公兮龜與鶴龜  
鶴汨沒塗泥中祝公願作天上月歲歲年年  
常皎潔錦城初動五更鐘引領衆星朝北闕  
秦大喜 書史會要秦檜能篆書金陵文廟  
井欄上刻其所書玉兔泉三字亦有可觀

湖隄何地葬桃花簡簡芳名未可誇  
賺煞西泠橋畔客幾番松下覓香車

咸淳臨安志蘇小墓在湖上周紫芝云湖隄  
步游客言此蘇小墓也詩云野水橫分青草  
陂誰埋玉樹與瓊枝湖邊山自向人綠門外  
柳今何處垂行雨行雲均是夢施朱施粉未  
相宜一從蕙死蘭枯後剛道桃花好面皮

雙名志蘇小小一名簡簡案蘇小墓並不

在錢唐自武林舊事載在西湖而咸淳臨安  
志亦載引周紫芝詩為證然唐人徐凝有詩  
云嘉興縣裏逢寒食落日家家拜掃回惟有  
縣前蘇小墓無人送與紙錢灰陸廣微吳地  
志亦明載在嘉興縣側或謂李賀歌有西陵  
下風吹雨之句然西陵即西興亦並不在錢  
唐似不足據後之志墓者當考正之

對坐金獅映日明彩雲仙隊奏瑤笙黃羅盒賜

東宮食石首魚燻土步羹

詩林韶濩揚萬里德壽宮慶壽口號雙金獅子四金龍噴出香雲繞殿中太上垂衣今上拜百王曾有箇家風 二老堂禱志殿上大宴有蠻人控金獅子對設柱間 文獻通考宋女弟子隊曰彩雲仙隊 隨隱漫錄每日賜太子玉食批司膳內人所書也如酒醋白腰子三鮮笋炒鶴子烙燻石首魚土步辣羹

海鹽蛇鮓煎臥烏鳩湖魚糊酒蟹江蚶青蝦辣羹酒醋蹄酥片生豆腐醋腦子清汁襍燻胡魚肚兒辣羹之類

薰風駘蕩水芙蓉聞道冰船江上供瓜果浸來消永日宮官小殿講中庸

雞肋編二浙少冰雪紹興壬子車駕在錢唐是冬大寒屢雪冰厚數寸北人遂窖藏之燒地作窖臨安府委諸縣皆藏明年五月天中



節天適晴暑供奉行宮有司大獲犒賞其後  
錢唐無冰可收時韓世忠在鎮江率以舟載  
至行在晝夜牽挽謂之進冰船 松漠紀聞  
西瓜本出塞外自洪忠宣奉使歸得其種蒔  
之禁圃鄉圃 石湖集碧蔓凌霜臥軟沙年  
來處處食西瓜 桐江集西瓜足解渴割裂  
青瑤膚 詩林韶獲真德秀宮夏詩午漏遲  
遲滴玉壺清陰幕幕布庭除直教底事消長

日大學中庸兩卷書

香雲漫與白雲遊千載錢唐豈得休識語何須  
憂鼎折元勳一代在春秋

秀水閒居錄趙鼎起於白屋一旦拜相以臨  
安相府為不足居別起大堂竒花佳木環植  
周圍堂之四隅各設大爐為異香數種每坐  
堂中則四爐焚香煙氣氤氳合於坐上謂之  
香雲 山堂肆考金明縣道士自稱白雲片

鶴遊汴見趙鼎大呼曰中興名相他日又遇  
鼎曰吉陽相逢後鼎紹興五年為相有重名  
晚竄吉陽忽見白雲曰憶昔日之言乎 雞  
肋編會稽士人有錢唐休者有名於時趙丞  
相當國人薦之方議除擢會邊報警視奏目  
中適見其姓名趙不悅曰錢唐遂休乎因置  
不用趙引折彥質為樞密其院中奏牘書名  
相次人有譖之者謂趙鼎折為不祥乃與錢

事相類古今以讖語而為禍福者多矣 宋  
元通鑑辛棄疾帥長沙時士人或訴考試官  
濫取第十七名春秋卷棄疾察之信然索亞  
榜春秋卷兩易之啟名則趙鼎也棄疾怒曰  
佐國元勳忠簡一人胡為又一趙鼎擲之地  
案趙鼎字元鎮撰忠正德文集十卷四字  
高廟所賜宸翰中語也又得全詞一卷

青絲覆額灑銀豪寶騎裝鞍繫錦鞞殿隔珠簾

宣賜宴庭開花燭慶同牢

朝野襍記高宗一朝童子求試者三十六人授官者五人萬頃彭興張宗柔朱虎臣劉轂惟虎臣能排陣步射及讀書故補承信郎劉轂以小校子五歲善騎射故補校尉虎臣又賜金帶孝宗一朝童子求試者七十四人命官者七人有呂嗣興者四歲能誦書切韻辨四聲畫八卦上召見俾面啗詩授右從政郎

令伴皇孫榮國公讀誦乾道八年春也又授王克勤右從事郎李如圭林洽何耀並迪功郎何致遠將仕郎郭洵直下州學光宗一朝童子求試者七十人無補官者惟從仕郎吳鋼年九歲能誦六經語孟以壽聖親姪孫特改承務郎壬子四月也 談蒼吉水李如圭七歲中童子科孝宗召見與其父隔珠簾賜宴 弘簡錄熊克家素儉約除起居郎嘗愛

臨川童子王克勤之才將妻以女而乏資遣  
會草制獲賜金遂以歸之人稱其介 江漢  
叢談茶陵譚昭寶七歲應童子科登第謝啟  
傳入禁中理宗見而異之

柳絲高颭紅旗小蘭棹平移妓樂來十錦亭邊  
春市散風光老去舊樓臺

西湖賦湖詠維百先言御園爰有聚景圖經  
所尊致坤宮之孝養據震位以生蕃來四朝

之遊幸攬衆遠以平吞南有翠芳蘭棹在焉  
接蓬萊於中泚賓慧日於前軒北有玉壺紅  
鷗尚存去環碧兮百擢隔水月兮一垣慶樂  
有梅關桂林之勝珍禽異獸之繁亭連棟為  
十錦碑蝕苔以千言記南園之絕景扁西湖  
之洞天此皆始屬於禁籞又不但嘗錫之侯  
藩 又云想見進魚羹之宋嫂猶多乘鶴舞  
之優人翦羅釘采花之籃範飴為穿柳之鱗

飾木兵於小桁串家具於修筠柘彈象弩畫  
棍髹盆羅襪凌波金釵照春 鞠澗小集聚  
景園口號淺碧池塘連路口澹黃楊柳護檐  
牙舊時歲歲春風裏長見君王出看花竹影  
參差臨斷岸花陰寂歷浸清流遊人難到闌  
干角盡日垂楊覆御舟 乾淳歲時記蔣苑  
使小圃花木匝匝立標竿射塚秋千梭門  
升菴外集陸放翁詩云秋千旗下一春忙畫

工作寒食仕女圖秋千架作兩繡旗 蒲江  
詞西湖調寄柳梢青鬪草褰衣濕翠秋千瞥  
眼飛紅 蛻巖樂府西湖泛舟調多麗云館  
娃歸蘇臺游鹿銅仙去漢苑飛螢 西湖賦  
白珽作

曾聞總服到臨平龍德宮中祭奠誠二帝魂遊  
沙漠外何來朽木與燈檠

函史紹興十二年己丑帝易總服奉迎徽宗

南齊書卷一  
皇帝及顯肅皇后鄭氏懿節皇后邢氏梓宮  
至奉安於龍德別宮 雲谷臥餘全遼志云  
五國城頭有宋徽宗墓然則和議成而梓宮  
至臨安蓋以空櫬給宋朝考五國城一名五  
國城頭在三萬衛北一千里自此而東分為  
五國故名距京城三千三百里 宋元通鑑  
紹興五年上皇卒於金五國城年五十四遺  
言欲歸葬內地金主亶不許 朝野襟紀欽

宗之喪舉哀於天章閣南以學士院為几筵  
殿遙上陵名曰永獻暨乾道中朝廷遣使求  
陵寢地金人許以遷奉且併歸靖康梓宮朝  
廷難之金人乃以禮葬於鞏縣云 癸辛襍  
志揚髡發徽欽高孝光五帝陵初徽欽葬五  
國城數遣使祈請於金人欲歸梓宮凡七年  
而後許高宗親至臨平奉迎易總服寓於龍  
德別宮至是被發二陵皆空無一物徽陵朽

南齊書 卷一  
木一段欽陵木燈檠一具而已 野獲編欽

宗陵柩無尸止有木燈檠一枚按欽宗柩在北高宗不肯歸金世宗以一品禮葬於鞏洛之原柩且不還安所得燈檠也 譚輅紹興

十二年皇太后韋氏至自金而靖康帝故未歸也豈當時不請耶抑不遣耶至二十一年始遣巫伋迎之而金海陵云不知歸後何處頓放伋遂唯而退 考三朝北盟會編邢皇

后歸至中途上仙 案田志引癸辛雜識言

欽宗梓宮歸臨安者誤矣

回首中原長草萊金門土稚幾疑猜紛紛小腳船中客爭買西湖黃胖來

渭南集嵩山景迂廊時排悶詩莫言無妙麗土稚動金門廊夫善作土偶見宮禁及貴戚家爭以高價取之為玩喪亂阻隔南人不復知此句遂亦難解 夢梁錄小腳船專載賈

客小妓女荒鼓板燒香婆嫂 白獺髓迎春  
黃胖起於湧金門外地有杏花園遊人多取  
其黃土戲捏為人形爾

家鄉風物嗜鳴蛙聖主頻頒惠愛加寫到坐魚  
資雅博市門日日送冬瓜

四朝聞見錄杭人嗜田雞如火即蛙也憲聖  
渡南以其酷似人形力贊高宗申嚴禁止都  
人習此不能止售者至劊冬瓜以實之真諸

食蛙者之門謂之送冬瓜又黃公度帥閩宿  
戒庖兵市坐魚三觔庖兵不曉時林執善為  
州學錄庖人問焉林語以可供田雞三觔庖  
兵納入公度笑曰誰教汝庖以善對黃公遂  
館林於賓閣云

中興香繞玉堦深瞻芴頻頻用表忱鷓鷯兩行  
齊拜舞閣門多是鮑魚音

香乘光宗萬幾之暇留意香品合和奇香號



東閣雲頭香其次則中興復古香 老學菴  
筆記紹興中朝參止罄折遂拜今閣門習使  
先以笏叩額拜拜皆然謂之瞻笏亦不知起  
於何年也 貴耳錄孝廟時取北人於閣門  
充贊喝聲雄如鐘有京洛氣象嘉定來多以  
明台溫越人聲皆鮑魚音矣

德壽書名滿市廛一丁猶是賦三千不須更問  
燈籠錦翼翼宮旗插糞船

齊東野語德壽宮建房廊於市廛役者不知  
體凡門闔輒書德壽宮汪應辰出劄極言之  
上不憚會德壽宮市燈籠錦不得太上曰比  
已得之汪應辰家物也 宋稗類鈔南渡後  
浙中賦稅全是橫斂丁錢有至三千五百者  
人由此多去計會中使作宮中名字以免稅  
辛幼安云曾見糞船亦插德壽宮旗字

蘋蘩亦可助調羹老嫗驕兒御賜名獨坐綸扉

兩朝宰閨中不許號先生

黃氏日鈔賈似道始生之日錢唐宰郭應酉以詞賀之并頌其母蓋賈之母朝命封兩國賜號賢母 槎菴小乘賈似道母胡氏贈秦齊兩國賢壽休淑莊穆夫人諡曰柔正又秦檜妻王氏自號沖正先生見陸務觀王佐墓志 朝野遺記秦檜妻王氏素陰險出其夫上 兩浙名賢錄秦檜妻王氏陳乞舊所得

恩數未領者自稱沖正先生王佐為秘書省校書郎駁之曰妾婦安得有此稱向者誤恩今得追正

安前幾樹碧桃花曾駐龍旂耀日華兩岸水聲芳草路居民猶話宋官家

西湖百詠年來青鳥碧桃花築室安前即是家玉貌星冠隨絳節雙成不及魏無瑕 武林梵志高宗南渡議西溪建立行宮因幸西

溪相度形勢遂駐蹕於沈氏有沈諸者進食  
獻茶帝大悅曰西溪且留下後遂相傳為駐  
馬沈 西溪梵隱志西溪有三橋多植柳濃  
陰夾道東西兩涯民居臨水花木周廬亦稱  
花市又安前之名特裴墩董竈並著其義未  
詳

滿苑奇花擁至尊宛書宸翰代天恩細看御寶  
新紅沫猶有香生粉指痕

太平清話四明樓璉繪耕織圖後此圖流傳  
人間見逐段下有憲聖慈烈皇后題字皇后  
姓吳配高宗其書絕相似又御前應制多女  
流也碁為沈姑姑演史為張氏宋氏陳氏說  
經為陸妙慧妙靜小說為史惠英隊戲為李  
端孃影戲為王潤卿 霏雪錄宋故事禁中  
處分事付外謂之內批又謂之御批皆內夫  
人代書 留青日札徑山宋時萬壽禪寺大

碑其中一御寶至今如朱砂印痕風雨不剝  
滅此名紅沫也

香水銀盆看浴時圍紅攪亂小釵枝浮浮花果  
爭相取少婦偏尋立棗兒

夢梁錄育子滿月外家以彩畫錢或金銀錢  
襍果及珠翠顛角兒食物送其家大展洗兒  
會煎香湯於銀盆內下洗兒果用色綵繞盆  
謂之圍盆紅尊長以金銀釵攪水名曰攪盆

釵撒於盆中謂之添盆又盆內有立棗兒少  
年婦爭取而食之以為生兒之徵

三臘移窠過別房銀盆彩蛋與眠羊賓親來慶  
洗兒會只少崑山粥米莊

夢梁錄三朝與兒落臍灸顛七日名一臘十  
四日名二臘二十一日名三臘女家與親朋  
俱送膳食又兒落胎髮畢抱兒遍謝諸親及  
抱入姆孀房中謂之移窠又育子父母家以

南齊書 卷一 四  
銀盆或綠盆盛粟桿一束上簇通草花朵貼  
五男二女意思及眠羊臥鹿以綵畫鴨蛋百  
二十枚及芽兒繡裯彩衣至壻家 齊東野  
語楊和王第六女事向子豐一日向妾得男  
楊以為已出王厚遺其女且撥吳門良田千  
畝以為粥米今向氏有崑山粥米莊  
束禾何必再三將軌革當年亦渺茫獨坐中書  
書剝字果然紅日壓無光

老學菴筆記秦會之專國軌革中又多三人  
各持禾一束曰秦字也其言亦頗驗及秦氏  
廢亦無人占得此卦矣 宋稗類鈔乾道中  
駁放秦頊等科名方集議時中司誤以駁為  
剝衆畏中司護前遂皆書曰剝又謝石折春  
字謂秦頭太重壓日無光忤檜死於戍  
秘書省坐狀元慙紅履塲中侈笑談石鼓墨文  
今在否裝池碑版付枯蟬

朝野襟記紹興十二年秦申王當國其子熿始冠多士十五年以秦熿提舉秘書省南宋相眼陸務觀云嘗記先人說紅鞋飾帶始唐莊宗施之優人文昌襟錄滑臺賈昌朝畫像猶黑鞋不知紅鞋起於何時雲麓漫鈔元祐間有溫公帽伊川帽未有巾之名渡江後方著紫衫號為窄衫畫巾巾之製有圓頂方頂塼頂琴頂秦伯陽以塼頂服去頂內之

重紗謂之四邊淨石鼓文辯鄭樵模寫其字之可曉者而隨用其見以為之辯南劍州州學以鄭本鋟木紹熙辛未有以墨本見示者建康秦丞相家藏本也點畫模糊皆不可讀甘露園短書秦熿當其父檜執政十九年中無日不煨酒器無日不裱背書畫碑版空向權門去附名龍圖曾是說端明蘇家骨肉皆零落悔不闍奴序弟兄

咸淳臨安志紹興元年禮部尚書秦檜參知政事龍圖閣待制孫覲賀檜有曰畫室航海還復中州四方傳聞感涕交下漢蘇武節毛畫落止得屬國唐杜甫麻鞋入見乃拜拾遺檜以為譏已大怒 快雪堂集跋宋孫尚書覲尺牘云聞之毘陵人尚書實大蘇公遺體孫老得公棄婢而生畏時禁不能自明而詳其顛末於家乘 朱子語錄梁師成自謂東

坡遺腹子待蘇叔黨如親弟兄諭宅庫云蘇學士使一萬貫以下不須復 考香祖筆記坡公往陽羨憩村舍見一童子頗聰慧出對句云衡門稚子璫璣器童子應聲曰翰苑仙人錦繡腸坡喜之童子即覲也然則遺體之說妄矣 按孫覲字仲益撰鴻慶集四十卷木陰斜轉月娟娟片紙驚看戴角斫判得棄官何處去雲中來往翦頭仙

夷堅志秦檜下岳飛大理獄周三畏鞫之遇  
夜間行見古木下一物似豕而角周却步此  
物徐行至獄傍小祠而隱經數夕復往月甚  
明又見前怪首有片紙書發字 樵書大理  
卿周三畏不肯勘問岳武穆掛冠而去不知  
所之後於延安葭州山中有翦頭仙人日飲  
淨水三甌與人論及宋事咸陽寃死仙輒大  
哭問其姓曰姓周後忽不知其何從而去空

中隊名帖二紙書周三畏拜謝乃知翦頭仙  
即周也

佃客當時岳五郎廬山淚血灑松篁獄辭一紙  
書天日不願千年姓氏香

宋稗類鈔岳太尉本是韓魏公家佃客每見  
韓家子弟必拜 學圃憲蘇初岳飛從戎留  
妻養母姚氏既而河北淪陷訪求數年不獲  
俄有自母所來者寄聲曰為語五郎勉事聖



天子無以老嫗為念也飛竊遣人迎之往返十有八然後歸奉之後宣撫襄陽母死與子雲跣足扶櫬歸葬路人無不涕泣既葬廬於墓側揮麈錄張唐老自九江來聞岳侯父子伏誅唐老云去歲在匡廬正覩岳侯葬母儀衛甚盛一僧為言岳葬地雖佳掩壙之後子孫須有非命者然經數十年再當昌盛同話錄岳武穆獄案今在莆陽陳魯公家世

本無獄辭但大書天日昭昭天日昭昭八字是罪案乃是細書與前筆跡不同不知後來如何粘成卷也竹莊舊藁讀岳鄂王行實詩一片堂中紙千年身後名

賜來盾樣襲文綈玉軫金徽御墨題不見薦紳稱四絕曾知閣譜重江西

玉海高宗賜洪皓御銘盾樣琴一上曰古人琴製不同朕製盾樣以示不忘武備之意

佩楚軒客談端淳薦紳四絕楊嗣翁琴趙文中棋張溫夫書趙子固畫 清容集琴述往年錢唐楊司農以雅琴名於時有客三衢毛敏仲嚴陵徐天民在門下朝夕損益琴理刪潤別為一譜以其所居曰紫霞名焉自渡江來譜之可考者曰閣譜曰江西譜閣譜由宋太宗時漸廢至皇祐間復入秘閣今世所藏金石閣畫之精善咸謂閣本蓋皆昔時秘閣

所度而琴有閣譜亦有義也方閣譜行時別譜存於世良多至大晟樂府證定益以閣譜為貴別譜復不得入其學寢絕紹興時非入閣本者不得待詔曰江西者由閣而加詳焉案楊纘字繼翁寧宗楊后兄次山之孫也號紫霞翁

綠雲深擁御袍黃一枕琉璃清夢長花竹後來誰弛禁海棠樹樹染天香

松隱集題禁中黃石榴安石開花比御衣綉  
紅繁綠不能奇上林別有嬌黃貴如翦冰綃  
襯玉肌又禁中荼蘼詩密葉素華青羽帔繁  
香秀色六銖衣枕間為插琉璃滿清夢泠泠  
入翠微 宋元通鑑內侍移竹栽入內趙鼎  
見之責曰艮嶽花石之擾皆出汝曹今欲蹈  
前轍耶因奏其事帝改容謝又紹興二年禁  
買花木珍禽臨安諸門不許放入 海棠譜

一卷錢唐陳思撰開慶元年自敘云海棠自  
杜陵絕吟至鄭谷已為舉似本朝列聖品題  
雲章奎畫烜耀千古此花盛傳於世余因採  
集諸家為一編曰海棠譜

訓唱詩章洵雅嫻窄衣絲履識龍顏五雲玉座  
傳香遠射塚前排招箭班

武林遺事孝宗幸玉津園講燕射禮皇太子  
宰執皆從賜宴上服顏巾窄衣束帶絲履內

侍御帶進弓箭看箭人喝看御箭教坊樂作射塚前排立招箭班皇帝射中太子以下各拜稱賀上賦七言詩丞相以下屬和又招箭班者服紫衣幘頭叉手立於塚前御箭之來能以幘頭取勢轉導入的亦絕技也 松隱集從駕玉津園詩天子行春御六龍五雲回暖泛晴風和鸞寶苑梅花路賸有香傳玉座中 東京夢華錄招箭班外又一人口銜一

銀盃兩肩兩手共五隻箭來則能承之射畢駕歸宴 觀此南渡制度皆承祖制

千秋聖節拜彤宸詔賜餼牲及下臣慶禮常聞南北使金人擇日作生辰

宋史高宗天申節五月二十一日孝宗會慶節十月二十二日光宗重明節九月四日寧宗瑞慶節十月十九日理宗天基節正月五日度宗乾會節四月九日 玉堂禋記宰執

及親王生日預申學士院撰詔書及賜目一  
 紙祖宗時牲餼外又錫器幣過江後牲餼耳  
 米麩本色羊準價酒則臨安醞造加以黃封  
 周益公年譜七月甲子中使賜生日牲餼  
 米麩羊酒 松漠紀聞金人生日各分占良  
 時尼雅滿 舊作粘罕今改後仿此 以正日烏克紳 舊作悟室  
 改今以元夕烏允茂 舊作烏曳今改 以上已國主亶  
 以七夕等 老學菴筆記淳熙己酉金邊帥

移文境上曰皇帝生日本是七月今為南朝  
 使臣冒暑不便已權作九月一日

諸生伏闕捲堂歸當路無才愛養違寧遠荒阡  
 寒食候尚餘草木戀春暉

清夜錄淳祐十二年武學為同舍求棺木京  
 尹余太監晦差伍作搔撿揭帛裂衣暴露兩  
 日齋衆同太學伏闕上書不報各捲堂散去  
 司業蔡抗申奏即就出浙江亭呼吏出榜云

就撥官會一百萬照甲牌俵散以表賑卹之意 成化杭州府志宋有寧遠阡葬太學生死而無歸者在方家峪梯子嶺下國子司業王介撰記

江上風吹羅刹沙九重遙拜護仙查攢宮已建容車出萬國齊簪白柰花

西湖志錢唐江一名羅刹江 聞見錄顯仁太后龍輜將渡會稽上預恐風濤為孽於宮

中默禱清忠廟及篙御既戒浪平如席 揮塵錄紹興初昭慈聖憲皇后升遐朝論欲建山陵曾公卷以謂帝后陵今存伊洛復中原即歸祔矣宜以攢宮為名 堅瓠集寧德皇后從徽宗蒙塵紹興五年訃音來徽州唐輝使休寧尉陳之茂撰疏文云十年罹難終弗返乎蒼梧萬國銜冤人盡簪乎白柰

大理埋魂骨已朽復仇九廟獻軍俘拚香棄雪

清風鎮誰寫將軍嘗后圖

宋元通鑑史嵩之遣使以孟珙所獲金哀宗遺骨及寶玉法物并俘囚等獻於臨安備禮告於太廟藏其骨於大理寺獄庫 癸辛襍志史嵩之開判湖閩與孟珙合元兵攻蔡州獲亡金守緒殘骸以歸且繪八陵圖以獻見只篇宋人嘗后圖上有題云棄雪拚香無處著這面孔一綜兒是清風鎮的樣子那將

軍是報尼雅滿的孟珙

四海歡聲傳墨本恤刑寬政頌臯陶頻年獄吏  
宣恩處青火桁楊享少牢

山堂肆考紹興二年詔以恤刑手詔刻石頒諸郡縣奉使魏良臣曰北人得上親筆恤刑墨本曰恤刑如此民心安得不歸 宋史淳熙元年守臣胡與可奏三院獄空上賜璽書獎諭 古杭襍記舊傳三歲拜郊或明堂大

禮所有在前誤國姦臣首級在大理寺者必以矢祭蓋訛傳謂以污穢之物祭之其實乃少牢也其文云國家於三年恩霈汝雖誤國然今亦不忘汝之舊特用以祭

今日士師非禾絹申王已見臥書齋滿朝伴拜母多語還有臺端肉簡牌

困學記聞誠齋為章燾墓銘云今日士師非禾絹士師也宋明帝紀胡母顥專權奏無不

可時人語曰禾絹閉眼諾胡母大張索禾絹謂上也蓋謂秦檜政士師非主上之士師也山堂肆考宋秦檜初為太學生號秦長脚一日睡於窓下有異人來詣檜語其同舍郎曰他日此人誤國害民天下同受其禍諸君亦有死其手者劉時舉續資治通鑑自檜當國士大夫之名望者悉屏之遠方齷齪委靡不振之徒一言契合即登政府仍止除



一廳謂之伴拜稍出一語斥而去之 王宗  
沐續資治通鑑楊愿為中丞迎合檜意以舉  
劾人號之為肉簡牌

鐵牙班心列諫官滿朝人指滿朝歡一遭白簡  
書名姓又使家人製藥丸

王宗沐續資治通鑑章鑑居位號寬厚與人  
多許可時目為滿朝歡 劉時舉續資治通  
鑑紹興元年何澹同知貢舉劉光祖除殿中

侍御史首上學術邪正之章及奏名被旨入  
院拆卷出同院謂光祖曰何自然見公所上  
章數日為之恍惚日餌定志丸他可知也

當時深悔和魚須蚤列江西詩派圖齋閣焚香  
滌研外煎茶偏自喚昌奴

困學記聞徐師川以諫議召程致道在西垣  
封還除書言與中貴人唱和魚須之句為人  
所傳 詩說雋永徐師川贈中貴鄭公諶詩

平生不善劉蕡策色色人中自有人 漁隱  
叢話師川因鄭謨而進致身樞府東湖集中  
與鄭唱酬亦多又呂居仁江西宗派圖推豫  
章黃山谷為詩祖列陳師道潘大臨謝逸洪  
芻饒節僧祖可徐俯洪明林敏修洪炎汪革  
李錞韓駒李彭晁沖之江端本楊符謝邁夏  
倪林敏功潘大觀何顛王直方僧善權二十  
四人以為法嗣謂源流皆出自豫章也 宋

史新編徐俯字師川號東湖七歲能詩為山  
谷所知以父禧死事受通直郎邦昌僭位遂  
致仕工部侍郎何昌言與弟昌辰避邦昌諱  
皆改名俯買婢名昌奴客至即呼前驅使之  
堯山堂外紀徐師川是山谷外甥晚年欲  
自立名客有稱其源自山谷者公讀之不樂  
答以小啟曰涪翁之妙天下君其問諸水濱  
斯道之大域中我獨知之濠上案此則師川

久已無渭陽之情矣且藉闈寺以進身倒行  
逆施皆晚年之事以邦昌名其婢頗覺可嘉  
特表出之

棲雲花月小坡仙元祐儀型屬後賢天寶遙遙  
千載事又從詩酒薦青蓮

山堂肆考宋趙達資州人累遷至中舍高宗  
以其文章似蘇軾人號為小東坡有棲雲集  
行世 歷代臣鑑張浚與趙鼎共政多所引

擢從臣朝列皆一時之望人號為小元祐  
清容集跋汪龍溪外制草崇觀詞臣以扇對  
全語為高獨龍溪先生痛埽時弊盡復元祐  
之舊不幸為秦氏子擯斥 劍南集題跋孝  
宗一日御華文閣問周益公曰今代詩人亦  
有如唐李白者乎益公以放翁對由是人競  
呼為小李白

虎頭金甲列前扃天眷牛車去不停尋得周家

姊妹帖朔風腸斷讀零丁

楓窻小牘靖康已前汴中門神多番樣戴虎頭盔而王公之門至以渾金飾之識者謂虎頭男金飾便是金人在門也 弔伐錄太上皇太上皇后鄭氏至金營諸王嬪御以下畢至親王二十八人帝姬一十五人皇太子一人諸王男女一十六人 三朝北盟會編金人遷天眷於通塞州去燕山府一千五百里

給田十五頃令種蒔以自養 經濟類編上

皇離青城金人以牛車數百乘載諸王後宮皆金人牽駕不通華言 放翁題跋周侍郎尋姊妹帖方建炎多故羣盜如林士大夫罹禍有盡室不知存亡者觀周公所書可為流涕 案東漢戴良有尋父零丁即今尋人帖子也

八罪彈章上玉階盲翁負鼓唱荆釵梅溪莫笑

元辰命曾憶無衣臥學齋

王宗沐續資治通鑑侍御史王十朋論史浩  
懷姦誤國等八罪遂罷浩知紹興府 天祿  
識餘玉蓮王梅溪先生十朋之女孫汝權宋  
進士與梅溪為友敦尚夙誼先生劾史浩八  
罪汝權實愆患之史氏所最切齒遂妄作荆  
釵傳竒謬其事以蠆之 升菴外集潛說友  
宋安撫使今傳竒王十朋有此人訛為錢

餘姚許浩賦荆釵百詠 鞠坡叢話王十朋  
云術者謂予命犯元辰故仕輒已予笑曰有  
是哉戲作問答語又王十朋寓居臨安偶值  
乍寒諸生有陳元佐劉士宗各借以衣童生  
謝偉謝侃濟以衾因作二詩以贈 案王十  
朋字龜齡撰梅溪奏議三卷 史緯陳之茂  
嘗毀浩浩擬之茂進職上曰卿以德報怨耶  
浩曰臣不知有怨若以為怨而以德報之是

有心也莫濟詆浩尤甚浩薦濟掌內制上曰  
濟非議卿者乎浩曰臣不敢私害人按史載  
史浩寬厚如此荆釵之作果何為耶

禪牀夜午春生夢書閣燈青月覆香一種痴情  
何處是風流都入選優場

古今女史宋女貞觀陳妙常尼年二十餘姿  
色出羣詩文俊雅工音律張于湖授臨江令  
宿女貞觀見妙常以詞調之妙常亦以詞拒

詞載名媛璣囊後與于湖故人潘法成私通  
情洽潘密告于湖以計斷為夫婦即俗傳玉  
簪記是也 警心錄陳淳祖為賈似道之客  
守正為諸客所疾內人亦惡之一日諸姬爭  
寵密竊一姬鞵藏淳祖牀下意欲并中二人  
也賈入齋見之心疑焉夜驅此姬至齋門誘  
之淳祖不答繼以大怒賈方知其無他遂勸  
諸姬得其情由是極契淳祖後遂有知南安

軍之命金元院本演其事

一餅清甌雪點初晚香和月入簾疏空傳舊樣  
紅綾袋貢錄先將小鳳除

咸淳臨安志周必大賜筆記次韻詩天香漫  
炷薰常歇貢茗虛霑樣頓殊晨壁搖風愁幕  
冷夜窻透月喜簾疏註雖賜香而火禁甚嚴  
不許炷爐諸位總賜茶三百斤舊每斤即一  
紅綾袋凡十餘團今乃給黃袋拆而分之以

一餅為一斤殆典吏移易也 北苑茶錄先

人作茶錄當貢品極勝之時凡有四千餘色  
紹興戊寅充攝事北苑閱近所貢皆仍舊其  
先後之序惟躋龍團勝雪於白茶之上及無  
興國巖小龍小鳳蓋建炎南渡有旨罷貢三  
之一而省去之也 五襍組茗有片有散片  
者即龍團舊法散者則不蒸而乾之如今之  
茶也始知南渡之後茶漸以不蒸為貴矣

南齊書 卷一  
丞相生辰駙使聞四方車馬已紛紛漫誇天慶  
觀中列不及高家九錫文

續資治通鑑韓侂胄却生日賀儀仰奏官徧  
行闕報時士大夫或獻紅錦壁衣承塵地衣  
之屬修廣高下皆與中堂等有獻紅牙果卓  
正珠搭檔遇生日大臣以下皆排列所獻於  
天慶觀之廡下都人競往觀焉 談薈韓侂  
胄生日高似孫獻詩九章每章用一錫字以

寓九錫

呵殿歸來報舉觴迎門三十六鴛鴦南園又有  
閒風月蚤逐笙歌過別房

王宗沐續資治通鑑韓侂胄愛妾張譚王陳  
四人皆知郡夫人 丹鉛錄寧宗時武學生  
華岳池州人上書極論韓侂胄之惡并詆程  
松之納妾倪僕售妹蘇師旦獻妻書奏侂胄  
大怒下之大理貶建寧園土中死於獄近觀



歷代名臣奏議可謂詳矣而岳奏不在其中故表出之

夜半中宮調虎符軟纏能敵鐵鞭無九重尚杖  
追回淚去國誰憐趙汝愚

四朝聞見錄虎符半在禁中半在殿巖開禧  
間慈明陰贊寧皇誅侂冑出御批授錢象祖  
象祖授殿巖夏震震遣其帳下鄭發王斌邀  
韓車於六部橋徑出玉津園夾墻韓身裹軟

纏用鐵鞭中韓陰乃死地名磨刀坑又寧皇  
時聞韓出玉津園亟用牋批殿司前往追回  
韓太師慈明持牋泣且對上云若欲追回他  
我請先死寧皇收淚而止 宋史建炎改鑄  
虎符樞密院主之其制刻篆中分 說纂趙  
汝愚橫遭謫去國之日天為雨血京城人以  
盆盞貯之色殷然 宋史本傳史彌遠錢象  
祖等赴延和殿以殛侂冑聞帝不之信越三

日帝猶謂其未死蓋是謀悉出中宮帝初不知也

行間江南孰自謀私財官物已都休出師不草當時詔伴簡何來雙鬪髀

弘簡錄金購得侂胄族人韓元靚使行間於宋送令渡淮宋督府丘宏奏之宋方欲盟即遣宏護元靚北歸因密諭宏使歸罪邊將以請和 四朝聞見錄開禧兵端既啟國用寔

虧侂胄上表自謂家藏先朝錫予金器六千兩上之寧皇優詔允其請天下笑韓之欺君筆塵韓侂胄出師數屢自悔失圖私出家財二十萬以助軍興而募人持書赴金求和然竟不免於函首 朝野襟記韓侂胄將舉兵先以葉正則直學士院蓋藉其名使草出師詔也正則喻其意堅辭三四於是用李壁草之 宋元通鑑嘉定元年王柟以韓侂胄

南齊書 卷一  
首蘇師旦首至金主璟御應天門備黃麾  
立仗受之百官上表稱賀懸二首并畫像於  
通衢令百姓縱觀然後漆其首藏於軍器庫  
遂命完顏匡等罷兵

袈裟偏袒醉醺醺多少山靈奉事殷不引紅粧  
看花捧風流傳得起棺文

靈隱志道濟侍者台州李氏子初參瞻堂知  
非常僧然飲酒食肉有若風狂監寺不能容

瞻堂云法門廣大豈不容一顛僧人遂不敢  
言及遠公既寂出居淨慈在本山有化砌靈  
隱至錢唐門街道疏 淨慈寺志神運井在  
香積厨内泉極甘冽皎焉冲照其下縱廣約  
二丈餘窺深悸魂内外引汲不竭嘉定時有  
六甲神常協僧道濟運木於此故云相傳其  
甌與江水通又名通江又濟顛常為陶師兒  
作起棺文下火文 古杭襍記杭州市肆有

喪之家命僧為佛事必請親戚婦人觀看主  
母則帶養孃隨從養孃首問來請者曰有和  
尚弄花棒鼓否而請者曰有則養孃爭肯前  
去花棒鼓者謂每舉法事則一僧三四棒鼓  
輪轉拋弄諸婦女競觀之以為樂 案陶師  
兒事已詳第四卷中茲不多列

封章誰道左司賢獨秉鈞衡十七年癡漢滿朝  
緣底事金人歲歲問胡銓

甘露園短書胡澹菴菴上高宗封事是范左司  
璿作范擬上澹菴慮其親老禍且不測取以  
為已意上之非澹菴筆也今人知有澹菴而  
不知有范璿范璿之不幸耳 昨非菴日纂  
紹興末朝士多饒州人時人語曰諸公不是  
癡漢 宋稗類鈔乾道初金使來猶問胡銓  
今安在張魏公曰秦檜持柄十九年只成就  
得一個胡邦衡 考談薈宋申王檜以紹興

南齊書 卷一  
八年右僕射同平章事再擅政進少保太師  
以二十七年殂凡十七年 案胡銓撰忠簡  
奏議四卷

得遇天家畢骨董虛將薰染供郊園金龜已苦  
多尸氣彘鼎輸他列死軒

三朝北盟會編畢良史字少董以買賣古器  
書畫赴行在思陵方搜訪古玩恨未有辨其  
真偽者得良史甚悅月給俸二百千而食客

滿門時號貧孟嘗後權知東明縣搜求古器  
書畫復載以達行在人又號之畢骨董 紫  
桃軒襍綴古鼎彝皆黃銅今人得之地中者  
歲久色變自應爾今郊廟所製乃用藥薰染  
作蒼黑此何理然則藥燒銅物已起於宋矣  
癸辛襍志景定中向若水墓為賊所劫其  
棺上為一榻畫貯平日所愛法書名畫時董  
正翁得其蘭亭一卷真定武刻也後有名士

跋語甚多其精神炯炯透出紙外正翁極珍之然尸氣所侵其臭殆不可近或教以檀香能去尸氣遂作檀香函貯之然付之庸工裝潢頗為裁損所謂金龜八字云 研北襍志畢少董命所居之室曰死軒凡所服用皆上古壙中之物玉如彼舍蟬是也

烟飛小朶斲雲根梅子青青客打門詩酒四時春萬樹紅亭却建別家園

太平清話范石湖小峨嵋靈壁石也烟江疊嶂太湖石也天柱峰英石也皆歸休時間玩語林范至能喜啖梅人嘗致一斛奩至能食之須臾而盡 酒小史范至能有萬里春酒 四部豪范至能有雲霞酒 弘簡錄張說乾道七年除簽書樞密院事朝論不平中書舍人范成大不草詞說罷為奉祠說語人曰范至能亦胡為見攻指所坐亭曰是材植

皆至能所惠 案范至能撰石湖集

錦官先進牡丹衾分賜宮袍出上林象尺薰爐  
寒夜永文窓深度美人鍼

文獻通考乾道二年戶部言左藏東西庫每  
歲所賜賜袍親王宰執以全匹餘裁裂給之  
請皆照以全匹上從之又賜窄錦袍有翠毛  
宜男雲雁細錦獅子練鵲寶照大錦寶照中  
錦凡七等應給賜袍者皆五件次四件次三

件次二件 淳熙玉堂雜記十月朔賜錦襖  
子學士院四金鵬尚書八搭暈錦宰臣使相  
天下樂 蜀錦譜建炎三年始織造錦綾被  
褥乾道四年即舊廉訪司潔已堂初錦院有  
上貢錦官誥錦細色錦等其名有八搭暈

盤毬 簇四金鵬 水林檎 翠地獅子

天下樂 大窠獅子 大窠馬 雙窠雲雁

宜男百花 瑞草雲鶴 如意牡丹 穿

花鳳 正紅雪花毬露 大百花孔雀 六

金魚 紫阜段子 聚八僊 天馬 飛魚

正紅大被褥 阜大被褥 青大被褥

四色中被 緋大被 正紅雙連椅背 正

紅單椅背 輟耕錄高宗渡江後榷場購求

為多錦標如克絲樓閣 克絲龍水 克絲

百花攢龍 克絲龍鳳 紫寶階地紫大花

五色簞文 小摘珠方勝鸞鵲 青綠簞

文 紫鸞鵲 百花龍 龜紋 珠嵌 紫

曲水 紫荷花 紅霞雲鸞 黃霞雲鸞一

名絳霄 青樓閣 青大落花 紫摘珠龍

團 青櫻桃 阜方團白花 褐方團白花

方勝盤象 毬路 衲 柿紅龜背 樗

蒲 宜男 寶照 龜蓮 天下樂 練鵲

綬帶 瑞草 八花暈 銀鈎暈 細花

盤鵬 翠色獅子 盤毬 水藻戲魚 遍



地襟花 遍地翔鸞 遍地芙蓉 七寶金

龍 倒仙牡丹 白蛇龜紋 黃地碧牡丹

方勝 輟耕錄一條厲君太鴻第六卷錦標

裝池一首註也今所謂宋錦者其名色蓋詳

於南渡行都矣向註偶略因錄於此

宸書曾為擬汾陽勲業淮西亦可方一字裏巾

一把雪慚無秦蜀入封疆

山堂考索高宗御書郭子儀傳賜韓世忠又

書裴度傳賜張浚 三朝北盟會編韓世忠既

罷兵柄為樞密使乃製一字巾入都堂則裹之

出則以親兵自衛槍頗不喜 韓蘄王神道碑

王在軍中獨馳騎馬使一把雪執信字旗一把

雪者其兵之曹號孟趨捷善走之人也 王庶

家傳公為兵部侍郎對殿口陳手畫秦蜀形勝

利害上大喜之

翠翹筆底散天葩 豔豔芳容暈曉霞 樺燭影中

二十二杏紅箋上寫春華

焦氏說楷翠翹洪內翰侍人題畫竹云翠翹戲  
筆字畫婉媚程大昌題詩戲作風枝斜再惱玉  
堂宿 異聞總錄臨安倡女儀二十二名珥頗  
慧悟能立成詩詞予於席間與紙筆即賦詞大  
略美吾兄弟有都江英氣鍾三秀之句

千秋廟貌錦江濱獻助謀猷四木君可惜月湖  
佳子弟空傳遺墨號昇聞

續成都記武侯祠壁間嵌一小碑上鐫繪像  
衣冠甚古雅題云丁黼字文伯石埭人也宋  
嘉定初進士有詩名以忤史彌遠出帥成都  
元人入蜀公不屈死之詔諡恭愍賜廟浹溪  
有司春秋祠 瀛奎律髓成都太守自國朝  
以來至今皆畫像云 王宗沐續資治通鑑  
薛極與胡榘聶子述趙汝述附史彌遠最親  
用事時人謂之四木 清河書畫舫史守之

越國公浩之孫衛王彌遠之姪仕終朝奉大  
夫中年避勢遠嫌退居月湖 甫田集史守  
之退處月湖與慈湖諸公講肄為樂寧宗書  
碧沚二字賜之 太平清話宋史守之心非  
叔父彌遠所為著昇聞錄以寓規諫  
九市官街新築成青裙販婦步盈盈三更歌笑  
明燈火巡檢傳呼出御營

渭南集凡都城橋梁道路皆包道成力治之

費至緡錢百餘萬 續文獻通考宋理宗嘉  
禧中臣寮言蔬菜魚肉日用所須販夫販婦  
所資錐刀以營升斗若皆以官價強取之終  
日營營錢本乾沒 華谷集詩天上歸來打  
六更夢回搔首正曹騰玉霜初上三峯月絳  
絲猶明九市燈聲徹銅魚催勘箭影斜金雀  
在觚稜帝鄉東望重回首佳氣何時到五陵  
學詩初橐天街夜步詩風不停雲月更清

南齊書 卷一  
千門繡幕笑歌聲御營巡檢無拘束走馬天  
街夜達明

賜來金白耀街衢百藥無如用呪符佛佛不知  
煩惱界才辭禁籞即鄴都

船窻夜話孝宗嘗患痢德壽憂之過宮偶見  
小藥局遣使宣之至語以食湖蟹多故至此  
醫曰此冷痢也用新米藕節以熱酒調服數  
服而愈德壽乃大喜以金杵白賜之乃命以

官至今呼為金杵白嚴防禦家 靈隱志天

醫波利多乃天醫菩提化身淳熙間居飛來

峰 山堂肆考杭州慈聖院有吕公池宋乾

道間高僧能取池水呪之以施病者輒愈號

聖水池 遂昌襍錄馬都錄者號靜齋以道

法際遇度宗賈平章以海味進謝后啗之泄

瀉不止馬進符水飲之而愈因言曰臣上告

佛佛繼今他人進飲食不可造次供御言出

商守有言 卷一  
賈已知之甫出禁門即下臨安府獄面刺雙  
旗押付鄴都寨

歲寒亭外過西村橫幅窓開坐小軒半樹梅花  
流水上酒標挑出竹籬門

遂昌襍錄孤山之陰一亭在高阜上曰歲寒  
繚亭皆古梅亭下臨水曰挹翠閣皆斗拱砌  
成極為宏麗蓋盧董兩瑞以內府錢建西太  
乙宮又能以其餘資建兩閣可謂能事 又

寶塢下西為善住閣其間有山中四時小窓  
橫幅安樂窩之類其結構皆明敞可喜稍西  
陟為江湖偉觀 武林舊事孤山有西泠橋  
又名西村 搜米異聞錄都城酒肆皆揭大  
帘於外以青白布數幅為之或掛餅瓢箒秤  
時人多詠於詩

才到綸扉捧賜金茅檐曾憶淚雙淋紫衣中貴  
宣丞相玉海金柈請點心

南齊書 卷一  
夢占類考趙雄微時最貧母在無以卒歲夫  
婦對泣次日埽除拾銀一錠重二十五兩由  
此稍活後入相例賜白銀百錠既受而缺一  
錠將以詰守藏吏夢左藏庫神告曰某年月  
日已先借用一錠覺而憶正埽除得銀之月  
日也 吹劍錄孝宗詔每日常朝不必宣宰  
相名趙雄奏君前臣名禮也上曰蘇洵嘗言  
名呼而進退之非所以禮貌大臣丞相不必

辭 宋稗類鈔趙溫叔丞相阜陵素喜之且  
聞其善噉數倍常人會史忠惠進玉海容酒  
三升一日問曰朕作點心相請命中貴捧玉  
海賜酒至六七繼以金柈捧籠炊百枚遂食  
盡上為之一笑

食經珍品過堂厨忘却家鄉椒數株書畫悅生  
別錄上空存屈角印葫蘆

貴耳錄天台桐草遠致色味必變乃併桐木

南齊書 卷一  
致之賈相供饌 又賈師憲喜茗溪鱖魚趙  
與可造大盤養魚千頭作機使灌輸不停魚  
游泳自得數舟上下遞運不絕 始豐豪賈  
氏族譜天台賈氏在宋為最盛余少在鄉里  
所聞而知者惟知漢州之竒有遺惠在鄉里  
蜀多美椒漢州解官歸攜其種蒔之其味辛  
烈不減蜀產至今人稱漢州椒云由漢州而  
下皆仕宋有階至承議郎承節郎者而其別

出之族有擁旄二鎮秉鈞兩朝者蓋甚顯矣  
云云 清河書畫舫賈似道留心書畫家藏  
名蹟多至千卷其宣和紹興秘府故物往往  
乞請得之其名蹟標題見於悅生別錄 又  
賈師憲所藏書畫皆有古玉一字印相傳是  
封字又謂之屈角封乃長字也印大將及二  
寸其篆法用李陽冰新意盤屈成文前無此  
體當是唐時所作又有悅生葫蘆印悅生賈

堂名也 古今法書苑神仙起居法思陵故  
物標綾上有曲脚封并悅生葫蘆印蓋似道  
柄國時御府珍秘多歸私家

泉布行都已號繁一時交鈔又番番鑄牌尚寫  
臨安府官券何來天市垣

錢譜高宗建炎通寶 建炎元寶 建炎重  
寶 紹興元寶 紹興通寶 孝宗隆興通  
寶 乾道元寶 淳熙元寶 光宗紹熙元

寶 寧宗慶元通寶 嘉泰元寶 開禧元  
寶 開禧通寶 嘉定元寶 理宗大宋通  
寶 紹定通寶 端平元寶 端平通寶  
嘉熙元寶 淳祐元寶 寶祐元寶 開慶  
元寶 景定元寶 度宗咸淳元寶 少帝  
德祐元寶 宋史紹興二十八年七月己卯  
命取公私銅器悉付鑄錢司民間不輸者罪  
之 元史劉宣言交鈔所起宋紹興初軍餉



不繼造此以誘商旅為沿邊糴買之計 至  
正直記宋季銅鑄牌長三寸有奇闊二寸大  
小各不同皆鑄臨安府三字而鑄錢貫文曰  
壹伯之等之類額有小竅貫以致遠最便於  
民近有人收為鑰匙牌者亦罕得矣 二老  
堂襍志近歲用會子持官券耳不知何人目  
為楮幣遂入殿試御題若正言之猶紙錢也  
乃以為文何耶 槎菴小乘臨安天市垣耳

宋高宗南遷建都於此

家筵靜看無聲樂別館爭排鎮宅錢練得桃花  
繡甲隊義兒相送上江船

三朝北盟會編醫官王繼先於宅傍剏一別  
館畜臨安名妓劉榮奴其子悅道則畜金盼  
盼父子聚麀令妓女時作歌舞聞淵聖升遐  
乃令妓女舞而不歌舉手頓足為戲名為啞  
樂於湖州舊館別剏大第自都下載見錢二

十萬貫前往排塚謂之鎮宅錢 又陰養無  
賴惡少五百人置桃花甲竹槍牌棒及刀劍  
等日夕訓練為殿中侍御史杜莘上言令編  
管福建居住子孫並勒停 中興遺史張俊  
撫諭楚州王勝為中軍統制或譖勝欲殺俊  
俊以事責勝送建康軍中自效後俊罷樞密  
勝潛至行在見韓世忠世忠具宴招醫師王  
繼先飲酒行世忠出勝拜繼先為父繼先見

上言勝可大用遂有都統制之命王勝又名  
王黑龍 林泉野記王進為張俊帳下提轄  
專背印隨行軍中呼為背印王至是除御前  
諸軍都統制進不恤士卒惟厚結王繼先及  
內侍以久權士卒皆不喜之

涑水摩崖孰與詳吳山故牒閱星霜傳來翠墨  
人休笑多少遺文在汴梁

曝書亭集詣壑菴觀磨崖隸書家人卦考葉

南齊書 卷一  
六五  
紹翁四朝聞見錄吳自牧夢梁錄皆云石壁  
刊字出司馬溫公筆獨周密謂是唐人遺蹟  
後人於石旁刊右司馬溫公書六字其實非  
也家有宋鑑稱紹興六年十一月庚辰上諭  
大臣曰司馬光隸字真似漢人朕有五卷日  
夕置座右所書乃中庸與家人卦皆修身治  
國之道不特玩其字而已今磨厓所刊家人  
卦後襟以樂記篇禮樂不可斯須去身至舉

而措之百九十二言中庸道不遠人至無入  
而不自得焉百九十七言合乎宋鑑所載當  
是諸大臣聞思陵面諭請刊於石者此王參  
洧詩有云涑水厓碑半綠苔春遊誰向北山  
來也 拊掌錄紹興九年金歸我河南地商  
賈攜長安秦漢間碑刻求售於士大夫王錫  
老得一碑無一字可辨王獨稱賞不已客曰  
此何代碑王不能答客曰某知之是名没字

碑也一笑而散 三茅寧壽觀石刻牒紹興  
二十年六月勅臨安府三茅堂可賜寧壽觀  
為額故牒

聖經賢史帝王資歲歲尋求詔有司試看獻書  
皆賜祿莫教攔駕進歌詩

山堂肆考高宗渡江獻書有賞或官有家藏  
者命抵家就錄有鬻者即市之 朝野襟記  
乾道初有衢州進士毛日新者以上書補文

學 宋元通鑑咸淳十年饒州布衣董聲應  
進諸史纂約兵鑑刑鑑詔充史館編校文字  
南宋相眼駕過德壽宮回有台州進士宗  
汝夫余宋臣縞素在望仙橋攔駕投進二黃  
冊文字為街司所驅駕過叫呼不已臨安尹  
為繳進乃萬世如見集其前太上慶壽歌頌  
其後乃追思上仙之辭刻板摸印有旨令毀  
板押出界

南齊書 卷一  
從來解額出前廊風雨青燈汲古堂聞道方州  
舉貢士等間香酒禱皮場

朱子大全文集今以遂州新定解額之半而  
又析其半為德行之科明立所舉德行之目  
註云如解額百人則以二十五人為德行科  
須溪記鈔汲古堂宋公子諸生國學之堂  
名也堂有井故名德祐鼎遷堂廢學亦燬矣  
成化杭州府志宋貢院在錢唐門外王家

橋試一郡之士謂之方州貢士 燕翼貽謀  
錄汴京試禮部者禱於二相廟二相者子游  
子夏也二子不知何以稱相今行都試士皆  
禱於皮場廟不知士人之禱起於何時皮場  
乃皮剥之所也 案廟在萬壽觀之晨華館  
與貢院為鄰

上人心折龍洲友湖海詩名姓氏芳並枕朱絲  
絃已斷老娼休唱賀新郎

名蹟錄辛稼軒印曰六十一上人蓋破其姓  
文也 鐵崖集龍洲劉公墓表先生名過字  
改之廬陵人宋以詩俠名湖海間陳亮陸游  
辛棄疾世稱人豪皆折氣岸與之交丞相周  
必大欲客之門下不就公常抗疏光宗請過  
宮屢與時相陳恢復方略謂中原可一戰而  
取 詞苑叢談劉改之淳熙甲午預秋薦赴  
省試到建昌二更後有美人執拍來唱一曲

侑酒云別酒未斟心已醉忍聽陽關辭故里  
揚鞭勒馬到皇都三題盡當際會穩跳龍門  
三級水天意令吾先送喜不審君侯知得未  
蔡邕博識爨桐聲君抱負却如是酒滿金杯  
來勸你劉與之偕至臨安果擢第道士熊若  
水謂之曰隨車孃子非人也今夕並枕吾於  
門外作法君當緊抱之勿令竄逸劉如所戒  
乃擁一琴耳 龍洲詞賀新郎自跋云去年

秋余試牒四明賦贈老娼至今天下與禁中  
皆歌之

敝衣蟲垢去邊陲九廟神靈已建基迎得鸞輿  
快活地龍綃收淚定歌詩

山堂肆考宋道君北狩至五國城衣上見虱  
呼為琵琶蟲以其形似琵琶也 弘簡錄洪  
皓居燕十五年會金大赦得還見秦檜語連  
日不止因述金人言景靈宮太廟土木以為

無意中原檜不懌 三朝北盟會編初皇太  
后與喬貴妃相叙為姊妹而貴妃先遭遇遂  
薦太后亦得幸後北狩二人皆從及金人欲  
還太后也貴妃舉酒送行勸太后曰姊姊此  
歸見兒即為皇太后矣宜善自保重妹妹永  
無還期當死於此太后慟哭貴妃亦哭又曰  
姊姊到快活處莫忘了此中不快活太后曰  
不敢忘今日太后慟不止天眷在旁者皆哭

高宗皇帝 卷一 九十一  
太后自清河而下 又車駕如臨平奉迎太  
后上入幄朝見宰臣及文武百官班幄外起  
居如儀上初瞻慈容喜深感極淚濕龍綃衛  
軍歡聲動天地太后進宮滿城士庶夾道聳  
觀皆以手加額太后入居於慈寧殿文武百  
官上表稱賀亦有獻賦頌雅歌稱美聖德者  
令中書舍人程敦厚第其高下敦厚以建昌  
軍進士章藻為第一知真州張昌為第二進

士陸渙為第三昌特轉一官進士免文解一  
次

虹光朗射天垂象鼎峙形成淮作邊送客津亭  
留不住一心何願頌三千

劉嶸萬言書今年立春雷震大雪白虹貫日  
錢唐之地實天示象不可不修德以偃之

吳伸萬言書兩國之勢未解鼎峙之形已分  
莫視疆場為太輕莫任藩籬之太易 竊憤



錄上皇在北遇阿濟台

舊作阿計替今改

出片紙書

紹興二字示之曰此南朝新改年號以淮為界矣 趙丞相行狀公以和議不協罷相出守紹興首途之日秦檜乞備禮餞於津亭公相揖即登舟檜曰得旨餞送公曰議已不合何留之有即叱舟師離岸而去 格齋四六賀壽皇云心一臣三千願紀嘉名於盛際我百爾九十蓋申景命於前規用成語最切合

漫彈雙韻唱如如蕭鼓元宵擁繡裾好坐嘯臺  
恣雅博莫因家學註蟲魚

癸辛襍志銀花高文虎婢善小唱五百餘曲  
又善雙韻彈五六十套以元宵時近點燈來  
因取古人詩句有銀花垂院榜又銀花無奈  
冷等句為名時高已近七旬喪偶多年買此  
以侍湯藥後攜歸越 四朝聞見錄高疎寮  
居近城因城疊石曰南麓麓後高數級登汲

於甕泄之以管淙淙環珮聲入方池池方四  
五尺畫☵☵於扁自麓之後登城為嘯臺  
吹劍錄高內翰文虎作西湖放生池記以鳥  
獸魚鼈咸若作禹事其子疎寮作蟹略以林  
和靖草泥行郭索作杜詩父子皆為博學強  
記所誤

空題御墨金纏幹不見軍容黑大蟲一等英雄  
沙草外墓門殘碣臥松風

三朝北盟會編李寶興仁府乘氏人也少無  
賴號為潑李敗金人於渤海廟 鶴林玉露  
上書忠勇李寶四字於金纏幹上賜焉 齊  
東野語畢再遇屢遷至驍衛上將軍戰馬號  
黑大蟲獨主翁能御之既死以鐵絙羈之偶  
聞金鼓聲長嘶斷絙而出健卒十餘挽歸云  
將軍已死汝莫生事馬聳耳汪然出涕長鳴  
數聲而死 萬厯杭州府志武義大夫畢進

南齊書 卷一  
子武信軍節度使再遇墓並在西溪進兗州人建炎間轉江淮積階武義大夫再遇以恩補官屢有戰功擢至武信軍節度致仕卒年七十贈太師諡忠毅 案赤山埠內有李忠勇公神道碑其墓在焉郡邑諸志皆不載狀元局內士無雙單騎欣然犯敵幢一自明因辭國去人傳劉洙在清江

文山全集舊例三魁唱名罷賜袍笏謝恩入

幕賜御饌進謝恩詩出賜席帽於闕門上馬迎入期集所又名狀元局官給錢物供帳阜隸等於此聚同年待賓客刊題名小錄賜聞喜宴進謝宴詩如此者一月然後率榜下士詣闕謝恩謂之門謝門謝後授初階狀元授承事郎簽書某軍節度判官廳事至後一科放進士榜則前一科狀元召入為秘書省正字名曰對花名 又公平生嗜象奕以其危

險制勝奇絕者命名自玉屑金鼎至單騎見敵為四十局勢圖悉識其出處始末玉屑蓋公所居山名也 宋元通鑑文天祥同吳堅謝堂賈餘慶使元軍見巴延舊作伯顏今改後仿此於明因寺巴延留公不遣回 又文天祥至鎮江與其客杜滸等十二人夜亡天祥乃變姓名為清江劉泐東入海道 又公於寶祐四年廷試第一 案明因寺臨平鎮尼刹也

案癸辛雜志狀元局在祥符寺

金隄窅窅海波頽祝拜宮中香未灰笳鼓滿城馳鐵騎巴延江上看潮回

山村遺橐題宋宮觀潮圖金隄既成事已非錢唐江上開皇畿雕闌玉檻照東海貪看秋潮忘黍離中原不復民易主百萬貔貅宿沙渚倚樓望潮潮不來六帝同歸一丘土 輟耕錄元將巴延遣人入臨安駐兵錢唐江沙

上太皇太后望祝曰海若有靈使波濤大作  
一洗而空之潮竟三日不至 宋元通鑑三  
月巴延自潮州市入臨安城建大將旗鼓率  
左右翼萬戶巡城觀潮於浙江又登獅子峯  
觀臨安形勝 雲邁淡墨杭潮三日不至人  
謂天佑元興然巴延英雄豈有不知錢江如  
山之濤宿兵其地宋之叛將降卒充牣其幕  
自詭効忠豈不諫止濤之不至事或有之元

兵必不駐此傳者文以為奇史臣襲之耳  
遊北傳聞皆丙子渡江天意屬庚申酒人祇愛  
梅花好踏遍孤山不計春

兩鈔摘腴宋少帝丙子三月北遊 視聽抄  
宋少帝辛未九月二十八日申時生甲戌正  
月十一日登位號天端節丙子三月十七日  
北遊宋高祖劉裕丁亥生庚申即位國號宋  
丙子渡江國亡凡七百二十年至趙太祖丁

亥生庚申即位國號宋先丙子俘李主後丙子大元渡江國亡 甘露園短書元世祖以庚申立立十五年而取宋順帝即以庚申生十三年而取元 洹詞紀事續鈔劉靜修閔元伐宋乃賦渡江題梅曰西風吹落戰塵沙夢想西湖處士家曰恐江南春減猶夫賦也

南宋禱事詩

卷二 一百首

錢塘吳焯撰

艮嶽曾經號鳳皇  
東京特地擬餘杭  
竒亭巧石神霄夢  
月上俄聞唱海棠

雲麓漫鈔政和五年命內官梁師成築山於  
景龍門側象餘杭之鳳皇山遂賜名鳳皇後  
神降有艮嶽排空霄之語又名艮嶽今臨安  
府大內麗正門之正面即茲山也 艮嶽記



介亭最高於諸山前列巨石凡三丈許號排  
衙石案介亭排衙石俱在鳳皇山側宋之都  
杭有先兆矣 雲麓漫鈔徽廟內禪幸淮浙  
嘗作小詞名月上海棠末云孟婆且與我做  
些方便其意指風竟成孟太后讖 華陽宮  
記事良嶽有飛來峰

靖康字讖啓金徽名罩黃羅局上飛誰道漢家  
兵制闕陰符蚤已著神機

鐵圍山叢談靖康改元中書擬進年號取日  
靖四方永康兆民請號年曰靖康其文為十  
二月立康也後一年康王中興 北狩見聞  
錄曹勛扈從北行時太后未知主上即位嘗  
用象戲局子裏以黃羅書康王二字貼將上  
禱曰令三十子俱擲於局若康王字入九宮  
者必得天位一擲其將果入九宮 補漢兵  
志宗正少卿錢文子以班史無兵志因而補



之蓋有慨乎南渡後兵食冗濫而富平符離  
之役棄師累十萬莫正其罪假漢兵志以寓  
意焉 神機制敵太白陰經南宋內府鈔本  
兵家之要典也凡十卷未有寫勘監收等名  
更鑄新銘帝命宣儒臣皇祐有遺編洛鍾不響  
土圭冷太史頻煩測會天

建炎以來朝野雜記紹興十六年鑄景鍾高  
九尺天子親祠上帝則用之以皇祐黍尺為  
準於是上命秦檜銘之曰德純懿兮舜文似  
躋壽域兮孰內外薦上帝兮偉茲器聲氣應  
兮用久視貽子孫兮彌萬世 皇祐新樂圖  
記仁宗皇祐二年阮逸胡瑗等奉詔修凡三  
卷十二篇 會天厯寶祐四年荆執禮等算  
造南渡以後自統元至會天厯名凡七改是  
歲在丙辰元日立春因定是名學士尤焞被  
命製序具註頒行

南齊書卷之二十一  
卷二十一  
三  
我好來朝即便留行都不改舊杭州歌聲隱隱  
江湖上虹氣分明赤斗牛

思陵錄高宗生時徽宗夢吳越錢王引上衣  
云我好來朝便欲留我終須還我山河淳熙  
十四年宰執奏事延和殿上因論高宗謚法  
語及此事案此稱錢王指做也舊志謂是武  
肅皆祖洪邁之說 吳越世家疑辯李琪武  
肅王碑江湖之上棹有歌聲斗牛之間獄無

### 冤氣

歲幣年年訝許同紅蠶南國號靈蟲巧機花匠  
休離手柿蒂原充職貢中

蓉塘詩話樂天詩紅袖織綾誇柿蒂柿蒂綾  
紋也 夢梁錄杭產綾曰柿蒂狗脚後人改  
為柿葉者妄也 元豐九域志杭貢綾三十  
匹 丘陵學山有黃省曾蠶經一卷言杭地  
蠶事最詳

欲負龍歸計太貪鸞聲先報下江南柳林一議  
驅俘馘誓不尋盟死不甘

北窗炙輠宇文虛中始陷於金後仕為國師  
遂得其柄令南北講和太后之歸資其力也  
後欲挾淵聖以歸為人告變論死 迎鑾七  
賦太尉曹勛墨跡勛自奉還徽宗梓宮及韋  
太后乃作迎鑾七賦題分為七實止一篇其  
裔世居海鹽保有此卷後歸花山馬氏余得

見之 脚氣集金諸大臣會於黑龍江柳林  
議遣秦檜歸國言彼得志吾事可濟檜至計  
果得行廢殺諸將而南北之勢定金亦德之  
誓書中必有不輕易相語而檜亦發宇文虛  
中事以報之此金人自言之見於金國南遷  
錄

不裹冠巾女聖人雕弧那羨十流銀更饒艷思  
輕紅句粉浣香梳十指春

四朝聞見錄高宗憲聖吳后侍高宗航海金  
騎猝至欲挈御舟后發一矢應弦而倒高宗  
重於視師后奏曰若臣妾裹尺五阜紗須一  
往矣 弧矢譜有踧蹬弩最為利害張憲巾  
林之伏張浚射孤關之捷皆用此弩制勝此  
書不著撰人紹興間曾進御者 韵石齋筆  
談憲聖能詩題徐熙牡丹云吉祥亭下萬千  
枝看盡將開欲落時却是雙紅深有意故留

春色緩人思題芍藥云穠李夭桃掃地無眼  
明驚見玉盤孟揚州試識春風面看盡羣花  
總不如

日日攻書腕骨靈清江白鹿拓朱檀鉤金不獨  
松門字先飾涪翁戒石銘

書學纂要高宗在內殿作書日有程課 至  
正直記宋紙有單鈔清江名曰白鹿乃龍虎  
山寫籙之紙又曰白鹿 四朝聞見錄紹興

二年六月頒黃庭堅戒石銘於郡縣亦用金書不獨飾吳說九里松字也 咸淳臨安志九里松一字門亦曰松門

亂似羣鴉腫似豬聯綿新體果何如銀漿蠲紙沙錐利好趁游絲一筆書

書苑菁華吳說傅朋出己意作游絲書世謂前代無有趙與昔云唐書呂向能一筆環寫百字若繁髮然號聯綿書即此體 朝野類

要臨安有鶯紙者澤以粉漿使之瑩滑謂之蠲紙 太倉稊米集題吳傅朋游絲書聊將畫沙錐幻出蟲網壁

山岳英靈久不磨虎兒談律繼梁羅子瞻風采人門重豈獨斜川號小坡

曲洧舊聞李廌方叔祭坡公文皇天后土鑿平生忠義之心名山大川還千古英靈之氣小字錄蘇子由子遲小名梁适小名羅遠

小名虎兒東坡詩高談付梁羅詩律到阿虎  
 朝野雜記高宗雅敬蘇文忠止稱子瞻或  
 稱東坡 浮溪集蘇軾孫符改宣教郎勅有  
 云賈生明王道漢錄賈嘉之能魏公進忠規  
 唐表魏謨之烈人門並用今古所同其振爾  
 之家聲以待予之器使 文湖州竹派坡公  
 詩老可能為竹寫真小坡解與竹傳神小坡  
 蘇過也有斜川集

愛他鈎勒與橫歌恨不生同黃米時繡幄裁成  
 翰墨志一規明月下宮墀

筆塵山谷書善用鈎勒米家父子得橫歌執  
 後村題跋光堯喜書畫自恨不與黃太史  
 米南宮同時 高宗翰墨志一卷今見於王  
 氏書苑者全凡二十六條前有自序 養蒙  
 集思陵金書扇詩超然塵外萬緣空得失何  
 須問塞翁鈎畫尚留奎壁潤斂歸明月一規

中

錢源雪雪接龍溪才過橫坑二水齊白日陰崖  
叫鷓鴣野花開遍刺棠梨

雲麓漫鈔靈隱寺東西漢二水東龍源橫過  
寺前即龍溪冷泉亭在其上西曰錢源二水  
合出橫坑橋案龍溪龍源宋時之名今志所  
無

絕品銘心未肯降翰林花月醉春江清明不見

河中景湖上空聞戲綵艘

向氏圖畫記翰林張擇端善畫城郭舟車人  
物其所作清明上河圖西湖爭標圖二圖紹  
興中入內府並選入神品

龍衮遙升啓虎關奉常官立最先班宣和雅樂  
如何補知在先皇指節間

夢梁錄明禋詩龍衮初升殿陞階奉天酌祖  
歲皇儀虎關夕啓咸來肅從坐紛綸衛百祇

雲麓漫鈔紹興十六年禮器局造祭器用博古圖雅樂用大晟府制度大晟樂之景鍾當時用徽宗指三節為三寸蓋崇寧四年所鑄者是也樂府雅詞首冠調笑絕句云是九重傳出此大晟樂之遺音

枉被人稱紫府仙原芝志不究先天君王雅愛通經士圖畫龜龍進巨編

四朝聞見錄張孝祥精於翰墨人稱紫府仙

惜其與南軒諸人為友而不能續伊洛之統于湖居士集紹興二十四年芝產太廟前楹張孝祥作原芝文推行符瑞之說周易經傳集解福清林黃中著凡三十六卷淳熙十二年進御降詔褒美案此書精研該貫第以其曾糾朱子學者非其人而黃勉齋集祭黃中文有云玩義經之文象究筆削於獲麟立朝正色雖當世大儒或見擯斥著書立說



雖前賢爲論不樂因循然則朱門高弟稱許亦至矣徐尚書開雕經解此書不入或亦以朱子故與

亭深喬木貯張穰直上彤庭認筆蹤不似韓家失機表勸君餘暇誦車攻

剡源集張忠烈王開國於循而置邸於杭所居之坊曰清河有喬木亭在焉因為之記

雪履齋筆記張俊有愛姬乃錢唐妓張穰頗

涉書史拓皋之役俊發書囑以家事穰引霍去病趙雲事以堅其心俊以其書繳奏上親書獎諭張韓皆中興名將皆有奇女子又皆出微賤亦奇矣中興編年紹興五年上書車攻詩以賜輔臣曰當與卿等勉勵以修政事

松花如粟布前除嶺脊猶傳古宅徐一笑湖西梅處士茂陵書去野亭虛

北窗炙輶錢唐兩處士林和靖居孤山徐沖  
晦居萬松嶺夾湖相望徐之孫忉猶守故廬  
語人曰先祖有言子孫世世勿離錢唐永無  
兵燹徐精數學也案先生名奭賜號沖晦  
金鈴獵獵降香回佛跡多憑梵夾開不信香山  
老尊宿玉顏花貌坐蓮臺

朝野類要內宮有祈禱賜香於天竺大士  
五百羅漢名記宋時記江陰軍乾明院羅漢

名號案淨慈寺亦有五百塑像曹勛為記特  
以名不著於梵夾此名號不知何所本淳熙  
三山志懷安大中寺有八百羅漢像是又不  
止五百也 曲洧舊聞蔣穎叔用香山僧懷  
晝之請取唐律師弟子義常所書大悲之事  
云國莊王不知是何國王有三女幼者多妙  
善施手眼救父此與楞嚴經及大悲觀音等  
經頗相失華嚴云善度城居士韓瑟胝羅頌

大悲為猛勇丈夫今香山乃大悲成道之地  
謂是生王宮以女子身顯化考古德翻經所  
傳者絕不相合不知穎叔何意而粉飾之以  
猛勇丈夫易為女子也

赤岸前頭赤羽驅平江供遞五千夫龍茶宣賜  
無箋表蚤駕冰綽過鼎湖

雲麓漫鈔金國每年賀正旦使平江排辦司  
供役凡五千三百十四人 武林舊事北使

到闕先遣中使至班荆館宣賜龍茶香合

貴耳錄道君北狩凡金人有賜賚必索一謝  
表 雲麓漫鈔賀正多值冰雪有司作浮筏  
前用巨碓擣冰謂之冰綽以迎北使

雄關八界三千里上國于京六十程累葉統傳  
分歲月兩家書在記和盟

大金國志自臨安府餘杭門起至雄州舊界  
口凡三千二百七十里又自雄州起至金之

古史補遺 卷二  
上京會寧府凡二千七百五十里通計六千  
零二十里 剡源集天台潘可大稟宋自建  
炎丁未迄德祐庚子金自天輔戊戌迄天興  
甲午撥提綱要各為南北紀年 三朝北盟  
會編宋朝散大夫清江徐夢莘商老撰案此  
書分三編上宣政中靖康下炎興靖康以後  
採諸家纂記二百六十餘種最為詳洽總二  
百五十卷後又有集補五十卷未見

早聞玉盃出塵闌更設淘沙最慘顏不計本根  
江乘壘空教保護劍門山

劉豫事跡豫見兵士賣玉盃疑非民間物鞠  
之果出山陵中金人發掘時得之豫遂置河  
南淘沙官發掘諸陵括取棺中水銀等物上  
代陵寢及民間塚墓無有免者 景定建康  
志白下本江乘之白石壘 玉牒初草嘉定  
中詔臨安府北山劍門嶺毋得伐石以張齊

賢論其洩山川之氣故也案栖霞嶺又名劍門嶺

才罷三孟丞相嗔想夫憐曲有前因從今閣下乘龍耳莫解金刀與別人

雲麓漫鈔秦相十客郭知運逐客吳益嬌客郭臨安人登科以少俊選為孫婿秦每夕必留三孟郭多夜出秦嘗以佩刀分遺諸婿郭獨失秦怒會夜出令門者勿納遂罷親吳宜

興人以門蔭遂令繼郭為姻改秩為臨安倅秦薨罷之

兒家不繫守宮砂曾拊金枝綴玉葩細馬盤馱成隊去傷心猶奏後庭花

蘆浦筆記資政王復守徐州與子僧均死靖康之難和議成上憫其忠令僧諸女入禁中命宮嬪養之凡十餘年一日曝書內庭上見囊封有忠烈二字亟取閱乃王氏女入內事

即日召見賜金幣敕命遣嫁 歸潛志宋宗  
室家姬流落於金吳彥高詞云南朝千古傷  
心事猶唱後庭花

天上何曾下玉棺人間偷把淚珠彈可知故鬼  
依新鬼柩室前頭已奉安

中興編年紹興三十一年八月淵聖凶問至  
詔臣民發哀成服廟號欽宗遙稱獻陵明年  
閏二月祔木主於太廟案咸淳臨安志紹興

四年命守臣梁汝嘉建太廟於瑞石山左以  
奉列主後又設配享功臣位于橫街南西湖  
志謂太廟獨缺欽宗不祀考欽宗祔廟詳於  
宋史嘗下詔議配享功臣廷臣謂欽宗在位  
不久無可當配享者故缺焉咸淳志記配享  
諸臣名於列宗之下因無欽宗因誤讀此志  
耳高宗不復父兄千古議之乃責其不祀欽  
宗冒昧一言遂啓後來罔諉不可不辨

漢祖關前兵有壘劉伶臺下酒如池閉關頌酒  
斯何意知是風流女畫師

志雅堂襍鈔李伯時盧鴻草堂圖曾收入高  
廟劉娘子位者有奉華大小二印又有閉關  
頌酒之喬一印此劉家事然以婦人用之恐  
不類也 畫法年紀劉妃工畫人物

規模不定事逡巡和福寧須怨相秦可恨將軍  
無死地荒郊一窳賈宜人

識遺紹興中張燾上言曰一紀之間命相十  
四執政遞遷無慮二十人宜其和戰紛紛迄  
無成功故燾直謂規模不定也 知稼翁集  
解試以和戎國之福發策 南宋相眼詔臨  
安府訪求岳將軍尸其墳在錢唐門外當時  
私號賈宜人墳

鄴邱金陀著錄成桃溪難認手題名未詳蘄國  
爭三字猶賴文昌傳一生

王楮集岳珂封鄴侯進紀恩詩 岳珂著金  
陀粹編二十八卷續編三十卷述家王之事  
最詳 雲麓漫鈔宜興張渚張氏圃臨水號  
桃溪岳侯曾館其家題名廳事云近中原板  
蕩金人長驅如入無人之境將帥無能不及  
長城之壯余發憤河朔起自相臺總髮從軍  
大小二百餘戰雖不及遠涉邊荒亦足快國  
事之萬一今又提一壘孤軍振起宜建康之

城一舉而復今且收兵養卒以待如或朝廷  
見念賜予器甲使之完備頒降功賞使人蒙  
恩即當深入邊庭迎二聖復還京師取故地  
再上版籍他時過此勒功金石豈不快哉此  
心一發天地知之知我者知之建炎四年六  
月河朔岳飛書岳陷罪其家洗去隱隱猶見  
案此篇見於粹編者作五岳祠盟記寥寥數  
語故拈出之 宰輔編年錄岳鄂王獄具秦



南齊書 卷二  
檜言岳雲與張憲書其事體必須有斬王爭  
曰必須有三字何以使人甘心案此三字與  
中興紀事本末同今皆作莫須有恐不若紀  
事之得其實也 金陀粹編珂自序先王勲  
在王家名在國史遺跡之存者文昌章公傳  
而上之朝案珂忠武之孫敷文閣待制霖之  
子

圭田新錫奉烝嘗無復東家舊講堂天水兒孫

幾輩輩風煙隔斷柳林莊

朝野雜記中興後衍聖公孔玠奔至行在上  
以孔子林廟隔絕特賜衢州田以奉祠事

東家襍記先聖四十七代孫孔傳編首列杏  
壇圖說 清波別志國家上世陵寢在保州  
保塞縣東三十里御莊在焉號柳林莊

孔門弟子自清羸髣髴塑俄更舊表儀為有龍眠  
傳榻本可曾新樣畫溥熙

咸淳臨安志淳熙四年建石經閣遂新兩學  
議者以廟中諸賢舊像無福厚氣象遂令改  
塑其舊像遷於首善閣李龍眠有孔門弟子  
畫像刻於石藏石經閣

嶧雨鳧雲天際昏誰從配食憶魚門七篇幸不  
亡金鏡敕付東朝細討論

朝野雜記兗州鄒縣有孟子廟政和中詔以  
樂正子克配享并從祀公孫丑萬章浩生不

害孟仲子陳臻充虞屋廬連徐辟陳代彭更  
公都子咸丘蒙高子桃應盆成括季孫子叔  
渡江後鄒魯隔絕孔廟既立而孟獨無行在  
諸賢宜留意也 名勝志魚門古鄒城也

東宮備覽靖康時侍御史胡舜陟上言以中  
書舍人朝說之乞令皇太子講諸經而廢孟  
子竊謂孟軻氏發明聖道豈可以為百家而  
黜之使皇太子不聞七篇之義今請東宮官

進講仍舊制用孟子

伐鼓淵淵揮扇同巧思射覆女郎中後來傳得  
千文虎字畫分離謎工

賓退錄都下擊鼓射字之伎全用切韻法該  
以兩詩詩皆七言全用支齊有平無仄以應  
鼓節亦有揮摺疊扇同是一法 武林舊事  
諸色伎藝人射覆有女郎中 七修續藁余  
有一敗帙惟序可讀乃勝國謎社之書名曰

### 千文虎

野雲戲罷擲金錢擊撲爭傳冷節前聞道十家  
春繡倦不扶綵索上秋千

雲麓漫鈔歲將除都人相率為儼俚語謂之  
打野狐亦呼野雲戲 又擊撲食物法有禁  
令凡元正冬至寒食三節京尹出榜放三日  
或以數十笏銀或以樂藝女人為一擲其他  
百物無不然 孝宗儉德記官中無秋千之

戲

父子唐虞有憲章  
郊山宮闕可相望  
紛披玉檢勞  
雙隻曾悔中書去  
一網

蕭臺公餘詞薰風解愠  
手握乾符躬揖遜  
廊廟無為天子親傳  
萬歲卮恩覃湛露和氣歡  
聲均海宇嵩岳三呼  
父子唐虞千古無松  
隱集德壽宮春帖子  
曉來簾幙捲東風  
尚有春寒下綺櫳  
德滿人間和氣浹  
郊山宮殿瑞

雲中 玉牒初州李安行奏寧宗曰陛下雙  
隻皆視朝而延訪之時不及雙隻猶言雙日  
單日 王筍集咏史有一網謠為李忠定作  
也

鈞容法部幾班頭  
半是吳歛半楚咻  
誰解綠腰花十八  
但教小令整歌喉

朝野類要教坊之名唐時屬太常本朝增東  
西兩教坊又別有化成殿鈞容班中興後因

之紹興末臺臣王十朋上章請罷凡名伶俊  
伎留充德壽官其餘多隸臨安府雖有教坊  
之名多是市井之輩不知音律 碧雞漫志  
琵琶六么一名綠腰其曲中有一疊名花十  
八 又有人過釣容班教坊問曰某宜何歌  
必曰汝宜唱曹元寵小令

飲馬歌殘絡馬銜浮屠軍已越重巖尋官儻入  
黃鍾調蚤向陽山進一帆

松隱集飲馬歌邊頭春未到雪滿交河道暮  
沙明殘照塞烽雲間小斷鴻悲隴月低淚溼  
征衣悄歲華老自注此腔傳自金中飲午馬  
即橫笛吹不鼓不拍其音淒斷聞烏珠舊作兀朮

今改正每對陣吹此則鏖戰無還期也 建

後仿此康集詩快飲莫辭金鑿落先聲須破鐵浮屠

注金將下親兵皆精練號鐵浮屠 至正

直記文丞相入燕聞軍中歌阿剌來曲驚曰

此正黃鍾之音南人不復興矣 建炎航海  
記建炎海上之役烏珠由鄞入海望大洋中  
隱隱一山問海師何所對曰陽山烏珠嘆曰  
吾得至此足矣下令返棹其日御舟將如館  
頭亦過於風不爾幾殆蓋天所以開中興云  
親見宣豪寫洛神殘碑重捲淚宮嬪後來石刻  
應鋪叙猶記花門舊日春

書史會要高宗自言學書惟視筆法精神朕  
得王獻之洛神賦六行置之几間日閱數十  
過自覺於書有所得 玉林詩話高九萬觀  
思陵墨本詩淡黃越紙打殘碑盡是先皇御  
製詩白髮內人和淚看為曾親見寫詩時  
石刻鋪叙建昌曾宏父撰叙高宗御書石經  
本末特詳南渡後祕閣帖亦加詮訂

毛詩一卷誦交交風過泠泠竹韻敲偶為尋花  
行別殿棚簾不捲結蠨蛸

滄洲集春日夫人閣詩君王著意在經幃無  
復瓊林宴賞時從此六宮休鬪草碧紗窗下  
讀毛詩 孝宗儉德記上在禁中凡先皇游  
玩之處多扃鐃不御

清鐘杳杳碧波深塏影扶雲出梵林何取香山  
舊詩句一山兩寺漫追尋

詩人玉屑中興後詩如趙天樂冷泉夜坐鐘  
樓晴聽響池水夜觀深 秋聲集靈隱詩兩

峰塏影天垂蓋千佛林光地布金 東坡詩  
集自注往在虔州天竺寺見白公親書天竺  
寺寄韜光詩案此則虔州別有一天竺寺因  
韜光原住靈隱寺故有天香桂子之句咸淳  
志稱舊志不收此詩是也

峻嶒孤塏倒江波六合於今號六和不見一瓶  
明似雪龍山依舊莽烟蘿

四朝聞見錄衛涇字清叔自僉幙奉召而不

入國門翱翔於江上六合塏又宋藝圃集李  
沆有題六合塏詩 雪溪集王銍云余與郭  
壽翁別於錢唐追送至龍山白塏寺又江月  
松風集白塏詩宋宮傳自唐朝寺白塏崔嵬  
寢殿前案此則一白塏唐代物宋時已在禁  
中其扎木揚喇勒智哀陵骨而建稱鎮南塏  
俗稱一瓶塏者又一塏也西湖志雖兩載白  
塏不為疏明又考清江集穆陵行云江頭白

塏今不見則鎮南塏自明初刻去之也如此  
兩塏本未朗然今志多誤

皇壇高敞坐神農指向吳山第一峰藥局有方  
還證類不知仙草閱靈蹤

咸淳臨安志南渡初有商立者攜神像至杭  
舍於吳山因以為祠都人有疾禱者必應遂  
以其神為神農云案商立所攜之神即指為  
神農西湖志誤作閣上另塑一神農像當從



咸淳志 太平惠民和劑局方紹興六年置  
藥局四所一曰和劑局十八年改熟藥所為  
太平惠民局取大觀刊正藥局方添補紹興  
寶慶淳祐諸方暨吳直閣諸局方 證類本  
草大觀初唐慎微撰紹興中詔王繼先校定  
附以釋音付國子監鏤板 白雲仙人靈草  
歌凡圖靈草五十四種各附以歌南宋祕府  
書也

館閣藏書校更繁綜甄簿錄列庭軒崇文舊目  
依稀見去盡源流割幾番

朝野襍記中興館閣書目淳熙中修渡江後  
書籍散佚紹興十三年建祕書閣以秦熺提  
舉祕書省掌求書籍至是數十年所藏充牣  
乃命館職為書目陳騏領其事綱例皆倣崇  
文總目凡七十卷案今中興館閣書錄十卷  
淳熙四年陳騏撰李燾序續錄十卷嘉定三

南齊書事記 卷一  
年館閣重編其後次第補錄迄於咸淳然今  
所傳非完書也 崇文總目六十六卷舊於  
各書下疏明源流自鄭樵盡削之今所傳者  
僅書名耳

手畢應防典墨兵野人識小太言諱尚書筆札  
經題後雪柏霜松無此清

分門瑣碎錄孫樵謂史書為墨兵 朝野雜  
記秦主和議禁私史秦死郡國多鋟本嘉泰

中言者請仍舊禁 續資治通鑑長編李燾

撰乾道初命給筆札寫進淳熙十年上其書  
自建隆至靖康凡九百八十卷舉要六十八  
卷詔付祕書省案此書今所傳者一百七十  
五卷從閣本錄出 南軒集李文簡長編如  
霜松雪柏生死文字間 水心集長編自春  
秋後才有此書

文鑑經時未始刊惛惛理學罔糾彈家山尚有

圖書在不比東萊費墨丹

宋文鑑臨安書坊先有聖宋文海孝宗得之命本府校刻益公請加銓擇上屬之呂伯恭書成賜名皇朝文鑑有近臣密啓云奏議中有詆及祖宗政事者不可示後世乃更命直院崔大雅增損後有道學之禁以有伊川文遂詆伯恭上不復降出此書當時迄未刊也家山圖書文公私淑弟子之文傳於許魯

齋其書以易中庸古大學古小學參列成圖網領條目極為精詳朱子語類朱子云呂伯恭編次文鑑徒耗損精力無所裨益

稽古如何不鑒今輪臺甄別倍森森可知千古公言是惜爾搜羅系譜心

龔頤正著元祐黨籍譜系一百卷悉取籍中三百九人各為傳佚者四人而已案頤正後又著續稽古錄美侂胄功侂胄死詔臨安府

毀其書 梁溪漫志紹興間詔贈卹元祐黨籍諸賢言者謂中多奸邪下詔甄別其人帶經堂集蔡京手定黨籍原有二本南渡後合二本校勘詳定慮中有奸人耳所云三百九人乃京第二本案宋史崇寧元年籍黨人凡一百二十人御書刻石端禮門者是為第一本

元祐忠良冤始雪慶元理學禍重胎寧知御閣移碑去又見神州置勝來

中興編年慶元偽學之禁凡五十九人宰執四人趙汝愚留正王藺周必大待制以上十三人朱熹徐誼彭龜年陳傅良薛叔似章穎鄭湜樓鑰林大中黃由黃黼何異孫逢吉餘官三十一人劉光祖呂祖儉葉適楊方項安世李熈沈有開曾三聘游仲鴻吳獵李祥楊簡趙汝談趙汝諧陳峴范仲黼汪逵孫元卿

袁燮陳武田澹黃度張體仁蔡幼學黃灝周  
南吳柔勝王厚之孟浩趙鞏白炎震武臣三  
人皇甫斌范仲任張志遠士人八人楊宏中  
周端朝張衍林仲麟蔣傅徐範蔡元定呂祖  
泰慶元三年知綿州王沈上言請令省部置  
籍下臨安府吏部郎黃子由上言人主不當  
待天下以黨不必置籍以示不廣未幾子由  
降去 神仙通鑑林靈素侍游禁中至一閣

下見碑題云元祐姦黨之碑遂獻詩曰蘇黃  
不作文章客童蔡翻為社稷臣三十年來無  
定論不知姦黨是何人因得旨撤碑案此事  
野史多載考宋史崇寧中籍黨人榜朝堂一  
刻石端禮門再刻石諸州三刻石文德殿門  
帝既親書京復自書頒天下並無刻石閣下  
道流之言恐不足據 案蘇黃二句金人馬  
定國詩見中州集

南齊書 卷二 三十一  
未擎手版進名銜正士僉人一例芟安得長書  
似方鳳清風終不浣朝衫

朝野類要初入仕必具鄉貫三代名銜謂之  
脚色崇觀間當書云不係元祐黨籍紹興間  
即云不係蔡童朱王等親屬慶元間加不是  
偽學方與銓除 又上天子書曰萬言書若  
上公侯則曰長書 方韶卿集方鳳睦州浦  
江人久於臨安以三策上陳宜中不能用宋

亡不仕與謝翱吳思齊為友黃潛作詩序柳  
貫撰墓銘

易地函頭事總非髑髏夜泣佛燈微死灰又煽  
咸陽焰江表難推禍福機

翠微南征錄華岳因韓侂胄函首有詩云反  
漢須知為晁錯成秦恐不在於期感函首事  
之非也案岳於開禧元年上皇帝書請誅侂  
胄及蘇師旦語最伉直及函首後又為此詩

重傷國體蓋不肯遂浮議附和者也吳興掌  
故云翠微集華廉字仲清著誤也 朝野雜  
記侂胄既見殺已詔臨安府葬於其家先塋  
之顯親報恩寺後易地議起乃下臨安尹遣  
本府副將尹明斲棺取首命通謝使許左往  
金交納時詔復秦檜官爵 僑吳集高宗享  
國江表禍福倚伏有難明者

三班受使拆筠籃欲賦枇杷作美談西域涼瓜  
似冰雪不勞速遞到江南

大金集禮宋使到闕於三品官班內間插高  
麗夏國於五品官班內間插先引宋使副出  
笏捧書至丹墀面殿立定閣使左下受書奏  
封全轉讀訖引使副左上露堦齊揖入闈內  
宣問宋皇帝躬身受敕旨訖左下至丹墀面  
殿立定禮物右入左出高麗夏國亦如之  
歸潛志宋使至金進枇杷子章宗命狀元王

澤賦詩澤奏云小臣不識枇杷子王庭筠詩  
成上喜之案庭筠詩見中州集而枇杷詩不  
載 輿地廣記唐地理志餘杭郡貢枇杷  
松漠紀聞北地西瓜圓而色青翠味甘脆中  
有汁尤冷今禁圃亦有之 北轅錄金接伴  
使各帶銀牌一面樣如方響上有蕃書急速  
走遞四字上有御押

高築猿臺靈隱宮松花蕭雪綠蘿風畫師却有  
拏猿手不管霜牙射月中

梁溪集有靈隱宮詩 後邨題跋易元吉以  
畫猿光堯賜以詩案都穆鐵網珊瑚易元吉  
畫猿猱擇風圖有東坡題則元吉北宋人或  
光堯跋其畫不則另有一人又云元吉畫二  
猿俱有白牙識者云母猿方有白牙

春水平隄湖上下相攜早試踏青鞵花枝繞路  
山南北歸去還乘搖碧齋



尊生八牋抗人三月三日上踏青鞵 梁溪  
集詩雲深不見孤山寺風急難乘搖碧齋搖  
碧齋是當時湖船之名

萬松深處響秋濤路繞宮城氣象豪  
萬地西風一行雁山雲江月轉蕭騷

南窗紀談錢唐關注子東松聲詩夢破松聲  
枕上聞睡魔夜半戰金魂初疑夜雨連江岸  
乍覺寒潮上海門招引好風來古寺追隨月

色下前村晚行欲向聲來處鬱鬱蒼波盡日  
奔 元風雅黃子肅錢唐詩舟泊風林一雁  
聞白蘋紅蓼共思君月明江水多於海雨後  
秋山碧似雲

除却梅屏無好梅虞淵簿錄不須猜  
落花總入韓園去越果催從項里來

北磻集梅屏賦序北山鮑家田尼菴梅屏甲  
京都高宗嘗令待詔院圖進 名園記牡丹

南齊書 卷一  
三五  
渡江先入韓相園 會稽志會稽楊梅佳者  
出項里錢唐產者遜之入貢  
玉女朝天銀作粧詞臣雪宴捧雕章珠簾十二  
龍樓捲柳絮吹來浣粉香

艾軒集有賀雪表又有謝雪賜宴表 書畫  
題跋記宋寧宗楊皇后題畫冊云風吹醉面  
不知寒信脚千山與萬山天甃瓊街三十里  
更飛柳絮與君看後書題朱銳冊賜大少保

有坤卦小圓印少保即楊次山

花枝馬上蹙雙尖繡鎧非同舞袖纖亦有新詞  
傳禁苑清華直欲匹香奩

滄洲集閣子詩應是君王方右武內家仙子  
亦知兵 韻石齋筆談楊妹子寧宗皇后妹  
書法類寧宗御府畫多命題咏其題馬遠松  
院鳴琴詞云閒中一弄七弦琴此曲少知音  
多因淡然無味不比鄭聲淫松院靜竹樓深

夜沉沉清風拂軫明月當軒誰會幽心

柴柵牽名何太迂詩編著錄號江湖鶴山跋語  
題鴻寶鍾鼎能凌薛氏無

讀書附志江湖集九卷錢唐陳思彙本朝人  
之詩又刊六十家小集皆南宋人余插架有  
之 鶴山集書苑菁華序臨安鬻書人陳思  
集漢魏以來論書者為一編最為該博案此  
書凡二十卷後題臨安府棚北大街陳氏書

籍舖刊行又刊寶刻叢編二十卷皆金石文  
跋 鍾鼎彝器款識錢唐薛尚功用敏著凡  
二十卷皆三代以來款識之文尚功手書世  
傳石刻僅存其半尚功又有鍾鼎韻七卷  
千秋史法弘綱在十四經文舊目遺兩部聖言  
齊魯論一編帝學古今師

宋季三朝政要理宗嘉熙元年詔國子監下  
臨安府刊朱子通鑑綱目 禮記集說大戴

禮列於學官故當時有十四經之目 中興  
館閣書錄韓愈李翱共成論語筆解十卷王  
存序云此得於錢唐汪充家又通考云魯論  
二十篇齊論二十二篇多問王知道兩篇自  
張禹刪之斯文遂喪至南宋已難搜求矣  
帝學建炎四年禮部尚書謝克家等上言以  
故翰林學士范祖禹所著帝學有益治道可  
備睿覽案此書凡四卷

多少官人馬上看涼衫輕拂據雕鞍昨朝曲宴  
需雲殿親見官家進小冠

清波別志士大夫於馬上盡披涼衫 錢唐

鈔志古宮室考南宋大內有需雲殿 雲麓

漫鈔高宗時隆祐太后遺以小冠曰此祖宗

燕閒之所服也

內苑新營定一亭擬將射策卜文星無端竊得  
機關透造勝天翰墨有靈

三朝政要嘉熙二年廷對有邵澤攜京墨甚佳有中貴欲之邵無吝色中貴曰主上御苑中方建一亭名曰定一上曰有士人用此立說取為狀元邵得其說揮毫如飛上得此卷欲寘榜首時已取周坦乃以澤為榜眼知稼翁集放榜詩平地雷轟造榜天齋廊占籍幾春秋紬史翻經死不休不向殿前喫五盞儘判庾語冪缸頭

蠹齋鉛刀編送人失解詩紬史翻經有成約不應從此厭招邊 武林舊事上御集英殿唱進士名狀元賜酒五盞餘人各賜泡飯知稼翁集進士入試詩要令庾語題蠶白莫把元文覆醬瓿注臨安人以黜卷冪酒翻本蘭亭自取嫌寧知博議辨尖纖當時最好崇梨拓玉枕偏誇字格嚴

後邨題跋蘭亭定武石為薛氏子竊去今都

南齊書卷二  
城鬻者皆薛續本案都穆鐵網珊瑚薛珣作  
帥刻石易去 蘭亭續考蘭亭本流傳有玉  
有石有崇黎版木刻者佳 至正直記賈秋  
壑得一砭砭石枕光瑩可愛欲刻蘭亭而患  
其小有一鐫者以燈影覓其字宛如定武本  
缺損皆全賈開宴以賞之世號玉枕蘭亭今  
稱玉版者繆也

茸衫細氈錦鞵稜蕉萃珍珍痛不勝枉自監搜  
誇玉牒愁攤小雅映秋燈

宣和遺事二帝后北狩至真定府一番官妻  
自稱肅王女珍珍已戎服見太后訴舊事  
危學士集宋宗室士曠嘗錄羣從之言號為  
玉牒勝談 靖康小雅一卷紀北狩事此書  
通考失載

霜草稜稜健翮舒秋風獵獵海中虛南中那得  
巢生犬宮禁空傳味漱書

東園友聞北方雕作巢官司必設置守之凡  
三卵及出必有一狗耳上有羽毛獵時雕上  
飛狗則陸行所逐同至名曰鷹背狗 肯縻  
錄臨安有人好養鷹嘗見其几間有書一帙  
上題味漱二字皆飼鷹之法問所從來則曰  
先人在北司諸閣往來此從宮中得之  
國事已荒藍貌鬼南人惟恃黑灰團蠟丸夜達  
中書省只作牽絲撮弄觀

三朝政要丁大全藍色鬼貌既登寵位北兵  
渡江大全匿報幾誤國事遂謫竄而死 又  
北兵渡江臨安將謀遷蹕吳潛沮之向士璧  
曹世雄劉整皆有功似道並欲殺之整懼以  
城降北遂獻言曰南人所恃惟一黑灰團耳  
呂文德號黑灰團 杜清獻集奏藁臣蚤上  
得呂文德蠟書以捷聞既又有告急之說御  
筆降出云無甚迫急城中有恃而無恐耳

後村集端平之初除拜一新趙南塘起散地  
掌內制有觀傀儡詩云酒闌有感牽絲戲也  
伴兒童看到明

為有宮閨識小名又聞臺閣系羣英傳來都是  
臨安本粉墨閒銷與漫評

姬侍類偶周守忠集女子之名作偶聯韻語  
嘉定十三年刻於臨安行在諸軍糧料院幹  
辦鄭域序 自號錄錢唐徐光溥輯宋代名

人之號淳祐丁未其友譚友序而刊之 案  
諸軍糧料院在漾沙坑今蛾眉山東之淺山  
香奩弟子舊秦風詩法精深碑版工莫效長牋  
怨夫聳徒揮老淚倚熏籠

四朝詩集云閨秀韓玉父秦人家於杭李易  
安教以詩 雲麓漫鈔易安居士有投內翰  
綦公崇禮啟清照啓素習義方羸明詩禮近  
因疾病欲至膏肓牛蟻不分灰釘已具嘗藥



雖存弱弟應門惟有老兵既爾蒼皇因成造次信彼如簧之說惑茲似錦之言弟既可欺持官文書來輒信身幾欲死非玉鏡架亦安知僂俛難言優柔莫決呻吟未定強以同歸視聽才分實難共處忍以桑榆之晚節配茲駟僮之下才身既懷臭之可嫌惟求脫去彼素抱壁之將往決欲殺之遂肆侵凌日加毆擊可念劉伶之肋難勝石勒之拳局地扣天

敢效談孃之善訴升堂入室素非李赤之甘心外援難求自陳何害豈期末事迺得上聞取自宸衷付之廷尉被桎梏而置對同凶醜以陳詞豈惟賈生羞絳灌為儕何啻老子與韓非同傳但祈脫死莫望償金友凶橫者十旬蓋非天降居囹圄者九日豈是人為抵雀捐金利當安往將頭碎壁失固可知實自繆愚分知獄市此蓋伏遇內翰承旨搢紳望族

南齊書 卷二 四十三  
冠蓋清流日下無雙人間第一奉天克復本  
緣陸贄之詞淮蔡底平實以會昌之詔哀憐  
無告雖未解驂感戴鴻恩如真出已故茲白  
首得免丹書清照敢不省過知慙捫心識媿  
責全責智已難逃萬世之譏敗德敗名何以  
見中朝之士雖南山之竹豈能窮多口之談  
惟智者之言可以止無根之謗高鵬尺鷃本  
異升沉火鼠冰蠶難同嗜好達人共惜童子

皆知願賜品題與加湔洗誓當布衣蔬食溫  
故知新再見江山依舊一瓶一鉢重歸猷畝  
更須三沐三薰忝在葭莩敢茲塵瀆案易安  
再適張汝舟竟至對簿啓在臨安作也時崇  
禮官翰林學士

舊說南朝三百寺猶餘兩碣未頑孱誰知千古  
忠姦蹟却在波崖泐石間

興福禪院碑淳熙七年周邾撰記劉士莊書

廣壽慧雲寺碑史浩撰記樓鑰書此又稱  
張家寺 熙寧石屋題名陳襄蘇頌孫奕黃  
顥曾孝章蘇軾同遊熙寧六年二月二十一  
日案咸淳臨安志蘇公題名黨禁時已鐫去  
今摩崖朗然後人重公之名而補刊也 咸  
淳石屋題名咸淳三年九月二十八日賈似  
道領客束元嘉史有之廖瑩中黃公紹王庭  
來游子德生諸孫蕃世侍案此段摩崖賈名  
漫滅後人惡賈而毀之

黃鶯枝上盡情啼何處西陵路欲迷款款朱輿  
繞湖去相君心愛白沙隄

吳越備史西陵即今西興錢王渡江以陵非  
吉語因易之案此則錢唐稱西陵繆也 咸  
淳臨安志無白公堤所謂白公築之堤在上  
湖與下湖相隔處公自著錢唐湖石記可証  
今人所指之白堤即白詩所云綠楊陰裏白

沙堤白公前已有之宋時稱孤山路故成化  
府志猶無白隄之名 三朝政要賈相出乘  
朱輪輿自葛嶺至宮城繞隄而行

嬌女如花掩畫屏牙旗小校閉松廳新書仿出  
奇奇集更著兵門蟋蟀經

志雅堂襍鈔賈師憲嘗刊奇奇集萃古人用  
兵之法蓋自誇其援鄂之功也 世傳新書

曹孟德著 蟋蟀經三卷相傳賈秋壑著詞

頗雅馴有更籌帷幄選將登場諸語徽藩嘗  
有繪畫本

鴟夷不逐五湖雲那肯鎔金獨范君黃土搏成  
終是偶沉香爇盡更誰熏

三朝政要賈似道既占湖山之勝作半閒堂  
延羽流塑已像其中 元祕書志延祐七年  
五月中書省簿籍諸物有賈似道畫像二軸  
研朱嵌墨離文似沁綠塗青銅甌如久已朝堂

不設鼓無勞齋館有辭書

三朝政要景定五年造金銀見錢關子其制  
上墨印如西字中紅印三相連如目字下兩  
傍各一小黑印宛如一賈字 又賈似道當  
國置綠櫃招人告訐 清波別志行在登聞  
鼓院有院無鼓以鼓在汴京茲不復設 三  
朝政要太學生陳東上書輒累百人令臨安  
尹遂游士并削其籍諸生作捲堂文以辭先

聖案太學在紀家橋今按察司署

水西雲北景蒼蒼花塢風晴月有香何似梅花  
裡湖好長留孤影照滄浪

洺水集三賢堂記乾道中移三賢於水仙王  
廟東廡雖摘取坡公詩配食水仙王之意俛  
居廡下慢賢滋甚郡守袁韶搜得花塢一所  
當蘇隄正中建堂奉安又初三堂曰水西雲  
北日月香花影日晴光雨色 興觀集詩咸

平處士誠堪羨死守梅花住裡湖

爛爛珠光散不收香烟縈郁水空流皇家寶異  
誰經識冊府猶堪按籍求

至正直記宋臨安時有以徑寸珠進御一宦  
官求賂其人不從宦官取絲絡珠於梁焚乳  
香熏之須臾化為水宦官云此非明珠乃猿  
對月凝視久墮淚含月華而結成也 寶貨  
辨疑一卷宋時掌公帑者所錄凡物源產地

用法皆詳述

三千上玉只焚身雲氣終虛屍氣親二十金釵  
共垂手九歌聲裡哭孤辰

三朝政要賈似道愛珍寶聞余玠有玉帶發  
塚取之 志雅堂襍鈔盧方喜作秋壑記九  
歌

錦刻蒲桃稱異色當時諫史絕奢華後來輿論  
成謠詠玉碎琉璃號假花

中興編年淳熙中蜀貢蒲桃錦却之從臺臣  
諫也 佩韋齋輯聞咸淳末禁都下婦人飾  
珠翠悉以琉璃代玉民謠曰滿頭多是假無  
處不琉璃時似道當國假謂賈琉璃謂流離  
也

墨花零亂浣殘脂獨爾烏闌寫妙詞休話平康  
舊都事蔡奴留影傳師師

四朝詩集云南宋杭妓能詩者蘇小娟 後

村詩話汴妓部六即蔡奴也元豐中命待詔  
崔白圖其貌入禁中 敏求記李師師小傳  
一卷臨安刊於榷場中 老學菴筆記潘子  
賤有題蔡奴傳神語云嘉祐間風塵中人亦  
如此嗚呼盛哉則蔡奴留影正南宋事也潘  
為紹興中人

燕子帶來雙翦雨梨花老去一絲風啼痕染就  
紅心草誰葬金釵葛嶺東

桐江集木綿怨序云賈似道南竄猶攜所謂  
王生沈生者自隨二生天下絕色也木綿菴  
既殂二生再展入北後南還善事貴人巧伎  
藝拙女功願再鬻人為妾因寫之樂府以為  
世戒

會向歌樓喚酒京不煩東帶疑逢迎玉缸若藉  
麤罌佐祕色新來雨後晴  
雲麓漫鈔都人呼酒瓶為酒京侯鯖錄有酒

經晉安人餽酒致書云或一經或五經他邦  
人不知其義聞送五經東帶迎於門 又青  
麤罌李王祕色為最近臨安亦自燒之殊勝  
於前

自是清才繼玉瀾鸞釵劃損綠琅玕桃墩總有  
傷心淚勒斷筋弦不忍彈

斷腸集朱淑真錢唐下里人世居桃村工為  
詩嫁為市井民妻不得志歿宛陵魏仲恭端



禮輯其集名曰斷腸錢唐鄭元佐加注分為  
十卷刊行有臨安王唐佐傳今失之世所傳  
二卷田藝衡序者繆也 四朝詩集云淑真  
海寧人文公姪女 玉瀾堂集朱棣字逢年  
文公叔父少負才不得志晚年節愈厲而詩  
益高因夢名堂曰玉瀾尤延之為序  
我曾把讀梁溪集五世三公喬木材此日君臣  
咏魚藻湖園親駕翠龍來

梁溪集尤袤延之著凡五十卷 萬柳溪邊  
舊話先莊定公築圃臨安之西湖度宗嘗幸  
其堂御筆題楹間曰五世三登宰輔奕朝累  
掌絲綸

宮袍掩映牡丹緋裊裊鞭絲出禁闈寄語香街  
探花使今年春榜號龍飛

朝野類要聞喜宴日選年少二人先到瓊林  
折花迎狀元吟詩此唐制今人謂第二名為

探花者非也 又每遇主上即位第一次選士謂之龍飛榜

蕊珠淡墨尋常事尚見同班兩錄留千古香名磨不滅後來應號小瀛洲

紹興十八年王佐榜同年小錄寶祐四年文天祥榜登科錄此二錄後有翻刻為有朱文公及文信國耳文公名在第五甲第九十人字元晦小名沈郎小字季延信國第一甲第

一名字宋瑞小名雲孫小字從龍案後村集有甲申同班小錄序即題名小錄也 水天閣集小瀛洲石簣為商半楚題以其地近依光堂南宋進士題名之處

十里平湖波浪深大魚成抱小魚針放生不禁魚兒活贏取豪家幾笏金

金石志有高文虎德生堂碑記案慶元中安撫趙師異請用天禧故事以西湖為放生池

則通西湖皆稱放生池非今一隅之地也德  
生堂在石角橋今昭慶之側而淳熙虞公謂  
堂在湖心寺指今之放生池殊不知宋時湖  
心寺即今之湖心亭舊志多訛舛余修邑志  
駁正之 夢梁錄金魚有銀白玳瑁等色錢  
唐門外多蓄養之入城貨賣名魚兒活  
羅屏掩處添三尺蘇幕遮來抵一重若使藏鉤  
勝隔座為因鬪草代分拳

雲麓漫鈔紹興末中官以小竹編聯籠以衣  
畫風雲鷺鷥名曰畫絲好事者大其制施於  
酒席或野次可以障風易其名曰挂愚又言  
出於金中目曰話私言遮蔽可話私事然言  
為話南人方言非北語也

玉龍萬捲發靈虛畫裡濤江壯帝居只道鳧車  
迎伍相不知水馬弔三閭

七修續藁葉南屏家有宋宮觀濤圖案圖李

嵩畫見張憲王筍集 稊米集詩江風獵獵  
吹紅旗舟人結束誇水嬉又云飯筒角黍纏  
五綵楚俗至今猶未改日暮空歌誰在斯不  
見三閭憔悴時案周紫芝此詩言錢唐江中  
競渡也他志只言在西湖耳紫芝官臨安久  
其言有據 尊生八牋南方競渡使舟輕利  
謂之飛鳧又曰鳧車有詩云水馬浮江弔屈  
魂

南朝剝有虞公劍能比金源水造刀待與青城  
閒鼓柂西風一葉泛離騷

朱存理鐵網珊瑚宋相虞雍公古劍傳於其  
八世孫堪處倪瓚作古歌 志雅堂襍鈔伯  
幾家有篋刀乃大金水總管所造上有滲金  
鐫水造二字直鈔十錠 倪雲林集堪字克  
用僑居錢唐四壁山有鼓柂稿

桐華烟細不須多案上牀間置幾螺怎得清芬

西苑雜言 卷二 五四  
如帝子請將墨史試研摩

墨史澤州胡景純取桐油燒烟製墨名桐華  
烟 又南朝皆稱墨為螺 又趙令衿宋宗  
室封安定郡王善製墨子子覺孫伯康皆傳  
其膠法銘曰超然清芬如在超然令衿自號  
春宴遺風自曲江水晶雲殿百花牕熒煌燈火  
錢唐夜十隊酣春賽不降

朝野類要行都西湖寒食前排辦春宴用舟

載伶妓此唐曲江之遺自諸王公卿及六曹  
郎排日宴會並是京尹館伴 天籟集西湖  
詞十里水晶雲殿 夢梁錄湖船有百花十  
樣錦等名 霞外集詩店舍喧譁徹夜開熒  
煌燈火映樓臺歡游未曉不歸去早有元宵  
氣象來 剡源集咸淳德祐中抗有善歌者  
十人各以才色聞天下兵後散失

檐車小隊出通津艷紫文羅半隱身縱使凌波

步羅襪不爭水路蹙絲塵

清波別志婦女步通衢以方幅紫羅障蔽半身謂之蓋頭凡貴游出令人持鍍金水罐子前洒方過車名曰水路此猶汴京之遺風也井汲甜瓜分外清十街三市幾番更水銀不願天宮賜只願官除竹木征

夢梁錄六部前有甜瓜井 清波別志臨安人移屋以傍井處為佳 中興編年紹興二

十六年七月臨安雨水銀 三朝政要紹定五年臨安蠲竹木之征

潮拍樁滄卦畫齊蛟官荒怪漫然犀鱗蟲水母差堪異更詫毛羣膺胸臍

吳越世家疑辯錢武肅築塘以木立於水際去岸二丈九尺立九木作六重象易既濟未濟卦由是潮不能攻 龜溪集錢唐水母詩眼中水怪狀莫名出沒沙嘴如浮嬰渾沌七

竅俱未形塊然背負羣鰕行 清波別志臨  
安小民往江口見潮退有一異物褐色有毛  
有牙有脚有鼻有耳骨軟似不任持重三四  
十斤或名為海狗後有貴人詢其形狀曰此  
脛肭臍也

五醖封蒸按舊經亭童取汲水清渟河陽風月  
依然是况有如花儂酒伶

晏公類要江南五醖酒 稊米集論麴院書

酒與麴相須而成在乎擇水之佳者西湖之  
水清甘如飴其外則用龍山鴻雁池水南外  
用巡檢司大井水江漲北外用下湖水 夢  
梁錄臨安府點檢司管城內外諸酒庫每年  
清明前開煮擇日開沽呈樣各庫預貼告示  
官私妓女社隊鼓樂謂之迎煮 汴都記酒  
家望上書河陽風月

湖目全憑水結叢琉璃地上旱蓮紅鴛鴦豈是

能言鳥啞啞經魚粥鼓中

北磧集白蓮花寺在風篁嶺下肇法師誦經  
於此蓮生陸地鴛鴦亦解誦經 湖目蓮子  
見皮日休詩

一生難報狀元恩日月精光吐復吞不信漁陽  
撾鼓急回頭無路哭修門

文信公傳巴延駐軍臯亭山公往議和巴延  
以危言折之公謂宋狀元宰相所欠一死報

國耳 文山全集鹿鳴宴詩有云二宋高科  
猶易事兩蘇清節乃加榮囊書自負應如此  
肯遜當年襮正平自注提舉李愛梅迪舉送  
弟璧同薦是年及第 指南錄序臯亭山距  
修門三十里

寒鴉啼上萬年枝一片荒坪月去遲滾滾蠻潮  
等閒過蓬葩江上弔鴟夷

江月松風集故宮詩寂寞萬年枝上月夜深



南齊書 卷二  
猶照舊宮牆 滄洲集羅公升之大父從文  
丞相於閩廣兵敗不食死公升傷大父死節  
而宋祚已終乃作弔胥濤賦 蓬葩見劉義  
詩

夢斷羅衾冷似冰 嘒嘒紅喙語雕棱 木波不斷  
幽人怨梧葉聲中蟋蟀燈

乾坤清氣集瀛國公鸚鵡詩毛羽自然可數  
仙禽不受樊籠銜得梧桐一葉中含無限秋

風 湖山類葉瀛國公為僧號木波講師  
投老湖湘更不歸 哀江南後淚空揮 傷心醜酒  
城南路親見鸞皇作隊飛

金臺集水雲北歸後往來匡廬彭蠡間若飄  
風行雨人以為仙畫其像祀之 宋遺民錄  
謝翺賦續琴操哀江南四章為錢唐汪元量  
作也按水雲集元量以琴供奉扈駕北行既  
而以黃冠放還德祐主贈之以詩宮妃屬和

以勸君更盡一盃酒西出陽關無故人分韻  
王清蕙陳真淑黃慧真何鳳儀朱靜真葉靜  
慧孔清真鄭惠真方妙靜翁懿淑章妙懿蔣  
懿順林順德素真淑又有章麗真素真真金  
德淑總十七人其詩並見集中余家藏元量  
水雲集及湖山類藁二本互有不同  
千古靈胥氣未銷青霓曳曳下雲翹巫師但擊  
靈鼉鼓更有何人賦大招

金龍山聖蹟記謝公緒會稽諸生居錢唐安  
溪謝太后姪也三宮北行公投安溪死門人  
葬於鄉之金龍山明太祖呂梁之捷神顯靈  
遂敕封金龍四大王立廟於黃河之上余修  
錢唐邑志補入忠節傳

傳道尋春四壁還江清湖淥有無間元和圖牒  
分明見何處沈霾界石山

朱存理鐵網珊瑚倪瓚題虞堪八世祖雍公

古劍歌序云余訪青城山樵於錢唐之四壁  
山案此山之名咸淳志不載後來作志者均  
失之 元和郡國志錢唐載二山一靈隱一  
界石今界石之名宋志已無今不可考  
故事全憑共討論江關老去鳳皇門華胥醒後  
黃梁熟便話南柯也不根

松隱集德壽宮帖子向晚天中月一痕春陽  
先到鳳皇門 東京夢華錄幽蘭居士孟元

老追叙東京舊事書成於紹興丁卯自為序  
淳熙丁未浚儀趙師俠後序 夢梁錄吳自  
牧自序云昔人卧一炊頃而平生事業數歷  
皆遍矧時異事殊城郭範圍之富風俗人物  
之盛焉保其常緬懷往事殆猶夢也因名夢  
梁錄 養蒙集南柯錄序御前提點錢唐劉  
君久居禁近逮事皇元不失故步退食多閒  
追記舊聞名曰南柯錄蓋紀曩日繁華事也

案此編失傳名亦無考

名集猶傳六十人湖雲江月話津津而今花柳  
新題處况是欣逢寶歷春

南宋六十家小集錢唐陳思彙集本朝人之  
詩集尾書刊於臨安府棚北大街陳氏書籍  
舖者是也題曰羣賢小集鄱陽洪邁野處類  
稿二卷臨川危正巽齋小藁一卷螺川羅與  
之雪坡小藁二卷滄洲高九萬鞠礪小集二

卷臨江鄒登龍梅屋吟一卷盱江余觀復北  
窗詩藁一卷開封趙崇錡鷗渚微吟一卷古  
徐朱南杰學吟一卷古栝王琮雅林小藁一  
卷芳庭斯植采芝集二卷錢唐陳起芸居乙  
藁一卷雲川吳仲亨鞠潭詩集一卷龍泉沈  
說庸齋小集一卷唐栖釋永頤雲泉詩集一  
卷金華王同祖學詩初藁一卷四明陳允平  
西麓詩藁一卷錢唐何應龍橘潭詩藁一卷

南齊書詩 卷二  
柯山毛珣吾竹小藁一卷臨江鄧林皇華曲  
一卷壺山許棐梅屋詩藁四卷清源胡仲參  
竹莊小藁一卷三山陳鑒之東齋小集一卷  
浮玉施樞芸隱橫舟藁一卷又芸隱倦游藁  
一卷建安徐集孫竹所吟藁一卷盱江吳汝  
式雲卧詩藁一卷古汴武行適安藏拙餘稿  
二卷四明高似孫竦寮小集一卷建安葉紹  
翁靖逸小集一卷河陽張弋秋江烟草一卷

建人張至龍雪林刪餘一卷金華杜旃癖齋  
小集一卷廬陵劉仙倫招山小集一卷玉溪  
嚴粲華谷集一卷盱江黃文雷看雲小集一  
卷汴人趙希櫛抱拙小藁一卷丹陽葛起耕  
檜庭吟藁一卷碧澗利登骹藁一卷廡村薛  
岵雲泉詩一卷山陰葛天民無懷小集一卷  
錢唐余桂漁溪詩藁一卷又漁溪乙藁一卷  
長沙劉翰小山集一卷大梁張良臣雪窗小

集一卷邗州張蘊斗野稿支卷一卷南豐黃  
大受露香拾藁一卷三山林希逸竹溪十一  
藁一卷長樂敖陶孫臞翁詩集一卷建安朱  
繼芳靜佳龍尋藁二卷閩人陳必復山存存  
藁一卷長樂林尚仁端隱吟藁一卷剡溪姚  
鏞雪蓬藁一卷福唐劉翼心游摘藁一卷春  
陵樂雷發雪磯叢藁一卷茗川宋伯仁雪巖  
吟草一卷天台戴復古石屏續集四卷笠澤

葉茵順適堂吟藁一卷廬陵劉過龍洲小集  
一卷石塘林同孝詩一卷荷澤李龔梅花衲  
一卷又翦緇集二卷鄱陽姜夔白石道人詩  
一卷臨川李濤蒙泉詩一卷陽穀周文璞方  
泉詩一卷廬陵沙門紹嵩江浙紀行集句七  
卷宣城吳淵退安遺藁二卷永嘉薛師石瓜  
廬詩一卷又陳起宗之編前賢拾遺五卷又  
編增廣高僧前後集四卷此編流傳絕少特

著其目如右 石屏集詩聖朝開寶歷又云  
江山一夜雨花柳九州春



國家圖書館, NATIONAL CENTRAL LIBRARY, TAIWAN, R.O.C.

南宋禱事詩

卷三 一百首

仁和陳芝光撰

元朔朝正海國來聽雞探蠶曉光催千官鵠立  
瞻天表萬歲聲長繞殿雷

夢梁錄元旦禁中景陽鐘罷百官皆冠冕朝  
服諸州進奏吏各執方物之貢諸外國正副  
賀正使隨班入賀上御正衙禁衛人高聲嵩  
呼聲甚震名為繞殿雷百僚俱鞠躬聽宣制





南齊書 卷三  
一  
曰履茲新慶與卿等同 斗野藁除夕詩京  
國逢除夕栖遲鬢欲霜春聲生爆竹歲色動  
椒香戒睡聽雞蚤占詩探蠶忙燭花頻送喜  
兒女笑闌堂

金釘彎橋白玉裝幽奇全勝偉觀堂假山勅賦  
壺天景又見香蘭設御牀

癸辛襍識德壽宮有橋乃中秋賞月之所橋  
用吳璘所進階石甃之瑩徹如玉以金釘鉸

橋下皆千葉白蓮花水南岸宮女童奏清樂  
水北岸教坊樂工吹笛者二百人 方輿勝  
覽中和堂太上光堯皇帝御書謂斯堂偉特  
之觀無媿上都薰風南來我意雖暢願與衆  
人共之後改為偉觀堂 海野詞侍宴德壽  
宮應制賦假山調寄醉蓬萊云向逍遙物外  
造化工夫做成幽致杳靄壺天映滿空蒼翠  
聳秀峰巒媚春花木對玉堦金砌方丈瀛洲

非煙非霧恍移平地况值良辰宴遊時候日  
永風和暮春天氣金母龜臺傍碧桃陰裏地  
久天長父堯子舜燦綺羅佳會一部仙韶九  
重鸞仗年年同醉 宋史新編理宗在位久  
董宋臣盧允升作芙蓉閣香蘭亭宮中進倡  
優傀儡以奉帝遊宴

翠寒堂上賞春風壯麗由來絕代工小憩肩輿  
高柳下醪醕飛雪壽杯中

二老堂襟志淳熙七年三月十八日車駕詣  
德壽宮恭請太上皇帝壽聖皇后於是乘輿  
至大內於凌虛閣下三面設醪醕牡丹花皆  
層級高數尺一面垂簾設樂酒三行太上皇  
帝壽聖皇后聯步輦以行今上亦步輦從至  
翠寒堂棟宇顯敞不加丹雘太上指示曾覲  
云營造何如覲奏曰宏壯精巧二者兼之今  
上即曰凡此鉅材一椽已上皆出太上皇帝

所賜酒復數行至水堂中路石橋上肩輿少  
憩面對醑釀花架高柳參天醑釀引蔓垂梢  
而下其長袞丈芳菲照坐馥郁襲人上亦滿  
引勸酬者三

柳陰橋影步忘歸樓榜雙清碧四圍消得騷人  
奇絕想荷花欲翦嫁時衣

庸齋小集西湖獨步詩小立背橋影緩行隨  
柳陰 方壺存藁秋日飲錢唐門外雙清樓

詩西湖日日可尋芳樓上憑闌意未忘斫取  
荷花三萬朵作他貧女嫁衣裳

老木雲煙望裏平小春橋外水風聲猶餘圖畫  
雙杉古誰把青龍指下生

蛻菴集鳳山詩衰草寒煙老木風南朝佳氣  
落秋空 余忠宣集九里松詩言從天竺寺  
自度小春橋 傅與礪集有題李遵道畫靈  
隱道中二杉圖 犁眉公集題松雪松圖注

云松在白堦詩云趙公拈筆作古松平地躍  
出三青龍又云前朝美人鬪草處猶有當時  
數株樹 案小春橋即行春橋  
醑醑如雪酒初醒修竹風搖著作庭曾說牙籤  
紛萬軸不如丹筆寫盤銘

梅溪集有祕書省道山堂看醑醑詩 又題  
祕書省後園修竹詩不俗更嫌俗風枝時拂  
牆青青映藜燭細細襍芸香勁節老方見清

陰寒影藏蕭疎似吾輩味向靜中長 藤陰  
劄記光宗讀朱子編次盤銘丹書語朱子曰  
宮中嘗讀之其要在求放心朱子頓首謝  
沙河燈火接星關洞裏神龍去不還部伍亭前  
空綠草戴高祠畔賸青山

默堂集初到臨安詩風際篴弦朝病酒雲中  
樓閣夜焚香十年一夢沙河路獨步春泥覺  
燕忙 抱拙小藁臨平洞兩洞深如許神龍

南齊書 卷三  
此奠居 默堂集詩部伍亭前歸路鳳皇山  
下蕭齋我自無聊不住君如有興重來 晞  
髮集吳山謁祠詩吳山坊頂戴高祠禁地淒  
涼江水悲却是北人題記壁迤南者舊獨無  
詩

思陵筆格入鍾王搜得麻牋僅九行試看當年  
題識在磁藍籤色逼靈光

續書譜高宗書法出入鍾王更輔以六朝風  
骨自成一家人 松雪齋集王獻之洛神賦十  
三行二百五十字人間只有一本是晉時麻  
牋紹興間思陵力購僅得九行一百七十六  
字至賈似道復得七十四字 裝潢志宋徽  
宗金章宗多用磁藍紙泥金字貼籤殊臻壯  
偉之觀高宗亦用之

梅竹勻將扇面攤江南情思落齊紈可知青紙  
為承萼儉德猶留後世看

夢梁錄夜市有崔官人將字攤梅竹扇面兒  
在五間樓前大街坐舖 玉山璞藁題宋高  
宗意思便面詩當朝山色尚烟嵐近侍承恩  
罷早叅邊奏不來春殿寂自將情思寫江南  
嬾真子紹興三年六月明州阿育王山住  
持淨曇以宸奎閣所藏仁宗御書詣行在所  
獻凡五十三軸又有團扇三柄皆以青牋紙  
為承萼制度極草草大哉仁宗之盛德也

和王世澤有文孫猶記當時雲洞園搜輯九經  
奇字在更饒六帖與評論

六帖補呂午序云楊伯崑號泳齋和王曾孫  
輯六帖補最精核往與予同仕於朝出示此  
編命為之序泳齋又作九經補韵行於世  
天竺山西巖谷深松蘿交翠自成陰老禪慣與  
猿公戲攫果時來樹下唵

帝都賦傍西深入巖谷益秀 竹所吟藁下

竺看猿詩渴泉飲罷過別枝株守山林得便  
宜伸手攫拏野僧果貴游玩弄如兒嬉

一山桃李占繁華武庫旗翻寂不譁回首蓬萊  
雲氣近殿司營是太師家

龍洲集同郭殿帥遊鳳山詩廉纖小雨久於  
梅喜得新晴亦快哉五色波光麗鳩鵲十分  
雲氣近蓬萊旌旗側畔宮牆轉戈戟叢中武  
庫回走馬看花生怕晚果然桃李一山開

揮塵後錄蔡元長少年鼎貴建第錢唐極為  
雄麗全占江湖山林之勝今行在殿前司是  
也 案殿前司在鳳皇山大內側今呼御教  
場

纔過燒燈小雨收玉梅飛上玉搔頭  
湮槃勝會花生日看畫長明寺裏遊

斷腸集元夜詩壓塵小雨潤生寒雲影澄鮮  
月正圓十里綺羅春富貴千門燈火夜嬋娟

香街寶馬嘶金轡輦路輕輿響翠輶高掛危  
簾凝望處分明星斗下晴天 夢梁錄杭城  
大街春冬撲賣玉柵小毬燈奇巧玉柵屏風  
捧燈沙戲走馬燈鬧蛾兒玉梅花金橘數珠  
糖水魚龍船兒梭毬香鼓兒等物 又云仲  
春十五日為花朝節崇新門外長明寺建佛  
涅槃勝會羅列幡幢種種香花異果供養掛  
名賢書畫設珍異玩具觀者紛集竟日不絕

六日七分添線處五更三點賀冬時地瓶移插  
梅花吐繡疊簾旌喚舞兒

詩林韶濩周必大云冬至與胡邦衡小語端  
誠殿下邦衡舉易緯六日七分之說輒用子  
美五更三點為對 霞外集至節即事詩天  
街曉色瑞煙濃名紙相傳盡賀冬繡幕家家  
渾不捲呼盧笑語自從容昨夜梅花已報春  
地瓶移插更精神酒酣纖手爭來折鸚鵡回



頭不敢嗔已有紗籠照舞兒喧喧鼓笛自相  
隨誰家院落來呼喚門外天明也不知簾旌  
疊疊繡鮫綃遮護香風不放消却恐酒闌先  
睡去預教小玉問明朝 案馬霞外自序云  
年少承平之樂誠不易逢也

宋家南渡擬東遷為有遺經大道傳不比五山  
魚十刹崇儒但賦北山篇

勿軒集周東遷而夫子出宋南渡而文公生

世運升降之會三綱五常之道所寄也 又  
南渡初文定胡公造行都有以程氏之學盛  
行為言公愀然曰吾以程氏之學不行為懼  
何言盛耶 梅村集宋元以來浙東西分立  
五山十刹而靈隱居其最 仁山集北山之  
高一篇美咸淳天子謂其能繼理宗師賢而  
聘何夫子也何即北山先生名基

章公太學原奇士周子兵樞亦勝流天下何曾

南定禮記言 卷三  
有鵬卵人間可惜重魚頭

齊東野語外大父文莊章公少入太學為集  
正嘗置酒揭饌單於爐亭品目多異其間有  
鵬卵者最奇大如瓜片切餛釘大盤中衆駭  
愕不知何物其法乃以鳧彈數十黃白各聚  
一器先以黃入羊胞蒸熟次復入大猪胞以  
白入之再蒸而成按章名良能寧宗時登政  
府 二老堂襍志紹興辛巳予為祕書省正

字同館王十朋望見周麟之樞密目為魚頭  
公問其故云前歲為大金哀謝使金主喜之  
享以所釣牛魚非舊例也樞公糟其首歸獻  
於朝故有此號金人甚貴此魚直與牛同  
海陵集予憩燕山會同館有梁大使者先朝  
內官也入館傳旨賜金瀾酒二尊銀魚牛魚  
二盤 演繁露牛魚背長鱗硬頭有脆骨重  
百斤即南方鱠魚也

夢兒亭下蘚紋青更著佳名謝履亭誰賦池塘  
春草句只啗五字對山屏

靖逸小藁登謝履亭贈行之詩君家靈運有  
山癖平生費却幾緡履從人喚渠作山賊內  
史風流定誰識西窗小憩足力疲夢賦池塘  
春草詩只令履朽詩不朽五字句法誰人追  
自注云亭在天竺 案西湖志有夢謝亭無  
謝履亭

龍眠古器寫形新骨董流傳入要津六十卷中  
彝鼎字不知曾否辱狂秦

揮麈錄李伯時自畫其所蓄古器為一圖舊  
在畢少董處少董死迺歸秦伯陽熺 學古  
編云博古圖六十卷紹興間本今無矣

黃羅封麪賜頻叨德大王侯始食牢夢裏紅衣  
有歌句普門何必更相遭

全芳備祖蘇公詩註大內當麥熟時以黃羅

南齊書 卷三  
十一  
帕封賜百官外題曰新麪或云以蜜漬尤佳  
今內廷猶仍此制 墨憨齋笑纂翟公巽紹  
興初為參政自奉過薄謂客曰德大於天子  
可以食牛德大於諸侯可以食羊所進皆草  
具 夷堅別志杭人有中麥毒夢紅衣孃子  
悲歌有一丸蘆葦火吾宮之句 咸淳臨安  
志上天竺觀音祈夢極靈兩浙進士類試者  
恒往焉多以食物著驗

緝熙小殿研山排御墨流香記損齋天語微聞  
先八法真書派別出垂釵

輟耕錄葉世英造德壽宮墨葉邦憲造復古  
殿墨劉士先造緝熙殿墨 志雅堂襍鈔高  
宗御書損齋二大字并損齋記後有左僕射  
沈該以下聯名 法書通釋宋高宗云士於  
書法必先學真書以八法皆備不相附麗蓋  
篆隸之餘風

南宋補遺詩 卷三  
五柳園前柳線低  
新開門外草痕齊  
若從新路看花去  
一片紅隨碧玉蹄

都城紀勝新門外五柳御園  
咸淳臨安志  
五柳園在金剛寺北  
按即今之板兒巷內也  
又云走馬塘在艮山菜市門外地平坦可馳  
馬故名舊有花柳號城東新路

鄂字書成壯氣存  
臨安何處望中原  
蘆川亦有英雄語  
禾黍西風鼓角喧

揮塵新譚有請僊者箕書一詩云百戰間關  
鐵馬雄尚餘壯氣凜  
秋風有時醉倚箕山望  
腸斷中原一夢中  
後大書一鄂字始知為武  
穆也  
蘆川詞賀新郎送胡邦衡待制赴新  
州云夢繞神州路  
悵秋風連營鼓角  
故宮禾黍  
案張仲宗以此詞忤秦檜除名

活水穿田一徑微  
麥潮化蝶作團飛  
蟠龍舞鳳盆花樣  
多向都城賣却歸

西麓藁馬塍道上詩閒拖瘦竹筇獨步馬塍  
東鳥影青山外春愁碧樹中麥潮風化蝶櫻  
熟雨生蟲莫向溪頭去溪頭多落紅 斷腸  
集馬塍詩一塍芳草碧芊芊活水穿花暗護  
田蠶事正忙農事急不知春色為誰妍 夢  
梁錄錢唐門外東西馬塍諸圃皆植怪松異  
檜竒花巧果多為龍蟠鳳舞之狀每日市於  
都城

石八郎祠社鼓鳴龜兒井畔聽溪聲千林吹落  
梅花雪一段清愁畫不成

咸淳臨安志安樂山在錢唐下有石八郎祠  
龜兒井在西溪覆以石龜穴其背以汲 雪  
窗小集過西溪詩菴畫層波蕙草荒冷雲客  
雁兩回皇梅花到得吹成雪盡是清愁不是  
香

侍讀清才進美譽一筒散卓拜中書叢奎自愛

屠希手入貢澄心紙不如

渭南文集紹興之間有筆工名屠希者嘗從  
駕四方皆貴希筆一筒至千錢晁侍讀以道

作詩稱譽之 六研齋筆記謝墜知徽州於

理廟有椒房之親貢新安四寶澄心堂紙汪

伯立筆李廷珪墨羊鬪嶺舊坑硯

鍛銀枉為問工儔帶格曾傳號笏頭不信還來  
玉抱肚可能勝得紫雲樓

瑯琊漫鈔孝宗乾道中有以銀礦獻於朝上

命守臣詢究且將召冶工即禁中鍛之 帶

格凡三十二種其首為笏頭一字執政佩之

至鍛銀塗銅各有名號 宋稗類抄王荆公

受賜玉帶號玉抱肚紹興中王之曾孫璫復

進入禁中 格古要論王佐紫雲樓金帶考

太宗得巧匠親督視於紫雲樓下造金帶得

三十條以一賜曹彬一以自御餘皆貯庫號

鎮庫帶封鐫甚嚴至徽宗以賜童貫諸人欽  
宗復追還庫高宗紹興十三年有客來自海  
外忽出紫雲樓帶蓋欽宗取追不及者上出  
四鈔示岳珂其金紫磨地光艷溢目其文作  
醉拂林人皆突起長不及寸眉目生動其華  
紋則又六七級鏤篆之精若入鬼神

懷蘇何處覓芳叢捧壁擎珠繡戶中休向酒邊  
尋搭子京塵空度杏花風

嘉禾百咏註懷蘇亭在禾城東宋時建與蘇  
小墓相望故名 江行襍錄京都不重生男  
凡生女則愛護如捧壁擎珠甫長則隨其姿  
質教以藝業因備士大夫採擇 袖中錦京  
師婦人美者謂之搭子陋者謂之七蓋搭子  
者女傍著子為好字七字不成女字謂其不  
成婦女也 存餘堂詩話嘗見宋刻一詩云  
客懷耿耿自難寬老傍京塵更鮮歡遠夢已



回窗未曉杏花風度五更寒因讀渭南集乃知其都在都下作也

都亭館伴禮殷勤向冷泉亭坐夕曛無奈西湖銷滴水筆端驕語記煙雲

方輿勝覽都亭驛在候潮門裏國信所北使至闕先遣館伴使賜御筵於班荆館明日始至都亭驛又明日入見見之二日與伴使皆往天竺寺燒香上賜沈香乳糖齋筵酒果次

日至冷泉亭呼猿洞而歸 中州集王兢奉使江左讀同官蕭顯之西湖行記詩雲烟濃淡費臨摹行記看來即畫圖雲夢不妨吞八九筆端滴水了西湖

平章廟記筆穠纖却費青珉片片剝秋壑一生珍玩在右軍小影閉瑤函

志雅堂襍鈔廖羣玉刻王櫛所作賈氏家廟記 王忠文公集玉枕蘭亭跋云此本後有

南齊書 卷三  
右軍小像題曰秋壑珍玩

白石方泉擅賦才西湖寺古共裴回綺牀熏陸  
多生願得見金銅佛塏來

方泉集姜堯章金銅佛塏歌白石招我入書  
齋使我速禮金塗塏我疑此塏非世有白石  
云是錢王禁中物上作如來捨身相飢鷹餓  
虎紛相向拈起靈山受記時龍天帝釋應惆  
悵形模遠自流沙至鑄出今回更精緻錢王

納土歸京師流落多在西湖寺錢王本是英  
雄人白蓮花現國主身蛇鄉虎落狗脚朕何  
如紅袍玉帶稱功臣天封拆開即退聽兩浙  
不聞笳鼓競歸來佛子作護持太師尚父尚  
書令一枚傳到白石生生今但有能詩聲同  
袍秦外銛師兄哦詩禮塏作佛事同喫地爐  
山芋羹何曾熏陸綺牀供但見相輪銅綠明  
哦詩禮塏猶未畢蘆葉低飛山雨濕

喜生拍板宣孃笛唱賺勾欄盡有名薄媚六么  
官本外新添三笑月中行

武林舊事丁未年撥入勾欄弟子嘌唱賺色  
施二孃時春春時住住徐勝勝朱安安陳伴  
伴等 又陳宣孃笛陳喜生拍 又官本襍  
劇段數爭曲六么鞭帽六么王子高六么崔  
護六么鶯鶯六么女生外向六么請客薄媚  
錯取薄媚傳神薄媚鄭生遇龍女薄媚柳毅

大勝樂霸王中和樂夢巫山彩雲歸風花雪  
月爨宴瑤池爨夜半樂爨王崇道休妻李勉  
負心鍾馗爨王魁三鄉題檻哮店休姐秀才  
下醋搗風流藥三笑月中行 案其名甚多  
聊摘二三於此此即元人院本所自起也  
蟹黃水不產西湖和樂樓前妓喚酷借問風流  
趙夫子郎官還似酒監無

清波襍志泰州雪酷著名惟舊用州治井蟹

黃水紹興間呼匠至都下用西湖水釀成頗不逮 吹劍錄趙鞏監昇陽宮酒庫北使至問趙夫子今何官館伴問何人曰趙鞏其皇帝清問下民賦吾州後生以為矜式呼趙夫子館伴曰今為郎官即日除司封郎中 夢梁錄南庫元名昇陽宮煮界庫在社壇南新界庫在清和坊南酒樓扁曰和樂諸庫皆有官名角妓設法賣酒此郡風流才子欲買一

笑則徑往庫內點花牌惟意所擇

南人養馬不知名馬券傳來為習兵嘆息銷沈  
熊虎氣八哥空策蹇驢行

香溪集南人習水而便舟不熟銜轡雖畜馬無能名其駑若駿也 金石林時地考杭州有宋刻馬券碑 赤城集陳孚鳳皇山詩故國盡銷熊虎氣荒山空帶鳳皇形 勿軒集賈相葛嶺行有云望塵拜者頌元老伊尹周

公所不如豈知一旦事瓦裂銀鐙鐵鑠載以  
驢

莫問仙巢何處亭雲濤尺五鮮人經鳳城歸去  
鐘聲急紫水如霞冷翠屏

詞海遺珠宋理宗書仙巢吹香亭五字有詩  
云放鶴去尋三島客任人來看四時花亭為  
仙巢鍾尚書閒居之地今碑在嶽麓山下蒼  
筧谷 江湖長翁集題趙景安尺五雲濤二

亭尺五亭云山亭縹緲五雲連雲濤云坐看  
銀山捲壞雲 韋齋集西湖詩有云喚人歸  
去城鐘急觸處相親嶺月彎 太平寰宇記  
錢唐古泉亭有紫水如霞

海門樓櫓散煙塵空憶神州舊日春一自杜鵑  
啼不歇高峰叫月有孤臣

治世正音甘瑾讀文丞相傳詩有云樓櫓海  
門西日暗劍歌江介朔風寒又甘瑾錢唐懷

古詩神州未復英雄老王業偏安歷數迤萬  
 騎星屯潮捲夕六宮雲散草生春 天地間  
 集家鉉翁詩曾向錢唐住聞鶻憶蜀鄉不知  
 今夕夢到蜀到錢唐 咸淳集湖上詩一望  
 湖光鏡面平暮鴉過盡斷霞輕狂來飛上高  
 峰頂趺坐松柯叫月生  
 駕頭不出簾垂晝魚鑰初開肅綺寮閒却蘇堤  
 芳草外遊人題字上芭蕉

愛日齋藜鈔駕頭舊以一老宦者抱繡裏机  
 子於馬上高廟時亦然今乃代以閤門官不  
 知自何年 研北襍志云故宋宮中用魚鑰  
 降魚取匙降匙取魚古制也 順適堂唵藁  
 蘇堤詩參差臺榭無餘地襍沓輪蹄了四時  
 梅屋詩藁真珠園詩芭蕉葉上題詩字雨  
 後看來半不全餘濕未勝濃墨補且攜卮酒  
 到花前

福嚴水曲漾金沙靈苑清鐘客憶家香骨藏埋  
問逋客詩魂容與伴梅花

西湖淨社錄劉基福嚴寺硯記仁和縣北三  
十里有溪曰義溪乃故宋嘉定中有陳氏名  
迥者廬於溪上後捨身為浮屠名其廬曰福  
嚴皇慶二年賜額為福嚴寺 亞愚江浙紀  
行集句題靈隱云幾因留我宿唵到五更鐘  
澗音高九萬拜林和靖詩玉函香骨老雲

根占斷孤山水月村 元詩體要徐秋雲詩

憶別錢唐第幾春舜江春水落如雲小樓吟  
倚孤山月只有梅花可寄君 漁溪集延祥

觀詩御園自有逋梅在約束遊人莫肯開  
難教騎項便為虜意氣沖霄吐白霓誰道閣中  
頻賜酒那知膝底著留犁

瑯琊代醉編朱子云舉世無忠義氣忽自施  
全身上發出來此論足慰忠魂於地下矣續

綱目書施刺秦檜不克而死亦本文公遺意  
近有人曰今之岳廟鑄檜像縛於門外亦當  
鑄施像坐於檜上持刀斫之庶為得也 野  
客叢書秦檜自遭施全見刺之後常獨處一  
閣奴僕非召不得入會疾三衙楊存中成閔  
趙密往問名入款語久之言及近日表勲酒  
頗佳表勲賜酒名也各贈兩器自攜出室亦  
見駕馭之術 朱子語錄秦太師死高宗告

楊郡王云朕免得膝褲中帶匕首何孟春曰  
縛膝下褲脚今日婦女下體之飾豈當時男  
子亦或著膝褲耶騎項見漢書

蟲篆初來出野田樂章親製貫奎躔還勞十八  
章親賜筆意何如玉潤妍

鞠堂野史紹興五年春永興軍田夫段義耕  
得玉璽上於尚書禮部以為秦之傳國璽其  
文曰受命於天既壽永昌詔與禮部翰林祕



書御史太常官驗定集議方員二寸半印文  
深琢如碑字背白而地紅也字畫乃蟲篆也  
奎章錄光堯當內修外攘之際尤以文德  
服遠至於宸章睿藻日星昭垂者非一紹興  
二十八年將郊祀有司以太常樂章編序失  
次文義弗協請遵祖宗故事親製祭享樂章  
自郊社家廟原廟等共十有四章肆筆而成  
睿思雅正宸文典贍所謂大哉王言也 中

興紀事本末高宗以御書真草孝經賜秦檜  
檜請刻石以傳於後上曰世人以十八章童  
蒙書不知聖人精微之學因學草聖遂以賜  
卿豈足傳後耶 書畫眼思陵筆法其源出  
於玉潤帖

猶是飛來小朶峰細泉穿石響琤淙上人昔自  
稱湖隱拂拭殘碑看舊容

清江集天竺蒼筤堂記昔僧慧理自西域至

杭以其小朶峰為自身毒飛來者即其地置  
繡經院後改院為天竺寺 攻媿集觀冷泉  
亭放水詩冷泉淺濁使人愁開板橫波去不  
休岸側細泉穿亂石始知別是一清流 玄  
牘記石刻有湖隱上人贊非俗非僧非凡非  
仙打破荆棘林透過金剛圈眉毛厮結鼻孔  
撩天燒了護身符落紙如雲烟有時結茆宴  
坐荒山巔有時長安市上酒家眠氣吞九州

囊無一錢時節到來奄如蛻蟬湧出舍利八  
萬四千贊嘆不盡而說偈言烏乎此其所以  
為濟顛者耶

碑版無如羣玉工後來世綵亦稱雄仙花發萼  
名書在猶記重翻入禁中

墨池編宋羣玉堂帖所載前代遺跡最多韓  
侂胄刊 石蹟記世綵堂帖廖瑩中刻 金  
壺記顏書如神劍摧鋒仙花發萼 書畫題

跋記顏魯公劉中使帖載於宣和譜紹興中  
重進御

春草江南賸一丘空堂餒鬼故園愁十洲春色  
重門裏餘得春風舊酒樓

雙溪集南園詩花驄油壁隱輕雷消却冰山  
不復來墳土未乾為餒鬼園花雖好為誰開

北轅錄淳熙丙申詔待制敷文閣張子政  
充賀金國生辰使至相州闐闐繁盛觀者如

堵二樓曰康樂曰月白風清又二樓曰翠樓

曰秦樓時方賣酒其上牌書十洲春色酒名  
也或云韓魏公畫錦堂今為一貴人宅石記

猶存好事者叩門打碑不禁也 攬轡錄畫  
錦堂尚存北人嘗更修飾之

假子清華第一班一飛何事不知還名孫死節  
留餘羨難洗當初老鳳姁

雲莊四六餘話秦相子熺狀元登第李文肅

賀啓曰一經教子素欽丞相之賢累月答兒  
 敢起鄰翁之羨秦甚喜之 齊東野語秦熺  
 本王氏子檜素不悅檜畏內妾嘗孕其妻逐  
 之生子為僂游林氏子曰一飛以檜故仕至  
 侍郎兼給事中其兄一鳴弟一鶚皆位朝列  
 曹詠嘗勸檜還一飛未果而檜死 金壘子  
 宋史秦檜曾孫鉅通判蘄州金人犯境與郡  
 守李誠之竭力捍戰城破鉅率兵巷戰復歸

署自焚死子浚澤皆死奸臣之後一門死忠  
 孝豈復繫其世類乎然檜無子以妻兄王喚  
 子為後則秦氏世絕於檜久矣 詞林海錯  
 宋時紫薇舍人謂之小鳳翰林學士謂之大  
 鳳丞相謂之老鳳 竹窗隨筆雁宕僧後身  
 為秦檜居權要造諸惡業  
 海門蒼翠聳雙山忽起清風一線間為有渾沙  
 三百里牛車須避迅濤還

見潮論龕赭二山峙為海門故激而為濤今  
 觀其洶湧却去海門之外非二山所為也  
 潮蹟潮之將來先以清風渺一線於天末旋  
 隱隱而隆隆 浙江潮候圖說浙江之口南  
 為龕山北為赭山謂之海門下有沙渾跨江  
 東西三百餘里若伏檻然 猗覺寮襍鈔浙  
 江風濤迅險人力不捷故近立諸堰以牛車  
 舟而過

坊間墨本幾差訛更怪麻沙滅裂多自古文風  
 闕世運異瀾誰識是同波  
 聽雨紀談古人書籍皆手錄唐世始刻板至  
 宋末而益盛麻沙至陋臨安坊間動輒刻板  
 然而滅裂者衆矣 佩玉齋類藁五七言始  
 於漢歷六朝而盛於唐至嬴宋而音調卑矣  
 同波異瀾用陸機語  
 三絃隔應琴書在八卦奇形古研留可與山家

作清事何須更覓鬼功毬

書齋夜話張炳炎咸淳辛未及第其父肖說  
為大理評事嘗與徐南溪論琴謂諸絃隔一  
之應皆在十徽獨第三絃在十一徽此中呂  
之宮也南溪琴統玉譜其說本朱子 研譜  
周益公研作八卦形自為銘 家山清事林  
龍發著林為和靖七世從孫當理宗時高抗  
不仕人謂其有祖風 格古要論嘗有象牙

圓毬一箇中直通一竅內車二重皆可轉動  
名鬼功毬宋內院中作者

雲氣鴻濛樹叢籬判教凡輩不容窺誰知天上  
春生曲流入金源總淚垂

畫繼米友仁被遇光堯官至戶部侍郎敷文  
閣直學士日奉清閒之燕方其未遇時士大  
夫往往可得其筆既貴更自祕重雖親舊亦  
無緣得之衆嘲曰解作無根樹能描濛鴻雲

如今供御也不肯與閒人享年八十無疾而  
逝 王氏畫苑米友仁畫樹作眾籬筆 中  
州集吳彥高米友仁之壻會寧府遇老姬善  
鼓瑟自言黎園舊籍因賦春從天上來詞後  
三山鄭域從張貴謨使金聞歌此詞  
當壚鬼女貌如花細雨輕風漾碧紗聞道雷壇  
覆蛇怪陰池誰遣誤金墓

楮記室宋吳宰撫州人於臨安聽調嘗飲酒  
肆一賣酒娼故人妾也吳呼問妾引至閣處  
語曰吾死雖為陰司所錄令賣酒於市今市  
上十之二三皆鬼也言訖不見 小窗自紀  
宋時法師鉢貯白蛇覆於雷峰塔下 文園  
漫語西湖十景有雷壇夕照 楮記室魏鶴  
山為叅政一日留史教授宿館中夜忽有兩  
鬟秉燭出迎云叅政有請史隨入有頃鶴山  
出不見史令徧尋見在池塘中半身沒水問

其故則曰了鬟引至一大屋綠衣人指以小女為妻今夕成禮不知在水中次日令乾塘有一蝦蟇大如斗小者四五而已

故人相對泣紅妝一曲清歌欲斷腸雖少霓裳陪鳳輦不教下色等廚孃

行營襍錄豐有俊字宅之登青樓偶見小倡疑故人女累目之酒罷女入曰豐官人識妾否詰之果故人女豐曰汝且退豐與臨安尹

有契明日以白尹且云某僅有錢百千從公更貸二百千嫁之尹嘉其誼即取入府厚匱具擇良士嫁焉尹即王宣子佐也 又朱熠

本武臣常為內夫人妹內官弟婚啓理廟見之大加賞異特旨授官至叅知政事具啓有令弟從長奕世近龍光月殿斯沾於湛露舍妹夫人十年陪鳳輦霓裳猶粲於朝霞云云朱乃武舉狀元温州人理廟微時識之 江



行襍錄京都中下之戶不重生男生女長成  
則隨其姿質教以藝業名目不一有所謂身  
邊人本事人供過人針線人堂前人劇襍人  
拆洗人琴童棋童廚孃等級截乎不奈就中  
廚孃最為下色然非極富貴家不可用余以  
寶祐丁巳叅閩嘗聞時官中有舉其族人置  
廚孃事首末甚悉漫書以發一笑

楊柳新塘裊碧絲便娟歌舞泥人時東風過了

花飛盡不及銷魂有粉兒

湖海新聞德祐太學作百字令云真箇恨殺  
東風幾番過了不似今番苦東風謂賈似道  
也新塘楊柳小腰猶自歌舞謂賈妾 宋季  
三朝政要似道蠱聲色寵妾葉氏本淑妃宮  
人也潘氏倪氏妓也 詩詞餘話詹天游名  
正字可大風流才思不減昔者故宋駙馬楊  
鎮有十姬皆絕色有粉兒者尤勝一日天游

南齊書 卷三  
宴盡出諸姬佐觴天游屬意於粉兒口占一  
詞有不曾真個也消魂之句楊遂以粉兒贈  
之曰天游今日真個銷魂也後為翰林學士  
玉瓢小印宛如初散佚重窺旅館虛一帖硬黃  
留健筆人間猶識瘦金書

洞天清錄徽宗御府所儲書其前必有御筆  
金書小楷標題後有宣和玉瓢御寶淳祐壬  
寅於臨安客舍見永嘉一士人藏一法帖乃

唐人硬黃倣右軍書前有金字御筆云王右  
軍書長者帖後有宣和玉瓢樣御寶 書史  
會要徽宗行草真書筆勢勁逸初學薛稷變  
其法度自號瘦金書

寒食平章上塚回集賢堂下獨興哀駸兒不解  
藏書畫可見吳興向氏來

詩話雋永賈秋壑於德祐元年寒食上母墳  
回至集賢堂作詩云寒食家家插柳枝戀春

南齊書 卷三  
春亦不多時兒孫只解花前醉青塚能消幾  
箇悲豈非亡國之讖按西湖志引此詩不載  
上墳事且後二句作人生有酒須當醉青塚  
兒孫幾箇悲亦與此異 癸辛雜識吳興向  
氏后族也三世好古多收法書名畫有名公  
明者駭而誕長城人劉暄多能狡獪登賈師  
憲之門言之賈公賈大喜因遣劉誘以利祿  
遂按圖索駿皆六朝神品

明兩為離是普安玉觀音進北朝官蕭森佛火  
松雲裏度廟龍姿繪像寒

聖德事迹孝宗為建國公初育於吳婉儀丁  
丑制建國公封普安郡王年十六時日者尤  
若納私謂秘書省正字張闡曰普乃並日字  
合乎易所謂明兩作離之象殆天授也 楮  
記室宋孝宗擊毬馬偶傷一目金人遣使來  
慶壽以千手千眼玉觀音為壽蓋寓相詭之

意上命迎入徑山 暖妹由筆杭州集慶寺

有紙軸度宗小像

泥金帖子報新名書上綸扉有品評春日桃符  
非麗句十年而已悞公卿

說略報新進士謂之泥金帖子始於唐至文  
宗時革之宋則復用 稗史洪平齋新第後

上史衛王書自宰相至州縣無不指撫其短  
大槩云昔之宰相端委廟堂進退百官今之

宰相招權納賄倚勢作威而已凡及一職必  
如上式未俱用而已二字時相怒十年不調  
洪有桃符云未得之乎一字力只因而已十  
年間

玉樓簾捲見梅魂催賦清詞月一痕照水圖開  
天水碧露桃脈脈總無言

海野詞坤寧殿得旨次韻賦照水梅花調鶯  
山溪云催花小雨輕把香塵洒簾捲水亭風

南齊書 卷三  
梅影轉夕陽初下靚妝窺鑑鴛甃湛清漪浮  
暗麝翦芳瓊消得連城價玉樓十二寒怯銖  
衣掛曾是綠華仙眷餘情新詞如畫花隨人  
聖須信世無雙騰鳳吹駐鑾輿堪與瑤池亞  
江村銷夏錄宋馬和之有照水圖 林下  
清錄宋顏方叔製諸色牋有杏紅露桃紅天  
水碧俱研花竹鱗羽精妙如畫

中興為有求賢詔不取金桴發玉函雪下天門  
空洒淚有人側岸看千帆

新定續志有紹興求賢碑 鹿皮子集樂雷  
發宋理宗朝特科狀元春陵人對策有曰求  
天下之士以文不若淑天下之士以道樂著  
雪磯叢藁 雷溪詩選題宋度宗熙明殿古  
墨詩蚤晚扁舟適吳越為君揮淚天門雪  
能改齋漫錄任惇夫紹興間有聲太學後坐  
上書入籍留落者久之有投時相啟云籠中

翦羽仰看百鳥之翔岸側沈舟俯閱千帆之  
過

愛他十里清涼國吳越江分指顧間白骨難為  
補天石太行久已不能山

解頤詩話宋行都西山多寺觀鐘鼓相接故  
楊廉夫詩云入山十里清涼國三百樓臺迤  
邐開 南溪詩話程泰之攷古編云到江吳  
地盡隔岸越山多此吳僧白堽院詩也后山

在錢唐亦有句云語音隨地改吳越到江分  
即用其意 岳忠武遺事元韓中村拜墓詩  
末云我恐精忠埋不得白日英魂土中泣朽  
骨斲出荒苔痕獻作君王補天石 楫欄集  
靖康迎駕詩有云南渡黃河如履地東有太  
行不能山

番犬狺狺給賜多金鈴不動臥晴莎心知不愛  
春林牧休寫歸牛緩下坡

南宋相眼德壽宮發下番狗五十隻禁中留  
其三餘賜內侍 缶鳴集題李迪畫犬詩護  
兒偏吠客花下臥晴莎莫出東原獵春來乳  
兔多 大江草堂集閣次平風林放牧圖跋  
樹木離披老牧掩面支策牛獨舉首掀鼻向  
風 嚴氏書畫記李唐放牧圖 澹圃畫品  
李唐三生圖作牛背牧童李源欠身揖之  
東圖元覽李唐春牧圖牛欲前行童子力挽

之 案以上皆南宋畫院人

梅花細嚼傍山居佛粥醱醱出定初愛筍顛師  
能濟物碧螺無尾半焦魚

柳塘集西湖除夕詩又來上國看新元細嚼  
梅花嚙冷泉 山家清供一日過靈鷲訪僧  
蘋洲留午粥甚香詢之乃醱醱花也 又濟  
顛筍疏云拖油盤內燂黃金和米鑊中煮白  
玉 永興寺志錢唐西溪永興寺唐貞觀三

年悟明尊者開山南宋時濟顛壘石為安樂  
橋當水啣處巋然獨存村民食螺已斷尾顛  
乞放池中遂活至今螺皆無尾 西湖竹枝  
續集徐楚詞云資嚴古院半丘墟滿壑梅花  
泛雪渠賸有顛師功德水至今留得半焦魚  
難尋雲壑巖中跡空見雲龕水面移誰憶東都  
金世界空傳祝聖到靈芝

翰林珠玉有題玉隆宮所藏宋乾道宸翰雲

壑二字詩 南湖集西湖詩有云美人具清

讌畫舫如雲龕浮游六橋間水天遙共涵

宣政禱錄徽宗遜位前一年中秋後苑賦詩

云日射晚霞金世界月臨天宇玉乾坤次年

金人入汴亦先兆金世界也 芸隱橫舟藁

祝聖所拈香詩幾度來游幾賦詩又因將命

到靈芝三呼祝了君王壽偷眼湖光立片時

一泓寒碧雨連山乳竇峰前聽講間最是觸鋏



修苦行誦經松下鶴初還

臞翁詩集紹興壬子夏游龍井詩江湖醜兩  
股一泓乃孤危我愛秦郎記字壓頭陀碑

鄭氏聯璧集宋高宗自題畫扇云萬木雲深  
隱連山雨未開 採芝集上天竺詩老樹煙  
蘿雨殘燈石墻雲 雪蓬稿送沖晦歸天竺  
詩西湖山下多奇石師去今遊乳竇峰遙想  
石臺登講罷野猿歸洞鶴歸松 暎車志臨

安下竺式道者苦行修懺置火鍬於像前日  
夜持誦環遶遇倦即以指觸鍬而醒之

逋臣前是老門生游戲清都一笑迎故國三皇  
廟猶在靈胥江上涕縱橫

疊山先生集上丞相留忠齋書友朋自大都  
來乃謂先生以賤姓名薦皇帝過聽遂煩旌  
招某乃丙辰禮闈一老門生也先生誤以忠  
實二字褒之斷不敢枉道隨人以辱大君子

知人之明 又與魏叅政書稱前宋逋播臣  
皇帝游民謝某 夢蕉詩話文山之死為兵  
解脫屣濁世翀遊清都 覆瓿集杭州重修  
三皇廟碑杭為宋故都以故太醫院地為之  
立三皇廟 須溪集建興廟記東錢唐如雷  
如霆子胥之所旦而奮也方盛時冠冕大者  
帝號小者王侯丹雘鉅麗擬於鈞天廣內今  
其故地黯然使人流涕

玉津鐘廢暗香凝 祕省銅缸碧水澄 喝道飯僧  
何所益 香廚翠釜照秋鐙

翠寒集有玉津園廢鐘詩 自娛齋集徐青  
壁使君置酒邀看南關署中宋梅按地即德  
壽宮後圃旁也 藥雲集宋祕書省有銅缸  
馬積水生魚 皇華曲九里松詩松是山靈  
一手栽堯天長就棟梁材龍髯怒起春風急  
似怪遊人喝道來 靈隱寺志秦檜因風僧

激厲發心齋僧其大鍋現在雲廚

曲從自製盡堪師雲影孤飛白石詞羨殺王孫  
才思敏蓮塘惟有落花知

白石詞揚州慢暗香疎影並是自製曲 樂  
府指迷姜白石如野雲孤飛去留無迹 詞  
旨蘄王孫韓鑄字亦顏雅有才思學詞於樂  
笑翁一日與周公謹泛舟西湖酒半公謹舉  
似亦顏學詞之意翁指花云蓮子結成花自

落

鐵綆沈來箭鏃埋巾籠放鳥失安排空饒紅朽  
豐儲積澤國圖安只自乖

寰宇分合志烏珠之陷臨安已隱然如巴延  
之臯亭山而宋得以不喪者由其懸軍深入  
視元無分道之兵席捲北歸視元有江中之  
舄使舟再沈於鐵綆而策不獻於閩人則烏  
珠為籠中之鳥矣 自怡集錢唐詩箭鏃不

隨錢氏沒黍苗還向宋陵生 清正集嘗會  
計豐儲之積約五百萬石多為備荒之用而  
大農每歲廩給止合用米一百萬石通計可  
支五年 李忠定奏議備攻戰之策必擇形  
勝然後能制服中外以圖事業臨安平江皆  
澤國褊迫偏霸所據非用武之地也

宴開澄碧捧瑤尊再拜彤墀笑語温日暮玉堂  
深處宿金蓮燭影獨承恩

玉堂禱記淳熙丁酉九月丙辰宣召侍讀進  
少保浩錫宴澄碧殿抵暮送以金蓮燭宿玉  
堂直廬上命作詩敘此會史進古詩三十韵  
臨平山下藕風輕軟軟鴻頭似雪瑩聞道尚方  
新薦果安榴猶自號金櫻

林泉結契雞頭亦號鴻頭 天中記杭州號  
石榴為金櫻避錢武肅諱而起也

苔繞梅身半吐鬚洗鉛何必較施朱鬢絲禪榻

南齊書 卷三  
四十五  
藏春塢猶有凌霄絡樹無

竹齋集西湖梅有素梅紅梅墨梅數十首  
全芳備祖西湖藏春塢門前有一古松凌霄  
花絡其上蘇公嘗為僧清順賦詩今百餘年  
其花猶茂

冠上金貂氣象尊瘦髯誰與貌師垣夜光最訝  
雙眸少賀啓中間欠片言

樂郊私語常氏有像一幅瘦惡而髯帶貂蟬  
冠上有贊曰佑時生甫同德暨湯云云後題  
紹興壬申門下士魯瑒拜書檢宋苑茂明集  
有代賀秦太師畫像啓乃知是摘啓中數語  
為贊耳 偃曝談餘檜眼有夜光

朝中和議盡姦回錯說官家也好猷不使雙鬢  
同炭婦春愁脈脈為誰來

吟嚙集沈持正名樞紹興中參政和議成語  
同列云官家好猷上聞之謫筠州攜二鬟去

南齊書 卷三  
數年歸嫁皆處子安吉尉潘方壽以詩寄曰  
昔年單騎赴筠州覓得歌姬共遠遊去日正  
宜供夜直歸來渾未識春愁禪人尚有香囊  
愧道士猶懷炭婦羞鐵石心腸延壽藥不風  
流處却風流

華陽巾子道人如樞院行行近大渠操履甚恭  
雖隱語楊妃脚也駭程俱

揮塵餘話向宗厚履方建炎末為樞密院計

議官美髯而若滑稽之狀裹華陽巾纏足極  
彎長於鈎距王侑公為戲之曰君唐明皇時  
四人合而為一何邪向曰願聞之公為曰君  
狀類黃幡綽頭巾類葉法善脚類楊貴妃心  
腸似安祿山後程致道行其祠部員外郎告  
詞云汝佩服高古操履甚恭又以戲之 夢  
梁錄樞密院在南倉前大渠口

節樓兩建靜干戈証果曾經過補陀羨煞明良

南齊書 卷三  
慶會閣一門六老共婆娑

雨航襍錄史衛王浩為尉時至補陀見大士  
云文潞公後身他時宰相官家要用兵須力  
諫浩後兩授節鉞遍歷三公壽八十九嘗曰  
吾口不言兵後必有為宰相者彌遠乃其次  
子 山堂肆考孝宗書明良慶會之閣六字  
賜史浩宋史浩淳熙乙巳掛冠年登八十女  
兄年八十二四弟又皆高年同氣至親舉觴

相屬朱顏華髮咸壽而康繪為六老圖樓參  
政為之序

雨山霜鞠掩荆扉寓馬塍西客到稀好事河陽  
張彥發芸居樓畔借書歸

馬塍藁嘉熙丁酉五月寓京遭熱僑居西馬  
塍有寓西馬塍詩十畝荒林屋數間門通小  
艇水灣環人行遠路多嫌僻我得安居却稱  
閒樽酒相忘霜後鞠一時難盡雨中山何年

脫下浮名事只與田翁賸往還 秋江烟草  
有從陳宗之借書詩自從春去後少省出柴  
扉樹暗鴉巢隱簷空燕迹稀憶山憐有夢當  
暑咏無衣案上書堆滿多應借得歸 案吳  
文英有題陳宗之芸居樓詞即睦親坊開書  
肆陳道人也

仁王寺裏熟黃梅誰識方泉杖履來更向九溪  
十平八澗臨流洗足帝青苔

方泉集有歸憩仁王寺詩重到招提未覺遲  
鉢單初副袂衣時僧房齋院門門閉梅子枇  
杷樹樹垂蟻陰經牀求脫化龍纏佛座學慈  
悲長年無事閒來此坐對空山諷小詩又有  
句云九溪十八澗冷見帝青苔洗足僧書石  
臨流客放杯 案仁王寺在吳山南渡時建  
田志引薩天錫橫山閣詩乃在閩中烏石山  
之仁王寺謬矣方泉常居行都者此詩確是



吳山之仁王寺也西湖北山亦有護國仁王寺

侍郎三覺困曹騰歇息牌懸客慣憎比較相公三照處裏頭日日近圓冰

雞肋集趙叔問為天官侍郎肥而喜睡又厭賓客常掛歇息牌於門首呼為三覺侍郎謂朝回飯後歸第也又云范覺民作相方三十二歲肥白如冠玉旦起與裏頭帶巾必皆攬

鏡時謂三照相公按趙范皆高宗紹興間

人

鞠苗瀾盞扶春倦花片浮苔怯曉寒御墨搜奇吟逸蝶嬌姿偏奈雨中看

花史洪景嚴遵和弟景盧邁登月臺詩云築臺結閣兩爭華便覺流涎過麪車戶小難禁竹葉酒睡多須藉鞠苗茶山家清供憲聖太后喜清儉令後苑進生菜必采牡丹花片

南宋禮部詩 卷三  
和之又收楊花為鞦韆毬褥之屬 海棠譜  
光宗御製海棠詩東風用意施顏色艷麗偏  
宜著雨時朝咏暮吟看不足羨他逸蝶宿深  
枝

門館遙臨南北峰平章堂印日相從他年十萬  
軍聲亂洲上遺亡何處踪

黃氏日鈔賈似道始生之日錢唐宰郭應酉  
以詞賀之云日長門館坐對南北峰之高時

遊廟堂盡付東西廳之間東西廳見韓魏公  
傳若南北峰殆俗語耳豈一時阿其所好耶  
兩浙名賢錄陳均字子公咸淳初除檢正  
會賈似道以平章奉母居湖濱欲以堂印自  
隨均爭曰堂印無出城之理由是免官 三  
朝政要賈似道集諸路軍十三萬屯丁家洲  
我師之敵十三萬軍一時潰散督府之印已  
失奔入揚州

德壽宮姬取次娛大劉宣過小劉呼夫人更得  
十<sup>平</sup>餘輩不數宮中有玉奴

朝野雜記德壽妃嬪劉妃臨安人入宮為紅  
霞帔後拜貴妃時有小劉氏者入宮轉宜春  
郡夫人進婕妤皆有寵宮中號妃為大劉孃  
子婕妤為小劉孃子德壽宮又有信安趙夫  
人咸寧蘭夫人平樂王夫人咸寧郭夫人新  
興陳夫人富平孫夫人縉雲蔡夫人南平張

夫人齊安張夫人安定李夫人此十餘人並  
無品秩紹興中又有馮美人韓吳二才人皆  
寵幸吳氏名玉奴中宮近屬也 南宋相眼

內東門司淳熙十四年準德壽宮提點傅太  
上皇帝聖旨才人李氏王氏並放令遂使其  
告命四軸并才人李氏從人紅霞帔宣一十  
道紫霞帔宣聽宣各二十道並降付內東門  
司才人李氏王氏告紅絲網鍍金銀鐸鈴紅

羅銷金袋全齊安郡夫人順政郡夫人告紫  
絲網銀鐸鈴錦袋全紅霞帔宣九道李惜奴  
陳來兒等紫霞帔宣二十道藍合兒藍福福  
陸小美趙九孃譚強兒譚小郁等聽宣二十  
道陸閏兒元沖淨等

舊碑遺字得雙行聽說西霞浣古香自奉宸居  
標楔帖神光難掩在宮牆

蘭亭考一修城所得本前有薛稷書兩行十

八字後高宗取石入德壽宮王仲信跋云此  
本西霞老道士云長安政和中修故宮掘地  
得此其精神鋒鋦出真定本上 又蘭亭序  
高宗所御宸翰題曰楔帖

鬻薪醜語竟能堪異日華班抱隱慚鳳閣裁同  
妃子笑西風已駕逐臣驂

三朝政要呂文德安豐人魁梧勇悍常鬻薪  
城中趙葵於道傍見其遺履長尺有咫訝之

南宋禮部言 卷三  
或云安豐鬻鬻薪人也遣使訪其家值文德出  
獵負虎鹿各一而歸借見趙留之帳前在邊  
立功遂至顯宦 黃氏日鈔呂文德起土豪  
似道始結之為大將官至保傅然文德愚鄙  
小民不識字每佯痴好無禮士大夫似道既  
入相文德寫醜語罵似道不敢怒至郡不肯  
禮先聖祭先聖每云不曾教我識字 宋史  
紀事本末賈似道以去要君帝拜留之江萬

里曰自古無此君臣禮賈忌之帝嘗問古人  
姓名似道不能對江從旁代對王夫人稍知  
書帝語夫人以為笑賈益慚怒遂逐萬里  
南荒一逐使人愁林氏油杉蚤見收遷客墨痕  
蕭寺壁相逢生怕唱杭州

癸辛雜識林僉樞存儒久為賈相所擯謫之  
南州道死於漳有富民蓄油杉甚嘉林氏子  
弟求為棺而價穹不可得因換其木曰收取

南齊書 卷三  
收取留與賈丞相自用至賈殂於木綿菴郡  
守經營竟得此木以斂可謂異矣 正藏書  
似道貶循州鄭虎臣請行時侍妾尚數十人  
鄭恚屏去奪其寶玉暴行秋日中令舁轎夫  
唱杭州歌以詭之辱之備至至古寺中壁有  
吳潛南行所題字呼似道曰賈團練吳丞相  
何以至此賈慚不能對

雁足書傳紫塞長只收鄴瓦貯歸裝忠宣不愧  
蘇卿節未賜洮瓊御筆光

容齋續筆先公自燕歸獲二硯予為銘建安  
者曰鄴瓦所範嘻其是耶幾九百年來隨漢  
槎淬爾筆鋒肆其滂葩憫實寶此以昌我家  
銘興和者曰元魏之東狗脚於鄴吁其瓦存  
亦禪干劫上林得雁獲貯歸笈玩而認之哀  
淚棲睫 談薈宋孝宗賜周必大洮河綠石  
硯有御筆洮瓊二字

南齊書 卷三  
鞦韆庭館賞花王三殿清遊樂未央唱得舞楊  
花曲罷天香飛滿萬年觴

貴耳錄慈寧殿賞牡丹時椒房受冊三殿極  
歡上洞達音律自製曲名舞楊花命小臣賦  
詞俾貴人歌以侑玉卮為壽詞有云正鞦韆  
庭館風絮池塘占東君誰比花王

玉輅鑄成玉篆牌貓兒捕鼠對原乖執綏官亦  
何為者孤負梯緣向御街

玉海乾道六年復用五輅玉輅有執綏官備  
顧問有牌篆玉輅二字以玉為之 三朝野  
史理宗祀明堂徐清叟為執綏官玉音問曰  
貓兒捕鼠如何答曰愛之欲其生惡之欲其  
死理宗本命屬鼠一時不覺觸突上亦不之  
咎 玉堂雜記玉輅執綏官從旁用小梯攀  
緣而上

聖節趨班禮數殊紫宸殿下效嵩呼南廊細認

南史補遺 卷三  
髹牌字若個無因入御廚

程史瑞慶節上壽紫宸殿百官皆賜食余待  
班南廊老兵持二髹牌至金書其上曰輒入  
御廚流三千里

吳鹽如雪繞場堆亭戶攤錢晝不開昨夜東風  
駕濤上石塘堅冢莫崩摧

天下鹽法志浙鹽鬆白宋時濱江設立亭戶  
計日科斛支給其法統於轉運使 地理指

掌圖宋時沿江置捍江軍東風濤上尤加警  
備 海塘記序海塘自錢唐以抵鹽官每為  
風濤所崩塌故沿江設備守茲土者時寄慮  
焉

場屋誰居第一流柱間小紙亦堪羞不如買却  
巾箱本喙喙爭鳴語蚤休

四朝聞見錄慶元二年考官葉翥發策首篇  
士愕莫知對莫子純以小紙帖所出於柱間



青牙補遺 卷三  
士皆感之是時舉子不事記誦專習於空虛  
之談射策中至有心心有主喙喙爭鳴之語  
識者固已患之 鼠璞今巾箱刊本無所不  
備嘉定間從學官楊璘之奏禁毀小板近又  
盛行第挾書非備巾箱之藏也

酒龍詩虎葛長庚跣足時時自在行太乙宮中  
因詔館一朝飛去入蓬瀛

武夷山志白玉蟾本姓葛名長庚嘉定末詔

徵赴闕對御稱旨命館太乙宮一日不知所  
往 海璫集賀新郎詞昔在神霄府是上皇  
嬌惜便自酣歌醉舞來此人間不知歲仍是  
酒龍詩虎

老卒曾經百戰場韓家弓樣獻高皇為銘克敵  
成功處邊鄙人多號鳳凰

揮塵後錄洪景伯兄弟應博學宏辭以克敵  
弓銘為題洪惘然有巡鋪卒曰我本韓世忠

部卒目見有人以神臂弓舊樣獻於韓韓令  
如其式制度以進賜名克敵 又邊人又謂  
鳳皇弓 弘簡錄和說以陰為右武大夫威  
州刺史上制勝強遠弓式能破堅三百步外  
號為鳳皇弓 三朝北盟會編金人犯瓜州  
都統制李橫用克敵弓射却之  
江湖自古有攸分綿纜牙檣何地乘水勢錢唐  
居第二韜光東去望西興

入越記淳熙元年八月步楓江上俗諺云第  
一揚子江第二錢唐江第三楓江蓋言其水  
波之惡也 青山集和楊公濟秦皇纜船石  
詩秦皇兩觀海此石繫樓船錦纜已無跡蒼  
苔昏暮煙 南歸日記初至靈隱求所謂樓  
觀滄海日門對浙江潮竟無所有至韜光了  
了在吾目中矣 名山記內載袁宏道西湖  
禱記余始入靈隱疑宋之問詩不似及登韜

南齊書卷三  
光始知滄海浙江捫蘿剝木數語字字入畫  
古人正不可及矣 端平詩雋韜光菴詩谷  
鳥與我言怨殺白太傅借問何以然攜却山  
僧去世間萬事誰始終寂寞寒江起煙霧  
西湖竹枝詞儂住西湖日日愁郎船只在東  
江頭憑誰移得吳山去湖水江波一處流  
毛先舒西湖不通江辯云案舊志云西湖故  
與江通誤也田學使汝成嘗辯之然未能了

了按水經注浙江至錢唐縣又東經靈隱山  
山下有錢唐故縣靈隱去江已遠然山川之  
名古今屢變或當時靈隱山直抵江干俱名  
靈隱猶言吳中亦稱會稽浙江亦稱廣陵耳  
若以駱賓王楊巨源之詩為徵靈隱山至絕  
頂何嘗不可觀日對潮楊詩義亦然又西湖  
南面稍近江而尚有慈雲萬松二嶺大山隔  
之他處去江更遠古必無湖通江之理也

臨安客子動春愁  
細雨無人深巷幽  
官吏打門驚午夢  
清風終憶十三樓

橘潭詩藁臨安僦樓詩過了燒燈望燕歸  
春寒剗地勒芳期  
杏花深巷無人賣  
細雨空簾盡日垂  
文獻通考店宅務掌管官房邸舍  
默堂集昔年曾到十三樓  
一月西湖十頃秋  
寒碧軒中最宜暑  
只緣修竹近清流  
一統志大佛寺有相嚴院為樓者十三間

九經墨義盡敷陳  
鑠院深沈聽鬼神  
試帖不因公薦外  
郎中先報易官人

宋史凡九經帖書一百二十道對墨義六十條  
又命士應舉謂之鑠廳又臺閣近臣得薦所知之負藝者號曰公薦  
夷堅志士人赴試臨安邸主人夢報榜人至云此店有易官人及第明日以告長沙郡故多易姓是時獨無春陵義太初歷數諸人用易經應詔者

惟已一人私自喜果登科

酒器新翻日日忙王家孽子習文章水晶宮裏  
榴皮老虛說東林送渭陽

齊東野語嬉性蠢駘日治酒器書畫 揮麈  
餘話秦嬉本王喚孽子嫡母鄭妬嬉既誕逐  
所生以嬉為檜之乞子 弘簡錄朱敦儒素  
工詩及樂府時檜當國喜獎用騷人墨客文  
飾太平嬉亦好詩除敦儒鴻臚少卿談者謂

畏避竄逐故其節不終 萬歷杭州府志李  
靴遷將作監檜屢遣子就學靴曰吾為天子  
卿監豈為宰相教子遂乞外 雲麓漫鈔秦  
伯陽送其舅王亨道知湖州詩暫別甘泉豹  
尾中隼旗仍駐水晶宮文昌地禁論詩少燕  
寢凝香簿領空可但龔黃宜共理便應顏謝  
與同風飽聞回老榴皮事試問溪頭鶴髮翁  
說者謂呂仙常到湖之東林訪沈東老留時

南齊書 卷三  
既而登東林寺於壁間以榴皮自畫其像人  
初不知及秦詩出觀者不絕

遺都莫謾溯繁華椒壁觚稜半土沙節用愛人  
題石在城頭夜月照飛鴉

鳧藻集序錢唐為前代之遺都風氣清美有  
山川臺榭之勝魚稻茶筍之饒民習侈巧廛  
屋繁麗歌管之聲不絕於西湖之上故仕者  
尤樂居焉 元詩類選杜瑛弔故宮詩月上

觚稜椒壁濕饑烏啄碎琅玕石劫灰飛盡海  
揚塵廢殿荒臺土花碧 西湖竹枝續集黃  
周星詞節用愛人猶勒石風流誰是老平章  
按節用愛人視民如傷八字石刻在寶石山  
足相傳為似道手書者也 風雅廣選劉基  
題白塢寺物換星移事已迷從來此地惑東  
西可憐如鏡中天月獨照城烏夜夜啼

產閣先期報設排胎衣裝畫寶瓶埋洗兒錢果

多珍巧聞道中宮日墮懷

容齋四筆車駕都錢唐以來皇子在邸生男  
女則戚里三衙皆有餉獻隨即放答自金帛  
以外洗兒錢果動以十數合極其珍巧武  
林舊事宮中誕育內史奏排辦產閣令太醫  
宿直供畫產圖方位合用藥材催生物件醺  
醪沈香酒催生海馬皮裝畫胎衣餅檀香匣  
盛唾銅剃刀

六龍巡幸護天神畫到通靈果絕倫鱗甲之而  
飛動處不知誰是點睛人

夷堅志西北士大夫多挈家南寓相率建黃  
錄醮就天慶觀設位父老鄭圓持水龍布帳  
展挂於堂中陰風振動燈火俱滅坐立者毛  
髮寒聳舉體森顫亟命捲還之帳不知何人  
所畫其神如此 宋元通鑑淳熙十四年以  
久旱頒畫龍祈雨法 案天慶觀在杭之吳

山天慶坊

徒步宮人盡出降滑臺昨夢語猶懽丙丁巳是  
留龜鑑頭白金姬夢此邦

靖康朝野僉言靖康二年丁未二月初七日  
上皇與諸王后妃以下乘金銅車子詣北營  
內人宦官多相攜步從 昨夢錄紹興辛巳  
省元劉德廣語及余所生之地曰滑臺 戒  
菴漫筆理宗淳祐中中書省奏名臣柴望衢

州人撰丙丁龜鑑言丙午丁未自古多變厄  
凡三十有一為十卷 金姬別傳李嘉謨以  
部發歲運至元都夜對月歌曰萬里倦行役  
秋來瘦幾分因看河北月忽憶海東雲夜聞  
鄰婦倚樓泣者明日訪其家此婦泣曰客非  
昨夜悲歌人乎此亡宋昭儀黃清惠寄汪水  
雲詩我亦宮人金德淑也昭儀舊同供奉極  
相親愛今各流落異鄉彼且為泉下人矣



潛齋集杭州詩相逢柳色還青眼說著梅花  
總白頭

表章正學有津涯何事禪房葵艷娃至竟遺民  
瞻太保龍顏曾寫郭蕭齋

史纂左編宋自理宗繼統首黜王安石孔廟  
崇祀升瀛洛九儒表章朱熹四書丕變士習  
廟號曰理其庶幾乎 七修類藁宋理宗像  
在集慶寺 南歸日錄集慶觀理宗舊像意

製寒儉然行筆樸雅絕不類傅粉大家 宋  
季三朝政要理宗資貌龐厚號為烏太保  
太平清話宋理宗御像郭蕭齋所寫 藥雲  
集理宗閻妃塚在集慶寺後

弓手兒童貌不羣狀元甘雨埽妖氛鼈頭果見  
舒龍爪觸石挈開白白雲

夷堅志汪應辰本玉山縣弓手兒喻子材為  
尉授諸子學有兵云汪兵子可學喻呼視之

狀貌奇偉出對試之曰馬蹄踏破青青草汪  
對曰龍爪掣開白白雲 宋史趙鼎為相延  
應辰於館塾紹興舉進士第一歲旱鼎命禱  
雨即應人謂相公雨鼎曰不然狀元雨也  
為有奇才待至公炎荒草木蘊隆風早知名以  
青雲累羞殺冬青哭野中

宋詔令寶祐四年陳顯伯為考官詔云爰東  
儒官董司文柄議論端確者必忠於體國智

略雄偉者必善於籌邊爾其決擇以成盛觀  
是年文天祥第一及第 元音徐世隆挽文  
丞相詩有云乾坤日月君臣在海嶺風霜草  
木知 承旨趙公行狀公見遇世祖上問留  
夢炎狀元宰相當似道誤國時曾無一言卿  
為朕賦詩以刺之詩成上深賞焉 松鄉集  
贈唐玉潛詩世上冬青高誼少山中日錄好  
詩多



國家圖書館, NATIONAL CENTRAL LIBRARY, TAIWAN, R.O.C.

古今圖書集成  
卷三  
三

南宋雜事詩

卷四 一百首

錢塘符曾撰

龍袞宮衣拜玉階  
乾安樂奏紫雲開  
潮沙築得平如席  
五輅新從大禮來

武林舊事冬至或元旦有事南郊自嘉會門  
至麗正門計九里三百二十步皆以潮沙填  
築其平如席以便五輅往來至期上服通天  
冠絳紗袍升自午階天步所臨皆藉以黃羅



謂之黃道中貴一人以金合貯片腦迎前撒  
之時壇壝內外凡數萬衆肅然無譁天風時  
送佩環韶濩之音正如九天吹下也弁陽老  
人詩云黃道宮羅瑞腦香袞龍升降佩鏘鏘  
大安輦奏乾安曲萬點明星簇紫皇

臨池太母照鸞釵欄幕休遮秋水涯小住玉田  
香世界芙蓉尤在臥看佳

四朝聞見錄北宮與東園最近旬浹間即恭  
請憲聖臨幸屬芙蓉臨池秀發遂白憲聖請  
登龍舟撤去欄幕卧看尤佳憲聖欣然從之  
玉堂宣勸紫金盃秋色偏將山翠餘著就麟臺  
傳故事白團扇又賜親書

石湖集寓直玉堂拜賜御酒詩歸鴉陸續墮  
宮槐簾幙參差晚不開小雨逐將秋色至長  
風時送市聲來近瞻北斗璿璣次猶夢西山  
碧翠堆慚愧君恩來甲夜殿頭宣勸紫金盃

麟臺故事程俱紹興初為秘書少監時庶  
事草初撫三館舊聞撰為書曰麟臺故事  
浮溪集序高宗以所御白團扇親書紫詔仍  
兼縮黃麻似六經十字以賜汪藻  
一帖鵞黃印擅竒鼠鬚瘦筆費尋思空餘內府  
裝褙手何處梅花問玉池

輟耕錄蘭亭一百一十七刻迺理宗內府所藏  
裝褙作十冊每版有內府圖書鈐印玉池上

又京師有鵞黃棗木印又舊梅花新梅花  
皆刻名

太學牢丸細麵洩山厨筍蕨未堪儔諸儒坐飽  
彭生肉玉楮篇中著意收

玉楮集饅頭詩幾年太學飽諸儒餘伎猶傳  
筍蕨厨公子彭生紅縷肉將軍鐵杖白蓮膚  
芳馨正可資椒實麤澤何妨比瓠壺老去齒  
牙辜大嚼流涎聊合慰饒奴 武林舊事蒸

作從食有太學饅頭

翻出游絲別樣多春蠶一縷奈愁何真書筆力  
無人繼博得思陵歎九歌

攻媿集錢唐吳傅朋游絲書前無古人 仲  
明舉題吳傅朋草書詩云春蠶一縷來不斷  
石鈞筆力歸毫芒 畫禪室隨筆傅朋真書  
為宋朝第一今觀九歌深得蘭亭洛神遺意  
高宗洞精筆法至為閣筆歎賞不虛也

液雨深宮落葉零煖盃行處疊寒屏御爐新進  
巖州炭不用桃紋鶉鴿青

夢梁錄十月中雨謂之液雨百蟲飲此而蟄  
老學菴筆記高宗幸臨安詔巖州進炭止  
用土產不用琴樣胡桃紋鶉鴿青

多福堦前竹一叢憑將妙偈問支公清風淇澳  
無尋處曲曲斜斜自不同

指月錄宋杭州多福和尚居多福寺僧問如

何是多福一叢竹曰一莖兩莖斜曰學人不  
會曰三莖四莖曲 咸淳臨安志多福院乾  
道三年建移請今額 六研齋筆記梅花道  
人一葉竹題云誰云古多福三莖四莖曲涼  
陰生研池清風滿淇澳  
卷裏光陰客憶家墨梅飄落又天涯旗亭摘句  
空題遍新體何人愛杏花

簡齋集高宗喜陳去非客子光陰詩卷裏杏

花消息雨聲中之句晚年益工旗亭傳舍摘  
句殆遍題寫號稱新體 容齋五筆崇寧朝  
時相不許士大夫讀史作詩政和後稍復為  
之陳去非以墨梅絕句擢寘館閣  
絲桐雖博思陵悅日給黃金未足誇有子絕絃  
教別藝幾年幾世遇官家

四朝聞見錄琴師黃震後易名振以琴召入  
思陵悅其音命待詔御前日給以黃金一兩



後黃教子乃以他藝人語以爾子不足進於  
琴耶黃喟然歎曰幾年幾世又遇這一個官  
家黃死遂絕絃云

參政門前畫戟枝客來倒屣未為遲爭歌燭影  
搖紅句見了何如不見時

後邨詩話嘉定更化收召故老一名公拜參  
政雖好士而力不能援謂客曰贄而來見者  
吾皆倒屣未嘗敢失一士外議何如客素滑

稽答曰自公大用外間盛唱燭影搖紅之詞  
參政問何故客舉卒章曰幾回見了見了還  
休爭如不見賓主相視一笑

清秋風月小裘回內苑無人共把盃聊寫一聯  
詩折簡橘香酒熟待君來

四朝聞見錄孝宗以太母故加養吳郡王益  
益太母弟也秋氣向清聖意怡懌手書御札  
一聯云稱此一天風月好橘香酒熟待君來

命近璫持賜益益入對頓首稱謝上笑曰聊復當折簡耳按此與西湖志所載異

五字空題處士墓冷香魂斷喚難回當時若守臨安郡未必清風在鶴梅

咸淳臨安志紹興有旨徙僧廬惟處士林逋墓勿遷 菊潭集和靖墓詩定知魂在梅花上祇有春風喚得醒 老學菴筆記金使自云烏克紳之孫喜讀書鄧千里館之遊西湖

至和靖祠忽問林公常守臨安耶千里但笑而已

蛾雪蟾冰舞萬狀天街燈火數錢唐三更鼓吹聞清禁一笑君王樂歲康

惜香樂府探春令元夕詞去年元夜正錢唐看天街燈火鬧蛾兒轉處熙熙笑語百萬紅妝女 經鉏堂雜志元夕後三日宣嗣秀王及其諸子宴集壽皇云聞得外間鼓吹喧闐

想是民間歡樂秀王云連年豐稔民間稍康  
所以致此

才見貧兒打夜狐禁園鼓吹又喧呼東華門外  
龍池上埋崇年年果有無

夢梁錄十二月二十四日後街市有貧丐者  
裝鍾馗小妹等形敲鑼擊鼓沿門乞錢謂之  
打夜狐 又除夕禁中呈大驅儼儀係皇城  
司諸班直戴面具著綵畫雜色衣裝手執金

鎗銀戟畫木刀劍五色龍鳳旗幟以教樂所  
伶工裝將軍符使判官鍾馗六丁六甲神兵  
五方鬼使竈君土地門神戶尉等自禁中動  
鼓吹驅出東華門外轉龍池灣謂之埋崇而  
散 又云入登平坊沿內城有內門曰東華  
沿內城面南皆殿司中軍立寨名護聖寨寨  
門外左右俱置護龍水池 案登平坊在今  
清平山巷對可想見宋內城故址也

院籀宮桃白露零仙娥遺像翠亭亭空傳勅祭  
文淒絕縹緲雲中叩玉扃

七修類藁閻妃像在集慶寺按西湖志但云  
理宗御容一幅 仇仁近山村集閻氏園池  
詩真妃已返鳳臺仙獨立池亭思愴然海岳  
不傳青鳥信石房誰伴白雲眠宮桃移種難  
生實院籀初翻又引鞭凝碧荒涼絃管靜萍  
花浮滿釣魚船 隨隱漫錄姚勉述勅祭閻

妃文曰五雲縹緲誰叩玉扃上曰朕雖不德  
未如明皇之甚也

茅山淤塞復開挑一閘長河暫閉潮八尺碧波  
亭下水清流今得過鹽橋

咸淳臨安志茅山河縱復淤塞乃在人戶稀  
少村落相半之中雖不免開淘而土泥有可  
堆積 又長河堰下瓶置一閘每遇潮上則  
暫閉此閘 又梅家橋上量得水深四尺碧

南齊書 卷四  
九  
波亭前水深八尺則鹽橋河亦無涸竭之理  
髮白從來能示老烏髭藥贈自何人笑他狀問  
箕仙語早向宮中召小陳

四朝聞見錄光皇春秋已富且又自宮中尹  
天府入侍重華從容啟上以有贈臣烏髭藥  
者臣未敢用上語光皇曰正欲示老成於天  
下何以此為 又今所請仙蓋小陳也光皇  
尹天府日久遣黃門召其父以入上著白絹

衫繫小紅條見陳入避之徐遣召陳黃門設  
香案金屈卮酒金樛貯生果三釘炷香焚所  
問狀仙遂降於箕書光皇某年月日有所就  
黃門持以入出則就以酒勞陳且贈金帛遣  
出

碧玉方池墨一泓秋風拉瑟老蛟橫宋臣自有  
綦卿在曾識操觚有殺生

秋澗集德壽殿玉方池研詩玉斲坤形靈四

溟丹書猶認壽宮名紛紛落墨蛟騰霧謾謾  
秋風拉瑟聲神物不知崑火烈碧絃今對玉  
堂卿眼中多少興亡事白髮孤臣最愴情自  
注當時同僚承旨留中齋學士劉東崖侍讀  
趙方塘皆宋人也 妮古錄宋高宗建炎以  
己所常用之硯賜綦崇禮上刻御書銘曰操  
觚濡墨兮中有殺生造次思兮令世可行  
筵盞新從赤岸開待他北使賀春來傳宣直到

班荆館風藥花錫賜得回

武林舊事北使到闕先遣伴使賜御筵於赤  
岸之班荆館中使傳宣撫問賜龍茶一斤銀  
合三十兩并風藥花錫

噴飯何須強效顰別時無復望車塵不知涕淚  
揚原仲何似藤州談笑人

容齋五筆揚愿善談動作悉效檜嘗因食噴  
嚏失笑愿於倉卒間亦佯噴飯而笑左右皆

哂秦察其奉已愈喜既亦厭之諷御史排擊  
而預告愿涕淚交頤曰太史恩過父母一旦  
別去何時復望車塵馬足耶 放翁題跋李  
莊簡公為檜遠謫藤州談笑而去青鞋布襪  
即日便行

三處胥山一處雄廟名永固颯靈風笑他義祖  
閨中配何事仙妃亦濫封

閒窗括異志嘉興有胥山杭州吳山亦名胥

山吳縣亦有胥山其名非一 媿郊錄中都

吳山城隍廟額曰永固 十國春秋注徐温

妻白氏宋理宗追封為闕仙妃

端平敗相樂相羊玉帶空傳出尚方日與門生  
飲酒快祇知風月在漁莊

清雋集傳淳佑丁未鄭清之再相鄭震登門  
罵曰端平敗相何堪再壞天下被執女子俱  
下獄京尹趙與憲縱之鄭罷相乃免 宋史

鄭清之傳上遣中使賜御書輔德明謨之閣  
賜楮十萬緡為築室乃日與賓客門生相羊  
山水間 又賜玉帶更賜第於西湖之漁莊  
又方與客飲舉杯曰今日飲此酒殊快  
癸辛雜識清之淳佑再相政事多出姪孫太  
原手昏繆貪汙有作詩譏云先生自號為安  
晚晚節何為不自安

擔無市物累歸裝日日還家費較量却與載書  
惟兩篋一般徒步出錢唐

鶴林玉露揚誠齋立朝時計料自京還家之  
費貯以一篋鑰而置之卧所戒家人不許市  
一物恐累歸擔日日若促裝者 宋史歐陽  
守道以言罷歸徒步出錢唐唯書兩篋

約齋桂隱閉閒門接樹栽花法尚存美殺貴人  
堂下竹盡將細麥拌陳根

游宦紀聞張約齋種花法春分和氣盡接不



得夏至陽氣盛種不得 二老堂雜誌臨安  
貴人家種竹木以麥拌土實根下雖盛夏亦生  
卿冒風霜意不安盛秋之際馭征難繡韉香餅  
尋常賜祇領官家念苦寒

金陀稗編賜鄂王勅卿盛秋之際提兵按邊  
風霜已寒征馭良苦如是別有事宜可密奏  
來 又十二月大雪苦寒遣詔賜器物宣撫  
問兼賜御札云戰鞍繡鞍各一對龍涎香一

千餅龍茶一合靈寶丹一合鐵簡一對賜卿  
至可領也

搜閱虛勞歲月遲御前冊進笑支持僅將婦女  
神仙語括湊唐人絕句詩

四朝聞見錄孝宗從容清燕洪公邁侍上語  
以宮中無事則編唐人絕句以自娛今已得  
六百餘首公對曰以臣記憶恐不止此上問  
有幾公以五千首對上大驚曰若是多耶煩

御為朕編集洪歸搜閱凡逾年僅得十之三  
至於裨官小說神仙鬼怪婦人女子之詩皆  
括而湊之迨以進御上固知不逮所對數然  
亦嘉其敏贍亦轉秩賜金帛

已見鷄竿樹上臺黃旗祇待鶴書開太平萬壽  
宣恩處滿道鈴聲報赦來

武林舊事肆赦日駕自文德殿詣麗正門御  
樓教坊作樂宮架奏曲簾捲扇開宰臣以下

分班立中書令稱有敕立金鷄竿一起門上  
仙鶴童子捧敕書降下閣門提點開拆授宣赦  
舍人起居舍人一員摘句讀宰臣以下再拜俟  
讀至咸赦除之獄級奏脫枷訖罪囚應喏三呼  
萬歲而出金鷄竿高五丈五尺四面各百戲一  
人緣索而上謂之搶金鷄先到者得利物呼萬  
歲諸州奏進院各有遮鋪腰鈴黃旗者數人俟  
宣赦訖即先發太平州萬州壽春府取太平萬

壽之語以次俱發鈴聲滿道都人競觀樓下  
排列次第有宣教臺 夢梁錄明禋禮成登  
門放赦金鷄銜紅幡上書皇帝萬歲

乞試同文慟未遭九重震怒隸波濤後來奉使  
中華日憶否宮門白紵袍

四朝聞見錄歲當大比有黃姓士人率其徒  
詣闕乞試同文館不報黃以其徒伏德壽宮  
祈哀太上覬宣諭孝宗德壽以閒人不管閒

事卻其奏黃遂與其徒向宮門大慟且所服  
白紵袍也孝宗震怒勅有司杖黃背黥隸海  
島黃因竄入高麗國主用為相後以使事至  
闕見於孝宗暨其主倦政遂授以國云

鶉脯曾供祗候官清詞唱出玉笙寒淒涼老抱  
東都感猶譜金人捧露盤

宋史曾覲字純甫紹興中以寄班祗候為建  
王內知客 老學菴筆記曾純甫問一客蕭

鷓巴

按鷓巴應作哲伯但與鷓脯字屬對不合因係當時謔語姑仍其舊

可對

何人曰可對曾鷓脯 覲有海野詞一卷

絕妙詞選純甫東都故老詞多感慨如金人

捧露盤憶秦娥等曲淒然有黍離之感案砌

下水潺潺玉笙吹暮寒亦純甫詞句

綠幔緋簾掛竹叉討春遊屐過分茶牡丹水餅

丁香角踏遍湖堤問杏花

夢梁錄開沽店門首綠畫歡門設紅綠杈子

緋綠簾幙貼金紅紗梔子燈廳院廊廡花木

森茂 大凡麵食店謂之分茶店更有絲雞

麵桐皮麵 又六部前有丁香餛飩此味精

細又有牡丹餅薄皮春蠶笑靨兒 宋稗類

鈔湧金門外有杏花園

醮設天台空奏章乞兒火冷盡荒涼於今樹倒

猢猻散不似平江周一郎

老學菴筆記檜初得疾遣李季設醮天台行

至天姥嶺下遇一士問曰為太師乎曰然曰  
徒勞耳季遂歸 談叢曹泳侍郎妻碩人厲  
氏餘姚大族女方泳盛時鄉里奔走恐後獨  
碩人之兄厲德斯不然泳怒帥越時德斯為  
里正泳風邑官脅治百端竟不屈會之甫殂  
乃遣介致書於泳啟封乃樹倒猢猻散賦一  
篇 武林舊事弄猢猻人平江周一郎 盧  
溪集雷雨沅湘振滯冤皇恩普出九重天乞

兒猶戀權門火應謂死灰能復然刺申王作  
鞞鞞月馭上青冥流落人間有石經還念中宮  
璽文在始知憲聖擅蘭亭

中興小錄吳后嘗臨蘭亭帖佚在人間咸寧  
郡王韓世忠得之表獻上驗璽文知為中宮  
臨本賜保康軍節度使吳益刊於石時紹興  
十五年秋七月丙寅 四朝聞見錄高宗御  
書六經嘗以賜國子監及石本於諸州庠上

南宋雜事言 卷四 十一  
親御翰墨稍倦憲聖續書至今皆莫能辨  
愛得清言畫手工至今繪苑遡餘風綠荷障子  
臨秋水一穗疎花上草蟲

朱昱毘陵志於清言晉陵人工畫荷花獨步  
一郡寧宗朝以荷花障進特旨授承節郎  
圖繪寶鑑嘉定間清言專畫荷花草蟲世號  
於荷

唱徹杭州更不回玉壺春賞遍樓臺遺民空掬  
中原淚猶說河流天水來

宋裨類鈔謝處厚有誰把杭州曲子謳之句  
老學菴筆記淳熙中河決入汴謂之天水  
來天水國姓也遺民以為恢復之兆  
誰信君王嗜學竒筆痕墨滓遍淋漓才臨五百  
蘭亭本更寫香山秋水詞

益公題跋白詩有秋水浙江稻朝煙烹白鱗  
蓋於飲食默寓忠愛不忘君之意孝宗每愛

書之三百餘年重遇聖明發揮 老學菴筆  
記高廟臨蘭亭賜壽皇於建邸後批云可依  
臨五百本來看兩宮篤學如此

十年閒味梅花咏一日春風楊柳愁俱是可人  
詩賈禍不如同泛北山舟

後邛集劉克莊詠落梅東君謬掌花權柄却  
忌孤高不主張讒者箋其詩以示柄臣由此  
閒廢十載 集中有贈陳起詩陳侯生長繁

華地却以芸香自沐薰鍊句豈非林處士鬻  
書莫是穆參軍雨簷兀坐忘春去雪案清談  
至夜分何日我聞君閉肆扁舟同泛北山雲  
案春風楊柳陳起事詳見第六卷注中又  
賣書者別有小陳道人為賈似道編管

一編小說奉昇平德壽閒消永日清笑喚何人  
來演史穆書生與戴書生

武林舊事德壽宮演史有穆書生戴書生

玉花接碎泛春壺開謝春風夢蕊珠二十五枝  
香冉冉綠雲晴雪遍南湖

朝天續集觀張功甫荼蘼詩有香雪南湖今  
誰有碎接玉花泛春酒 武林舊事約齋北  
園有蕊珠洞植荼蘼二十五株

產圖吉位正生方宮婢宣來踏逐娘先日申聞  
學士院淨除胎髮撰文章

武林舊事宮中有娠令太醫宿直供畫吉位

生方合用藥材催生物件 又令踏逐老娘  
伴人乳婦抱洗女人 又申學士院撰述淨  
胎髮祝壽文

小學源流識者稀桃菜舊柳邪辨纖微舍人手  
指雲萍錄協字偏旁果是非

湘煙錄洪景盧周茂振入館謝啟云桃菜難  
悟柳邪本同閔康侯曰荀子憐菜敝而不反  
其常注菜讀為菑古文篆卯字讀當為柳



游宦紀聞包遜字敏道在臨安謁魏舍人了  
翁蒙予進因出雲萍錄令書包有六子皆從  
心其間名協者舍人指曰此非從心乃是從  
十有館客李文留心字學待為叩之少選李  
至遂及此云其義有二從十乃衆人之和是  
謂協和萬邦之協從心乃此心之和是謂三  
后協心之協李名肩吾眉人 案肩吾有詞  
見絕妙好詞

左右江湖駐蹕初鬱攸飛燼少安居休言兩火  
兼三火自是臨安火政疎

楓隄小牘紹興二年五月大火被燬一萬三千  
餘家皆以為中興之初改元建炎致此但臨安  
撲救視汴都為疎 白獺髓紹定初御街中瓦  
前賣團子者目為三火下店遂為失火之讖

昭慶鐘樓竹影斜坡公手蹟舊籠紗誰教粉墨  
移京口燈暗長廊起暮鴉

二老堂雜志西湖昭慶寺有鐘在樓上東坡  
寫竹尚可辨竹下題云夫子方明弼康道嘉  
甫子瞻同遊庚午八月日題予紹興庚辰往  
觀則已茫昧後移往鎮江府謝后功德院不  
復可見 靜佳集昭慶寺詩幽尋得勝趣城  
市幾人能古柳深中磬長廊盡處燈畫龍聽  
說法塑佛看齋僧別寺經行徧茲遊昔未曾  
妃久已返星輶猶有香魂屬望仙露重月斜

凝立處玉梅花影澹如煙

異聞總錄咸淳間游士胡天俊於梅樹下得  
一白羅帕上題詩云蕭蕭風起月痕斜露重  
雲鬟壓玉珞望斷行雲凝立久手彈珠淚滿  
梅花胡明日以帕示人趙冰壺駭曰吾亡妾  
杭人喬氏望仙貴妃姪女也去年暴亡殯梅  
樹下此正其筆蹟也

花邊無事簇絨鞍乘轎都城許從官最稱踏青

流水步繡裳挂在隔簾看

雲麓漫鈔故事百官入朝並乘馬自渡江後  
方乘轎迄今不改 竹屋癡語御街行賦轎  
云筠籐織就花紋細稱穩步如流水踏青陌  
上雨初晴嫌怕溼文鴛雙履要人送上逢花  
須住纔過處香風起袞兒挂在簾兒底更不  
把窗兒閉紅紅白白簇花枝恰稱得尋春芳  
意歸來時晚紗籠引道扶下人微醉

芙蓉高閣倚層嵐兵氣休侵酒半酣  
暗浥龍中兩行淚幾人回首望江南

吳淵穎集理宗在宮中嘗被酒上芙蓉閣見淮  
上有黑祆十餘年不散南逼江淒然淚下  
地下鉛甯黯澹秋赤松何處伴同遊他時雖逐  
圖南去說著蒼生祇益愁

朝野遺紀岳飛之斃於獄也獄卒隗順負其  
屍塋之北山之濬及其死也謂其子曰異時

朝廷求而不獲必懸官賞汝告官曰棺上一  
鉛筩有棘寺勒字吾埋殯之符也後果購其  
瘞不得以一班職為賞其子始上告官悉如  
所言 七修類藁金陵士人名仙得詩云風  
露淒淒雨過天踈窗有月到床前夜深不作  
紅塵夢注得南華四十篇又強金擾擾我提  
兵血戰中原恨未平大厦已斜支一木豈期  
長脚悞蒼生二人乃陳搏岳飛

寶墨叢奎四軸餘史家恩勅等瓊琚內官亦有  
金絲扇隨駕今朝盡賜書

乾淳起居注淳熙五年太上賜史少保御書  
四軸隨駕宮人內官並賜金絲御書扇  
紅粉青衿盡北征昨宵丞相已書名秀才揀去  
將何用也與宮人合隊行

水雲集有北師要討撒花銀官府行移逼市  
民丞相巴延猶有語學中要揀秀才人 又

有三宮今日燕山去春草萋萋上玉階  
怡悵孤山第一春墓田處士有比鄰也知諫草  
名傳世空把梅花問故人

深雪偶談秋壑送朝客詩頸聯云梅花見處  
多留句諫草歲來定得名 宋稗類鈔賈似  
道別於西泠之外架樓臨之曰第一春梅塢  
冰盤角黍浴蘭時內司爭先雕刻奇亦有彩金  
紗盃子一枝通草貌天師

楊太后宮詞角黍冰盤釘豆裝酒闌昌歎泛  
瑤觴 夢梁錄浴蘭令節內司意思局以紅  
紗彩金盃子或菖蒲或通草雕刻天師馭虎  
像於中

老秦筆意授雕兒遂壞紅羅岳字旗可惜東松  
菴壁上一行遺墨見淋漓

宋史凡論人章疏皆檜自操以授言官識之  
者曰此老秦筆也 程史飛以紅羅為幟上

刺岳字 秋崖小蒙岳飛帖王之討楊么也  
公過師吾里留題東松菴壁上老墨飛動忠  
義之氣如所謂同後軍王團練者蓋後來告  
變之王雕兒也

野遊時到白雲堂麋性隨圓復就方贏得句傳  
山鳥起巖花衝落半溪香

四朝聞見錄恭孝儀王嘗遊天竺有山禽忽  
驚起衝落半巖花之句嘗自贊其容有性比

山麋貌同野叟隨圓就方似無唯有云云蓋  
叙其推戴事也死葬西湖顯明寺 天竺志  
天竺有白雲堂

朝朝絃管戲春湖看過春風二月無獨有金橋  
垂柳色不曾寫入燕遊圖

西溪梵隱志金四老橋垂柳獨盛 志雅堂  
雜鈔理宗有燕遊圖一軸

曾入摛文備講筵賜冰支酒自年年明朝禁宿

南宋雜事 卷四  
供宣訪又費餐錢日一千

楊太后宮詞有翰林學士知誰直今日傳宣  
與賜冰 玉堂雜記隆興初用真宗故實輪  
講筵學士院官直宿禁林每夕兩員以備宣  
引諮訪 又翰林支快行家食錢三千又折  
酒錢三百別賜冰一擔若寓直支餐錢一千  
限日下支不許次日 南宋宮殿記摛文殿  
在玉堂之後東西二閣以處詞臣

和寧門外雨如塵遊騎歸來滿眼春雪色海鮮  
都上市却隨花果及時新

古杭夢遊錄自大內和寧門外新路南北寶  
玉珍異及花果時新海鮮野味奇器天下所  
無者悉集於此

玉柵燈懸異巧名佳人游賞遍春城歸來幾日  
閒拋過又試東風絃管聲

稊米集孤山寒食詩最憐隱者高眠地日日

春風是管絃 夢梁錄元宵牛羊司前有內  
侍蔣苑使家粧點亭臺懸挂玉柵異巧華燈  
又公子王孫以紗籠喝道將帶佳人美女  
遍地游賞

雪花吹浪過西陵今夜清遊興未曾載月小舟  
仍似舊有人江上弔詩僧

攻媿集詩舊聞老具擅詩聲夜泛錢塘向鳳  
城今日清遊更豪逸雪花和月帶潮生自注

法具字圓復紹興初詩僧也有月夜游錢唐  
江詩云小舟為我載月色白沙翠竹光相射  
後復云白下金陵四百年無此豪興

老喚詩人薦得名寺前覓句寫閒情晚雲涼雨  
吹應遍合轉橋東玩月行

朱文公大全集同僚小集梵天寺坐間雨作  
已復開霽步至東橋玩月賦詩二首有層雲  
生薄晚涼雨遍空山之句 又孝宗時侍郎



胡銓以詩人薦同王庭珪內召故朱子自註詩云僕不能詩平生僥倖多類此

已却村酤禁酒牌何須攔稅更安排欲尋粟里高風處祇見春花落御街

西溪梵隱志西溪留下西南三里有宋人禁酒牌即高宗入山村酒肆喜其供奉精潔御書界牌以賜曰不為酒稅處是也後為陶家廂理宗朝有陶處士隱此水竹田桑夫畊婦

織有粟里之風皆山川幽寂之處也 續文

獻通考孝宗淳熙五年知臨安府吳淵乞復置西溪發引攔稅上曰去城五十里豈可復置攔稅 張泐禁酒牌詩芳草承行騎春花

落御階

染洗宮花勅字新鬻來猶帶舊家春可憐六尺青綾誥淚濕殘綃換帖人

晞髮集有洗舊誥綾鬻將以為緣以紺繒易

得作手卷賦小樂章求好事者書其後詩曰  
吳宮輦路傷行客繭冰壓雲凝碧色門前新  
掃染家鄰借人鋪設殘衣帛宮花翦綾連院  
號覆取翻看成一道織紋宛轉勅字新知是  
初誰六尺誥城霞失彩宮薛病中與海圖上  
衣領改顏倖售緣所遭褪藥玄香洗藍影青  
綢易得淚承睫擊筑楚歌無故業歌殘求書  
好事人異代倘傳誥綾帖

車駕蒼黃南渡日可憐應乏濟時才請看不識  
錢唐事猶頌東巡二月來

老學菴筆記建炎三年春車駕倉卒南渡有  
侍臣陳劄子首曰恭惟陛下歲二月東巡狩  
至於錢唐呂相笑之曰秀才家不識時務  
萬緡宣賜遭時忌老去逢官是畏塗不用再看  
磨鏡帖蚤將居里釋麟符

玉堂雜記御史王綸草劉婉儀進位貴妃制

太上稱其有典誥體潤筆殆萬緡賜硯尤奇  
秦丞相不樂遭論列而去周必大嘗草其致  
仕制曰少則歌鹿鳴而薦於鄉老則釋麟符  
而居其里 宋裨類鈔潘良貴少有氣節數  
忤權貴自少至老出入三朝在官不過八百  
六十日居不蔽風雨無尺寸之田有磨鏡帖  
行於世世以為名言自號默成居士

心經一頌意云何百萬僧齋願豈多頑石更將  
鐫作佛莫言只解畫彌陀

橫浦集錢唐喻氏子生不茹葷少妙畫學吳  
道子臻其能後專畫阿彌陀佛無為子楊次  
公喜之呼為喻彌陀為兒時嘗誦心經立願  
齋僧三百萬遊西湖多寶山輒作念曰異時  
當鐫此為佛其後遂為彌陀之像

鹵簿圖成出北門贖儀勻得向南奔蜀王曾為  
頭顱計莫望西州掩淚痕

四朝聞見錄吳曦既用賂師旦遂舉全蜀以授之其在殿巖也常命工圖畫上乘輿鹵簿卷軸甚詳人問曰太尉何用此曦給之曰把歸去教孩兒看了消災滅罪及出北關遂焚香拜天於鷓首云且得脫身歸去其反狀已萌於此矣 宋史程松以書抵曦乞贖禮買舟稱曦為蜀王曦遣吏以匣封致覬松望見大恐疑其劔也亟逃奔使者追及松不得已

啓視之則金寶也松乃兼程出峽西向掩淚曰吾今獲保頭顱矣

烏巾山滿雪中花佳茗還將鬪玉芽恰自鼎湖龍去後錫塘誰訪白枇杷

咸淳臨安志枇杷出於黃嶺前烏巾山小錫塘塢尤珍白色者上黃次之亦間出佳茗又淳熙間德壽宮嘗密遣人採訪惟烏巾山下汪氏廬前一本實大而味勝歲倍直以醜

之 又鼎湖即臨平山下藕花洲也

賜食曾蒙出上方自緣身領膳曹郎絕知禁臠  
人間少異品空思細頸羊

劔南集中秋書懷詩秋風社散日平西餘胙  
殘壺手自提賜食敢思烹細項家庖仍禁劈  
團臍自注昔為儀曹郎兼領膳部每蒙賜食  
與王公略等食品中有羊細項甚珍予近以  
惡殺不食蟹

古玉簪圖舊刻成蘭亭貌出賺書生攜來竟貸  
錢唐市金錯猶題後主名

蘭亭考古圖寫人物一軸唐右丞相閻立本  
筆狀賺書一段事書生意氣揚揚有自得之  
色老僧口張不吐有失意之態其狀如生

又此圖江南庫所藏簪頂古玉軸猶是舊物  
又紹興元年七月望有攜此貨於錢唐郡人

吳說得之見謝伋言舊有大牙籤後主親題

刻其上云上品畫蕭翼籤

報國翻成去國哀棄官肯許掖垣回如何鑑水  
龜堂老晚為南園撰記來

誠齋集韓侂胄築南園屬誠齋為記許以掖  
垣曰官可棄記不可得侂胄權日盛遂憂憤  
成疾家人不敢進邸報適族子自外至言侂  
胄近狀萬里痛哭呼紙書曰姦臣專權謀危  
社稷吾頭顱如許報國無路惟有孤憤別妻

子筆落而逝 宋史陸游傳晚年再出為韓  
侂胄撰南園閱古泉記見譏清議 又常自  
稱為龜堂老子

一朝鸞馭報歸期因識環環偽帝姬多被番人  
笑顏子怪他宮事教尼師

四朝聞見錄柔福帝姬徽宗女自金奔歸自  
言於上上憫之遂以高士儂尚主及韋太后  
北方歸持上袂泣未已遽曰哥被番人笑說

錯買了顏子柔福死已久上以太母之命寘  
姬於理獄具誅之東市柔福自聞太后將還  
鸞馭即以病告嘗以尼師自隨或謂此尼曾  
事帝姬故備知疇昔帝姬俱上在宮中事偽  
帝姬引見之日呼上小字尼師之教也京師  
顏家巷髻器物不堅實故至今謂之顏子生  
活 三朝北盟會編韓世清敗劉忠於蘄州  
得一婦人自稱柔福帝姬小名環環

手裊紅旗蹴白波翻頭若作等閒過天街鼓樂  
迎歸後爭向尊前唱浪婆

夢梁錄八月潮怒勝於常時十八日帥座出  
郊教習水軍杭人有無賴之徒以大綵旗小  
青涼傘紅綠小傘兒各繫色繡段子滿竿伺  
潮出海門百十為羣執旗泅水以迓子胥向  
有前軍作弄潮詩曰弄罷江潮晚入城紅旗  
颭颭白旗輕不因會喫翻頭浪爭得天街鼓

西京雜事 卷四  
樂迎 又云車駕幸禁中觀潮殿廷下視江  
中水軍教閱整肅部伍望闕奏喏聲如雷震  
其日帥司備牲禮草履沙木板祭於江中士  
庶多以經文投之

禁殿風傳臚唱聲宮花紅處認頭名若教畫竹  
呈官卷誰與今年賀滿城

貴耳錄淳熙間省元徐履殿試用卷子寫竹  
一枝題曰畫竹一竿送與試官 老學菴筆

記陳亞今年新及第滿城人賀李衙推

吳山避寇劇披猖簪珥無遺但淚妝若少侍晨  
雙篋贈廉郎沒興作徐郎

揮塵後錄廉宣仲布建炎初自山陽避寇南  
來攜鉅萬至臨安寓居吳山下陳通等亂悉  
為劫掠不遺一簪宣仲昔與侍晨道士時若  
愚游至是聞在賊間姑往訪之授以兩篋令  
二校防護出關趨雪川依曾空青泊僧舍宣



仲張子能之壻外祖戲曰君正是沒興徐德  
言矣

超然館裏歲華深盛有文心鄧牧心但覓賞音  
償宿願一生餘得伯牙琴

武林耆舊傳鄧牧字牧心錢唐人隱大滌山  
人稱為文行先生所居有超然館宴坐累月  
不出時時作詩文以自娛其著有洞霄記遊  
山誌襟文橐 都穆鐵網珊瑚錢唐鄧牧心

先生生於宋世之季有文數十首名曰伯牙  
琴

荒涼九曲到叢祠忠武空勞有賜碑昨夜魂歸  
秋水觀不堪重現岳家旗

朝野遺記岳侯卒於大理寺獄卒隗順負  
其屍出踰城至九曲叢祠中故至今九曲五  
顯廟尚靈 輟耕錄鄭元祐為岳武穆王修  
祠墓疏賜墓田於棲霞嶺下建祀祠千秋觀

西 雲邁淡墨臯亭山巴延取宋屯兵處方  
巴延兵至是夕大雷電巴延望見四山旌旗  
閃爍皆作精忠岳家字 岳侯傳侯中毒而  
死葬於臨安菜園內

六更夢醒閱興亡瀛國秋風兩鬢霜因記華山  
陳處士紙錢無處是錢唐

貴耳錄真宗問陳搏國祚靈長之數陳奏云  
過唐不及漢紙錢使不得處數百年前已先

知止錢唐之識 元朝文類封瀛國公制王

磐撰有云戈船競渡而天塹無憑鐵馬長驅  
而松關失險云云

鳳鳥霞裳翦霧開一聲清蹕八鸞迴將軍會揖  
單于去親奉瑤池阿母來

誠齋集題曹仲本出示譙國公迎請太后圖  
詩中有翠華黃屋從天降一聲清蹕萬人看  
輦中似是瑤池母鳳鳥霞裳翦重霧將軍元

西京雜事 卷四  
是一縫掖忽攘兩臂挽五石長揖單于如小兒奉歸急輦如折枝

紹興元祐事麤疎日歷參教玉牒餘不及開元表遺錄太平留得有傳書

困學紀聞紹興重修哲宗實錄獨元祐八年事皆無存者參取玉牒日歷諸書以足之僅得成書中興後事紹興八年至二十五年最為踈畧 又孝宗問周益公云唐孫樵讀

開元錄雜報數事內有宣政門宰相與百僚廷諫十刻罷編檢新舊唐史及諸書並不載益公奏太平御覽總目內有開元錄一書祖宗朝此本尚存近世偶不傳耳容臣博加詢訪

鏤將書印散中都七寶猶藏誥語無點筆一揮江上事邊風吹起九思圖

逸民史王忠民當高宗渡江劉豫僭立作九

思圖及定亂四象達之金主及鏤板印圖散  
於敵境以明大義紹興初翟宗薦其忠節授  
宣教郎詔遣至行在忠民上疏辭以誥寘積  
中藏七寶山下力懇求去

酒樓唱徹隔牆聞千垂花紅一色雲椎髻烏衣  
小龍女新傳歌譜玉華君

林下詞選紹興間都下酒肆中有道人攜烏  
衣椎髻女子買斗酒獨飲女子歌詞以侑云

朝元路朝元路同駕玉華君千乘載花紅一  
色人間遙指是祥雲迴望海光新或記之以  
問一道士道士驚曰此赤城韓夫人所製水  
府蔡真君法駕導引也烏衣女子疑龍云  
垂老三橋臥旅樓梅花無語替人愁一宵飛去  
鸚籠在勝雪何緣似玉榴

癸辛雜識別集方回字萬里號虛谷徽州人也  
寓杭之三橋旅樓有二婢曰周勝雪劉玉榴

方遊金陵寄二婢於其母周姬之家恣開杜  
陵之門勝雪者為豪客挾去方歸悵惋作詩  
有鸚鵡籠開綵索寬一宵飛去為誰歡之句  
先是方為庶官嘗賦梅花百咏以諛賈相  
龍尾金花識御顏五雲猶帶斲痕班如何硯亦  
論遭遇祕閣宸書一字頑

春風堂隨筆宋謝堅知徽州於舊坑取石貢  
理宗初坑上常有五色雲氣如錦衾隨雲所

覆處斲之 老學菴筆記祕閣有硯思陵御  
書一頑字因謂之準勅頑硯

陰陽雙柏翠光濃孤直何心貢九重曲竹只生  
安隱院管城子合受斜封

太平清話南渡高宗時高麗國進陰陽栢一  
株僅二尺許每歲左花則右實右花則左實  
咸淳臨安志安隱院在臨平山南地生曲  
竹林次麟詩直節稜稜是此君耳孫却以曲

南齊書 卷四  
四三  
為名首陽山下知難種只可斜封向管城  
載礫填窪尚典型北山仍與接南屏惠卿毀後  
潛增築依舊泂隄有九亭

咸淳臨安志蘇公隄郡守呂惠卿奏毀之  
又咸淳五年朝廷給錢命守臣潛說友增築  
載礫運土填窪益庫通高二尺袤七百五十  
丈廣皆六十尺泂隄舊有亭九亦治新之仍  
補花木數百本東坡詩六橋橫絕天漢上北

山始與南屏通

一簇紅鸞扇影遮景靈歸去擁如霞羣臣醉盡  
沾春色頭上風吹羅帛花

夢梁錄嘉定四年十月十九日降旨遇大朝  
會聖節大宴及恭謝回鑾主上不簪花又九  
遇聖節朝會宴賜羣臣通草花遇恭謝親享  
賜羅帛花又詩曰景靈行駕到和寧頭上宮  
花射彩雲歸向慈嚴誇盛事誓殫忠力報吾

君

南薰廣殿戛風鈴馬遠曾圖淺色屏絕笑螺屏  
填十事鹿磯月峽夢難醒

寓意編好事家藏宋馬遠畫南薰殿淺色屏  
障 癸辛雜識別集王櫛為螺鈿屏風圖賈  
相十事以獻曰度宗即位南郊慶成鄂渚守  
城月峽斷橋鹿磯奏捷草坪決戰安南獻象  
建獻嘉禾川獻嘉禾淮擒布哈

舊作亭化  
今改正

隆祐鸞車已上仙攢宮初建謂當然誰憐伊洛  
諸陵寢有似錢唐向趙田

東齋記事隆祐太后升遐朝廷欲建山陵兩  
浙漕臣曾公卷謂諸帝陵寢今存伊洛不日  
復中原即歸葬矣宜以攢宮為名僉以為當  
經鉏堂雜志趙子固向伯升錢唐二佳士  
其先太原人攜家南渡各有中原田契兩籠  
其初日望恢復憑契復故業至今七十餘年

竟成無用

粉墨應須尚雅馴畫中草草最通神試看嗜酒  
梁風子減筆能將伏院人

圖繪寶鑑梁楷嘉泰年畫院待詔賜金帶不  
受挂於院內嗜酒自樂號曰梁風子院人見  
其精妙之筆無不驚伏傳於世者謂之減筆  
海道空教寫作圖不堪南庫盡荒蕪墮文還驗  
當時篆玉紐雙龍記有無

元祕書志王士點商企翁祕書監關到物件  
有杭州海道圖一軸又收致寶四顆皇帝行  
寶白玉雙龍紐一顆上帶紅絨絲系欽崇國  
祀之寶青白玉五螭紐一顆光堯壽聖憲天  
體道性仁誠德經武緯文太上皇帝之寶蒼  
玉實碾螭紐一顆上有舊黃絨小絲系宋皇  
帝寶象牙素紐一顆上有裂璽

白紗巾拭淚痕多半臂分明念九哥空寄金銀



古今事考 卷四  
四十五  
人不見奈他蝴蝶鬪飛何

北狩見聞錄徽廟出御衣之襯一領俗呼背心又索於懿節邢后得所帶金耳鐙子一隻上有雙飛小蝴蝶俗名鬪高飛云是今上皇帝在藩邸時製以為的驗及皇太后信令曹勛見上奏之詔誥丁寧且泣且囑曰無忘吾北行之苦又以拭淚白紗手帕子付臣曰見上深致我思念淚下之痛

拂石曾經御坐來易安齋裏賦詩回春風吹瘦橫斜影上番先探青蒂梅

四朝聞見錄光堯親祀南郊因過易安齋為賦梅巖孝宗和云秀色環亭擁霽霞玉香冰艷數枝斜東君欲奉天顏喜故遣融和放早花高宗嘗問主僧云此梅喚作甚梅僧對曰青蒂梅又問曰梅邊有籐喚作甚對曰萬歲籐稱旨賜僧階上嘗拂石而坐至今謂之御坐石

能傳車輅劉宗古善寫天神胡彥龍鯨海風波  
中興業不圖坐右作遺蹤

畫繼劉宗古宣和間成忠郎亂後歸江左朝  
廷方尋訪車輅式而宗古進本稱旨除提舉  
車輅院事 圖繪寶鑑胡彥龍善畫人物天  
神紹定畫院待詔 雲麓漫鈔建炎三年航  
海幸台州祥符寺今壁間有詩云黃帽當年  
駕舳艫東浮鯨海出三吳中興事業風波惡

好作君王坐右圖

斷橋月即短橋時夜夜荷風度柳絲蕩漾香魂  
向何處試聽順受老人詞

花菴中興絕妙詞選吳禮之字子和錢唐人  
有順受老人詞五卷王生陶氏月夜共沈西  
湖賦霜天曉角弔之云連環易缺難解同心  
結癡騃佳人才子情緣重怕離別意切人路  
絕共沈烟水闊蕩漾香魂何處長橋月斷橋

月 按西湖志本癸辛襍識載王陶事但云  
都人作長橋月短橋月以哀之不記全篇且  
不知作者姓字得此可以補之短橋花菴本  
作斷橋是斷橋可名短橋也亦前此所未聞  
龍井松風鶴夢涼水聲人語近僧廊風流最是  
淳熙日尚有東坡植海棠

靖逸小藁秋日遊龍井詩引道煩雙鶴攜囊  
倩一僮竹光杯影裏人語水聲中不雨雲常

濕無霜葉自紅我來何所事端為聽松風

二老堂雜志壬午三月己亥酌龍井入壽聖  
寺有海棠一株蓋蘇公手植者

摺扇無多一握慳宮紗新弄玉連環誰教楊妹  
親題字蜂趕梅花落碎斑

者舊續聞摺骨扇詞云宮紗蜂趕梅寶扇鸞  
開翅數摺聚清風一捻生秋意摇摇雲母輕  
裊裊瓊枝細莫解玉連環怕作飛花墜今于

湖集載此詞 春風堂隨筆今世所用摺扇  
 亦名聚頭扇南宋以來詩詞咏聚扇者甚多  
 予收得楊妹子所寫絹扇面摺痕尚存 夢  
 梁錄小市周家摺摺扇舖

尊絲春貢點薑芽筍 劔黃鶯餉內家還有宮廚  
 生菜美鏗然寒齒嚼梅花

會稽續志湘湖貢尊 咸淳臨安志筍之類  
 有黃鶯筍貓頭筍哺雞筍 羣芳譜宋憲聖

后每治生菜必於梅花下取落花襟之

冊后儀文詔翰林制詞應費幾番心官家潤筆  
 須矜貴先賜黃金二百金

武林舊事冊皇后儀先一日宣翰林學士鎖  
 院草冊后制詞賜學士潤筆金二百兩次日  
 官聽宣布皇后三辭不允太史局擇日行冊  
 立禮

池上金魚策策遊落花如泛碧溪流紛然萍草

交迴處解道紅蟲飼此不

鼠璞南渡駐蹕王公貴人園池競建養之法  
出馬有金銀兩種鯽魚金鯽時有之金餐為  
難得魚子多自吐吞往往以萍草置池上待  
其放子撈出曝乾復換水復生魚黑而白始  
能成紅或謂因所食紅蟲而變 又六和埭  
寺後池中有此魚如金色

打馬圖成賦更工蕭蕭竹粉一番風長篇紀事  
尤奇絕題贈行人赴紫濛

打馬圖李易安著并撰賦一篇 太平清話

莫廷韓云向曾置李易安墨竹一幅 雲麓

漫鈔李易安有才思其詞已版行於世他文  
少有見者其上樞密韓公工部尚書胡公詩  
序云紹興癸丑五月兩公使金通兩宮也易  
安父祖出韓公門下見此大號令不能忘言  
作詩各一章以寄意以待採詩者云上韓公

南齊書 卷四  
云三年夏六月天子視朝久凝旒望南雲垂  
衣思北狩如聞帝若曰岳牧與羣后賢寧無  
半千運已過陽九勿勒燕然銘勿種金城柳  
豈無純孝臣識此霜露悲何必羹捨肉便可  
車載脂土地非所惜玉帛如塵泥誰當可將  
命幣厚辭益卑四岳僉曰俞臣下帝所知中  
朝第一人春官有昌黎身為百夫持行足萬  
人師嘉祐與建中為政有臯夔漢家畏王商

唐室尊子儀是時已破膽將命公所宜公拜  
手稽首受命白玉墀曰臣敢辭難此亦何等  
時家人安足謀妻子不必辭願奉天地靈願  
奉宗廟威徑持紫泥詔直入黃龍城北人定  
稽顙侍子當來迎仁君方博信狂生休請纓  
或取犬馬血與結天日盟上胡公云胡公清  
德人所難謀同德協心志安脫衣已被漢恩  
暖離歌不道易水寒皇天久陰后土溼雨勢

未回風勢急車聲鱗鱗馬蕭蕭壯士懦夫俱  
感泣閭閻嫠婦亦何知瀝血投書干記室天  
生性氣同虎狼不虞預備庸何傷哀甲昔時  
聞楚幕乘城前日記平涼葵丘踐土非荒城  
勿輕談士棄儒生露布詞成馬猶倚峻函關  
出雞未鳴巧匠何曾棄樗櫟芻蕘之言或有  
益不乞隋珠與和璧只乞鄉關新信息靈光  
雖在應蕭蕭草中翁仲今何若遺氓豈尚種

桑麻敗將如聞保城郭嫠家父祖生齊魯位  
下名高人比數當時稷下縱談時猶記人揮  
汗成雨子孫南渡今幾年漂流遂與流人伍  
欲將血淚寄山河去灑東山一坏土 契丹  
國志紫濛契丹地名晉慕容氏自云有熊氏  
之裔邑於紫濛之野案方虛谷稱紫濛為契  
丹館名誤也

海錯江珍聚玉京百年王氣怒潮平誰憐抗論

國朝通志 卷四  
陳同甫蚤以三分著史名

豹隱記談嘉熙中吳潛論錢唐建都以陰陽  
家言海門吳水蚤晚兩朝後為潮沙湮塞殆  
天啓國家以轉移之機也 案陳同甫撰三

國紀年史傳序二書

文獻金源洛水塵建炎留得趙家春一篇帝統  
遵王命猶有龍南著集人

羅鄂州集有帝統論一篇言光堯內禪事文

多不載 餘冬序錄金之高陵楊興宗史不  
著名元裕之記其當宋渡江時著龍南集





國家圖書館, NATIONAL CENTRAL LIBRARY, TAIWAN, R.O.C.

國定標準

卷四

五

南宋襟事詩

卷五 一百首

仁和趙昱撰

鳳闕蟠空入畫圖天開佳麗定鴻模六飛新駐  
稱行在詔進詞臣賦二都

徐一夔宋行宮考在杭州鳳皇山下即唐以  
來州治也咸淳臨安志建炎三年高宗詔以  
杭州為行宮時執政奏屋宇隘陋高宗以百  
官六軍未得其所不御正寢紹興元年詔守



古史補遺 卷五 二  
臣徐康國措置且命不得華飾二年南門成名曰行宮之門三年以百官遇雨泥行非便詔梁汝嘉劾廊序於南門之內十八年名南門曰麗正北曰和寧東苑曰東華二十八年始增築禁城以今地考之南自勝果入路北則入城環至德侔天地牌坊東沿河西至山岡自北至山隨其高下以為宮殿也 玉海  
建炎中駐蹕臨安紹興八年三月詔復還十

五年高袞上二都賦十七年施諤上行都賦又紹興八年將還臨安命有司建太廟十二年作太社太稷皇后廟都亭驛太學十三年築園立景靈宮高禩壇祕書省十五年作內中神御殿十六年廣太廟建武學十七年作玉津園太一宮萬壽觀十八年築九宮貴神壇十九年建太廟齋殿二十年作玉牒所二十二年作左藏庫南省倉二十五年建執政

府二十六年築兩相第太醫局二十七年建  
尚書六府凡定都二十年而郊廟宮省始備  
老學菴筆記大駕幸建康六宮留臨安則  
建康為行在臨安為行宮今東京阻隔而臨  
安官司猶曰行在某司示不忘恢復也

五丈新通御路寬盛朝故事詣圓壇腰輿三百  
分前導香裊輕煙護燭寒

方輿勝覽紹興三十八年殿前都指揮使楊

存中乞通展皇城十三丈以五丈作御路六  
丈作民居將來聖駕親郊由候潮門徑從所  
展御路直抵郊臺 蒲室集杭州金剛顯教  
院記院始於紹興中妙空大師惠齡居杭州  
之金剛嶺考之圖志龍山圓壇古有顯教院  
其墟久矣乾道中請於郡而復立院焉 稊  
米集郊丘紀事詩內門朝日上金鋪寶玉籠  
煙出殿餘紅燭兩行分御道輦官三百奉腰

輿奉寶玉輦官三百餘人謂之腰輿皆籠燭  
爇香而前蓋故事也

金桐葉葉走青驄羣從冠量貂尾籠儀仗依稀  
如昔日長髯重歎說元豐

夢梁錄明裡宿齋殿儀宰執親王頭冠九量  
加貂蟬籠巾侍從七量餘官六量至二量臺  
諫增豸角耳量者冠前額上排金桐葉是也

玉照新志紹興辛酉南郊時排設儀仗龍

山茶肆有一長鬚偉男子衣青袍於稠人歎  
曰吾元豐五年遊京師一見之後不曾再覩  
今者之盛殆與昔時無異焉

斷鼈息馬費追摩無逸圖消白日過清宴銀鈎  
驚絢綵半規小墜粉痕多

玉海高宗書法斷鼈立極息馬論道龍畫螺  
書旁分徧列又嘗書無逸圖曰朕一無所好  
惟閱書作字自然無勑 播芳大全文粹王

壁御書無逸圖贊紹興改元之五年四月皇帝陛下親灑宸翰書尚書無逸篇為圖以揭於經筵銀鉤絢綵鳳翬鸞翔而清宴之間於以省覽研味猗歟茲盛德事也 汪砢玉珊瑚網宋高宗御府手卷畫前上白引縫間用乾卦圓印其下用希世藏方印卷盡處下方用紹興二字印墨蹟不用卷上合縫卦印止用其下希世小印其後仍用紹興小璽

龍興入彀俊英多桂子飄香競揣摩想見重花交葉下水晶影裏記登科

老學菴筆記高宗行幸揚州郡人李易為狀元次舉駐蹕臨安而狀元張九成亦貫臨安時以為王氣所在 又張子韶對策有桂子飄香之語趙明誠妻李氏有云露花倒影柳三變桂子飄香張九成 汝陰餘話沈必先日記言奏事殿中高宗云近有人自東京逃

歸聞張九成見為劉豫用事可怪必先奏云  
張九成在其鄉里臨安府鹽官縣寄居去行  
闕無百里之遠兩日前方有文字來幸陛下  
裁之上云如此則所傳妄矣蓋子韶廷試策  
流播偽齊人悉諷誦故傳疑焉翌日降旨除  
祕書郎 咸淳臨安志張九成字子韶錢唐  
人徙居鹽官 夷堅志建炎春一士人步城  
西有虹自地出圓影若水晶老木極槎有茅

舍機杼之聲行入機張女子四五縮烏絲了  
髻玉肌雲質衣輕綃揜腕織組視之錦文重  
花交葉之下有字數行首曰李易如此十數  
問之女對曰登科記也

運際清平慶主臣紅雲繚繞簇花新車聲歷歷  
還宮候大內遙呼女聖人

武林舊事駕幸景靈宮大禮後行恭謝禮姜  
白石詩云六軍文武浩如雲花簇頭冠樣樣

新惟有至尊渾不戴盡將春色賜羣臣又萬  
數簪花滿御街聖人先自景靈回不知後面  
花多少但見紅雲冉冉來是日皇后車駕先  
還宮中呼后為聖人

龍笛仙音奏內庭冷光秋夜徹青冥碧琳堂外  
松風滿盡屏人間絲竹聽

都城紀勝淳熙間德壽宮龍笛色使臣四十  
名每中秋或月夜令獨奏龍笛聲聞人間誠

清樂也 朝野雜紀孝宗淳熙時作翠寒堂

禁中嘗召趙丞相雄王樞使准奏事堂下古  
松數十清風徐來上曰松聲甚清遠勝絲竹

玉海淳熙禁中有偉觀堂碧琳堂

碧蘚封碑廊廡前雲章揮寫倦勤年春風便面  
來諸院分得忘憂憲草篇

白石樵唱辟雍詩冠帶百年夢昔遊今重嗟  
璧池春飲馬槐市暝藏鴉堂鼓晨昏寂廊碑



風雨斜石經雖不火歲歲長苔花此題高宗  
石經之碑今尚在郡學 甫田集思陵留意  
字學尤喜寫經嘗曰寫字當寫經書不惟學  
字又得經書不忘 潛溪集思陵書神女賦  
思陵極留心書學九經皆嘗親寫此乃禪位  
後所書春秋已高而猶勿倦可謂勤已 玉  
海高宗詔書親札雲章奎畫超冠古今 道  
園學古錄高宗書護草詩便面以賜內庭戚

晚至館閣皆有之戒其帶酒祝以忘憂豈黃  
髮為期之意乎

兵略增刪寓意時中興雄志復誰知自工剝水  
殘山後空賦新秋雨霽詩

長水集寶元康定間西師不解命樞府論次  
兵略撰武經總要書成四十四卷仁宗為序  
靖康後宋事日以不競孝宗發憤國難親御  
戎馬又增修二十六卷製序再頒之 珊瑚

網世評馬遠畫多殘山刺水不過南渡偏安  
風景耳又稱為馬一角 水東日記明長陵  
愛温州永嘉郭文通畫有言夏珪馬遠者輒  
斥之曰是殘山刺水宋僻安之物也 貴耳  
錄壽皇有中興之圖作新秋雨霽詩及春賦  
後端平間試詞科出春賦為題試者皆不知  
之五十年間士大夫罔聞之矣

御案香飄古篆青摺將掌記坐昌庭黃僉標識  
橫陳便一一監司上畫屏

益公題跋淳熙間上勤萬機臨朝以方寸紙  
作掌記中摺之寘在御手內殿則留香案上  
三省樞密奏事即視所記一一宣諭已乃收  
之率以為常 方輿勝覽選德殿孝宗新剏  
作金漆大屏風分畫諸道各列監司郡守於  
兩行以黃僉標識居官者職位姓名其背為  
華夷圖 楊后宮詞天下監司二千石姓名

南齊書 卷五 九  
都在御屏中

水嬉爭破浪花圓迎弄劉船與董船何似龍池  
春色裏蘭荃排動內湖邊

夢梁錄百花七寶金獅子何船羅船黃船董  
船劉船俱湖船名 錢唐新志禁中德壽宮  
皆有大龍池萬歲山擬西湖飛來峯御舟之  
華春時競渡非外間可擬又有蘭橈荃橈  
硯池風煖縞魚鱗一冊蘭亭寫入神曾侍御前

三十帖詳觀點畫自超倫

蘭亭博議高宗吳皇后即慈福太后親翰墨  
尤愛蘭亭作小楷一本流傳內外陸升之春  
帖子云內仗朝初退朝曦滿翠屏硯池深不  
凍端為寫蘭亭 玉海紹興十三年貴妃吳  
氏題御書云機政之暇擇鍾王而下三十帖  
親御豪素並加臨寫龍蟠鳳翥希偉蹟也  
古今法書苑高宗翰墨志評余自魏晉以來

至六朝筆法無不臨摹至若楔帖則測之愈深擬之益嚴姿態橫生莫造其原詳觀點畫以至成誦不少去懷也

芙蓉並蒂艷清江小妹邀憐羨一雙筆底芳蘭嬌阿母為裁宮體譜新腔

楊后宮詞小小宮娥近水居雕楣繡額映清渠忽然攜伴凭低檻好似雙蓮出水初 四部藁馬遠畫上有書賜兩府三字并有楊娃

印章遠在光寧朝後先待詔寧后楊氏楊娃即后妹也以藝文供奉內庭凡遠畫進御及頒賜貴戚皆命楊妹子署題后兄石位太師稱大兩府書兩府者即石也 四朝聞見錄慈明楊太后越人通經史能小玉書母張夫人以樂部被憲聖幸後以病歸李氏死葬西湖小麥嶺下地名放馬場憲聖常因樂部不協顧左右曰我記得張家今安在左右對已

死矣有女頗聰慧召后入時年十三既長侍  
宴長樂寧皇目后有意憲聖宴寧皇賜之曰  
做好看待它日有福

孤亭荒落點寒梅曾記先皇翠輦來花醉澄瀾  
都莫問行人猶待杏花开

夢梁錄聚景園孝光寧常幸後漸蕪圯僅有  
一堂兩亭其一亭無扁僅植紅梅侍從陸游  
詩曰聖帝憂民罷露臺春風側苑晝常開盡

除曼衍魚龍戲不禁芻蕘雉兔來水鳥避人  
橫翠靄宮花經雨委蒼苔殘年自喜身強健  
又作清都夢一回又有水殿西頭起砌臺絲  
楊鬧處杏花开之句 錢唐志天逸閣載聚  
景亭臺尚有花醉澄瀾諸名則七十二亭即  
田誌尚未能盡也

朝來翠浪映朱門隨輦詞臣賦御園日莫三山  
祠畔過鳳城殘照近煙昏

梯米集四聖延祥觀御園侍臣周紫芝從駕  
幸山亭詩附山結崇祠朱門照湖水湖流入  
中池秀色歸淨几 桐江集方回以香山看  
山孤山為三山

南遷蕭寺寄流離知閣荒臺餘斷碑認取隨龍  
多漫漶亂鴉清句起悲思

癸辛襍識南渡初中原士大夫之落南者高  
宗有西北士夫許古寺院之命趙忠簡居越

之能仁寺曾文清居越之禹跡寺甚衆 雲  
棲寺志寺近掘地得斷碑題曰宋隨龍余知  
閣宅界旁有石隱隱有詩蓋護蹕南來因家  
於此後捨宅為寺也余知閣詩幾年魂繞浙  
城西十里荷花漾錦陂踏遍兩峯三竺路又  
隨青嶂入雲棲洛邑名園歌舞沈亂鴉啼破  
幾深林何人學得香山老千載精廬有梵音  
千里旌旗擁六飛投簪欲上釣魚磯無端忽

被閒雲引迴耀峰前掩竹扉

望裏樓臺繞翠煙天中帖子禁中傳平分四地  
來遊幸文杏春桃孰後先

玉堂襍記必大嘗自德壽宮後垣望見一樓  
巍然朝士云太上名之曰聚遠必大作端午  
帖子前後頗聞禁籞大略併記於下宮中分  
四地隨時遊覽東地分曰香遠梅堂也曰清  
深竹堂也曰月臺曰梅坡曰松鞠曰三徑鞠

芙蓉竹也曰清妍醑醪也曰清新木犀也曰  
芙蓉岡南地分曰載忻大堂御宴處也曰忻  
忻古柏太湖石也曰射廳曰臨賦荷花山子  
也曰燦錦金林檎也曰至樂池上也曰半丈  
紅郁李子也曰清曠木犀也曰瀉碧養金魚  
處也西則曰冷泉古梅也曰文杏館曰靜樂  
牡丹也曰浣溪大樓子海棠也北則曰絳華  
羅木亭也曰旱船曰依翠茅亭也曰春桃曰

盤松其詳不可得而知也

有客春為下竺遊枕流亭下送春流桃花數萬  
隨流去恍在武陵源上頭

省齋集丁酉二月二十日同部中諸公遊下  
竺御園坐枕流亭觀放閘桃花數萬隨流而  
下斷至集芳園是時海棠滿山郁李滿澗殆  
不數於人間世明日入都而桃花數枝伶俜  
窗外未時內直則海棠郁李方開遂賦二絕

句云萬點紅隨雪浪翻恍疑身在武陵源歸  
來上界多官府人與殘花兩不言清勝堂前  
花萬重玉堂署裏兩芳叢應憐寓直清無侶  
聊伴衰翁宿禁中

亂後瓊華出詔時淒涼恐讀孟家辭中興策自  
燕山定半臂輕綃屬趙岐

古今彞語宋孟太后詔云漢家之厄十世惟  
光武以中興獻公之子九人念重耳之獨在



南齊書 卷五  
三朝北盟會編徽宗自燕山密遣曹勛至  
賜帝絹半臂書其領曰便可即真來援父母  
孤臣泣血錄徽廟北狩有謀者持一黃中  
單來御書云趙岐註孟子付黃潛善諸人審  
思之蓋孟即瑤華太后趙即康王高宗由是  
中興

上壽仙漿第四盤天基令節正清歡良卿拍板  
堯卿鼓玉軸琵琶又獨彈

武林舊事天基聖節第四盞玉軸琵琶獨彈  
正黃宮拍王良卿杖鼓朱堯卿

內院春來樂事寬散錢一笑博君歡何如供職  
憂勤甚獨許恩辭煖盪官

癸辛雜識新集理宗春時內院效市井闌撲  
之戲皆小璫為之供純鏝散錢以供一笑  
白獺髓禁中有煖盪官紹定間內司提轄陳  
詢益奏以謝質供奉舊無此例質愈加戰兢

年餘謝遷他職陳奏謂質不當遷上曰汝見  
彼憂勤許時陳慙而退

占踞僊宮二十年門生投拜勢熏天一鞭催走  
閩南道慚愧東朝王繼先

白獺髓醫官王繼先顯仁太后御慈寧宮服  
其藥隨愈優游東朝幾二十年克副高宗盡  
親之孝已而繼先恃寵舉朝阿附至有稱門  
生者後太后上仙竟黜福州卒 鼠璞今以

太后為東朝蓋用叔孫通傳惠帝東朝長樂  
事 三朝北盟會編繼先占豐樂橋官地屋  
宇宏麗都人謂之快樂仙宮

八角銀牌禁樣班玉津園吏敢緣姦他時別有  
權宜事魏紫姚黃說孟關

癸辛襍識淳熙禁中獲偽號人乃玉津園火  
工包四搜出敕入宮門假印一面於是盡易  
敕號內宮門號八角樣禁衛號銀錠樣殿門

號四如意樣 又魏叔高娶穆陵親姊四郡  
主生關孫實全夫人之愛甥慈憲每為求官  
穆陵命見凡異姓入宮必懸腰牌惟宗子可  
免一時權宜假名孟闕以進時度宗亦與之  
同入宮四方有魏紫姚黃之傳 案玉津園  
在洋津橋

天潢麟秀氣如雲南北都傳小使軍更有晚波  
紅濕句一時流與禁中聞

鼠璞今稱宗寺曰麟寺玉牒曰麟牒宗英曰  
麟趾之秀 宋史本傳不尤宗室有武力嘗  
與金人戰雄張河南北盜皆避其鋒曰此小  
使軍也 貴耳錄趙介菴名彥端宗室之秀  
有賦西湖詞波裏夕陽紅濕阜陵問誰作左  
右云彥端曰我家裏人也會作此等語喜甚  
組繡年年進內家紅酥粉浣鬪鮮華波臣物土  
修畿甸別置輕容貢軟紗

南齊書事記 卷五  
文獻通考孝宗乾道中中宮常服有司進深  
紅大袖紅羅生色為領紅羅長裙紅霞帔藥  
玉為墜背子用紅羅衫子用水黃紗襦袴以  
白衫裙以明黃短衫以粉紅紗為之 施宿  
會稽志歲貢越綾十疋輕容紗五疋紙千張  
瓷器五十事

晴嵐遙疊海門青水色天光赴杳冥渡口新傳  
置津吏輕裝緩泛許揚舲

默堂集錢唐江詩潮頭駕月衝殘夢水色浮  
空送峭寒十幅輕蒲連夜發不知身到海門  
山 南雷文定錢唐之渡自昔為難孫覿誌  
汪思恩云會稽渡錢唐舟人冒利捆載而行  
半渡弭楫邀取錢物暴風猝至舉舟盡溺操  
舟者皆善泅獨免公為臨安守曰不戮此輩  
則殺人未艾也悉論殺之更造大艦十數每  
艦受若干人製號如其數以五采別之置吏

監總渡者給號登舟其舟人給直有定估除  
十之一備修葺之費自此無一舟之覆蓋錢  
唐除暴風積水亦不甚險惟載人過甚舟力  
不勝則有覆溺之禍當事每以空言申勅安  
得如汪守者而與之講濟人之事乎案鴻慶  
集汪諱思溫咸淳臨安志紹興六年呂頤  
浩尹臨安始置浙江監渡官以舟大小定數  
多寡自是少風濤之厄

堂開有美敞前楹江樹湖雲左右呈一片殘碑  
荒寺僻苔花畢畫尚分明

成化杭州府志有美堂嘉祐二年梅摯建宋  
仁宗賜詩有地有湖山美之句摯乃築堂名  
之歐陽修為記蔡襄書宋淳祐志有美堂錢  
氏初建江亭於此當在吳山最高處左江右  
湖故為登臨之勝而前賢題詠如東坡九日  
舟中望見有美堂上魯少卿飲處詩言舟中

望見堂上燕集此必西湖也舊志言在郡城  
又可以見古城界於吳山矣淳祐六年府尹  
趙與憲獲古刻小碑於山巔太歲殿之側即  
仁宗御賜梅公詩也此堂故址益顯著云  
按田志載有美堂在鳳皇山誤矣東坡九日  
舟中詩田志已載不復錄

殿前醫老張防禦白髮終身拜影堂還有長生  
橋沈喜親書恩主奉和王

志雅堂襍鈔醫老張防禦向為謝太后醫官  
後入楊駙馬家人目為張風子然頗尚義其  
家影堂上作小閣奉理宗謝太后神御牌奉  
之終身 又掠屋錢人沈喜居長生橋楊和  
王忌辰必設位書恩主供事人問其故云其  
家再世皆出楊府衣食今雖衰替然不敢忘  
鷄子趨承恩倍加北人倚醉惱官家歸來恰遇  
遺弓日淚絕魂淒蕭鷓巴

案鷓巴應作哲伯但於韻不叶姑從其舊

而於注內  
仍加改正

藝流供奉志碁待詔沈姑姑上官夫人鼓板  
潘小奴傀儡盧金線張逢喜踢弄吳金腳吳  
鷓子等 貴耳錄蕭哲伯嘗侍孝廟擊球每  
許其除步帥久不降旨哲伯醉語云官家會  
亂說不除步帥怒送福州居住德壽問及哲  
伯孝廟奏知德壽云北人性直可喚取歸後  
遇德壽發引日哲伯號哭欲絕

憶同優渥賜金蕉清隱閒居感舊僚後夜翠微  
亭上望月明如水馬蹄遙

金陀稗編上遣鄭莊齋賜先臣金蕉酒器如  
韓世忠禮 陶安學士集咏史韓世忠詩沙  
塵淨掃寂無譁第一中興不浪誇居士晚稱  
清隱號賢才勿用用奸邪清隱韓號也 浙  
江通志韓世忠忤秦檜解兵柄逍遙湖上最  
愛此山故建翠微亭紹興十一年冬岳飛死

南齊書卷之五  
十二年三月世忠建此亭謝兵柄時獨遊焉  
岳有登池州翠微亭詩曰經年塵土滿征衣  
特地尋芳上翠微好水好山看未足馬蹄催  
趁月明歸蓋韓當時憶岳此詩故以名亭而  
亦隱痛之也亭在飛來峯半 成化杭州府  
志翠微亭紹興十三年韓蘄王建乾道五年  
安撫周淙重建

崇化堂新故府遷傷心刺出繡袍鮮岳家昔與  
張家並今日韓家有賜田

玉海紹興十三年詔改岳飛第為國子太學  
堂曰崇化在前洋街有齋十二 金陀粹編  
先臣刺繡為袍有誓作中興功臣 鶴林玉  
露韓世忠嘗議買新淦縣官田高宗聞之御  
札特賜云卿遇敵必克克且無擾聞卿買新  
淦田為子孫計今以賜卿聊旌卿之忠故其  
莊亦號旌忠當時諸將各以姓號如張家軍



岳家軍朝廷頗疑聞其買田以為喜故特賜之

無端高架太平樓花腿生兵怨未休不敵韓軍銅面具背寇一奮決同仇

雞肋編車駕渡江韓劉諸軍在外獨張俊一軍隨行在擇卒之少壯者自臀而下文刺至足謂之花腿京師舊日浮浪輩以此為誇今效之不使逃於他軍用為驗也然既苦楚人

皆怨之加之營第宅房廊作酒肆名太平樓搬運花石皆役之衆卒謠曰張家寨裏沒來由使他花腿運石頭二聖猶自歸不得行在蓋起太平樓紹興四年韓世忠自鎮江來朝所領兵皆具裝以銅為面具軍中戲曰韓太尉銅臉張太尉鐵臉世謂不畏人者為鐵臉雲麓漫鈔建炎中興張韓劉岳為將人為法當時有張家軍韓家軍之語四帥之中

韓岳兵力最精又別置親隨軍謂之背寇勇健無比凡有堅敵遣背寇軍無有不破者見范參政致能說燕北人呼酒瓶為寇大將之酒瓶必令親信人負之范嘗使燕見道中人有負壘者則指云此寇也故韓岳用以名軍湖山歸隱號青松曾與開邊議不同堪笑當時希意旨無端殘照怨西風

咸淳臨安志俞灝字商卿世居杭登紹興四年進士第開禧議開邊政府密引灝言輕脫寡謀之人不可信趙良嗣張覺往轍可鑒歷麾節皆有聲寶慶二年致仕築室九里松買舟西湖會意處竟日忘返作詩自適號青松居士有集 四朝聞見錄李季章壁開禧初韓欲興兵遣張嗣古覘敵張還大拂韓旨復遣壁壁還與張異辭階是進政府壁使北有詩云天連海岱壓中州煖翠浮嵐夜不收如

此山河落人手西風殘照懶回頭

半篙晴色斷橋邊欲弔詞人認墓田幸藉知音  
楊薛輩冷花疎寺葬梅川

絕妙好詞施梅川清明湖上遊春詞有云傍  
斷橋翠繞紅圍相對半篙晴色 武林舊事  
施梅川墓施名岳字仲山吳人能詞精於律  
呂楊守齋為寺後樹梅作亭以葬 浙江通  
志梅川墓在虎頭巖楊守齋植梅以葬薛梯

颺為志李質房書周草窗題蓋

畫意吟情春水堤風流端在斷橋西胎仙尚與  
鳴臯字故遣荒亭塑鶴棲

竹所唵藁重拜和靖先生墓詩秋風爾許悲  
懷古若為思鞠老泉堪薦山孤草亦萎高風  
留塑鶴殘雨暗荒碑依舊梅千樹無花香似  
詩 歸田錄處士林逋居於杭州西湖之孤  
山逋工筆畫善為詩 和靖集有鶴名鳴臯

鹿名呦呦作詩以賦之

花開西院賦雙英萼綠飛瓊竝蒂陳翦賜近臣  
三百朶可曾分得紹興春

松隱集西院賞牡丹壽聖親見雙花臣下皆  
未覩折以勸酒調浣溪紗春曉於飛綵仗明  
西園嘉瑞格和鳴花王特地獻雙英並蒂輕  
黃宜淡淡聯芳競秀勸盈盈飛瓊萼綠不勝  
情藏拙藁宮詞牡丹春籞正穠華有旨今

年不賞花翦落金盤三百朶內批分賜近臣  
家天彭牡丹譜牡丹有名紹興春祥雲子  
花也色淡佇而花尤富大者徑尺紹興中始  
傳

一片湖山遠翠含璫瓏八面坐屏南施將纖巧  
藏朱邸十樣亭臺照碧潭

夢梁錄南翠芳園舊名屏山園內有八面亭  
堂一片湖山俱在目前又慶樂園舊名南園

南齊書 卷五  
賜福邸內有十樣亭榭工巧無二

烹宰親題教誡新放生恩遍及游鱗傳聞大節  
千官萃一棹延緣祝水濱

咸淳臨安志西湖德生堂有理宗皇帝奎畫  
又有御筆戒烹宰文刻石立堂上 玉海紹  
興時工部郎中林又請以臨安府西湖為放  
生池從之又淳熙三年詔西湖係放生池不  
得採捕 夢梁錄四月初八日聖福皇太后

聖節文武官於廣化寺起祝聖道場出西湖  
德生堂放生 成化杭州府志放生池宋天  
禧四年守王欽若建慶元四年趙師異荆德  
生堂於石函橋之西淳祐八年趙與憲更新  
之 按欽若奏請西湖為放生池蓋指通湖  
而言故建德生堂在今之昭慶寺外非今所  
謂放生池一窪之地也 勝蓮社約西湖南  
宋放生池也

一枝笑靨倚西風異品香茸發禁中踏過馬塍  
紅杏雨鞠花高塿鬪瓊瓏

花史臨安有大笑鞠其花白心黃葉如笑或  
云即枇杷鞠 羣芳譜臨安西馬塍園子每  
歲至重陽謂之鬪花各出奇異者有八十餘  
種 佩韋齋集西馬塍邊紅杏雨金牛寺外  
白楊風 誠齋集經和寧門外賣花市見鞠  
詩有平地拔起金浮屠瑞光千尺照寒碧乃

是結成鞠花塿蜜蜂作僧僧作蝶鞠花障子  
更瓊瓏生採翡翠鋪屏風 鞠譜余在臨安  
西馬塍園子每至重陽鬪花不暇悉求其名  
余於禁中大園子處得鞠品近六十種與外  
異者黃鶴翎黃羅繖報君知狀元黃翦金球  
銷金鞠火煉金檀香球黃五九鞠萬卷書金  
芍藥金孔雀金盞銀臺荔枝鞠銀撚絲試梅  
妝玉芙蓉一弄雪白雪團玉繡球白疊羅水

南齊書 卷五  
晶球月下白玉牡丹玉寶相白西施粉鶴翎  
玉樓春紫霞杯紫牡丹朝天紫紫骨朶紫絨  
球菡萏紅墨鞠狀元紅海東紅錦心繡口紫  
綬金章大紅袍慶雲紅帶笑鞠合歡鞠樓子  
紅冬鞠鶴頂紅猩猩紅西番蓮添色喜容海  
棠嬌赤金盤金錢豹醉楊妃平分秋色金鞠  
對芙蓉鴛鴦錦錦麒麟團圓鞠五色鞠順聖  
淺紫

花街貴宅弄春幡小象裝成風景繁一十三層  
黃累戲嬌民爭入杏花園

夢梁錄立春街市以花裝欄坐乘小春牛春  
幡春勝各相獻遺與貴家宅舍亦豐稔之兆  
武林舊事大禮縛青城齋殿每隊歌頭唱  
和杵歌等曲命象院教象前導蠻奴乘之手  
執短鑿旋轉跪起悉如人意市井因競市繪  
塑小象以饋四方 霞外集嬌民技藝也天

生鬪巧爭奇事事能稚子土宜偏劇戲浪兒  
黃累十三層 宋稗類鈔湧金門有杏花園  
游人取其黃土戲捏為人形

三三五五逐春場鼓板嗤他亦號荒張五牛新  
翻誤賺引人聽到尾聲長

都城紀勝街市有樂人三五為隊專趕春場  
看潮賞笑容及酒坐祇應與錢亦不多謂之  
荒鼓板 古杭夢遊錄唱賺在京師只有纏

令纏達中興後張五牛大夫遂撰為賺賺者  
悞賺之意令人正堪美聽不覺已至尾聲

寒食家家柳眼明朝陵車馬出山城遙憐苴母  
煙生處望祭南屏實愴情

夢梁錄清明寒食家家以柳條插門名曰明  
眼前五日發宮人車馬往紹興攢宮朝陵至  
日車駕詣赤山諸攢宮 鶴林玉露臨安淨  
慈寺後有望祭殿每歲寒食朝廷望祭西京



諸陵祝版詞絕寓祭之權宜愈深愴慕 詞  
品徽宗在北遇清明日詩曰茸母初生認禁  
煙無家對景倍悽然帝城春色誰為主遙指  
鄉關涕淚漣注茸母草名

荒郊野祭棗薑擔靚婦遊逢三月三地上天宮  
春九莫牡丹新插馬頭籃

乾淳歲時記清明前三日家皆插柳大家則  
加棗餹於柳上上塚者多用棗餹薑豉而野

祭尤多婦人淡裝素服提攜遊女分餛遊息  
楓窗小牘汗中呼餘杭百事繁庶地上天  
宮 秋崖小藁湖上詩今歲春風特地寒百  
花無賴已摧殘馬塍曉雨如塵細處處筠籃  
賣牡丹 夢梁錄春光將莫百花盡開賣花  
者以馬頭竹籃盛之歌叫于市

都城夜市客爭嬉名榜山三字畫奇聽到桃花  
三月放駸駸朝馬踏朝曦

都城紀勝夜市除大內前後諸處亦然惟中  
瓦前最勝 又酒家酒閣名廳院若樓上則  
又或名為山一山二山三之類牌額寫過山  
非特有山謂酒力高遠也 又官酒庫有樓  
曰西樓樓攻媿書榜後為好奇者取去 方  
輿勝覽夜市三更燦爛樓臺之燈火春風萬  
井喧闐簾幙之笙歌 夢梁錄沙戲兒藏香  
細扇融和坊賣卦名桃花三月放者皆杭城

夜市

此日輕儇嗟士風謔談盆盎浴堂中摩睺羅樣  
黠雕戲燈禁自應先蠟紅

癸辛襍識賈似道為相學舍纖悉無不知之  
雷宜中長成均直舍久圯遂一新之或書壁  
云碌碌盆盎中忽見古壘洗雷尚未之見一  
日見賈忽云碌碌盆盎中雷恍然不知所答  
久之入成均浴室見壁書此乃悟云 三朝

政要賈相患舉人猥衆御史請置士籍覆試之日露索懷挾辛未榜李鈞孫者少時戲雕摩喉羅於股間搜者視之駭曰此文身者事聞被黜朝野襍記燈挾之禁近歲雖行國子監及南省行之兩浙漕司則雖禁燈而已弛挾書之律矣其他郡國秋試達旦乃罷紹興二十九年王瞻叔護試復禁之然習俗已久今秉燭挾書如故

易名盛典感人神一字忠奸大義申父老至今談六檜墓田新土賜麒麟

天祿識餘宋贈岳鄂王諡忠武文曰李將軍口不出辭聞者出涕藺相如身雖已死凜然猶生又曰易名之典雖行議禮之言未一始為忠武之號旋更武穆之稱獲睹中興之舊章灼知皇祖之本意爰取危身奉上之實仍采勘定禍亂之文合此兩言節其一惠然今

天下岳祠皆稱武穆此未定之諡當稱忠武為宜 成化杭州府志宋少保鄂國武穆王孝宗為雪其冤初諡武穆寶慶二年改諡忠武元至正中加諡保義 諡法通考申王秦檜紹興中諡忠獻開禧三年追奪王爵改諡繆醜嘉定元年史彌遠奏復王爵贈諡 宋元通鑑寶祐二年詔太常釐正秦檜諡法因諭輔臣曰諡謬狠可也 篁墩文集跋楊補

之松檜圖云宋季有永嘉處士胡裒者憤秦檜之奸題其堂曰六檜蓋以六隱戮字也

柳待制集六檜堂王淮記 翰墨叢紀岳武穆家謝昭雪表青編塵乙夜之觀白簡悟士人之譖 湛淵集詠岳王孫縣尉復棲霞墓田詩岳鄂諸孫復墓田清明寒食起新煙道傍為我除蒼檜山下如今哭杜鵑高廟神靈應悔此中原父老尚淒然西湖靡靡行人去

却望棲霞轉可憐

一聲清蹕訝天臨萬騎雲環相府深廟主蒼黃  
遷狡窟蠩蝟刺目極傷心

播芳大全文粹駕幸秦丞相府啓元戎萬騎  
星拱轅門清蹕一聲天臨相府云云 程史  
望仙橋秦檜賜第其東偏即檜家廟西則一  
德格天閣之故基檜薨於位熈不能決去請  
以其姪烜為光祿丞留蒞家廟冀復居之言

者請罷烜遷廟主於建康遂空其居

掖垣清職棄如遺片石休嗟瘞草時不敵四夫  
人擘阮錦裯紅縑索新詞

餘冬序錄韓侂胄當國欲網羅四方知名士  
相羽翼嘗築南園屬楊萬里為之記許以掖  
垣萬里曰官可棄記不可作韓恚改命他人  
萬里卧家十五年皆其柄國日也事見楊本  
傳 四朝聞見錄陸游為韓作南園記又有

鄭棫者嘗第進士自作南園記併礮石以獻  
韓以陸記為重仆鄭石瘞之地後韓敗鄭竟  
免 又韓喜陸附已至出所愛四夫人擘阮  
琴起舞索公為詞有飛上錦裯紅縐之語  
淮南一蹶竟誰憑打諢翻將樊惱增江上竹光  
方快飲庭前何惜碎生菱

四朝聞見錄韓用兵既敗鬚鬢俱白莫知所  
為伶優因上賜宴設樊遲樊噲旁一人曰樊

惱揖問樊遲誰與取名對以夫子所取又揖  
問樊噲曰爾誰取對曰漢高所命又揖樊惱  
云誰名汝對以樊惱自取又因郭倪郭杲敗  
值賜宴以生菱進於卓上命二人移卓忽生  
菱墮地盡碎一人云苦苦壞了許多生菱只  
因移杲卓 都城紀勝襍劇中副淨色發喬  
副末色打諢又或添一人裝孤 函史寧宗  
開禧用兵淮漢師敗薛叔似以怯懦為韓所

南齊書 卷五  
惡項安世因貽佗胄書曰偶送客至江上飲  
竹光酒半醉書不成字韓大喜曰項平甫乃  
爾閒暇遂除湖廣總督

深堂羅木生前慮淺土蘆花死後悲在昔曾聞  
呼冷盞至今唯見說韓黎

四朝聞見錄韓佗胄敗籍其家卧内青細帳  
後以羅木自圍其寢防刺也 又韓敗韓功  
德寺佛像已輿他所而金碧木石俱空登其

母魏國夫人塚旁有蘆束淺土半露問之乃  
韓之尸其首已送之北也 又賣漿者敲其  
盞以喚人曰冷底喫一盞冷謂韓盞謂斬也

又姑蘇有地名韓墩產韓黎為天下冠中  
都謂之韓墩黎後因先皇諱改為韓村黎佗  
胄專國餽者不敢謂韓邨直曰韓黎蓋中都  
以外人為村故諱之

唐突平章是牧童朝耕莫飯唱林風尋詩趙尹

偏多事屏上空題杜宇紅

昨非菴日纂侂胄過南園山莊趙師弄偕行  
至東邨別墅宛然鄉井見林薄中一牧童歌  
曰朝出耕田莫飯牛林泉風月共悠悠九重  
雖竊阿衡貴爭得功名到白頭趙呵曰平章  
在此誰敢唐突跡牧童至草廬屏上有詩云  
玉津園內行天討怨血空啼杜宇紅後韓為  
史誅於玉津園

媚語相依北斗光園丁亦自頌師王惟憐他日  
雙扉掩零落寒亭晚節香

癸辛襍識傳伯壽上韓侂胄啓有云人無恥  
矣咸依右相之山我則異於獨仰韓公之斗  
四朝聞見錄南園乃慈福所賜韓者掌園  
金其姓皆武爵之近上者聽其滿口皆稱師  
王師謂太師王謂郡王韓敗後掌園之人閉  
園三日夜外人絕不與之通 又南園中有



南齊書 卷五  
亭曰晚節香植鞠二百種亦取其祖詩句陸  
游記中不及云

鐵槍雄盜渡淮南泣別紅妝赴碧潭後夜捷音  
仍不至相公區處又何堪

三朝野史李全擾淮時史相彌遠在朝堂束  
手無策訛傳全軍渡江史夜半披衣起愛寵  
林夫人隨後見史欲投池中林急扶住泣曰  
相公且少耐區處數日後即得趙葵捷書

宋史紀事李全能運鐵槍號李鐵槍

歸路晴煙草色纖公餘息影任休恬斷堤野水  
梅花宅占取湖園六事兼

咸淳臨安志賈魏公賜第葛嶺歸葛嶺舊居  
詩罷官歸舊宅山水得頻過息影堤邊樹清  
心湖面波勞無功可紀頑有命相磨見說連  
朝雨田家正翦禾 萬歷杭州府志賈似道  
題孤山詩半是樓臺換却春幾回獨立更消

南齊書 卷五  
魂斷堤野水梅花宅千古春風一月痕 悅  
生堂隨鈔洛人云園圃之勝不能相兼者六  
務寬大者少幽邃人力勝者乏閒古水泉多  
者無眺望兼此六者惟湖園而已

題名到處侍兒孫鷓鴣招邀半在門燈色秋山  
無限好相公風月細評論

咸淳臨安志大仁寺山頂有石菴一名天然  
菴洞崖仿佛有東坡題名咸淳三年賈似道

遊山題名九月二十八日賈似道領客東元

嘉史有之廖瑩中黃公紹王庭來游子德生  
孫蕃世侍 又旌德顯慶寺在小麥嶺題咸

淳三年九月二十四日賈似道因展先墓為  
泉石一來客東元嘉廖瑩中俞昕黃公紹王

庭子德生諸孫蕃世僧法照智印祖印文珣  
又龍井延恩院在風篁嶺題名靜庵邱放

賈似道乙未臈月來遊復亨泰侍後三十一

南齊書 卷五  
年夏閏大丞相魏國公再登揆席少駐湖曲  
賜第因謁演福來此客廖瑩中陳詩川從子  
德生侍 又龍泓洞題名咸淳丁卯七月十  
八日賈似道以歲事禱上竺回憩於此客東  
元嘉俞昕張濡黃公紹王庭從子德生侍期  
而不至者廖瑩中又治平寺太傅平章賈魏  
公舊游題名天台賈似道竺澤陸叡新安汪  
儀鳳永嘉沈厚潘方楊應華周之德曹元發

黃德方陳淳祖以嘉熙戊戌元日登治平寺  
序拜煙雲閣上期而不至者鄭泌安劉翁孟  
寅趙希彭曹良朋曹遵 又下天竺題名賈  
似道比以歲事禱靈隱迄幸有年飯僧已因  
過此山吳子聰東元嘉邱復亨俞昕廖瑩中  
張濡黃公紹王庭從子德生諸孫蕃世侍  
僧法照德寧時舉妙寧俱咸淳三年歲丁卯  
十月望 江湖長翁集西湖詩游客半鴛鴦

自註云暇日朝士多在湖上 咸淳臨安志  
賈魏公下天竺通元菴詩燈色難禁雨秋聲  
不離山

籤飾泥金開劇精墨丸香印散煙輕後先向廖  
元相匹閱古堂過又悅生

癸辛襍識賈廖刊九經本最佳裝褙以泥金  
為籤 居易錄賈似道鑒畫有悅生小印往  
往於士大夫家見之癸辛襍識載其與門客

廖瑩中刊書甚多聊志其目全唐詩話悅生  
隨鈔一百卷所援引多奇書九經以撫州草  
鈔紙油煙墨所造最精 研北襍志韓侂胄  
閱古堂圖書皆向若水鑒定 湧幢小品韓  
魏公閱古堂在定州侂胄建於臨安者仍祖  
名也

琢就新詞唱箇儂恩私門吏得從戎黃金特鑄  
匣盤貴頌禹尚書勒篆工

詞筌賈循州好集文士於館第時推廖瑩中  
為最其詩文不傳偶見鈔本箇儂一詞頗富  
艷詞云恨箇儂無賴賣嬌眼春心偷擲蒼苔  
花落先印下一雙春跡花不知名香纔聞氣  
似月下筇篻蔣山傾國半解羅襟蕙薰微度  
鎮宿粉棲香雙蝶語態眠情感多情輕憐細  
閱休問望宋牆高窺韓路隔尋尋覓覓又暮  
雨凝碧花徑橫煙紅扉映月儘一刻千金堪

值卸袜薰籠藏燈衣桁任裹臂金斜搔頭玉  
滑更恨檀郎惡憐深惜儘顛裊周旋傾側軟  
玉香鉤怪無端鳳珠微脫多少怕聽曉鐘瓊  
釵暗擘 志雅堂襍鈔賈似道自江上奏功  
廖瑩中以從戎功特賜黃金百兩廖鑄匣盤  
以為酒器楊尚書作篆古勒銘有云國有大  
功一相禹胼曰余瑩中與隨旆旃文昌孫子  
是寶是用誰其銘之史臣楊棟

南齊書事記 卷五 四十四  
乞將祕府藏千卷憲草芝蘭鸞錦裝五雀有圖  
崔白寫尾銜小印悅生堂

清河書畫舫似道家藏名跡多至千卷其宣  
和紹興祕府故物往往乞請得之今錄其稍  
隱僻者有薛濤萱草詩韓偓芝蘭帖錢鏐貢  
棗等帖 齊東野語思陵妙悟八法訪求法  
書名畫故紹興內府所藏不減宣和其裝褙  
裁制各有尺度印識如紫百花鸞錦碧鸞綾

托標之類 雲煙過眼錄崔白五雀圖皆賈  
氏悅生堂物其間一印云賢者而後樂此  
貯舞藏歌樂此生相公惟願頌昇平園泉歷歷  
都堪記洞口水香茶更清

癸辛襍識賈相集芳園南山水樂洞賜園等  
志之郡乘有云藏歌貯舞流連光景使園圃  
常興而無廢天下常治而無亂非後天下之  
樂而樂者其誰能 咸淳臨安志棲霞洞內

南齊書 卷五  
有水洞深不可測水極甘冽魏公嘗調以淪茗

譚玉精詳誰與同古花文篆辨青紅何來媚士無相識盡去低頭拜玉工

三朝野史賈相當軸收古銅器法寶用譚玉辨驗 史緯似道當國監司郡守貢獻不可勝紀趙潛等爭獻寶玉陳奕至以兄事似道之玉工陳振民以求進

回首東都老淚垂水晶遺注忍重窺南朝還有傷心處九廟春風盡一犁

續資治通鑑高宗南渡有將水晶注碗榷場交易見之泣云此哲廟陵寢中物也 又端平初金人失國元許本朝遣使朝陵迨三京之師一出元大怒陵廟盡犁為墟矣

錢唐博士有文孫藏得雙環竹葉痕雜誦遙村燈火句自來詩律重金昆

夷堅志錢唐關子東博士家其孫出乃祖所  
藏水晶條環表裏瑩徹中有生竹葉一片  
春渚紀聞鐘聲互起東西寺燈火遙分遠近  
邨此余友關子東西湖夜歸所作非身到西  
湖不知此語形容之妙關氏詩律精深妍妙  
世守家法子東二兄子容子開皆稱作者  
浮溪集關注字子東世為錢唐人登紹興五  
年進士第教授湖州官至太學博士子東自

號香巖居士有關博士集

東野清寒自可憐愛花名稱鞠花僊年年風雨  
重陽日空酌西郊一掬泉

萬歷杭州府志沈鞠山失其名字袁州宜春  
人由進士知錢唐嘗植鞠數百本以自樂晚  
節益堅適以九月九日歿朱文公挽之以詩  
愛鞠平生不愛錢此君原是鞠花仙正當地  
下修文日恰值人間落帽天生與唐詩同一



南齊書 卷五  
四十一  
脈死隨陶令葬千年如今恐向西郊哭東野  
無兒更可憐鞠山名字失傳建樹無攷可據  
者晦翁一輓詞耳然賢者不輕與人繹其語  
意徵為庶吏云

斷碑荒樹總飄零南圃關情草色青公子自餘  
今昔感夕陽秋水望西冷

山中白雲詞張叔夏過慶承園有調寄高陽  
臺詞云故園已是愁如許撫殘碑却又傷今

更關情秋水人家斜照西陵註秋水觀賈相  
行樂處又自敘云園即韓平原南園僅存丹  
桂百餘株有碑記在荆榛中故詞句有亦猶  
今之視昔之感復嘆葛嶺賈相之故廬也

中外參差滴漏聲院中學士任淒清內門唱徹  
連珠諾珂繖搖心促那行

玉堂襍記禁中四鼓乃在外三更 學詩初  
稟夜步臨安內門詩靜夜孤燈人未眠等閒

南齊書詩 卷五  
行過內門前一聲唱徹連珠諾碧檻朱闌綠  
柳邊註皇城夜間唱連珠諾 鶴山集紫宸  
殿詩珂繖搖心夢不成忽聽吏早放衙聲吹  
燈撥火供晨粥趣到皇城恰六更 老學菴  
筆記有官入殿門閣門輒促之曰那行予去  
國二十七年復還朝儀寢有不同唯此聲尚  
存那去聲

張家樂部已凋殘委骨春塵麥嶺寒占得青烏  
多吉兆百年詩禮盛衣冠

四朝聞見錄慈明楊太后葬其母於羣宮人  
塚旁葬處蓋天造地設山自南高峯為岡阜  
至夫人壠忽踊去若龍昂首為嶺春陽發達  
夫人墳有物若鍾乳結成甃淵泉環繞源出  
百里其家克知詩禮福祿未艾也

禁籞紅廊奉詔遊九翬四鳳翠光流慙慙好謝  
清寒客斷雨飄雲帝子愁

武林舊事南渡公主無及嫁者惟理宗周漢國公主出降楊鎮先一日宣宰執詣後殿西廊看公主房奩有真珠九翬四鳳冠北珠花冠真珠翠領四時衣服等物 三朝政要開慶元年四月上試進士賜周震炎等及第進身有差時周漢國公主方選尚丁大全欲用新進士為駙馬命考官寘震炎第一倡太平狀元之說以媚上震炎草茅士年幾三十矣

恭謝日公主於屏內窺之不悅事遂寢

焜煌宸翰護松風權奉天章寶閣中敬羨文明稱繼美成編百卷兩朝同

媿郊錄中興而後惟建天章一閣以藏祖宗御書今行宮大內之後萬松嶺有地舊名天章閣日厯載紹興十九年從義郎趙子欽投進太祖御容一軸赴天章閣收奉訖 咸淳臨安志祖宗諸閣在禁中藏祖宗御書圖籍

寶瑞置學士直學士等員惟天章閣以奉列  
聖御容南渡重建不以除官蓋天字非臣下  
敢稱亦以神御所在不可與他閣例言也

玉海紹興二十四年實錄院奉詔編次徽宗  
御集成上之翰院擬撰閣曰敷文書成凡詩  
百九十有五宮詞二百賦一序十二記十碑  
四策題九文七樂章二挽詞二十七禱文十  
五詩解九論語解二道德經解八南華沖虛

經解二十聖濟經十科儀二政事手札十三  
百五十邊機手札二百四十四通為百卷上  
御垂拱殿再拜受書親製序冠於篇首權奉  
安於天章閣又開禧元年實錄院上高宗御  
集一百卷

殿開打麥先農務臺設觀耕事灌耒璘箔傳來  
今不舉閒他繭館女尚書

女紅餘志蠶箔名璘箔 文獻通考紹興二

南齊書 卷五  
年上謂輔臣曰朕聞祖宗時禁中有打麥殿  
今朕於後圃令人引水灌畦種稻欲知稼穡  
之艱難又命臨安府守臣度城南之田得五  
百七十畝有奇迺建思文殿觀耕臺神倉及  
表親耕之田 又紹興十五年太常王湛請  
按政和禮建親蠶殿蠶室繭館請皇后就禁  
中行親蠶之禮朝旨送禮部下太常寺討論  
不果行 攷舊制皇后親蠶女尚書著貂蟬

佩璽陪乘

餅餌生香餽幾枚水沈黏瓣製徘徊兒家自點  
梅花粥露濕親封小蕊來

夢梁錄徘徊花貴官家以花片製作餅兒供  
送 誠齋集玫瑰詩別有國香收不得詩人  
薰入水沈中 傳是樓類書鈔本宋時有梅  
花粥楊誠齋云蜜點梅花帶露餐及脫蕊收  
熬粥食之取其助雅致清神思也 山家清

供誠齋梅粥詩脫蕊收將熬粥吃落英仍好  
當香燒

曲頸當胸斜按嬌雲楸面子數峯描舊京式樣  
都零亂賸有清歌大海潮

篋衍集孔尚任大海潮小啞蟬兩琵琶歌其  
一龜錦裹周身翦犀鏤牙如縷織背上雙鈕  
蹲盤螭盈尺曲項玳瑁飾雲楸面子波濤生  
三十六峯尤竒特橫挾不起斜按難滿輪明

月遮胸臆大者名為大海潮南宋流傳今到  
北 東京夢華錄教坊樂部前列拍板一行  
次一色畫面琵琶五十面

薄綃舊染露珠香宮樣新翻梅雨涼底事頻誇  
天水碧曾無北紫鬪遐方

紫桃軒雜綴峽石人積梅雨水以二蠶繭綠  
絲織紬有自然碧色名曰松陰色享上價此  
法本宋寧宗宮禁有為之者一時號為天水

南宋補遺詩 卷五 五十三  
碧天水本趙宋郡望碧者畢也未幾果有航海之應 通雅淳熙中北方染紫極鮮明中國亦效之謂之北紫

東都登頓下江南霜鬢風鬟意不堪文筆誰宗易安李秀齋方與鮑清菴

貴耳錄李易安居士趙明誠妻南渡來常懷京洛舊事晚年賦詞有於今憔悴風鬟霜鬢之句又清菴鮑氏秀齋方氏淳熙間二婦人

文筆可繼易安之後 詩說雋永今代婦人能詩者前有曾夫人魏後有易安李李在趙氏時建炎初從祕閣守建康作詩云南來尚怯吳江冷北狩應悲易水寒又云南渡衣冠少王導北來消息欠劉琨 四六談麈祭文唐人多用四六韓退之亦然故李易安祭趙湖州文云白日正中嘆龐翁之機捷堅城自墮憐杞婦之深悲婦人四六之工者

愁向天津聽杜鵑宮姬鵝鬢已堆殘忍聽笛吹  
南來怨三十六宮秋草寒

志雅堂襍鈔陳石泉自北歸有北人陳參政  
餞之木蘭花慢云歸人猶未老喜依舊著南  
冠正雪暗滹沱雲迷芒碭夢落邯鄲鄉心日  
行萬里幸此身生入鬼門關多少秦煙隴霧  
西湖淨洗征衫燕山從不見吳山回首一歸  
難慨故都離黍故家喬木那忍重看釣天紫

城何處問瑤池八駿幾時還誰在天津橋上  
杜鵑聲裏闌干容齋題跋北人張侍御有  
侍兒意狀可憐乃宣和殿小宮姬也翰林吳  
激賦詞有仙姿勝雪宮鬢堆鵝江州司馬青  
衫淚濕同在天涯之句詞品南渡後有題  
聞笛玉樓春詞於杭京者云玉樓十二春寒  
側樓角莫寒吹玉笛天津橋上舊曾聽三十  
六宮秋草碧韶華人去無消息江上青山空



晚色一聲落盡短亭花無數行人歸未得  
宣和名艷舊時嬌煙墨青螺著意描淚濕臨安  
來市上鶯花焦萃可憐宵

玉照新志秦妙觀宣和名倡也色冠都邑畫  
工多圖其貌售於外方陸升之客臨安雨中  
一老婦人蓬首垢面丐於市藉檐溜以濯足  
泣訴於升之曰曾聞秦妙觀否妾是也雖掩  
抑困頓而聲音舉止固自若也 畫史會要

盛陳顯工仕女泥面每用北螺青或煙墨水  
淡開謂之青娥粉白

波含木葉洞庭秋院體新評御筆收誰畫江南  
好煙水園前第一數營邱

妮古錄氣霽地表雲斂天末洞庭始波木葉  
微脫春草碧色春水綠波送君南浦傷如之  
何海風吹不斷江月照還空四更山吐月殘  
夜水明樓此乃宋畫院試題思陵嘗自出新

意以品畫師 居易錄畫家有兩李營邱北  
宋李成人皆知之南宋李永亦稱營邱知之  
者殊少王禕登云李營邱以山水擅名為宋  
畫院第一謂永也 寶顏堂筆記武林地有  
號園前者宋畫院故址也

賞識誰云定李唐折蘆蘭葉在豪芒南朝畫記  
何人續一一名圖發妙香

畫鑒宋南渡畫院諸人僕於李唐差加賞識

夷門廣牘梁楷撇捺折蘆描 珊瑚網馬  
和之蘭葉描 輟耕錄陳德輝續畫記一卷  
高宗建炎至幼主德祐乙亥一百五十人按  
是書今不傳 書畫彙考南宋畫院李唐南  
畝盭耕圖長夏江邨圖馬和之關雎桃夭葛  
覃等圖蘇漢臣熾盛光佛像日月珠幢像鬘  
華菩薩像揭諦神像李迪湖石海棠圖水仙  
咏梅圖楊仕賢山水開精舍圖豐興祖照殿

南宋雜事詩 卷五  
紅山茶圖會禽圖吳炳春池睡鳥圖鴛鴦瑞  
蓮圖折枝寒鞠圖蕭照赤松黃石圖採芝仙  
女圖劉松年耕織圖馬遠石鼎聯句圖旗亭  
記曲圖蓮舟邀月圖馬逵教鸚鵡仕女圖祝  
雞翁圖梁楷孫子牝牡八變陣圖世室明堂  
宗廟位次圖夏珪柏人宵征圖秋風斜谷圖  
溪橋暗雪圖雪夜歸帆圖陳居中落日照大  
旗圖王輝散花圖韓祐草蟲圖朱懷瑾寒花

待雪圖響泉圖陳清波三潭印月圖蘇堤春  
曉圖石屋煙霞圖貝葉注經圖孫覺撲蝶仕  
女圖香紈仕女圖胡彥龍北方毘沙門天王  
像諾矩羅尊者像授埵天王像天龍神鬼像  
散花神女像魯宗貴竹枝山鷓圖梨花白燕  
圖玉茗圖錢光普啞藻魚圖陳可久柳絲魚  
影圖蘇堅真誥事蹟圖崔友諒春山圖徐道  
廣華清宮圖李德茂白鷗圖顧師顏繡佛圖

史顯祖陸羽品泉圖朱玉凌霄四帥圖朱光  
普農家迎婦圖秋山圖朱紹宗蕭翼賺蘭亭  
圖薄荷醉貓圖陳善清猿求木圖羣猿越澗  
圖開房石榴圖劉宗古詩女圖范彬六橋桃  
柳圖張仲紺珠蓮交頸鴛鴦圖 按西湖志  
餘於畫院諸人著錄寥寥予友厲君太鴻輯  
南宋畫院錄八卷儲藏題跋蒐羅甚富此亦  
嘗鼎一臠也

國香零斷失清芬本穴浮根思不羣  
最憶酒邊花下客冰絃愁滿賦湘雲

雪濤詩評趙子昂宋宗室一人題子昂畫蘭  
云近日國香零落盡王孫芳草遍天涯  
蓋譏之也 遺民錄鄭思肖字憶翁號所南福州  
人為太學上舍應宏詞科元兵南下扣閣上  
太后幼主疏辭切直忤當路不報初諱某宋  
亡乃改名思肖即思趙憶翁與所南皆寓意

南齊書 卷五  
也坐卧不北向扁其堂曰本穴世界以本之  
十置下文則大宋也精墨蘭自更祚後為蘭  
不畫土根無所憑藉或問其故則云地為人  
奪去汝猶不知耶 鐵網珊瑚趙子固以諸  
王孫負晉宋間標格愛作蘭蕙酒邊花下率  
以筆硯自隨 畫史會要子固善水墨白描  
水仙梅蘭山礬竹石 贛州漁笛譜周草窗  
賦趙子固凌波圖詞國香流落恨正冰銷翠

薄誰念遺簪水空天遠應念礬弟梅兄渺渺  
魚波望極五十絃愁滿湘雲

冷葉疎枝劇可哀空傳奉勅寫邨梅同時困頓  
南遷客破費胭脂幾許來

春雨集楊補之无咎所居蕭洲有梅臨之以  
進徽廟戲曰邨梅南渡後紹興中嘗畫作疎  
枝冷葉清意逼人自署奉勅村梅而徽廟不  
及見矣 已瘡編畫梅有名者如宋時楊補

南齊書事記 卷五  
之作梅自負清瘦有持入德壽者內中頗不  
便於逸興謂曰村梅補之因自題曰奉勅村  
梅云 續書畫題跋記李唐初至杭無所知  
貨楮畫以自給甚困有中使識之曰待詔作  
也遂奏聞唐之畫杭人即貴之唐有詩曰雪  
裏煙邨雨裏灘為之如易作之難蚤知不入  
時人眼多買胭脂畫牡丹

蟹腊蛇王藏畫簾花鬚魚鬚戲銅鉦年來不覩

承平事想煞王生與戴生

癸辛襍識故都戲事呈水嬉以髹漆大斛貯  
水小銅鑼為節凡龜鼈鰕魚以名呼之浮水  
面戴戲具而舞王生畫花鳥人物千餘事定  
箭中物如花鬚魚鬚燕翅之類雖極微渺無  
不中之太廟前有戴生蓄異蛇數千種最大  
者長數尺如殿楹呼為蛇王無他生產凡所  
資命惟視吾蛇在耳彷彿秦龍之技有道人

負一麓視之皆枯蟹至百餘種如惠文冠如  
皮弁如箕如瓢如虎如龜如蝘蝓或赤黑紺  
斑如玳瑁或粲如茜錦其一上有金絲皆平  
日目所未覩

花傳佳種玉瓏鬢並蒂鴛鴦亦著紅更有蕭寥  
江路客宮梅不與野梅同

盤洲集偶得梅一種疎枝清香跗萼之花五  
出與江梅無異但花色微紅而五出之上復

有一重或十葉或九葉他皆竝蒂雙實俗呼  
為鴛鴦梅 風月堂襍識玉瓏鬢浙中謂之  
睡梅 圖繪寶鑑丁野堂名未詳住廬山清  
虛觀善畫梅竹理宗因召見問曰卿所畫者  
恐非宮梅對曰臣所見者江路野梅耳遂號  
野堂

風騷散佚罕流傳力購開雕讀御前空費元嘉  
詩禁密紛紛箋釋鬪新編

六研齋三筆思陵極愛蘇公文詞力購全集刻之禁中 庚溪詩話孝宗愛蘇軾文乾道中梁丞相叔子侍講席上因論文問曰近有趙夔等註軾詩甚詳卿見之否梁奏曰臣未之見上曰朕有之命內侍取示之 施註蘇詩王註正譌云分類蘇詩註三十二卷舊刻永嘉王十朋龜齡纂集 洪武蘇州府志顧禧字景蕃吳郡人不求祿仕居光福山紹興

間有司以遺逸薦不起嘗與吳興施元之註蘇子瞻詩行世 吳興掌故司諫施元之字德初註東坡詩四十二卷與吳郡顧景蕃為之元之子宿推廣為年譜陸放翁序 錢唐志廖羣玉有註坡詩以海陵顧註為祖而益以他註與戰國策皆欲刻而未成

江南黃葉亂秋空偶感宸書野寺中遺橐不勝三致意無邊風月系文忠



六研齋筆記武林潮鳴寺有宋思陵賜統制  
劉漢臣詩野寺參差落漲痕疎林欹側露霜  
根扁舟一棹向何處家在江南黃葉邨此蘇  
子瞻詩也起句第二字是水字只改一寺字  
遂掩而有之思陵博學斷不如是當由一時  
在寺中偶御筆書之以賜劉而寺中欲假以  
為重乃改字勒石以侈榮觀耳 玉海乾道  
九年孝宗御製文忠蘇軾文集贊并序內贊

云敬想高風恨不同時掩卷之歎播以聲詩  
選德殿書賜蘇嶠 又先是有詔贈太師  
朝野襍記孝宗在翠寒堂嘗曰子瞻以風月  
為無盡藏信哉上雅敬蘇文忠居常止稱子  
瞻或稱東坡 宋史本傳高宗即位贈蘇軾  
資政殿學士諡文忠

峰攢千疊卧犀泉山水清居好味禪去住老僧  
休作偈菜園新詔賜嬋娟

咸淳臨安志卧犀泉鄭戩靈隱天竺詩集序  
云若夫玉巖青壁犀泉龍湫峰攢千疊松排  
萬蓋山之境也據此則青壁檻卧犀泉皆在  
靈隱天竺之間 隨隱漫錄閻妃以特旨奪  
靈隱寺菜園為功德寺住持沖癡絕示衆云  
欲去不去被去礙欲住不住被住礙云云  
成化杭州府志卧犀泉在醴泉側

道學誰將倡盛朝獨聞忠讜冠羣僚清居賸有  
風徽在至竟人呼博士橋

萬厯杭州府志李性傳字成之宗正寺主簿  
李舜臣之子宋寧宗嘉定四年舉進士歷轉  
運幹辦行在諸軍審計司進對有崇尚道學  
之言稱旨遷武學博士嘗寓居武志坊巷以  
修武志故名其橋為博士橋巷曰武志坊  
十里山堤散客襟芹芽菰米趁幽尋雪甌初汎  
蓮花院第一泉香記小林

南齊書事記 卷五  
誠齋集過臨平蓮蕩詩人家星散水中央十  
里芹羹菰飯香想得薰風端午後荷花世界  
柳絲鄉 咸淳臨安志蓮花井在小林蓮花  
院范令光記臨平山後數十里井鹵惡余客  
小林四面散汲其味略同與范右之蔡及之  
納涼蓮花院院有三井扣僧孰勝僧指露井  
最良余亟取烹茗清甘寒冽自是日走甃奴  
二罌靳不輕費品此泉為小林第一

荆山嶺半白雲開水面橫斜盡野梅築得團蕉  
香裏住隔橋支杖一僧來

西溪梵隱志春雪菴在荆山嶺左淳祐中沙  
門熙春號雪山結菴靜攝有樂靜堂植梅花  
砌出山城輦道長翠華頻幸過琳堂一十平八  
里秦亭路祇奉宸遊入禹航

西溪梵隱志西溪留下谿路皆輦道石平如  
砥 浙江通志歷方井法華秦亭幾十有八

南宋神皇詩 卷五  
里為南宋車駕入禹航洞霄宮輦道 又靈  
隱亦有輦路一路砌為城者南宋時為翠華  
臨幸也 徑山集樓鑰徑山興聖萬壽禪寺  
記顯仁皇后高宗皇帝皆常遊幸御書龍游  
閣扁榜

孫辟清幽圖史安香生衣袂染秋蘭舊時寫出  
桃花扇小種歐虞秀可餐

佩楚軒客談金應桂字一之雅標度能歐書

受知賈似道晚居西湖南山中築孫辟山房  
左弦右壺中設圖史古竒器客至撫摩諦玩  
清談灑灑每肩輿入城府幅巾氅衣望之若  
神仙然 絕妙好詞貧房李彭老商隱寄題  
孫辟山房詞調寄高陽臺石筍埋雲風篁嘯  
晚翠微高處幽居縹簡雲籤人間一點塵無  
綠深門戶啼鶻外看堆牀寶晉圖書儘蕭閒  
浴研臨池滴露研朱舊時曾寫桃花扇弄霏

香秀筆春滿西湖松鞠依然紫桑自愛吾廬  
冰絃玉塵風流在更秋蘭香染衣裾照窗明  
小字珠璣重見歐虞

南湖老去管風花小部新聲別院誇寒粟香茸  
有清供銀絲一鼓勝箏琶

功甫玉照堂詞南湖老矣無襟度但尊前跟  
踣醉飲 紫桃軒雜綴張功甫豪侈而有清  
尚嘗來吾郡海鹽作園亭自恣令歌兒演曲

務為新聲所謂海鹽腔也 誠齋集木犀初

發呈張功甫詩憶曾風露飄寒粟自領兒童  
拾落金 武林舊事約齋桂隱百果淳熙丁  
未秋余舍所居為梵刹爰命桂隱堂館橋池  
諸名各賦小詩總八十餘首逮慶元庚申歷  
十有四年之久匠生於心指隨景變移徙更  
葺規模始全因刪易增補得詩凡數百綱舉  
而言之東寺為報上嚴先之地西宅為安身

攜幼之所南湖則管領風月北園則娛燕賓  
 親亦菴神居植福以資淨業也約齋晝處以  
 助老學也至於暢懷林泉登賞吟嘯則又有  
 衆妙峰山包羅幽曠介於前六者之間區區  
 安身嗜靜之志造物亦不相負矣或問余曰  
 造物不負子子其惡負造物哉釋名宦之拘  
 囚享天然之快適要當於筋骨未衰時今子  
 三仕中朝顛華齒墜涉筆總無十二句如之

何則可余應之曰仕雖多不使勝閒日余之  
 願也余之幸也敢不勉旃壬戌仲夏張鎡功  
 父書 東寺 勅廣壽慧雲 大雄尊閣 千佛

像 靜高堂 寢室 真如軒 種竹 西宅

叢奎閣 安奉四朝被賜宸翰 德勲堂 祖廟

以高宗御書二字名 儒聞堂 前堂用告詞

取名 現樂堂 中堂用朱巖壑語 安閒堂

後堂 賞正亭 山水 瀛壑勝處 東北小堂

前後山水

綺互亭 有四可軒

柳堂 花院

應鉉齋 筮得鼎卦故名

振藻 取告詞中

名 宴頤軒 尚有軒 亦菴 法寶千壘

鐵鑄千壘藏經千卷

如願道場 藥師佛壇

傳衣軒 寫經寮書華嚴等大乘諸經

約

齋 泰定軒 煙波 觀南湖

御風橋 十間

閨春堂 牡丹芍藥 杞鞠亭 天鏡亭 水

心 星槎 舟名 鷗渚亭 汎月闕 北園

羣仙繪幅 樓前後十一間 下臨丹桂五六

十株 盡見江湖諸山

桂隱 諸處總名 今揭

樓下 清夏堂 玉照堂 梅花四百株 蒼

寒堂 青松二百株 艷香館 襟春花百餘 摻

碧宇 修竹十畝 水北書院 對山臨溪

界華精舍 夢中得名 撫鶴亭 近松株 芳

草亭 臨池 味空亭 臘梅 垂雲石 高二丈

廣十四尺 攬月橋 飛雪橋 在梅林中

芙蓉池 紅蓮十畝四面種芙蓉

蕊珠洞 醮

醮二十五株 珍林 襍果小園

涉趣門 總

門入松逕 安樂泉 竹間井

杏花莊 村酒

店 鵲泉 井名 衆妙峯 山

詩禪堂 黃

寧洞天 景白軒 冥香山畫像并文字

文

光軒 臨池 書葉軒 柿二十株

綠畫軒 木

犀臨側 俯巢軒 高檜傍

無所要軒 長

不寐軒 摘星軒 餐霞軒 櫻桃三十餘株

讀易軒 詠永軒 道德經 凝薰軒 楚

佩軒 蘭 宜雨亭 千葉海棠二十株夾流水

聽鶯亭 柳邊竹外 滿霜亭 橘五十餘株

千歲菴 仁皇飛白字 恬虛菴 憑暉亭

美芝亭 都徽別館 誦度人經處經乃徽

宗御書 水湍 漪嵐洞 施無畏 觀音銅

像 澄霄堂 面東 登歎臺 金竹岩 隱

書巖 石五仙書在巖穴中可望不可取 古



雪巖 新岩 疊翠亭 茂林中容十許人坐

釣磯 菖蒲澗 上有小石橋 中池 養金

魚在山澗中 藏丹谷 珠旒瀑 煎茶磴

右各有詩在集此不係錄 雲邁澹墨張

約齋磁喜延湖海之士一日午酌數盃後命

左右作銀絲供且戒之曰調和好又要真

味衆謂鱸也良久出琴一張請琴師彈離騷

始知銀絲琴弦也調和好調弦也有真味蓋

取淵明琴中有真味之意也 案張功父園

在南湖即今城北白洋池也

去國靈芝寓遠坳故人落落似晨星歸來空谷  
風流甚賸有青山幾疊青

四朝聞見錄慶元元年韓侂胄欲逐趙忠定  
因以盡除天下之不附己者名以偽學朱文  
公去國寓西湖靈芝寺送者漸少惟平江木  
川李君杞獨從容叩請得窮理之學有紫陽

傳授行於世 通考纂略熹登第五十年仕  
於外僅九考立朝才四十六日 太平清話  
朱紫陽畫深得吳道子筆法 朝野雜記紹  
興已卯高宗命召先生乞祠俟滿日赴行在  
劉忠肅除御史籍溪胡先生赴祕書正字先  
生以詩寄之云先生去上芸香閣閣老新裁  
獬豸冠留取幽人卧空谷一川風月要人看  
又甕牖前頭翠作屏晚來相對靜儀形浮雲

一任閑舒卷萬古青山只麼青  
玉印荒江售釣師御名重識涕漣而舊傳易運  
東都事先有交辭兆德基

槎菴小乘淳熙中明州士人過曹娥江見漁  
叟持巨鯉買得作膾腹中得小玉印有二字  
不能識以五千得之後為德壽宮提舉佩腰  
間光堯見之曰汝何以得此具以聞上凄然  
曰此我故物京師玉冊官鐫德基二字建炎

避敵海上誤墮水中今四五十年不意復落  
吾目 坦齋筆衡道君皇帝大觀二年戊子  
秋八月以易數一一口又又一乃御製易運  
碑刻之延福殿東壁其略曰始建元基高宗  
御字德基也曰紹興德壽謂紹興年德壽宮  
也曰承太乙循運盡在陽九之數高宗聖壽  
八十一歲也其後事皆歷驗信乎聖哲先知  
之明因往推來在天數者果不可追歟

彝鼎雲雷攷鑿精相傳薛篆與張評煙江莽蒼  
言司婦劫火消殘百感生

張掄紹興古器評紀紹興內府諸器凡二卷  
掄字材甫南渡故老好填詞應制極其華艷  
每進一詞上即命宮人以絲竹寫之嘗同曾  
覲吳琚輩進柳梢青西江月壺中天酹江月  
諸篇上極稱賞賜賚甚渥掄曾見汴都之盛  
每多感慨惜草堂花間諸選不多錄也見評

後毛晉跋 歷代鐘鼎款識南宋錢唐薛尚  
功手摹款識之文凡二十卷筆墨最為精妙  
其討論有出於博古考古二圖之外者此卷  
流傳不專一氏迄未有刊本明季南州朱謀  
聖始序而刻之前有張雨趙孟頫楊伯岳周  
密柯九思威鄂蘭舊作幹王倫今改托台布哈舊作徒泰  
不華今改王行周伯溫豐坊諸跋字皆題其墨蹟  
也 鄉媛記趙明誠幼時其父將為擇婦明

誠夢誦一書覺來惟憶三句云言與司合安  
上已脫芝芙草拔以告其父父解曰言與司  
合是詞字安上已脫是女字芝芙草拔是之  
夫二字汝殆得能文詞婦也 漱玉詞附載  
李易安金石錄後序述購求之始品鑒之精  
及遭亂後遷移之難散亡之易比再至臨安  
大略盡失因序此錄以存其名

爭來南曲索煙花退舍生多近狹斜不道東風

花有主空教分帖野猫家

夢梁錄散樂傳學教坊十三部惟以襍劇為  
正色又官妓如金賽蘭范都宜唐安安倪都  
惜潘稱心梅醜兒錢保奴康三孃桃師兒沈  
三姐等及私妓如蘇州錢三姐七姐李惜惜  
鼓板朱一姐媳婦朱三姐呂雙雙十般大胡  
憐憐婺州張七姐蠻王二姐搭羅邱三姐一  
丈白楊三媽舊司馬二孃裱褶陳三媽履片

張三孃半把傘朱七姐轎番王四姐火臂吳  
二媽浴室徐六媽沈盼盼普安安徐雙雙彭  
新等後輩雖有歌唱者比之前輩終不如也  
貴耳錄成均舊規引試凡先在三等而今  
在四等謂之退舍 又學舍燕集點妓各齋  
集正出帖子用齋印書仰弟子某人到何處  
祇直燕集專有一等野猫兒卜慶等充報  
深雪偶談許左之寓飲妓坊欲狎之妓密有

所懽在矣許賦詞云誰知花有主悞入花深  
處放直下酒杯乾便歸去蓋紹興間籍太學  
休澣日漫遊酒邊作也

一餉湖亭瑤席通春風憶煞舊瓊瓏城南路接  
橋南樹聽玉瓏璁便不同

藏拙藁湖亭席上贈商素詩一曲春風已擅  
場淺顰低轉更傳觴令人憶殺香山老舊日  
瓊瓏也姓商能改齋漫錄有士人不欲書

名嘗於錢唐江漲橋為狹邪之游作樂府名  
玉瓏璁云城南路橋南樹玉鉤簾捲香橫霧  
新相識舊相識淺顰低笑嫩紅輕碧惜惜惜  
劉郎去阮郎住為雲為雨朝還暮心相憶空  
相憶露荷心性柳花踪跡得得得其後朝廷  
復收河南士人陷而不返其友不欲書名作  
詩寄之且附以龍涎香云江漲橋邊花發時  
故人曾共著征衣請君莫唱橋南曲花已飄

南齊書 卷五  
零人不歸士人在河南得詩訓之云認得吳  
家心字香玉窗春夢紫羅囊餘熏未歇人何  
許洗破征衣更斷腸

玉牌狼藉冷香塵小閣空餘佛火新歌斷紅兒  
楊鐵史柳絲風漾不勝春

堅瓠集云梁溪楊仲弘載一日遊鳳皇山過  
宋大內獨步微吟至披香閣址拾玉牌一事  
上有詞云內人曉起怯春寒輕揭珠簾看牡

丹一把柳絲收不住和煙搭在玉闌干為之  
憮然 瞿佑詩話元廢宋故宮為佛寺西僧  
皆戴紅兒帽故楊廉夫宋故宮詩用紅兒為  
韻

名錄登科決兆先蛛絲紅硯墨花牽天家結網  
非無效一榜爭看忠節傳

歸愚集紹興戊午五月余與妹夫章道祖待  
省試於臨安之資國寺所用硯上結成蛛網

南齊書事記 卷五 七  
衆以為登科之祥已而果然 筠廊偶筆宋  
寶祐四年登科錄第一甲第一名文公天祥  
第二甲第一人謝公枋得第二甲第二十七  
人陸公秀夫忠節萃於一榜洵為千古美談  
四水先生事退潛蒼華髮冷貌清恬搖思自擅  
蕓洲趣笛譜西鄰一再拈

剡源文鈔雲周密公謹與杭楊承之大受有  
連依之居大受和武恭王諸孫其居之苑籞

引外湖之泉以為流觴曲水大受捐其地之  
西偏以居公謹故公謹亦為杭人 半軒集  
有題周草窗畫像云宋運既徂杭有弁陽周  
草窗志節不屈觀其自贊之辭可槩見焉其  
像藏長洲沈氏 絕妙好詞秋崖李萊老寄  
弁陽翁詞云蒼華髮冷笑瘦影相看如竹  
詞綜周密詞名蕓洲漁笛譜 按鄭元慶湖  
錄云四水者湖城以苕水餘不水前溪水北



流水合而入於郡霅溪故名四水舊人詩四水交流霅霅聲是也據此則四水乃湖之地名公謹生於湖中年雖遷杭晚仍歸老弁山又號弁陽老人則四水潛夫之號亦猶是耳大滌洞天記杭城癸辛街楊府瞰碧園有茂林修竹之趣

小架紅亭碧水環上元明月玉簫閒愁聽穉柳嬌黃後不忍重過昭慶灣

霏雪錄元帥夏謹齋若水居錢唐西湖之昭慶灣第宅百餘間乃故宋謝太后歇涼亭如看壽堂百花堂一碧萬頃堂湖山清觀等皆宏麗特甚又架船亭水中每元夕諸堂皆施五色簾放華燈上下輝映花草粹編湖海紀聞德祐太學生詞云穉柳嬌黃全未禁風雨穉柳謂幼君嬌黃謂謝太后

衣冠南渡纂興七回憶東都舊事荒瀕洞忽吹

南齊書事記 卷五  
塵世換濃花淡柳說錢唐

玉海王稱上東都事略百十三卷其書掇取  
五朝史傳及四朝實錄附傳而微以野史附  
益之 野處類豪上東都事略成書劄子王  
稱之父賞在紹興中為實錄修撰稱承其緒  
餘刻意史學斷自太祖至於欽宗上下九朝  
為東都事略 竹山詞元夜閱夢華錄齊天  
樂詞云華胥仙夢未了被天公瀕洞吹換塵

世淡柳湖山濃花巷陌惟說錢唐而已



國家圖書館, NATIONAL CENTRAL LIBRARY, TAIWAN, R.O.C.

南史卷五  
卷五  
生

南宋襍事詩

卷六 一百首

錢塘厲鶚撰

野店新興駐六軍  
開基節建兆初聞  
試聽一夜臨安雨  
便是天邊華蓋雲

清波襍志高宗自相州渡河初程宿頓問地名以新興店對幕府進言宋室中興其命維新又建炎初符瑞如冰泮復凝紅光如火雲覆華蓋其類不一揮麈前錄政和二年南



京鴻慶宮道士孟若蒙進言本宮每遇正月  
初四日為初業之日修設齋醮乞置節名開  
基以永崇奉詔從其請紹興中若蒙又以前  
績自陳仰惟太上皇帝中興再造復在南都  
豈偶然哉 揮塵餘話車駕初至臨安府霖  
雨不止葉夢得等言州治屋宇不多六宮居  
必隘窄聖訓曰亦不覺窄但卑溼爾然自過  
江百官六軍皆失所朕何敢求安 三朝北

盟會編紹興二年遷臨安府於奉國寺基  
麗正門開散瑞煙六更纔罷雁行聯別拋柘彈  
驅鴉地高級金鈴放鴿天

鼠璞行在南內門名麗正蓋取重離麗正之  
義 豹隱紀談揚誠齋詩天上歸來有六更  
蓋內樓五更梆鼓交作謂之蝦蟆更禁門方  
開百官隨入所謂六更也 四朝聞見錄紹  
興初高宗建行闕於鳳山之中林木蓊如鴉

以千萬噪鳴聒天高宗在汴無山未嘗聞此  
至則大駭命內臣張去為領修內司諸兒聚  
彈射而驅之臨平赤崖間未幾復如初 又  
云東南之俗以養鵓鴿為樂內侍畜之尤甚  
寓金鈴於腰風力振鈴鏗如雲間之珮

景靈恭謝駕初回帽插宮花繡作堆除目傳宣  
休覆奏昨宵齋殿降恩來

隨隱漫錄景靈恭謝駕回宰相以下皆簪花

學詩初集觀景靈宮恭謝詩云不比常朝  
添覆奏報來除目十餘家自注常朝除目覆  
奏而後出劄惟齋宮免 案景靈宮在錢唐  
門內北即今演武場地

渡江以後說繁華非復吟梅處士家堤上風開  
及第柳山中春到狀元花

藏拙餘藁春日湖上詩飛鷁鳴鑣鼓吹喧繁  
華應勝渡江前吟梅處士今還在肯住孤山

爾許年 雪巖吟卷湖上春晴詩楊柳也如  
新及第向人爭舞綠羅衣 咸淳臨安志徐  
清叟淨明院和御製詩衝凍細尋梅信息枝  
頭喜見狀元花

貌取湖山玉色愉蕭郎絕筆院中無調鉛殺粉  
經營極勅寫天家瑞應圖

清容居士集蕭照江山圖詩蕭郎解作湖山  
圖上皇一見玉色愉 清河書畫舫蕭照中

興瑞應圖前後凡六卷

進御麋九妙手供旨教小米搨雙龍輕煤第一  
黃山產赦却蒼蒼九里松

老學菴筆記紹興間復古殿供御墨新安戴  
彥衡所造自禁中降出雙角龍文或云米友  
仁侍郎所畫也中官欲於苑中作墨竈取西  
湖九里松作煤彥衡力持不可曰松當用黃  
山所產此平地松豈可用

柳色青青食已寒香車菜市客爭看紅亭醋庫  
橋東住心似桃花一樣酸

武林舊事清明前三日婦人淚妝素衣提攜  
兒女若玉津富景御園包家山之桃關東青  
門之菜市尼菴道院尋芳討勝極意縱遊  
咸淳臨安志紅亭醋庫在菜市橋東街南面  
北

祕省蓬巒儼帝居風籤萬軸獻來初牆西措大

窮寒甚只讀江東陸氏書

中興館閣錄祕書省蓬巒碑起居舍人朱待  
問書 揮麈前錄太上南渡詔獻書補官者  
凡數人秦熈提舉祕書省奏請命天下專委  
守臣又有旨錄會稽陸氏所藏書上之今中  
祕所藏之書亦良備矣 夷堅志乾道初內  
侍陳源居在祕書省東連牆起樓樓下築臺  
每宴客張樂必於其處有閩士獻書警之曰



宅西正是三館職多窮寒措大羨人富貴於心常以勿堪或能害我是後遂不復至

東閣芬蓋衰綺羅雲頭香法本宣和如何張趙為官日阜英胭脂用不多

齊東野語宣和時常造香於睿思東閣南渡後如其法製之所謂東閣雲頭香也 老學

菴筆記高宗在徽宗服中用白木椅子錢大王入覲見之曰此檀香椅子耶張婕妤掩口

笑曰禁中用胭脂阜英多相公已有語更敢用檀香作椅子耶時趙鼎張浚作相也

尊為隆祐過江年黑竹輿中后諭傳一自苗劉多事後都人總戴孟家蟬

揮塵後錄昭慈孟后紹聖三年以使令為襪禮之法詔徙處道宮思陵中興尊為隆祐太后孟后祖名元易元為隆字 又云苗劉兵殺內侍脅制上為內禪之事太后乘黑竹輿

宣諭以上仁孝曉夕思念二聖欲復讎雪恥  
太尉等皆名家不須如此 可談孟后衣服  
盡作雙蟬目為孟家蟬識者謂蟬有禪意久  
之竟廢 白石集觀燈口號遊人總戴孟家  
蟬爭託星毬萬眼圓闌裏傳呼大官去後車  
多少盡蟬娟

築毬吹笛共流離中瓦鉤闌又此時檀板一聲  
雙淚落無人知是李師師

汴都平康記政和間汴都平康之盛而李師  
師崔念月二妓名著一時李生門第尤峻靖  
康中李生與同輩趙元奴及築毬吹笛袁絢  
武震輩例籍其家李生流落來浙中士大夫  
猶邀之以聽其歌然憔悴無復向來之態矣  
白獺髓中瓦前娼戶李博士 案中瓦通  
後市街

硬雨分明似李梅無端太學瓦皆摧儒官諱道

天飛電祭酒應為捕酒來

軒渠錄紹興十七年五月臨安大雨電太學屋瓦皆碎儒官申朝廷不可言電稱硬雨

清波襍志紹興間張扶少持改國子祭酒時祭酒虛位亦久前騶接呼赴監供職學前居民驚懼曰官來捕私酒傳以為笑

錦標裝池數榷場百花樓閣五文章鴛衾官庫留遺物隱約風懷記蜀王

輟耕錄高宗渡江後榷場購求為多錦標如克絲作樓閣百花攢龍五色簞文之類 又

云孟蜀主一錦被一梭織成被頭作二穴如雲版樣此之謂鴛衾也楊元誠太史言兒時聞尊人樞密公於宋官庫親見之

沈家丞相起書樓滿地香雲五體投猶勝申王格天閣十眉環侍瀹茶甌

三柳軒襍識沈丞相該為樓貯書時禮佛其

上人謂之五體投地之樓以對秦檜一德格  
天之閣 清波襍志朱伯箕為秦伯和侍郎  
壽詞咸瞻格天閣見十眉環侍爭鳴絃索茶  
甌試淪更良夜沉沉細酌  
籠袖嬌嬈嬾不勝琵琶槽面撥輕冰趙家小景  
佳山水畫上春夜雪色綾

太平清話錢唐宋行都男女尚嫵媚號籠袖  
驕民 畫繼紹興間一時婦人服飾及琵琶

箏面所作小景山水實倡於趙士遵

傾國名花一首詩御前草聖墨淋漓芙蓉玉貌  
描添線休遣君王怒淨師

游名山記皋亭山廣嚴院僧淨師紹興初被  
召作草首書名花傾國兩相歡宋主不悅賜  
罷 子素集高宗二劉妃圖詩秋風落盡故  
宮槐江上芙蓉並蒂開留得君王不歸去鳳  
皇山下起樓臺 繪事備考尚衣夫人劉氏

畫用奉華堂印有宮衣添綫圖枚卜圖補袞  
圖宮繡圖

小雨春寒白晝長杏花紅遍錦膳廊熏爐巧樣  
姜娘子細炙龍涎幾品香

居易錄南宋姜娘子善鑄銅器 佩楚軒客

談浩然齋有古龍涎香自復古睿思東閣瓊  
英勝古清觀清燕閱古以下凡數品

東朝鑾馭朔方歸南面方知樂事稀可惜岳將

軍不見深宮只著道家衣

二老堂襍志紹興十二年太母還宮上曰朕  
自東朝之歸方知南面之樂中書舍人程敦  
厚行太后姪女韋氏十娘封郡夫人制全用  
上語 七修類藁韋太后北歸至臨平因問  
何不見大小眼將軍耶人曰岳飛死獄矣遂  
怒帝欲出家故終身在宮中道服也

花市爭先競買栽朱門尤貴看新梅錢唐湖上

南齊書 卷六 十一  
春風蚤九月疎花對菊開

石湖梅譜錢唐湖上早梅花予嘗重陽日親折之有橫枝對菊開之句行都賣花者爭先為竒置浴室熏蒸令拆強名蚤梅終瑣碎無香

硯童侍立太師窓夙構佳文未易降貢院無煩戴羞帽紫綾冊裏士無雙

朝野遺紀程敦厚子山為中舍時秦檜善之

一日呼入內閣坐候終日獨案上有紫綾標一冊書聖人以日星為紀賦末有類貢進士學生秦垾呈文采艷麗子山兀坐靜觀幾成誦及晚竟不出乃退子山叵測也及數日差知貢舉乃大悟以此命題乃孫果首選老學菴筆記秦太師第中窓上下及中一二眼作方眼餘作疎櫺謂之太師窓 夢梁錄知貢舉主文官皆戴羞帽乘馭赴觀橋貢院

三朝北盟會編檜小奴硯童婢興兒

方響敲殘事可驚玉堂天子出青城傷心祭了  
紅鸚鵡無復重呼萬歲聲

外史徽宗是玉堂天子不聽玉皇說法謫降  
人間 楓窓小牘高宗在建康有大赤鸚鵡  
自江北來集行在承塵上口呼萬歲足有小  
金牌有宣和二字因以索架置之比上膳草  
草無樂鸚鵡大呼卜尚樂起方響久之曰卜

娘子不敬萬歲蓋道君時掌樂宮人以方響  
引樂者故猶以舊格相呼高宗為罷膳泣下  
後此鳥持至臨安忽死高宗親為文祭之云  
金距絳囊何意朱紫乘軒駭散纏羅鬪死不  
遠長江來自汴水匪飢則附曰忠自矢謝跡  
雲端投身禁裏每呼舊人以勵近侍禽言若  
斯鳥官誰似云胡委羽歸魂鵲尾借號有烏  
來朝無雉漸肯為儀歷仍輝紀尚饗

東青門外九宮壇歲歲明禋走從官記取石湖  
齋宿向窓風隙月不勝寒

徐一夔宋行宮考九宮貴神壇在東青門外  
一里 石湖集次韻尹少稷察院九宮壇齋  
宿詩草草馳三里蕭蕭共一餐吏方綿禮蕞  
公自將詩壇隙月窺牀近窓風刮坐寒鴉鳴  
未忍散端為合并難 方輿勝覽九宮貴神  
太乙攝提軒轅招搖天符青龍咸池太陰天

一

說史堪嘲王與之舌端今古盡傳疑一時煙粉  
偏快聽鐵騎兒兼銀字兒

白獺隨行都紹興間有三市井人好談今古  
謂戚彥樊屠尹昌也彥乃皇城司快行屠乃  
市肉昌乃傭書有無名人賦詩曰戚彥樊屠  
尹彥時三人共坐說兵機欲問此書出何典  
昔時曾看王與之與之乃說書史人 都城



南齊書 卷六  
紀勝說話有四家銀字兒謂煙粉靈怪傳奇  
鐵騎兒謂士馬金鼓之事

尚食遙供泛索并繡紅巾上合衣擎餛飩不熟  
伶官進棘寺應推丙甲生

夢梁錄大內進膳有紫衣捲脚幞頭者謂之  
院子家托一合用黃繡龍合衣籠罩左手攜  
一條紅羅繡手中進入若非時取喚名曰沉  
索 霏雪錄宋高宗時饗人淪餛飩不熟下

大理寺優人扮兩士人相貌各問其年一曰  
甲子生一曰丙子生優人告曰此二人皆合  
下大理高宗問故優人曰餛飩子餅子皆生與  
餛飩不熟者同罪耳上大笑赦原饗人

蠻王獅子綴來齊九日花糕最可題狎客陳詞  
天一笑孟嘉陶令一身泥

武林舊事九日菊糕為蠻王獅子於上 詞  
苑叢談康伯可附會秦檜求進為十客中之

南唐書 卷六  
狎客專應制為歌詞重九遇雨奉勅口占望  
江南云茱萸胖菊蕊溼滋滋落帽孟嘉尋筇  
笠休官陶令覓蓑衣兩箇一身泥上大笑  
春來湖上兩高峯滴粉搓酥夢裏逢修態橫生  
花誥筆此詞應是為張穠

詞綜王仲言云天台左譽與言策名之後錢  
唐幕府樂籍有名姝張芸女名穠色藝妙天  
下君頗顧之如帷雲剪水滴粉搓酥皆為穠

作後穠委身立勲大將家易姓章疏封大國  
紹興中覓官行闕訪西湖兩山間忽逢車輿  
甚盛中覩一麗人褰簾顧君而顰曰如今若  
把菱花照猶恐相逢是夢中君醒然悟入即  
拂衣東渡一意空門 清波襟志嘗得一誥  
詞云朕眷禮勲臣既極異姓王之貴疏恩私  
室并侈如夫人之榮以爾修態橫生芳性和  
適云云紹興間權外制某人行 三朝北盟

會編張俊妾張穠錢唐名妓也知書嘗代俊  
文字封榮國夫人

和議初成返使車御容收得向龍沙白龜池屋  
秋風冷手著叢書記禁花

兩浙名賢錄朱弁字少章婺源人高宗遣使  
問安兩宮為通問使十二年和議成始得歸  
獻金國所得六朝御容及宣和御書所述北  
方事狀秦檜沮之僅轉奉議郎未幾以疾卒

於臨安府白龜池之寓舍 朱弁曲洧舊聞  
木香始禁中有數架花時民間得之相贈遺  
今則盛矣 夢梁錄白龜池在錢唐門裏沿  
城南

清修尼寺靜焚香傳是中宮賜寶坊還有藕花  
洲畔女翠深不礙宿鴛鴦

咸淳臨安志清修尼寺在崇新門外右軍寨  
前紹興間顯肅皇后建仍賜額 又云臨平

山下有藕花洲即鼎湖也 夢窓丁橐題藕  
花洲尼扇詞翠深不礙鴛鴦宿采菱誰記當  
時曲

汝甕古解祕深宮修內司窰范更工提舉昨朝  
新進入青花不與外間同

梧溪集有宋高皇壽成殿汝甕解引 輟耕  
錄南渡邵成章提舉於修內司造青器名內  
窰模范極精油色瑩徹為世所珍

間看鷗飛下小池影妻倚妾況淒其服膺齋裏  
諸先輩魁輔何由刻上碑

鶴林玉露太學蘊道齋前有小池忽一鷗飛  
下容與甚久一同舍生詩云昨夜雨餘春水  
滿白鷗飛下立多時 清波襍志紹興十三  
年再興太學呂榮義為上庠錄投進倡和詩  
有影妻倚妾語 林下偶談陳自強本太學  
服膺齋生既當國齋中為立碑刻魁輔二大

南齊書  
卷六  
字

南遷事事仿東都曾述江西詩派圖凍匠纔成  
山谷褐臨安猶見典型無

竹坡詩話呂舍人有江西詩派圖自是雲門  
臨濟始分矣揮塵後錄舊見黃太史所服  
絕勝時在臨安呼匠染之始就名曰山谷褐  
玉練槌香破鼻聞薔薇露滑大瓢分御前漫賜  
黃封醞不及秦家有表勳

武林舊事諸色酒名薔薇露御庫玉練槌祠  
祭酒小史秦檜表勳

繫書錢要十分豐一閱書牆惱至公謝石空誇  
能拆字可憐身在討論中

容齋隨筆紹興初范覺民為相以崇寧來初  
立法度例有泛賞建議討論行下吏部追奪  
雖公論當然而失職者浮議蜂起無名子改  
坡語云清要無因選舉艱辛繫書錢須要十

分又云不如歸去作箇閒人免一回來一回  
討一回論大書貼於門上邏者以聞朝議罷  
討論之舉 二老堂襍誌謝石善拆字徽宗  
特補承信郎後因范覺民作相討論追奪邵  
溥尚書第三子謂石我亦能拆字詰之則曰  
爾姓謝所謂身在討論之中名石則終身右  
選不能出頭也聞者大笑 夷堅志謝石紹  
興八年來臨安

層閣森沉白日間敷文譏語豈難刪虎兒學士  
空供職憶否揮毫進楚山

媿郊錄紹興十年五月十一日內降詔曰恭  
惟徽宗皇帝宸章奎畫著在簡編崇建層閣  
以嚴寶藏恭以敷文為名按典故凡建閣降  
詔必著閣之所以名如煥章建閣淳熙十五  
年詔曰載稽帝世之隆無越堯章之煥還考  
敷文則隱其義而無其辭及考雲麓漫鈔曰

南齊書 卷六  
徽宗書閣曰敷文取誕敷文德於兩階七旬  
而有苗格以寓譏誚是時秦檜當國其無君  
之心不可不誅焉 畫繼米元章便殿賜對  
因上友仁楚山清曉圖友仁宣和中為大名  
尹被遇光堯官至工部侍郎敷文閣學士  
案天章敷文諸閣皆在大內  
東西馬海散如雲出格驂騮空一羣欲使廣南  
高薊北詔將牽付殿前軍

名馬記紹興七年五月廣右進出格馬十匹  
上留其一餘付殿前司曰馬之良者不必西  
北 夢梁錄吳越王牧馬於錢唐門外東西  
馬塍其馬蕃息號為馬海 又云殿前司在  
鳳凰山八蟠嶺有御書閣凝香堂整暇堂  
侯門歌舞出都城無奈更衣訴此情但向小屏  
啼絳蠟輸他三傑蚤知名

夷堅志觀察使張淵紹興中以高價往都城

買美妾二十人而御之甚嚴小過必撻嘗延  
客環侍歌舞中席淵起更衣坐客葉晦叔之  
側一姝最麗乘間語之曰恭人在太尉左右  
想大有樂處姝慘容不語指筵上燭云絳蠟  
分明會得 齊東野語范石湖云朝士中姝  
麗有三傑謂韓无咎晁伯谷家姬及趙彥博  
家姬小瓊也 近體樂府贈趙富文家姬小  
瓊詞見了還非重理霓裳舞都無誤幾年一

遇莫訝周郎顧

花來瓊野玉光寒學士吟成傲熱官曉翦春冰  
送緹騎一枝慶忌宅邊看

陳氏書錄解題瓊野錄一卷學士洪邁園池  
記述題咏曰瓊野者從維揚得瓊花植之而  
生遂以名圃 留青日札南宋宦者陳源取  
瓊花孫枝接於聚八仙根上至今流傳杭褚  
家塘瓊花園是也地即春秋慶忌宅基 宋



鄭覺齋揚州慢瓊花詞記曉翦春冰馳送金  
莖露溼緹騎星流

葉葉西風翠翦裁新涼氣味蚤相催金錢買得  
秋多少秋傍玉人雲髻來

夢梁錄立秋日都城滿街叫賣楸葉婦女小  
兒翦如花樣插於髻邊以應時序 竹屋癡  
語清平樂咏秋葉詞盤枝翦翠葉葉西風意  
吹上玉人雲髻底無限新涼氣味飄蕭露葉

烟柔絕憐不逐宮流寄語多情宋玉悲秋得  
似宜秋

天街春暖酒如油爭上和豐豐樂樓銀甕呈祥  
都不解屏間瑞應待人搜

齊東野語中和和豐豐樂銀杓銀甕錢唐酒  
樓名 野客叢書都下有銀甕酒庫或問何  
謂余考瑞應圖王者宴不及醉則銀甕呈祥  
蓋取此意

南齊禱事詩 卷六  
夜來歸夢月橫西東閣重窺路更迷傳語郎君  
新得意酒醒無奈曉鴉啼

能改齋漫錄汪彥章在翰苑屢致言者作點  
絳脣詞或問曰歸夢濃於酒何以在曉鴉啼  
後公曰無奈這一隊畜生何 寓簡秦熺狀  
元及第汪彥章以啓賀會之有云三年而奉  
詔策固南宮進士之所同一舉而首儒科蓋  
東閣郎君之未有本求屬對之工而熺父子

怒以為輕已彥章自此得罪羈置湖湘

德壽宮中撰冊新書厨尤氏最移入明朝上壽  
天顏喜舞五花兒動酒鱗

貴耳錄德壽八十壽皇講行慶禮上尊號周  
益公當國差官撰冊楊誠齋尤延之各撰一  
本進呈壽皇以楊之文聱牙不若用尤之文  
溫潤 坦齋筆衡尤延之貫穿今古士大夫  
目為尤書厨 癸辛雜識德壽宮舞譜有五

南齊書 卷六  
花兒雁翅兒龜背兒

雨過秋來禁苑西述懷詩格未曾低平生覽鏡  
雄心在接骨時聞喚小嵇

庚溪詩話孝宗不忘中興之圖每形於詩詞  
如新秋雨過述懷云平生雄武心覽鏡朱顏  
在 兩浙名賢錄嵇清仁伯由汴扈蹕南渡  
世傳祕術壽皇躬騎射時有誤損應期而瘳  
宮中詔曰小小嵇正能接骨耶

西蕃名劍敵吳鉤賜出寒光凜素秋底事武臣  
要重賞邊功漸近太平州

名劍記紹興六年二月右相都督張浚請降  
御前西蕃寶劍給賜有功將士 錢氏私誌  
隆興初賀子忱知樞密院有武臣陳理公賞  
稱累立戰功自宣和年第一次燕山府至紹  
興年第九次太平州謂朝廷推賞一次輕於  
一次賀正色云只為邊功一次近於一次武

南齊書 卷六  
臣無詞聞者稱服

垂衣暇日沐恩波四角金龍押帕羅紅粉抹胸  
緋裏肚貴從御退賜宮娥

建炎以來朝野襍記乾道邸報臨安府浙漕  
司所進成恭后御衣有粉紅紗抹胸正紅羅  
裏肚 癸辛襍識大臣家賜與帝后衣謂之  
御退衣服予妻舍有御退羅帕四角皆有金  
龍小印

鴛鴦飛處畫船橫白玉芙蓉兩朶生請看雙投  
橋下水有情爭得似無情

七修類藁杭西湖南入路曰長橋宋誌俗名  
雙投昨讀元馮士頤竹枝詞曰請看雙投橋  
下水新開兩朶玉芙蓉注云常有情人雙投  
橋下故長橋名雙投

甘園地占社壇多大尹忻然不奈何留與花時  
誇好景水亭四望客經過

南宋雜事詩 卷六  
玉照新志乾道中趙渭礮老尹臨安時巨璫  
甘昇有別墅在西湖惠照寺西地連郡之社  
壇昇欲取以廣其圃礮老忻然領命 靜佳  
集辛亥二月望祭齋宮因遊甘園詩朝霏作  
雨連天溼花氣熏人到骨香四望水亭無正  
面有花多處背湖光 案甘園在淨慈寺對  
禁中丹桂月如銀猶有張掄一曲新霜滑玉堦  
行不得謫來蓮社作閒人

花菴絕妙詞選張材甫掄號蓮社居士多應  
制詞有臨江仙咏禁中丹桂 夷堅志紹興  
末知閣門事張掄赴後殿起居由隔門東澁  
道階趨下霜滑失足頓坐於地閣門職主朝  
覲彈奏臣僚失儀若本司官則自奏劾掄竟  
放罷

楊監朝天乍卸帆一官一集換頭銜蒲橋暇日  
攜孫子幼圃花窠手自芟

行都紀事楊誠齋名萬里為監司時巡歷至  
一郡郡守宴之官妓歌賀新郎詞以送酒其  
中有萬里雲帆何時到之句誠齋遽曰萬里  
昨日到守大慚監繫此妓 瀛奎律髓注楊  
誠齋詩一官一集每一集必變 誠齋朝天  
集幼圃詩序蒲橋寓居有剗方石而實以土  
者小孫子藝花窠菜本其中戲名幼圃 夢  
梁錄鹽橋東一直不通水旱橋名蒲橋 按

蒲橋為誠齋寓居此類甚多皆從來郡邑志  
所未備

三橋旅舍寂無譁揭榜嚴宵燭影斜響卜已占  
婆惜得試文莫是董公遮

夷堅志括蒼何湛叔存淳熙丁未赴省試館  
於三橋旅邸揭榜之夕遣僕探候久而不至  
有憂色因率同輩登橋聽響卜聞河畔婦人  
呼曰婆惜你得蓋吳人愠怒欲行打罵之詞

南齊書 卷六  
俗謂之受記非吉兆也湛獨喜曰可賀我矣  
吾小名正為婆惜僕至果中前列 坦齋通  
編淳熙丁未洪景盧知舉一考官大笑絕倒  
問之則云試卷中有用董公遮說漢王事以  
公遮為三老之名 夢梁錄韓府南曰軍將  
橋次曰三橋子

僧到郊裡識御顏易安齋類虎邱山劈開溪石  
尋微徑窗外江光一抹間

二老堂襍誌易安齋溪石畫開髣髴虎邱之  
劍池但小耳上有數亭傍結小菴僅容膝自  
窓中望濤江際天如發雞甕也僧宗表年八  
十八上遇郊裡宿齋往往過之至今設御榻  
而皇城司遣親事官為閣者 案易安齋在  
龍山郊壇側淨明院內近慈雲嶺

記得明堂舊例無誤宣鎖院噪宮烏紫霞帔接  
紅霞帔慶慶堪憐作受奴

南齊書 卷六  
玉堂禱記禁中以鎖院為重淳熙三年慶壽  
赦凡降麻官合加恩者用辛巳明堂例免鎖  
院九月三日中書進熟狀魏王愷恩平郡王  
璩永陽郡王居廣並加食邑只乞降付院草  
制內夫人失於詳閱宣鎖陳直院明日内批  
付密院典字直筆吳慶慶降充紫霞帔不令  
供職主管大內公事慶國淑懿夫人劉從信  
降兩字夫人蓋懲其誤也 留青日札紅霞

帔宋宮人品名紹興間如張頑兒馮十一娘  
張正奴劉翠奴之類又有紫霞帔王受奴  
瑞石山隅帝式憑桃遷九室亦同升摩睺羅自  
平江進原廟花樓又試燈

建炎以來朝野禱記太廟自神宗以來皆祀  
七世崇寧初取王肅說謂二桃在七世廟之  
外乃建九廟奉翼祖宣祖咸歸本室焉紹興  
中徽宗祔廟以與哲宗同為一世故無所桃



南齊書 卷六  
及升祔欽宗始祧翼祖高宗與欽宗同為一世亦不祧由是淳熙末年太廟祀九世十一室及阜陵復土趙汝愚為相遂祧禧宣二祖而祔孝宗有旨集議時朱子方在講筵獨以九廟為正中興小歷紹興十三年景靈宮成祖宗神御自温州來至是達於行在乃詣天章閣告遷徽宗及恭顯恭肅二后神御乙未並奉安於景靈宮四孟躬行獻禮上元結

燈樓寒食設鞦韆七夕設摩睺羅 方輿勝覽平江府土人工於泥塑所造摩睺羅尤為

### 精巧

湖蟹年年出葑田吳閭八跪進尤鮮不須將相矜雄畧茅店青旗認鞠天

隨隱漫錄姑蘇守臣進蟹應制程奎章批答云新酒菊天維其時矣上曰茅店酒旗語豈王言耶令陳藏一擬聞先臣援筆立成畧曰

內則黃中通理外則戈甲森然此卿出將入相之象也上乃悅咸淳臨安志西湖葑田產蟹土人謂之湖蟹

富景園開聚景同宸遊風物冠城東百花池上花多少直到升仙橋外紅

禁扁園有集芳慶樂聚景玉津玉壺富景翠芳並在杭都城紀勝城東新開門外有東御園今名富景園七修類藁東花園宋之

富景園也內有百花池相傳舊矣今園前民家之後尚存大池孝宗嘗奉太后幸此板兒巷名白花蛇散巷乃百花池上巷也咸淳臨安志富景園規制略仿湖山又云升仙橋富景園前

面赤如卿酒戶廉小春茶味亦清恬重華宮裏他年宴滿席無多汎綠籤

玉堂襍記淳熙丁酉十一月壬寅必大輪當

內直上曰卿想不甚飲比賜宴時見卿面赤  
賜小春茶二十銖葉世英墨五團以代賜酒  
經鋤堂襍志壽皇坐側有一牙籤筒凡二  
十半白半綠酒樽至出白籤斟止半杯出綠  
籤則滿汎一席之間用綠籤止二三而已  
青兕雄姿剩一錢晚年空看綠苔圓呂婆名徹  
楓宸聽弱女釵分劇可憐

宋史辛棄疾在耿京軍中僧義端竊印以逃  
辛追獲之義端曰我識君相乃青兕也力能  
殺人幸勿殺我辛斬其首歸報京 稼軒長  
短句侍者阿錢將行賦錢字贈之云杜陵正  
好事留得一錢看又云從今花影下只看綠  
苔圓 貴耳錄呂婆即呂正己之妻淳熙間  
名達天聽京畿有二漕一呂搢一呂正己搢  
家諸姬甚盛必約正己通宵飲呂婆一日大  
怒踰牆詈之搢子一彈碎其冠事徹孝皇兩

南齊書 卷六  
漕即日罷呂婆有女事辛幼安以微事觸怒  
逐之今稼軒桃葉渡詞因此而作按稼軒祝  
英臺近有寶釵分桃葉渡烟柳暗南浦之句  
天淨紗幙薄似雲冷泉堂下翠涼分君王欲識  
民間事金合朝封豹脚蚊  
咸淳臨安志紗有天淨紗 齊東野語壽皇  
語崇王曰聞湖州多蚊果否後侍宴因以小  
合貯豹脚數枚進之

東觀峩峩尺五天硯儲百九潑雲煙汴京公相  
無遺物七庫青緗值幾錢

硯箋祕閣硯高宗御押鄭亨仲詩石渠東觀  
天尺五右文儲硯一百九今所見七十五耳  
建炎以來朝野雜記中興館閣書目淳熙  
中所修也高宗渡江書籍散失紹興初有言  
賀方回子孫鬻故書於道者上命有司市之  
洪玉父為少監建言蕪湖僧有蔡京所寄書

籍因取之以實三館五年九月大理評事諸  
葛行仁獻書萬卷於朝詔官其一子十三年  
初建祕閣又命即紹興府借故祕閣陸賓家  
書繕藏之賓農師子也 夢梁錄祕書省經  
史諸子書籍凡七庫 按祕省藏書始末此  
段視揮麈錄較詳  
菴酒店前楊柳風碧香酒煖十分空舞兒二八  
腰身小染就春衫不肯紅

都城紀勝菴酒店者謂有娼妓在內而於酒  
閣暗藏臥床也 天下酒名記杭州有碧香  
咸淳志碧香庫在西橋東 老學菴筆記紹  
興末縑帛有一等似阜而淡者謂之不肯紅  
亦退紅之類也

垂髻妙女綠鬢鬢獨對經書四十三從此閨檐  
為進士淳熙省榜作新談

留青日札淳熙九年女童林幼玉求試經書

南齊書 卷六  
四十三件並通時年一十二歲賜為孺人或  
云林妙玉賜為進士 丹鉛總錄女進士者  
林妙玉也

籥冠長笛最矜奇一曲惟將項下吹比似盧郎  
倚樓處沙河塘上少年時

游宦紀聞沙隨先生頃於行在見一道人以  
笛拄項上吹曲其聲清暢而不近口竟不曉  
所以然 夢窓甲蒙醉桃源贈盧長笛詞沙

河塘上舊游嬉盧郎年少時一聲長笛月中  
吹和雲和雁飛驚物換歎星移相看兩鬢絲  
斷腸吳苑草萋萋倚樓人未歸

不因馴象外藩通誰識臨安假國忠齒冷虛無  
新拜號太師竹倚一枝紅

白獺髓寧宗恭淑后上仙而曹氏為婕妤平  
原特以為親屬偶值真里富國進馴象至平  
原語公瑾曰不聞有真里富國公瑾曰如今

有假楊國忠 朝野遺紀婕妤曹氏姊妹通  
籍禁中皆為女冠賜號虛無自然先生者左  
右街都道錄者皆厚於韓侂胄或謂亦與之  
暱 圖繪寶鑑韓平原自寫琅玕大葉號太  
師竹

蕭閒日誦度人經管領南湖尚典型詩客何妨  
原將種冰茹雪食髮星星

武林舊事張鎡桂隱百果云南湖則管領風  
月北園則燕賓娛親 又云都徽別館誦度  
人經處 四朝聞見錄鎡預史彌遠議誅韓  
侂胄史以韓為大臣且近戚未有以處鎡曰  
殺之足矣史退謂錢象祖衛涇曰真將種也  
楊誠齋贊張功父像云門有朱履坐有桃  
李一何佳公子也冰茹雪食瑯碎月魄又何  
窮詩客也

淺色衫裁艾虎紗髻邊千葉試榴花催教馬遠

圖宮扇意思山前賞物華

宋寧宗楊后宮詞一朶榴花插髻鴉君王長  
得笑時誇內家衫子新翻出淺色新裁艾虎  
紗 夢梁錄榴花有千葉者 吳師道禮部  
集仙山秋月圖宮扇馬遠畫 武林舊事端  
午先期學士院供帖子禁中排當例用朔日  
謂之端一設天師艾虎意思山子數十座巧  
粽結為樓臺舫輅

詩人正樂是姜夔私篆鷹揚與鳳儀一擔琴書  
留水磨秋聲夜夜故鄉思

白獺髓慶元間士人姜夔乞正奉常雅樂

雲煙過眼錄姜堯章有鷹揚周郊鳳儀虞廷  
印甚奇 吳夢窓詞藁姜石帚館水磨方氏

武林舊事水磨頭近石函橋 白石集湖

上寓居詩荷葉披披一浦涼青蘆葉葉夜吟  
商平生最識江湖味聽得秋聲憶故鄉



南齊書事詩 卷六  
水仙廟下水連天佩玉峩冠像宛然喚取雪篷  
煙艇子任他豪貴占頭船

咸淳臨安志表韶水仙王廟記峩冠佩玉乘  
風載雲相羊於水月倒景之中仙有靈宜不  
宜耶 清波襍志頃年西湖所置船舫如汎  
星槎凌風舸雪篷烟艇扁額不一 霞外集  
西湖春日壯遊詩豪家游賞占頭船趁得風  
輕放紙鳶

平原省吏史梅溪侍從申呈勢莫齊不道清才  
工樂府泉綃織就粉箋題

四朝聞見錄蘇師旦既逐韓侂胄為平章專  
倚省吏史邦卿奉行文字擬帖擬旨俱出其  
手權炙搢紳侍從東札至用申呈 張功父  
史梅溪詞序史生之作情詞俱到織綃泉底  
去塵眼中

白首修書局正開洞微能識我重來一囊粟抵

南齊書 卷六  
千壺酒自有蓮花博士才

詞統陸放翁之出也韓平原招致之一夕夢  
故人相語曰我為蓮花博士鏡湖新置官也  
我去矣君能暫為之乎月得酒千壺亦不惡  
也遂以詩紀之云白首歸修汗簡書每因囊  
粟歎侏儒不知月給千壺酒得似蓮花博士  
無 老學菴筆記予去國二十七年復來惟  
賣卜洞微山人無恙

書學官家筆勢騫楊家妹子最承恩偷從琴鶴  
圖中見嫵媚清詩粉指痕

書史會要楊妹子楊后之妹書似寧宗馬遠  
畫多其所題語關情思人或譏之 真蹟日  
錄楊妹子題劉松年琴鶴圖詩清獻先生無  
一錢故應琴鶴是家傳誰知默鼓無絃曲時  
向珠宮舞幻仙

特祠太乙留瓊館小著危亭綠樹間佳氣葱葱

誰與辨武林山是虎林山

學詩初集東太乙宮即事詩綠陰深處著危  
亭佳氣葱葱王武林一片紅塵飛不入杜鵑  
啼處白雲深自注宮後有亭乃武林山 七  
修類藁虎林即今祖山寺宋東太乙宮之山  
也不知者改虎為武宋樓攻媿詩云武林山  
出武林水靈隱後山母乃是此山亦復用此  
名細考其來正有以從來有龍必有珠此雖

培塿千山餘四朝聞見錄云虎林即靈隱山  
因避唐諱改名武林楊正質又謂錢氏有國  
時此山在郭外異虎出焉故名吳音訛虎為  
武耳據三說惟楊為是若以避唐諱則漢志  
已名為武林矣又晏元獻輿地志云武林山  
錢唐泉所自出此可見武林自是靈隱而虎  
林之地又豈有泉之可出耶

鸞綃閒引玉津遊正值南郊祀事修丙夜宓妃

南宋雜事 卷六  
先犯戒却將聖像拜盤溝

朝野遺紀光廟郊宿青城李后復至玉津行  
園亦犯玉女宓妃之戒 韋居聽輿蘇州承  
天寺有神曰盤溝大聖光皇嘗宣像入內賜  
僧牒

宜男圖子李家描蜨戲長春撲扇綃為愛鞠花  
香五月草蟲勾出雨珠跳

書畫彙考南宋畫院李從訓有宜男圖馬麟

有美人撲蝶蝶戲長春合卷 石湖鞠譜五

月鞠花心極大每枝只一花近年院體畫草  
蟲喜以此鞠寫生

三朝御裏陳忠翊四世儒醫陸太丞指點賀家  
酥樣好合將扁榜一時稱

老學菴筆記大駕駐蹕臨安故都及四方士  
民商賈輻輳又初立官府扁榜一新好事者  
取以為對曰鈐轄諸道進奏院詳定三司勅

南齊書 卷六  
令所王防禦契聖眼科陸官人遇仙風藥乾  
溼脚氣四斤丸偏正頭風一字散三朝御裏  
陳忠翊四世儒醫陸太丞東京石朝議女壻  
樂駐泊藥鋪西蜀費先生弟子寇保義卦肆  
如此凡數十聯 都城紀勝都下買物競趨  
有名之家如望仙橋糕糜後市街賣酥賀家  
草菴舊住萬松嶺能畫惟將畫出家月黑山深  
鬼吹火筆頭力便可驅蛇

攻媿集釋智融俗姓邢以醫入仕南渡居臨  
安萬松嶺號草菴邢郎中官至成和郎年五  
十棄官謝妻子祝髮靈隱寺人下口上吃畫  
山深多蛇如  
畫

畫集一

蹋蛇而掣甘

業

七寶山頭一俊  
自橋識舊京臣誰知竹暗  
雲深處更著梅亭句絕塵

揮塵三錄明清削迹蹕路假居於臨安之七

令所王防禦契聖眼科陸官人遇仙風藥乾  
溼脚氣四斤丸偏正頭風一字散三朝御裏  
陳忠翊四世儒醫陸太丞東京石朝議女壻  
樂駐泊藥鋪西蜀費先生弟子寇保義卦肆  
如此凡數十聯 都城紀勝都下買物競趨  
有名之家如望仙橋糕糜後市街賣酥賀家  
草菴舊住萬松嶺能畫惟將畫出家月黑山深  
鬼吹火筆頭力便可驅蛇

攻媿集釋智融俗姓邢以醫入仕南渡居臨  
安萬松嶺號草菴邢郎中官至成和郎年五  
十棄官謝妻子祝髮靈隱寺人不知其能畫  
山深多蛇忽作二竒鬼於壁一吹火向空一  
蹋蛇而掣其尾蛇患遂除

七寶山頭一俊人侍郎橋識舊京臣誰知竹暗  
雲深處更著梅亭句絕塵

揮塵三錄明清厠迹蹕路假居於臨安之七

寶山俯仰顧盼聚山林江湖之勝於几案間  
前錄云徐五丈敦立為貳卿明清偶訪之  
坐間問曰度今此居侍郎橋何耶明清即應  
以仁宗朝郎簡杭州人以工部侍郎致仕居  
此里人德之遂以名橋兩朝國史本傳字簡  
之王荆公有寄郎簡之詩敦立大喜曰博聞  
如此可謂俊人矣按敦立名度作却掃編  
四朝聞見錄陳謙三茅觀梅亭詩竹密不知

雲欲雨山高盡見水朝宗繼是無有和者  
按三茅觀在七寶山 隨隱漫錄紹興初以  
牛鼎賜三茅觀內有銘乃宋孝武孝建元年  
八月二日作西湖志以為漢建元鼎誤矣  
西湖衣鉢幾人傳長繞梅花拜墓田為問孤山  
林處士可曾一世對花眠

雪巖吟卷讀林可山西湖衣鉢詩梅花花下  
月黃昏獨自行歌掩竹門只道梅花全屬我

南齊書 卷六  
不知和靖有仍孫 升菴詞品林君復宋史  
謂其不娶無子然林洪著家山清供言先人  
和靖先生云云蓋喪偶後遂不娶耳 按洪  
字可山

荷花萬柄倒池心小水晶宮望更深詩思只宜  
生此處雲山罨畫地銷金

四朝聞見錄白洋池在田家橋側芰荷渺然  
鷗鷺襍集號小水晶宮 老學菴筆記紹興

中有貴人好為俳諧詩如綠樹帶雲山罨畫  
斜陽入竹地銷金

江湖集列幾名家陳道人詩頗足誇攤向睦親  
坊畔賣相公語禁累梅花

瀛奎律髓注寶慶初史彌遠專權之際錢唐  
書肆陳起宗之能詩凡江湖詩人皆與之善  
宗之刊江湖集以售劉潛夫南岳藁與馬宗  
之詩有云秋雨梧桐皇子府春風楊柳相公



橋哀濟邨而誦彌遠也或嫁秋雨春風之句  
為教器之作言者并潛夫梅詩論列劈江湖  
集板二人皆坐罪而宗之坐流配於是詔禁  
士大夫作詩紹定癸巳彌遠死詩禁始解潛  
夫為病後訪梅絕句云夢得因桃却左遷長  
源為柳忤當權幸然不識桃并柳却被梅花  
累十年 又云陳起睦親坊開書肆自稱陳  
道人 按睦親坊即今杭城弼教坊

小隊宮妝候蚤朝石中靈鵲噪聲遙綰成不落  
新翻髻裏就春趺上馬嬌

玉芝堂談薈宋穆陵宮中有靈鵲石石中有  
鵲每天將旦咸聞噪聲 妝臺記理宗朝宮  
妃梳高髻於頂曰不走落 說略理宗朝宮  
妃束足纖直名快上馬

兩湖勝槩得佳名飲綠亭前春水生好是上頭  
天氣近燕簾柳戶作清明

范石湖集李翬知縣作亭西湖予用東坡語  
名曰飲綠遂為勝槩 夢梁錄清明節凡官  
民子女未冠笄者以此日上頭 史梅溪飲  
綠亭詞有柳戶清明燕簾寒食之句  
和寧門內敞樓臺甲第初綠貴主開細草林花  
猶道遠內人遣自兩宮來

柳待制集右開元宮圖一卷本宋理宗女周  
漢國長公主第在杭州清湖橋西第成於景  
定辛酉公主實以是年下嫁駙馬都尉楊鎮  
初理宗無子度宗自福邸入正儲貳而謝后  
女獨有公主兩宮最所鍾愛有司希旨為治  
第帷帳供御下乘輿一等居半歲猶以遠掖  
庭更卜和寧門內東穿堦垣為直道內宮宮  
婢朝夕通饋問而是賜第在清湖者惟居楊  
氏母 句曲外史集題周漢國公主甲第圖  
詩主家樓觀蔚參差想是當年全盛時宮草

細分乘輦道林花深隱汎舟池瑤臺仙去塵  
生海甲帳神來風滿旗好在畫圖留勝蹟五  
雲長護鶴笙祠 咸淳臨安志崇恩寺惠順  
賈妃攢所周漢國端孝公主祔焉公主妃所  
出按此與柳說不同  
斫竹為棚翠動搖行都也學借元宵鮑燈珠網  
交垂處傀儡先裝獨自喬

清夜錄理宗淳祐三年京尹趙節齋預借元  
宵十二月十四日諸巷陌橋道皆編竹為張  
燈之計 武林舊事燈品鮑燈則鏤犀珀玳  
瑁以飾之珠子燈則以五色珠為網下垂流  
蘇 又云大小全棚傀儡有喬三教喬迎親  
喬師娘喬宅眷獨自喬之類 案前此徽宗  
有預借元宵事

清霽亭前宴賞時盼兒歌韻裊游絲官家不解  
閒愁悶休唱尋尋覓覓詞

李社陳盼兒傳庚申八月太子請兩殿幸本  
宮清霽亭賞芙蓉木樨韶部頭陳盼兒捧牙  
板歌尋尋覓覓一句上曰愁悶之詞非所宜  
聽可令陳藏一撰一即景快活聲聲慢 隨  
隱漫錄度宗令製桂詩秋桂庭前霽影涼萬  
重深翠護深黃恭迎兩殿臨清賞壽宇濃浮  
月殿香

水月仙人半面妝浴堂門外見徐孃郎君可是

無金屋畫取湖山近卧牀

蔣捷竹山詞傳巖隱木如武林納浴堂徐氏  
女子於客樓其歸也亦貯之所居樓上圖西  
湖景於壁詞有水月仙人院宇到處有西湖  
如鏡之句

捲地霜風葦盡枯淺斟低唱應開爐羅幃小釘  
金泥密紅入麒麟醉倩扶

夢梁錄十月朔貴家新裝暖閣低垂繡簾淺

斟低唱以應開爐之序 歸愚詞西江月咏  
開爐云風送丹楓卷地霜乾枯葦鳴溪獸爐  
重展向深閨紅入麒麟方熾翠箔低垂銀蒜  
羅幃小釘金泥笙歌送我玉東西誰管瑤華  
舞砌

何當不吠犬成羣日稅漁船扇寇氛因有宵衣  
難畫錦白麻紅燭救摛文

古杭襍記寶祐乙卯丁大全除司諫陳大方

除正言胡大昌除侍御天下目為三不吠之  
犬 清夜錄開慶元年丁大全當國江鄂二  
郡守劄例每一漁船日稅五千漁人不堪命  
遂渡北兵入寇鄂渚八月起復舊相吳履齋  
宅左揆直院洪魯齋芹草麻制云予方重宵  
衣之憂汝不以畫錦為樂入趨延英之召亟  
奉天章之咨

花樣連枝放杏桃街頭青紙價爭高袖中自具

南宮手波撇紛紛落剪刀

志雅堂襍鈔向舊都天街有翦諸色花樣者  
極精妙隨所欲而成又中瓦有俞敬之者每  
翦諸家書字皆專門其後忽有少年能衣袖  
中翦字及花朵之類更精於二人於是獨擅  
一時 誠齋集翦字吳道人翦李義山經年  
別遠公詩用青紙翦字作米元章體逼真

清湖河水貫城流載酒船通屋後頭移得癖齋

雞夫住吟詩破却一生愁

咸淳臨安志高九萬喜杜仲高移居清湖詩  
笑移雞夫入城居無復游從歎闊疎河水通  
船堪載酒桐陰近屋可修書飯香休憶辛田  
米羹美何慚丙穴魚我亦買山湖上任效芹  
時擬貢園蔬按杜旃仲高金華人有癖齋集  
夢梁錄清湖河自府治前淨因橋過閘轉  
北由渡子橋合湧金池水流至清湖橋衆安

橋與市河合

喬相無兒晚秉釣上梁文語亦酸辛見滄閣上  
聞簫鼓溼雪明燈作好春

齊東野語喬行簡嘉熙末自相位拜平章軍  
國重事年八表矣作上梁文云有園有沼聊  
為卒歲之謀無子無孫盡是他人之物 絕  
妙好詞翁元龍雪霽登吳山見滄閣聞城中  
簫鼓聲水龍吟詞有街聲暮起塵侵燈戶月

來舞地之句 按吳山石龜巷內寶奎寺宋  
相喬行簡故第後捨為寺有理宗書見滄二  
字勒之崖石此田叔禾西湖志所載不知捨  
宅由於無子且曾有見滄閣也翁詞全首佳  
絕想叔禾未寓目故不采入耳

西湖詩客習難除多挾中朝闊匾書笑殺壺山  
老居士竟勞秋壑構華居

瀛奎律髓注慶元嘉定以來乃有詩人為謁

客者干求一二要路之書謂之閱區副以詩  
篇動獲千萬緡如壺山宋謙父自遜一謁賈  
似道獲楮幣二十萬緡以造華居是也錢唐  
湖山此曹什伯為羣阮梅峰秀實林可山洪  
孫花翁季蕃高鞠礪九萬往往唯黃士大夫  
口吻可畏

簿錄平原故物空著庭竹石屬蘇公文山二十  
魁天下獨重邦人學二忠

鶴林玉露東坡謫儋耳道經南安於一寺壁  
間作叢竹醜石甚奇韓平原當國劄下本軍  
取之守臣以紙糊壁全堵脫而龕之以獻平  
原置之閱古堂中既敗籍其家壁入祕書省  
著作之庭 偃曝談餘寶祐年登科錄第一  
甲第一名文天祥字宋瑞小名雲孫小字從  
龍年二十 文山集道山堂瞻御書詩著庭  
更有邦人筆稽首承休學二忠自注云著作



之庭乃胡忠簡公書周文忠公立

閣門贊拜盡宮嬪花外流鶯誤達晨春夏秋冬  
書月日釀成別是一家春

隨隱漫錄會寧郡夫人昭儀王秋兒順安俞  
修容新興胡美人永陽朱梅兒資陽朱春兒  
高安朱夏兒南平朱端兒東陽周冬兒順政  
石潤兒高平周賽兒通化聞潤兒潯陽陳宜  
兒胡安化沈咸寧黃新平皆上所幸也初東

宮以春夏秋冬四夫人直書閣為最親王能  
屬文為尤親王非以色事主度皇亦悅德者  
也 通鑑輯略度宗既立耽於酒色故事嬪  
妾進御晨詣閣門謝恩主者書其月日及帝  
之初一日謝恩者三十餘人 武林舊事亭  
名別是一家春度宗初初或謂非佳識也未  
幾果驗

六和寺塙俯江潯萬佛千燈出綠陰喜得神童

能偶句青衫嘗從翠華臨

兩浙名賢錄柴蒙亭長臺人以神童聞端平  
二年初赴省從幸六和寺上指堦云一堦七  
層八面萬佛千燈蒙亭應聲云孤舟雙槳片  
帆五湖四海

弈棋待詔總新僉方罨文楸巧藝兼何似宮中  
玉棋子似將漏水逐時添

武林舊事恭待詔鄭日新等 徐文長別記

度宗朝宮中有十二玉棊子上有十二時字  
置盆水中逐時浮出不差晷刻

葯洲遺墨已無倫壑相蘭亭更絕塵正是樊襄  
多事日只留勇爵付斯人

志雅堂襍鈔廖瑩中羣玉號葯洲刻陳簡齋  
姜堯章任希逸盧柳南四家遺墨十三卷賈  
師憲命王用和翻開定武蘭亭三年而成酬  
以勇爵幾與定本相亂 芸窓詞張榘作也

中多壽賈相詞稱為壑相

畫扇宸書進壽筵珠衣玉笏禮難全須從福邸  
投虹處記取銅華洗日年

淵穎集宋度宗御書福王慶壽宮扇詩漢家  
諸侯奉大統會稽故邸王封重歲周甲子壽  
筵開賓客滿堂宮扇來掖庭嬪御侍圖史聖  
筆逡巡鸞鳳似清風外撲龍阜花明月中涵  
鏡湖水南國為家日已微禮官考禮是耶非

前殿君臣朝玉笏後宮父子曳珠衣 夢窓

甲藁宴清都壽榮王夫人詞云長虹夢入仙  
懷便洗日銅華翠渚 癸辛襍識福王次子

黃氏所生即紹陵也黃氏封隆國育聖夫人

按度宗父福王與芮為理宗之弟皆榮王  
子也理宗無子度宗入繼大統田志云度宗  
理宗同母弟也訛甚

閩帥才長未足多稱心無賴轉橫波閨燈寶錄

風流筆能殺漳南賈八哥

三朝野史賈似道閫才有餘相才不足又云以元老之尊眉與賤娼潘稱心褻狎 姑蘇志鄭虎臣殺賈似道者吳人也其家居第甚盛號鄭半州四時飲饌各有品目著集珍日用一卷元夕閨燈寶錄一卷 夏基西湖志張淑芳錢唐西山樵家女有才色理宗時選入宮賈相匿之為妾

憶否琴邊奉至尊文君髻影伴黃昏斧柯片石香痕濕留與遺民一斷魂

湖山類藁汪水雲留燕臺一紀束書告行一時同人賦詩為別陳貞淑詩云天山雪子落紛紛醉擁貂裘坐夜分明日馬頭南地去琴邊應是有文君 改蟲齋襍疏水雲宋末以善琴供奉國亡隨三宮入燕久之請為黃冠南歸藏有賜硯背刻天錫永寶四字八分書

右刻水雲二篆字左刻楷書絕句云斧柯片  
石伴幽閒堪與遺民共號頑試憶當年承賜  
字墨痕如淚盡成斑

水南半隱傍花宮猶是承平處士風一卷十空  
經在否有兒不愧鞠山翁

心史鄭思肖父鞠山翁諱起淳祐間居西湖  
有水南半隱在長橋作水南半隱記 寶顏  
堂筆記鄭所南嘗著大無工十空經一卷空

字去工而加十寓為大宋造語奇澁自書其  
後云當有巨眼識之

問安兵已入宮時救日空教羽檄移麗景只今  
傳樂府松風吹冷浴龍池

吟嚙集咏呂文煥詩只將六載無消息太后  
宮中一問安注云大兵至臨安屯皋亭山文  
煥與范文虎九騎入城至大內謁宋太皇太  
后 三朝野史大兵渡江賈似道即出檄書

布告中外有云救日之弓救月之矢便直指  
於旌旗如礪之山如帶之河尚永堅於盟誓  
思古堂集臯亭山崇先寺浴龍池宋高宗  
嘗洗手因名 案西湖十景始自南宋瞿宗  
吉稱周草窗賦木蘭花慢張子成賦應天長  
皆晚宋名作今草窗十景詞已軼不傳獨張  
子成陳君仲所作具在各存五首以見勝槩  
其外南渡詞人題咏行都者亦摘句附卷尾

日湖漁唱蘇堤春曉調探春云上苑烏啼  
中洲鷺起疎鐘纔度雲窈篆冷香篝燈微塵  
幌殘夢猶吟芳草搔首捲簾看認何處六橋  
烟柳翠繞繞繞艤西冷趁取過湖人少掠水風  
花繚繞還暗憶年時旗亭歌酒隱約春聲鈿  
車寶勒次第鳳城開了惟有踏青心縱蚤起  
不嫌寒峭畫闌閒立東風舊紅誰掃 平湖  
秋月調秋霽云千頃玻璃送遠目斜陽漸下

唐詩卷六  
林間題葉人歸采菱舟散望中水天一色碾  
空桂魄玉繩低轉雲無迹有素鷗閒伴夜深  
呼棹過環碧相思萬里頓隔嬋媛幾回瑤臺  
同駐鸞翼對西風憑誰問取人間那得有今  
夕應笑廣寒宮殿窄露冷烟澹還看數點殘  
星兩行新雁倚樓橫笛 斷橋殘雪調百字  
令云凝雲沍曉正縈花纔積荻絮初殘華表  
翩躚何處鶴愛吟人正孤山東解苔鋪水融

莎甃誰凭玉勾闌茸衫氈帽冷香吹上吟鞭  
將次柳際瓊消梅邊粉瘦添做十分寒閒踏  
輕漸來薦鞠半潭新漲微瀾水北峰巒城陰  
樓觀留向月中看巘雲深處好風飛下晴湍  
雷峰落照調掃花遊云數峰醮碧記載酒  
紺園柳塘花塢最堪避暑愛蓮香送晚翠嬌  
紅嫵款乃菱歌乍起蘭橈競舉日斜處望孤  
鶯斷霞初下芳杜遙想山寺古看倒影金輪

百字令  
卷六  
三  
逝光朱戶暝煙帶樹有投林鷺宿凭樓僧語  
可惜流年付與朝鐘暮鼓謾凝竚步長橋月  
明歸去 花港觀魚調鷲山溪云春波浮淥  
小隱桃溪路煙雨正林塘翠不礙錦鱗來去  
芹香藻膩偏愛鯉花肥簷影下柳陰中逐浪  
吹萍絮宮溝泉滑怕有題紅句釣餌已忘機  
都付與人間兒女濠梁興在鷗鷺笑人癡三  
湘夢五湖心雲水蒼茫處 梅淵詞麴院風

荷調應天長云換橋渡舫添柳護堤坡仙舊  
欠今續四面水窓如染香波釀春麴田田處  
成暗綠正萬羽背風斜轟亂鷗去不信雙鴛  
午睡猶熟還記湧金樓共撫雕闌低度浣紗  
曲自與故人輕別榮枯換涼燠亭亭影驚艷  
目忍到手又成輕觸悄無語獨撚花鬚心事  
曾卜 南屏晚鐘前調云翠屏對晚烏榜占  
隄鐘聲又歛春色幾度半空敲月山南應山



南唐書事詩 卷六  
北歡娛地空浪迹謾記省五更聞得洞天曉  
夾柳橋疎穩縱香勒前度湧金樓嘯傲東風  
鷗鷺半相識暗數院僧歸盡長虹卧深碧花  
閒恨猶記憶正素手暗裁輕拆夜深後不道  
人來燈細窓隙 柳浪聞鶯前調云翠迷倦  
舞紅駐老妝流鶯怕與春別過了禁烟寒食  
東風顫環鐵遊人恨柔帶結更喚醒羽喉宮  
舌畫船遠不認綿蠻晚棹空歌爭似湧金樓

燕燕歸來鈎轉暮簾揭對語畫梁消息香泥  
砌花屑昆明事休更說費夢繞建章宮闕曉  
啼處穩繫金狨雙鐙籠月 三潭印月前調  
云桂輪逼彩菱沼漾金潛虬暗動鮫室水路  
乍疑霜雪明眸洗春色年時事還記憶對萬  
頃葑痕龜坼舊遊處不認三潭此際曾識今  
度湧金樓素練鶯窓頻照庾侯席自與影娥  
人約移舟弄空碧宵風悄籤漏滴蚤未許睡

南齊書 卷六  
三十一  
魔相寬有時恨月被雲妨天也拚得 兩峯  
插雲前調云暮屏翠冷秋樹赭疎雙峯起南  
北好與霽天相接浮圖現西極苔蘚處雲共  
碧謾費盡少年遊履故鄉遠一望空遙水斷  
烟隔閒凭湧金樓瀲灩波心如洗夢淹筆喚  
起睡龍蒼角盤空壯商邑西湖路成倦客待  
倩寫素縑千尺便歸去酒底花邊猶自看得  
書舟雅詞臨安晚秋調滿庭芳云南月驚

烏西風破雁又是秋滿平湖采蓮人盡寒色  
戰菰蒲 坦菴長短句中元柳洲作調酌江  
月云一葉扁舟數聲柔櫓陡覺紅塵遠六橋  
三壩恍然圖畫中見 嬾窟詞西湖調風入  
松云入扇柳風殘酒點衣花雨斜陽 介菴  
詞西湖調謁金門云柳外晚來船集波底夕  
陽紅溼 月溪集錢唐記恨調水龍吟云晚  
來江濶潮平越船吳榜催人去 東澤綺語

借錢唐北關舟中調月底修簫譜云小小船  
窓香雪照尊俎 隨如百咏西湖餞春調江  
神子云柳外歸鴉點點是離愁 空同詞湖  
上調菩薩蠻云駐馬綠楊陰酒樓三月春  
碧山樂府次周公謹故京送別調三姝媚云  
今夜山高江淺又月落帆空酒醒人遠彩袖  
烏絲解愁人惟有斷歌幽婉 梅屋集漁浦  
有感調綺羅香云斜照帶一縷新愁盡分付

暮潮歸去 江村遺藁半閑堂賦春雪調玲  
瓏玉云風窓浙籟夢驚錦帳春嬌是處貂裘  
透暖任尊前回舞紅倦柔腰 友古詞西湖  
調浣溪紗云虛掉玉釵驚翡翠緩移蘭棹趁  
鴛鴦 石屏詞寄豐宅之調賀新郎云錢唐  
風月西湖柳渡江來百年機會從前未有  
竹齋詩餘湖上調鵲橋仙云黃花似鈿芙蓉  
如面秋事淒然向晚 于湖詞元夕調憶秦

古今事蹟 卷六  
娥云多情又見珠簾揭游人不放笙歌歇笙  
歌歇輕烟曉散帝城宮闕 和清正詞調西  
河云都會地東南王氣須記龍盤鳳舞到錢  
唐瑞烟四起畫圖彩筆寫西湖波光溶漾無  
際 花草粹編羅志仁賦四聖觀調霓裳中  
序第一云記舊日曾遊翠輦青紅如寫便面  
帳下鵲池荒放鶴人遠

南宋禱事詩

卷七一百首

仁和趙信撰

帝都繡錯列山川警蹕初聞鳳詔傳從此六飛  
臨幸後七朝都屬太平年

葛澧帝都賦序云錢唐據東南之都會號天  
下繁盛之樂土山川之秀丽井邑之浩穰人  
物之豐景槩之美考按圖籍見於前人之稱  
述備矣因摭其大略總而賦之 淵鑑類函



古身補遺言 卷十  
宋高宗定都臨安詔曰昔在光武之興雖定都於洛而車駕往返見於前史者非一用能奮揚威靈進行天討上繼隆漢朕甚慕之朕荷祖宗之休克紹大統夙夜危懼不常厥居比者巡幸建康撫綏淮甸既已申問邊圉獎率六軍是故復還臨安內修政事繕治甲兵以定基業非厭雨露之苦而圖宮室之安也遂定都故今以臨安府為行在所 朝野禱

記高宗六飛至錢唐觀表裏江湖之勝嘆曰吾舍此何適呂頤浩上言曰金人專以聖躬為定今駐蹕錢唐足避其鋒矣帝意遂決人皆以偏安責秦檜不知實頤浩成之也艮山門外曉風尖玉輦低遮錦軟簾佳處但從東麓望一方新綠畫春奩

宋史紹興十二年玉輅成前有橫軾後垂錦軟簾 歲寒堂集艮山東麓南渡宸遊看新

南齊書 卷七  
二  
綠之處

青燈如豆夜書開蒸餅嘗教市得來著就公餘  
詞一卷落花紫草憶簫臺

北窻炙輒云姚進道在太學日每夜必市兩  
蒸餅未嘗食明日輒以飼齋僕同舍皆怪之  
子韶問曰公所市蒸餅不食徒以飼僕何耶  
進道曰固也某來時老母戒某之學中夜間  
饑則無所得食宜以蒸餅為備某雖未嘗饑

然不敢違老母之戒也市之如初進道名述  
堯華亭人所著有簫臺公餘詞詞綜作錢唐  
人名見咸淳臨安志進士表

電窻窈窕燭花明蓮漏傳籤已四更展卷不知  
雙目痛親持玉管賜佳名

揮塵後錄高宗諭宰臣云王某所進兵制甚  
佳朕連夕觀為目痛賜其書名曰樞庭備檢  
玉輦當奉幸翠岑親書小字是泥金紫駝尼裏

南齊書 卷七  
三  
擣菹錦貝葉傳來盡梵音

湖山勝槩高宗嘗幸薦福寺吳太后手書金剛經有楊太后跋及高宗御書心經並刻石藏下天竺靈山塏下 齊東野語思陵妙悟八法訪求法書名畫故紹興內府所藏不減宣和其裝標裁制各有紫駝尼裏擣菹錦標清賞堂前按管絃至尊偏喜杏花天教坊嘌唱無由入供奉空傳何總憐

南宋故都宮殿記翠寒堂萼綠華堂環秀堂清賞堂 齊東野語太皇太后知音極喜歌木筮人者以歌杏花天遂補教坊都管 藝流供奉志嘌唱賺色何總憐陳伴伴施二娘兩回斤斧赦蒼官淮海新詩動玉鸞從此月波亭上望綠陰仍作畫屏看

靈隱遺事靈隱寺僧元肇號淮海寺有古松大數十圍與月波亭相對史彌遠遣人伐松



淮海作詩云大夫去作棟梁材無復清陰覆  
綠苔惆悵月波亭上望夜深惟有鶴歸來  
山房隨筆穆陵在御閣貴妃父良臣起香火  
功德院欲於靈竺下伐松供屋材淮海又作  
詩曰不為栽松種茯苓祇緣山色四時青老  
僧未忍移松去留與西湖作畫屏詩徹於上  
遂命勿伐

佳識昭然可不疑歡聲父老望旌旗仁和門外  
江東道馬首聞呼趙不衰  
揮塵後錄高宗自建康避入浙東至蕭山有

列拜於道側者揭其前曰宗室趙不衰上大  
喜曰符兆如此吾無憂矣 是時選御舟篙  
工有趙立畢勝之識

黃閣優閒塞責餘千函日攬四方書緘題併字  
如忘却遠道空勞使者車

宋史紀事本末陳自強為相言路阨塞有泛

論君德時事皆取其陳熟緩慢畧無櫻拂者  
言之或問之則愧謝曰聊以塞責耳 又陳  
自強貪鄙四方致書餽必題其緘云某物若  
干併獻凡書題無併字則不開

內使龍茶宣賜回班荆館為使臣開湖山景物  
家鄉地幾度迎風喚筆來

武林舊事北使到闕賜御筵於班荆館傳宣  
撫問賜龍茶一斤銀合三十兩 入蜀記班

荆館者北使宿頓及賜燕之地距臨安三十  
六里 程史施宜生閩人也有僧相之曰面  
有顴骨可公可卿子身之毛皆逆上且覆腕  
然則必有合乎此而後可貴也龜山僧介之  
北不數季仕至禮部尚書時盟好方堅而謀  
者傳彼中調兵之事無虛日金來賀正旦宜  
生為使至天竺語館使張燾曰今日北風甚  
勁又取几間筆扣之曰筆來筆來於是始大

警

三顧頻煩運幄籌令公帳下領兜鍪笑他帶汁  
南奔日還憶軍中借木牛

龍洲詞贈殿帥郭杲云細柳營開團花袖窄  
人指汾陽郭令公案郭杲侂冑黨開邊時統  
兵北伐者 宋稗類鈔嘉泰開禧間郭俛位  
殿巖自謂臥龍復生酒後輒詠三顧頻煩兩  
朝開濟陳景俊為軍漕讌之曰木牛流馬則

以煩公既潰自度不復振對客泣時彭法傳  
師在坐曰此帶汁諸葛也

雲龕居士老詞人嗙得官梅托興新不忿開遲  
怨風笛酒邊記唱漢宮春

小學紺珠南渡三詞人李邴汪藻樓鑰也

能改齋漫錄李漢老建炎末自簽書樞密遷  
知院二三月而罷為梅詩托意云綿霜歷雪  
忿開遲風笛無情抵死吹鼎實未成心尚苦

不甘桃李傍疎籬 玉照新志漢老少日作  
漢宮春咏梅膾炙人口所謂問玉堂何似茅  
舍疎籬是也政和中王黼為相忽招至東閣  
開宴出其家姬十數人酒半唱是詞數日有  
館閣之命 案邴號雲龕居士任城人紹興  
初參知政事卒謚文敏  
小步宮門日影殘青青楊柳望中寒行朝臨遍  
蘭亭石得似先皇墨未乾

蘭亭考紹興初遣中貴衛茂實交河南地界  
是時講好之初使人往來中都宮闕尚容觀  
瞻衛因與同事趙彥恬遍歷其間至一閣壁  
皮上有小匣徽皇御筆題云真定武蘭亭整  
有十軸遂置其匣袖之以歸使回各藏其一  
餘皆上之九重 珍珠船紹興乙未六月思  
陵常臨禊序賜刻劉光世子堯仁進之孝宗  
親洒宸翰於後

南齊書事記 卷十  
敢矜紅旆笑儒酸綠鬢青衫蚤聽宣擬得策題  
學士院內批左藏賜餐錢

玉堂襍紀試文多在學士院內侍省差官一  
員充監門前一日學士宿院進策題候內批  
依次早乃引試支左藏庫錢三十緡充餐錢  
周必大以秘書少監寓直翰苑發策嘗賦詩  
寄程同年云當年給札踏金鑿重到依然九  
月寒學士策詢學士策秘書官試秘書官自

憐綠鬢非前度尚喜青衫總一般寄語浙東  
程閣老莫矜紅旆笑儒酸

牡丹秋影曉霏微自賞湖光近釣磯還與蘇隄  
鷗鷺約不將五組易蓑衣

江湖長翁集詩春光陸續委東流看到湖邊  
安石榴更與蘇隄鷗鷺約辦舟來賞牡丹秋  
自注俗目芙蓉為秋牡丹 雲莊四六餘話  
周益公謝宮祠表曰晨趨鳳闕縮五組之光

華夕侶漁舟披一蓑之藍縷

降封麻卷閤門通敷狀親承鎖院中僂直自來  
知制誥詞頭日日看屏風

玉堂襍紀內封名色不一僂直時或未詳其  
體院吏必以片紙錄舊作於前謂之屏風兒  
又凡鎖院或親被旨或受敷狀即闕閤門  
閤門即報御史赴文德殿聽麻卷自內出  
宣贊大聲擿首尾詞及塔位姓名下數句并

所除之官而讀之不盡宣也

莊嚴雕飾紙衣僧蓼葉芹花滿鉢稜一自翠華  
行幸後袈裟金縷伴禪燈

四朝聞見錄觀音高五丈本日本國僧轉智  
所雕轉智不御煙火止食芹蓼不衣絲綿常  
服紙衣號紙衣和尚高宗僭憲聖嘗幸觀音  
所憲聖製金縷衣以賜之及挂體僅至其半  
遂再製衣以賜 案五丈觀音在龍山勝相

寺

紹興誰念舊封疆黃閣歸來錢滿囊愛殺當時  
髯吏部裝成千載墨猶香

宋稗類鈔渡江後呂元直作相堂廚每廳日  
食四千至秦會之當國每食折四十餘千於  
是始不會食 又胡忠簡作字勁挺孝宗曰  
卿寫字宛如卿為人得卿紹興戊午所上封  
事真跡太上與朕玩久之太上曰畱為後代

式其後為檜批抹汙漬者多朕啓太上令工  
逐行裁去裝褙之矣 二老堂詩話胡邦衡  
多髯初除吏部郎官或以髯吏部為戲  
長日空教掩竹扉雨泥融淨燕初飛劇憐春盡  
無憂館乙乙楊花欺客衣

朝天集都下無憂館小樓春盡旅懷二首病  
眼逢書不敢開春泥謝客亦無來更無短計  
消長日且遶闌干一百回不關老去願春遲

只恨春歸我未歸最是楊花欺客子向人乙  
乙作西飛

延風揖月鎮從容西掖揮豪不再逢贏得竹絲  
胎髮樣即今同受管城封

王楮集試廬陵賀發竹絲筆詩此君素以直  
節名延風揖月標韻清何人心匠出天巧縷  
折毫分勻且輕居然束縛復其始即墨紆朱  
封管城世門官爵豈必計且幸一家同汗青

太平清話宋時有雞心筆檀心筆小兒胎  
髮筆猩猩毛筆鼠尾筆狼毫筆 咸淳臨安

志張彥實掌制話楊原仲並居西掖話詔多  
張與之潤色閒戲成筆一絕云包羞魯借虎  
皮蒙筆陣仍推兔作鋒未用吹毛強分別即  
今同受管城封原仲以為誚已愬於秦檜罷  
為宮祠

蕊宮宣喚按新歌爭捲珠簾踏舞鞦韆春到十三



南宋雜事詩 卷十  
門裏路內官齊著縷金羅

楊太后宮詞新翻歌譜甚能奇  
宣索蕊宮入管吹又聞道蕊宮三十六美人爭為捲珠簾  
心史宋行在十三門 談薈宋時宮人多  
以麝香色縷金羅為衣裙

嬾向橋邊問得仙一蓬秋雪晚漁天  
歸來迷却蕪葭里暫就僧房借榻眠

西溪梵隱志紹興間有老翁自言姓朱不火  
食能前知品度蒼然坐橋而化故曰得仙

又宋南障湖俗呼河水亦名渦水又曰蕪葭  
深處沙岸縈迴秋深荻花如雪故其地又名  
秋雪 隨隱漫錄度宗御製晚望詩鷗鷺歸  
烟渚秋江挾晚晴老漁閑艤艇坐待月華生  
新聲歌罷半含顰兜裏花枝別樣春一盞鶴飛  
消渴露軟屏風底笑夫人

南宋相眼周子充之侍妾曰芸香姓孫氏錢

唐人淳靜謹畏精於女工頗能為新聲事公於行在所時年十七 夢梁錄有一等貧家父母兄弟所倚者惟色可取而奩具茫然議親者以首飾衣帛加以諸物送往謂之兜裏說畧周益公有鶴飛盞注酒則鶴飛乾則滅韋居聽輿周益公夫人妒有媵公盼之夫人縻之庭公過之當暑媵以渴告公以熟水酌之夫人窺於屏曰好个相公為婢取水公笑

曰獨不見建義井者乎

只管催歸歸計無杜鵑早已叫西湖如何月夜天街上撥盡琵琶唱鷓鴣

明詩綜昔宋南渡李御史粹伯菩薩蠻詞云杜鵑只管催歸去知渠教我歸何處 蒙泉詩彙三月十六日西湖聞杜鵑詩云辟穀未能那廢食買山所欲尚無錢 咸淳臨安志乾道四年臣僚言今都人靜夜十百羣吹鷓鴣

鳩撥琵琶使一人黑衣而舞衆人拍手和之  
道路聚觀不可不懲詔從之

一枝芍藥倚東風讀得詩書正後宮縱有迎康  
天賜兆都緣貴相產重瞳

談薈高宗皇后吳氏父吳近常夢至一亭曰  
迎康旁值芍藥一枝獨放一花花下白羊一  
隻后以乙未生高宗為康王時選入宮 朝  
野襍記吳皇后京師人也年十四入宮少長

封新興郡夫人上自海道還進才人又進婉  
儀時邢后在朔庭後宮惟后與婉儀為上列  
而后讀書萬卷翰墨絕人自是寵遇日至顯  
仁太后来歸明年遂正位宮壺 南宋相眼  
洪邁云顯仁本會稽人紹聖蘇丞相頌致仕  
居丹陽有老婢韋出家為尼嘗給事蘇丞相  
其妹即顯仁也初攜登頌榻通夕遺溺不已  
頌曰此甚貴非此能住宜攜以入京會哲宗

擇室女二十人分賜諸王顯仁在選入端王  
宮暨即位才一幸而生太上 弘簡錄韋太  
后開封人崇寧中入宮為侍御得幸夢神投  
胎遂生高宗

沙岸波光積翠鋪風標公子下菰蒲不知春曉  
西湖上染出南山黛色無

清河書画舫劉松年西湖春曉圖 高宗御  
題劉松年畫紈扇詩南山晴翠入波光一派

溪聲繞路長最愛早春沙岸暖袞風輕浪拍  
鴛央荷葉如錢三月時幅巾藜杖一追隨邇  
來勝事知多少惟有風標公子知

帝姬金屋自風流奩具封章孰與儔一種貧家  
深巷女落花滿地不知愁

却埽篇政和間采周之王姬之稱而改公主  
曰帝姬郡主曰宗姬縣主曰族姬公主之號  
建炎初復之 朝野禱紀故事宗女適人皆

內侍與有司主之以昭穆益疎乃給奩具然  
有司不時給宗女貧不能行多自稱不願適  
者 又凡宗室封女之制使相女封淑人節  
度使碩人觀察使令人等身亡皆任子孫一  
人

不見文章立墓門牧牛亭上泣奸魂東窗事犯  
須臾事夜半猶然憶子孫

佩韋齋集秦檜為相怙權恃援沮復仇之議

誅殺勲舊誣陷忠良死之日詔撰神道碑士  
大夫無肯執筆者 山堂肆考檜墓在建康  
墓上豐碑屹立不鏹一字蓋當時士大夫鄙  
其為人兼畏物議故不敢立神道碑 野客  
叢書金陵牧牛亭秦檜丘壠在焉有移忠旌  
忠兩寺相去五里金碧相照楊誠齋嘗題詩  
於壁 雲邁淡墨岳侯之獄以檜妻王氏一  
言而死有押衙何立者檜命往東南第一峰

勾幹恍惚人引至陰司見夫人帶枷備刑楚  
毒難堪語立曰告相公東窗事發矣押衙復  
命言其事檜憂駭數日亦死 按丘氏遺珠  
有方士伏章見檜與万俟高俱荷鉄枷檜屬  
方士曰可煩傳語夫人東窗事發矣此說與  
此不同 鴻慶居士集載秦檜之跋後山集  
後有云病起聞雞唱不寢書此以付墳堪  
按墳堪秦檜二孫也

松柏青青繞券臺麪碁彩段紙錢堆拜墳兒女  
悲霜露莫向菩提拭淚來

乾淳歲時記祀先例用時果彩段麪碁 程  
氏遺書拜墳則十月一日拜之感霜露也寒  
食又從常禮祭之飲食則稱家有無 滄洲  
集菩提寺詩一畝方塘幾劫灰哭聲未了笑  
聲催六橋煙柳相逢處半是菩提拭淚來自  
註菩提寺臨安人火葬之地 按寺在錢唐

南定補遺言 卷七 十一  
門外令廢

紫花羅服稱風流花散東風暖氣浮莫使蚤梅欺晚杏一般春色有清愁

淵鑑類函宋高宗紹興二年賜吳益紫花羅公服 林下詞選梅嬌杏倩俱宋吳七郡王姬工詞翰常賦詞相謔梅嘲杏滿庭芳云杏花何太晚遲疑不發等待春深杏嘲梅滿庭芳云梅花何太早蕭疎骨肉葉密花稀

菱角香薰紫繡裾瑤津小艇採芙蓉花前坐賭長歌罷贏得寒光水玉魚

稗史彙編慶元吳監稅菱角香乃不假印手捏而成 乾淳起居注淳熙六年三月太上太后並乘步輦官裏乘馬遍遊園中再至瑤津西軒入御筵 談薈南宋宮人有寒光水玉魚係楊太真潤肺物

湖上清遊佛子家粉雲酥雨壓楊花今朝妙出

南定有言 卷一  
春風手六一泉烹雙井茶

清苑齋集孤山寒食詩二月芳菲在水邊旅  
人消困總隨緣晴舒蜨翅初勻粉雨壓楊花  
未放綿 朝天續集以六一泉煮雙井茶中  
有句云細叅六一泉中味故有涪翁句子香  
重門鐵葉鎖金環只應鈎春柳幾彎如此江山  
亭在否精能圖上看名山

吳越備史杭城凡七十里門凡十皆金鋪鉄  
葉用以禦侮諸門皆有星橋惟艮山門獨無  
無懷小集湖上觀柳偶記龍泉先生句春  
柳一絲之句感而有述云斷槎無葉又無枝  
得似勾春柳一絲不是畫船棲泊處白鷗飛  
下立多時 七修類彙杭城舊有如此江山  
亭在吳山天望觀此乃宋遺民有為而作也

清河書畫舫王維精能圖在紹興祕府前  
有思陵御題乾卦紹興小壘按精能者名山



南齊書  
卷之  
三  
之目也

宜雨亭邊趁晚陰  
春風流水海棠林  
酒闌睡醒圍千葉  
人在紅雲無處尋

武林舊事張功甫  
衆妙峰山內有宜雨亭種千葉海棠二十株夾流水誠齋集觀張公甫園中海棠有約齋妙出春風手人在中央花四旁

驅蝗無法老農嗟  
穰稷風香稻試花  
賽社不須祠莽將  
滿塍新水聽鳴蛙

脚氣集朝廷禁捕蛙以其能食蝗也 居易

錄南宋劉漫塘宰為蝗神劉金壇人有專祠往祀之則蝗不為災俗呼莽將

錦塢山中花滿川  
雲煙四壁畫前賢  
遊人不盡傷今昔  
遙望孤山放鶴仙

咸淳臨安志建炎初始建錦塢菴紹興二十一年額治平寺有閣三間面揖孤山扁曰煙

南齊書 卷十  
雲四壁舊畫古賢像今尚存李鄴侯白文公  
趙清獻張忠定范文正蘇文忠諸公像  
芸籤玉牒落枯蟬祕省龍章品再三鈿匣金題  
誰拾得盡隨花鳥散江南

松隱集新建祕書省呈李祕監詩道山賢範  
久推藏聖德重興接耿光招隱稍來周俊造  
紬書行見漢天章挂簷玉榜昭新渥插架芸  
籤識舊香喜見諸儒在天祿嘉謨應欲贊時

康 筆叢宋淳熙中聚書至四萬四千八十  
六卷陳騃等四庫書目後屢增益至五萬九  
千餘卷 中興館閣續錄南渡後祕閣所藏  
徽宗御題畫三十一軸 又圖畫一百八十  
七軸御府續行降付并舊藏九百一十一軸嘉  
定三年并用都堂印仍於畫背用祕書省印  
又名賢墨蹟一百二十六軸一冊續行降付  
八十九軸

南齊書 卷七  
竹廊風細裊茶煙御餅龍文宮女煎昨夜外臣  
貢新茗金奩拜賜紫雲鮮

瀛奎律髓梅聖俞建溪新茗詩有云粟粒烹  
甌起龍文御餅嘉註南渡後宮禁嬪御日所  
飲用即此品 姚氏殘語紹興進茶自高文  
虎始 洺水集茶詞歲貢來從玉壘天恩拜  
賜金奩春風一朶紫雲鮮明月輕浮盞面想  
見清都絳闕雍容多少神仙歸來滿袖玉爐

煙願侍年年天宴

莫把杭州作汴州山河牛角為誰謀西湖水石  
無情況縱少蘆花也是秋

夷堅志金人南侵高宗奔杭有人題詩吳山  
子胥祠云遷杭不已思閩廣牛角山河日入  
尖 四朝聞見錄高宗六龍未知所駐觀錢  
唐表裏湖山之勝嘆曰吾舍是何適 弘簡  
錄黃耆嘗從郭雍朱熹學熹深期之累官大

理寺簿憤時不樂間行西湖慨然嘆曰我昔在南北山一水一石無不品題今無復情況何耶 稊米集湖亭之勝大似江上但無蘆葦二月二十日移植數千本詩云大年著色山前雨摩詰無聲句裏秋已是湖山無限好更栽蘆葦伴輕鷗

晝長紅紫競含芳繡錦亭邊闌草忙妃主一時齊掩口輸他內侍嚼生薑

乾淳歲時記二月一日中和節排挑菜宴預備花斛上植生菜薺花諸品以金篋挑之賞則珠玉金銀罰則唵詩念佛飲冷水吃生薑以資戲笑 故都宮殿考有綉錦亭

七插高鬟未利花茜鷄螭雁巧筵奢樓中妝點嬌兒女荷葉新裁半臂紗

乾淳歲時記茉莉初出之時其價甚穹婦人簇帶多至七插所值數十券不過供一餉之

娛耳 又乞巧小兒女多衣荷葉半臂設茜  
鷄蠟印鳧雁水禽之類

試罷尋春上翠樓雙鬟半蹕聽歌喉燭花紅篆  
揮毫處從此佳人喚狀頭

夷堅志洪邁試詞科出院同試者五人至抱  
劍街娼孫小九家置酒於小樓而燭結花若  
連珠孫曰今夕燭花呈祥其為登第可證願  
各賦一詞洪調臨江仙有云釵頭小篆燭花

紅直須將喜事來報主人翁桂月十分春正  
半廣寒宮殿匆匆姮娥相坐曲欄東雲梯知  
不遠平步躡東風果奏名得第

手把青芝說舊恩雪香亭畔掩啼痕宮花零落  
收銀鑰卸下歌妝出禁門

談薈南宋宮人有青芝雙虬如意是六朝宮  
人所遺 禁扁有花光亭雪香亭 雲泉詩

集寄行宮監門王以道詩云玉鉤簾外前朝

柳鬪鴨闌邊小艷葩莫道君王不曾問好叔  
銀鑰護宮花 朝野襍記李王二才人俱明  
艷高宗愛之及上賓憲聖每見之常感愴孝  
宗聞之特許自便

空王不管有情痴一晌貪歡醉酒卮搵盡深閨  
兒女淚玉釵何處寄相思

玉照新志張安國春日偕友游西湖至普安  
寺於窗戶間得玉釵半股青蚨半文想是遊

人歡洽所分授偶遺之者各賦詩以紀其事  
王明清詩云淒涼寶鈿初分際愁絕清光欲  
破時

紅燈綠幕近黃昏幾醉藍橋風月樽新樣杏花  
高髻子衣香綵繚進歡門

武林舊事元夕諸妓夜賣各戴杏花冠兒危  
坐花架又諸色酒名吳府藍橋風月 夢梁  
錄食店門首以枋木及花樣皆結縛如山棚

南定府志 卷七  
窗牖皆朱綠五綵裝飾謂之歡門

思陵八法果堪珍絹本親披草洛神閱古堂中  
十二帖笑他婢又學夫人

清河書畫舫思陵洛神賦絹本大行艸書後  
署德壽宮書 王照新志米元章帖十二冊  
各以其類為冊如手簡家書詩文各分類聞  
是韓侂胄故物中間韓魏公家園池詩各有  
閱古珍玩大印其後歸史衛王府 雪舟勝

語婢之婢世謂之重儻羊欣書似婢學夫人  
米芾學欣書故高宗謂米字為重儻 思陵  
八法事見前 明文徵聶大年高宗遺墨詩  
摩挲五十四驪珠絕勝滕王蛟蝶圖惆悵彩  
雲飛不盡至今遺恨滿西湖

拘沒皆歸南庫藏頒還御筆煥天章宮亭西畔  
悲家市瓦屋江州是故鄉

金陀續編本部據江州申見在岳飛田產屋

南宋雜言 卷一  
宇等有人承佃田三頃一畝地九十一畝水  
磨二所廊房艸瓦屋共一百五十一間岳家  
市見今只存六十間地基屋宇共二百九十  
間奉聖旨令給還 又前後被受御筆手詔  
無慮數百章不幸為權臣厚誣悉被拘沒今  
聞見在左藏南庫架閣比蒙詔太常議謚而  
本家別無文字可以稽考欲望朝廷給付本  
家參考庶使子孫久遠珍藏奉聖旨令左藏

南庫搜檢給還

王楮集初還故居詩元是

廬山莫逆交官亭西畔著衡茅盟鷗似怯經  
新浪怨鶴還知宿故巢一沼種蓮衣可製萬  
竿脫籜杖輕敲不須海若猶然笑乞與杯堂  
樂芥坳

台星朗耀紫垣中賢牧堂前像已工袞冕師王  
生意在柳洲更與坐龍宮

雙槐歲抄會稽郡治有賢牧堂趙師異帥浙



東使門吏陳詞乞增己像 四朝聞見錄湧  
金門柳洲龍王祠帥臣趙師異重塲五王旒  
冕珪服畢具其中三像一模韓侂胄一模陳  
自強一模師異時韓陳猶在臺臣惟於疏中  
及師異自貌其像不敢斥韓陳云 又開禧  
時政府惟有陳自強居相位民謠謂之天上  
台星少人間宣幹多

孤峰西轉水東流風月臨平動客愁幾處桑麻  
邨舍外漁姑多住藕花洲

咸淳臨安志臨平山上有塲有龍洞細礪洞  
有天井下有東嶽廟景星觀峙立兩旁又有  
藕花洲即鼎湖也 沈金部汝諧詩有山勢  
分明飲水鼉孤峰西轉鬱嵯峩之句  
故宫忍見舊冬青一塲如山雪涕零欲訪影魚  
香骨案更從何處叩英靈

槎菴小乘至元間得南國有總統者發掘先

南宋神事記 卷七  
宋江南陵寢其間金寶不可勝計取梓宮中  
尸體置於故宮殿基上建石塼壓之以厭勝  
江南人凡宗廟神主人民版籍皆置於其下  
高一十三丈 解醒語西僧扎木揚喇勒智  
故掘宋帝諸陵寢徽宗陵得走馬烏玉筆箱  
銅涼撥繡管高宗陵得正珠戲馬鞍光宗陵  
得交加百齒梳香骨案理宗陵得伏虎枕穿  
雲琴金猫睛為徽龍肝石為軫綠玉磬楊貴

妃物度宗陵得五色藤絲盤影魚黃瓊扇柄  
按元史扎木揚喇勒智為江南釋教總統發  
掘故宋諸陵之在錢唐紹興及其大臣冢墓  
凡一百一所

內殿傳來宴近臣酒酣歌罷笑宮嬪當前欲乞  
詞人筆香霧輕飄解領巾

齊東野語孝宗內宴酒酣內人以帕子從魯

覲乞詞

南齊書卷之七  
一團寒月白鱗鱗太史占來上瑞新後苑已圖  
耕織事民間又見踏犁陳

近異錄云慶元間季冬二十夜月初出時臨  
安嘉興人皆見其團圓如望太史奏是為上  
瑞其地當十年大稔 玉海景德二年內出  
踏犁式付河北轉運使令詢訪民間可用則  
官造給之 又紹興中樓璠畫耕織二圖四  
十五事為五言詩四十五章高宗召對以進

呈宣示後宮

定帖初來彩盒呈筵前最喜寶釵橫含情一樣  
春閨女多少羞容受壓驚

夢梁錄伐柯人兩家通報擇日過帖各以色  
絲襯盤安定帖然後相親 又如新人中意  
即以金釵插於冠髻中名曰插釵又若不如  
意則送綵緞二疋謂之壓驚則姻事不諧矣  
酒衣簇蓋盡銷金綵幣紅羊報吉音鬚掠巾環

南齊書 卷七  
相答外一罇魚水用心深

夢梁錄媒氏往女家報定加以雙羊牽送以金餅酒裝以大花銀方勝紅綵銷金酒衣簇蓋酒上又女氏即於當日回定禮以珠翠鬚掠卓羅巾段七寶中環又用金銀打造魚箸以綵帛造像生葱雙株挂於魚水罇外妓樂迎來梭轎前雙擎寶鏡照團圓兒童拾果攢花斗爭乞攔門利市錢

夢梁錄至親迎日借官私妓女及樂官鼓吹引迎花擔子或梭擔花簾轎前往女家迎取新人又尅擇官執花斗盛五穀豆錢綵果望門而撒小兒爭拾之謂之撒穀豆以厭青陽煞耳又樂官妓女互念詩詞攔門求利市錢又新人下車一妓女倒朝車行捧鏡青花氈上步紅蓮佳兆乘龍跨錦鞦百子帳中看合髻綵絲雙結兩心聯

夢梁錄新人下車左右女使扶持而行踏青  
氈花席上先跨馬鞍背平秤而過 又男左  
女右結髮名曰合髻 又禮官請兩新人出  
房叅堂男執槐簡掛紅綠綵綰同心結倒行  
女挂於手面相對而行謂之牽巾

塗金貼套蜜油缸還送花冠鶯蛋雙親串三朝  
餽女後並肩絮語坐紗窗

夢梁錄三日女家送冠花緞鶯蛋以金銀缸

兒盛油蜜頓於盤中四圍撒帖套丁膠於上  
又女家或於九朝內移廚往壻家致酒謂  
之餽女會

歲晚西廬冷不禁風餐雪嚙惱詩人清寒儂境  
非人世何處能回暘谷春

誠齋集左藏南庫西廬下帟閣負暄戲題左  
帟大禁清寒非人間有也而庫官孔仲古汲  
季承史伯載心匠天功剏一火閣不薪不炭

煖亦非人間有予以小暘谷名之且賦絕句  
水衡仙客任冰天雪嚙風餐更禁烟不是移  
來小暘谷老夫凍折兩詩肩 案左藏庫在  
清湖橋

銀榜恭書幸翠華玉壺私酒愧官家三千庫米  
都蠲却一任東風轉柳花

老學菴筆記德壽宮德壽殿皆壽皇御書旁  
署臣某恭書四字 程史右正言袁亨論北

內有私酤光堯怒孝宗諭曰太上怒甚昨日  
方宴太上賜酒一壺親書德壽私酒於上

思陵錄四月庚辰國忌行香運司令承受奏  
每糴米五千石內二千石御前酒庫三千石  
德壽酒庫內批德壽宮三千石更不供納遂  
申中書省照會 武林舊事壽皇承歡兩宮

楊誠齋詩云長樂宮前望翠華玉皇來賀太  
皇家青天白日仍飛雪錯認東風轉柳花

白練分馳滾畫毬球門高築殿西頭芙蓉秋晚  
誰先得爭唱紅旗第一籌

玉海淳熙四年命閣門稽太宗朝擊毬典故  
仍先習儀詔擊毬御朋是日三少使相執政  
已下各分朋侍立上擊過毬門回馬御殿皇  
太子以下稱賀續資治通鑑淳熙四年九  
月閱蹴毬於選德殿周必大年譜同宰執  
赴芙蓉閣觀擊毬內宴選德殿有御製詩是

穹垂佑福羣生涼德惟知監守成未忝三登  
占叶氣簫韶九奏播歡聲未央秋晚林塘靜  
太液波閑殿閣明嘉與臣鄰同燕樂益修庶  
政答丕平宋史有司除地東西為毬門加  
以采績承旨二人守門衛士二人持小紅旗  
唱籌御龍官錦繡衣持歌舒棒周衛毬場東  
西建日月旗教坊設龜茲樂於兩廊鼓各五  
閣門預定分朋狀取親王近臣駙馬都尉以

下悉預服異色繡衣左朋黃欄右朋紫欄烏皮鞞冠以華插脚折上中天廐院供馴習馬帝乘馬出教坊大合涼州曲馬皆結尾內侍發金合出朱漆球擲殿前通事舍人奏云御朋打東門帝擊毬教坊作樂奏鼓毬既度颺旗鳴鉦止鼓帝回馬從臣奉觴上壽貢物以賀始命諸王大臣馳馬爭擊毬門兩旁置繡旗二十四而設虛架於東西堦下每朋得籌

即插一旗架上以識之帝得籌樂少止從官呼萬歲群臣得籌則唱好得籌者下馬稱謝又有步擊者乘騾驢擊者時令供奉者朋戲以為樂云 武林舊事築毬左軍一十六人毬頭張俊蹻毬王憐等

特設山林高士寮常從講易問道遙一朝杖履紅塵去琴韻松風久寂寥

四朝聞見錄孝宗聖性超詣尤精內景時詔



山林修養者入都寘之高士寮人因稱之曰  
某高士有謝高士以從臣薦講易於宮中孝  
宗問以老莊之學易如剛最後灑掃高士堂  
亦稱高士無甚異惟善於趨謁陸三山因齋  
宿升宮扣其廬有三蒼童對奕聞松風間有  
琴絲碁奕聲陸公心羨何異神仙叩童願見  
高士童荅以高士已出去某御藥處陸因歎  
曰高士亦見御藥耶笑而出 高似孫真誥

序云易如剏太乙宮高士也號玉京外臣  
歌吹年年豐樂樓春晴三十六梯遊千官墀下  
題名姓風景依稀似汴州

湖山勝槩豐樂樓為朝紳同年會拜鄉會之  
地 絕妙好詞韓畤浪淘沙豐樂樓詞云裙  
色艸初青鴨綠波輕試花霏雨溼春晴三十  
六梯人不到獨喚瑤箏 艇子憶逢迎依舊  
多情朱門只合鎖娉婷却逐彩鷺歸去路香

陌春城 江左十五子詩註煙霞洞口千官  
塢刺南渡諸臣姓名

初開棘院立新科別取名流博學多底事分經  
誇蕊榜傳來謬種竟如何

日知錄高宗立博學宏辭科凡十二題制詔  
誥表露布檄箴銘記贊頌序內禱書六題分  
為二場每場體制一古一今南渡以後得人  
為盛多至卿相翰苑者 宋史各房分經始

於理宗紹定二年 又理宗朝有司命題苟  
簡發策用事訛舛所取之士既不精數奉之  
後復命主文時謂之謬種流傳

天章燦爛半山霞白石清泉有道家誰到永和  
尋石鼓多從水甕看桃花

咸淳臨安志舉亭山寧宗御書三字為扁有  
崇善靈惠王祠名半山廟旁有水甕及桃花  
塢 又教陶孫詩樵路縈連入翠微清泉白

石可忘機雲中犬吠劉安過樹杪春深望帝  
歸 又桐扣山在臨平山之西晉武帝時岸  
壞出石鼓擊之無聲張華取蜀桐木刻作魚  
形而扣之聲聞數里 抱拙小藁市井蕭條  
景物非居人猶號永和堤永和堤即臨平驛  
路

燦錦亭前淪茗香即看百戲列迴廊影花扇底  
招闌撲分取金錢松子量

乾淳起居注乾道三年三月車駕與皇后太  
子過宮起居二殿訖先至燦錦亭進茶 夢  
梁錄大街闕撲如漏塵扇柄異色影花扇  
老學菴筆記市人有以博戲取人財者每博  
必大勝號松子量不知何物語也

九仙有夢順人情臚唱傳來互有名魚雀不同  
松栢貴自然公自不如卿

湧幢小品陳僕射俊卿謁九仙祠問功名夢

南定補遺 卷十  
仙曰前程在黃公度口陳過黃黃曰我狀元  
子榜眼陳曰何尊已而卑人黃曰然則狀元  
爾榜眼我廷試黃果元陳榜眼高宗曰卿土  
何竒黃曰披綿黃雀美通印子魚肥陳曰地  
瘦栽松栢家貧子讀書高宗曰公不如卿改  
陳為元

堂花看罷冶遊歸去逐西嗟燕子飛衫紫紛紛  
裁御愛闔將春色上春衣

癸辛襍識有馬嗟堂花 燕翼貽謀錄中興  
以後行都貴賤皆衣黝紫以赤紫為御愛紫  
無敢以為袍衫者獨婦人以為衫襖爾  
柳堤紅舫宣魚戶煖殿春燈點蟹胥聞道民間  
供汎索菌丁昨夜又新除

蟹譜嘗見監御厨王滌院云御食經中亦有  
煮蟹法但不常御賜命則進 又錢唐置魚  
戶蟹戶專掌捕魚蟹 玉楮集蟹至正月重

出謂之看燈蟹 夢梁錄非時取喚謂之汎  
索 菌譜合葦產於台州嘗進上標以台葦  
上遙見誤讀合葦因承誤既充苞貢遂以此  
冠於諸菌

桃柳春工費主持妄遭蒲縛笑無知橫行介士  
風流甚西子湖頭作判司

夷堅志步司將狄訓練五更至錢湖門覺有  
物觸其足取視則一巨蟹長三尺形模怪醜

命卒執送於家坐假寐夢一人長髮容貌可  
惡淡綠袍軟幘黑鞵烏犀帶持手版揖曰某  
乃西湖判官

月課曾遺政府羞當時穢德有箕裘斬新節帖  
開言路湖上平章十六秋

宋史紀事本末以陳自強為右丞相言路阨  
塞每月按舉小吏一二人謂之月課 又似  
道既相引薦奔競之士又引外戚子弟為監

南齊書 卷一  
四一  
司郡守進倡優奉帝為游燕臺臣有諫者宣  
諭使裁去謂之節帖 忠肅公集賈平章故  
第詩豪華汨沒幾星霜廢宅空遺孔道傷鼠  
跡印塵盈故榻燕巢經雨落空梁紫雲影斷  
人千古金谷花殘夢一場世事興衰只如此  
啼鴉不必怨斜陽

當季富貴付猴形飲博場中幾醉醒相法若應  
為太守可無萬里嘆徐行

齊東野語賈似道少日有人善相一日來值  
其跣卧因嘆惜再三私語客曰相公貴極人  
臣而足心肉陷是名猴形恐異時不免有萬  
里之行 又徐謂禮自誇閱人多奇中與賈  
似道為姻賈年少荒於飲博其生母胡夫人  
苦之叩徐云君相法言之何如徐曰夫人勿  
多憂異日必可作小郡太守

曾因神馬駐三軍香火南來第一勲廟貌忽為

丞相怒居民空自殺王雲

南渡錄高宗徽宗第九子也封康王靖康之變質於金與金太子同射康王三矢俱中以為此必揀選宗室之長於武藝者冒名為此留之無益遣還換真太子來高宗得逸奔竄疲困假寐於崔府君廟中夢神人曰金人追及速去之已備馬於門首康王驚覺馬已在側霜蹄霧鬣昂然翹立躍馬南馳既渡河而

馬不復動下視之則泥馬也 宋稗類鈔高宗至磁州宗忠簡假神道以止之曰此有崔府君廟甚靈可以卜玆有馬更顯應遂入燒香其馬銜車輦等物塞了去路遂止不往一日北使來秦檜出接少憇廊廡上告以故檜曰余以為功令都歸功於神恐不便即日毀之 宋史紀事本末王雲副康王使金宗澤迎曰肅王一去不返大王復去何益願勿行

南齊書 卷一  
王出謁嘉應神祠雲在後民遮道諫王勿北  
去厲聲指雲曰真賊也因執雲殺之 考湖  
州府誌南潯南柵建炎二年金人陷揚州高  
宗南幸金人追之帝至潯懼追者見及匿嘉  
應神祠中月下俄見泥馬忽動跨之而行遂  
入杭州舊封康王寺今褒能教寺俗呼康王  
寺按高宗從未至湖州此載或恐有誤 案  
顯應觀祀崔府君在湧金門外

乞將主簿玉雙瓶淪水風前上雪亭飲取第三  
春貢好解從官柳醉微醒

平園集周必大胡邦衡生日以詩送北苑八  
勝日鑄二瓶曰賀客稱觴滿冠霞懸知酒渴  
正思茶尚書八餅分閩焙主簿雙瓶揀越芽  
妙手合調金鼎鉉清風穩到玉皇家明年勅  
使宣臺醜莫忘幽人賦葉嘉 省齋橐賦詩  
謝送賜茗復以丙申小春四銜寄贈詩云淳



熙又貢第三春驛騎星馳渡劍津七祖師泉  
難話舊八功德水且嘗新雪亭亭烹處休裝景  
火閣煎時却可人口只恐春從官柳動樂天還  
欲醉精淳註官柳邦衡侍婢名

初聞響盞點葱茶迎酒旋開賣酒家橫笛一聲  
吹入破便從竹葉換梅花

夢梁錄今之茶肆列花架安頓竒松異檜等  
物於其上裝飾店面敲打響盞 又冬月添

賣七寶擂茶餠子葱茶 至正直記故宋過  
府官及數貴例蒙賜酒却於官府支給以鼓  
吹歸謂之迎盃 都城紀勝暑天兼賣梅花

酒用鼓樂吹梅花引曲破 曲洧舊聞杭州  
酒名有竹葉清碧香白酒 續松漠記聞燕

京茶肆設雙陸局如南人茶肆中置棊具也  
江左曾傳定武本宣和殿裏幾回看八千禩帖  
空留得蠶紙應無似牡丹

蘭亭考定武者乃江左所傳晉人會稽石也

太平清話唐太宗蘭亭用玉石刻之文宗朝舒元興作牡丹賦刻之碑陰熙寧間薛紹彭聞公廚有石用以鎮肉取視之乃刻牡丹賦於碑陰者遂易之以歸長安大觀中詔取置宣和殿或云良嶽瑪瑙亭靖康之亂尚方珍寶悉歸金獨此石金所不識遂棄不取建炎初高宗駐蹕廣陵宗澤守東都見之遣騎

疾馳進行在未逾月金南侵大駕幸浙倉卒失之紹興中密旨尋訪竟不獲 芝園前集賈師憲竄逐時朝廷命王孟孫簿錄其家石刻蘭亭多至八千匣

朝來宮婢藥囊添滿院飛花掩畫簾手把輕羅還絮語每逢三月病懨懨

神仙通鑑皇甫坦先生善布氣韶位有甄娘娘病甦累年踊而後能步太后命先生亦為

布氣即釋踊而行及將還山留一扇於禁中  
曰有發寒熱者以此扇當差未幾宮中多患  
瘧用之皆驗 萬曆杭州府志陳沂其先汴  
人扈蹕而南遂為錢唐人嘗治康王妃危疾  
有竒效賜御前羅扇凡宮中有疾欲不時召  
之者聽持扇入禁中金吾閤寺皆不得沮仕  
至翰林金紫良醫考癸辛襍志紫紗衫羅扇  
不得入宮

一叢東閣碧琅玕花木陰陰晝影寒但覓隔窗  
通小飲嬾從祕省借書看

玉堂襍記學士院東閣窓下小池旁植金沙  
月桂之屬海棠郁李玉繡球各一株 硯北  
襍志宋嘉定間著作郎曾從龍請嚴臣僚借  
書之禁紹定三年三月詔祕書省書籍非備  
省官毋得借書許從監少置簿有欲闕文籍  
為檢閱較正等用即先批簿以憑請取俟還

本庫隨與黠奴或借出已久亦須檢舉以察  
隱遺從祕書監葉禾言也

一奠神輿列祖筵焚香端為奉賓天公家楮券  
猶傳世例得堯夫用紙錢

楓窗小牘思陵神輿就祖道祭百官奠哭紙  
錢差小官家不喜諫官以為俗用紙錢乃釋  
氏非聖主所宜以奉賓天也今上抵於地曰  
邵堯夫何如人而祭先亦用紙錢豈生人處

世如汝能日不用一錢乎 鼠璞楮券聽稱

責以傳別特民間私相稱責以為符驗公家  
未嘗為之紹興間錢端禮議令權貨務給降  
諸軍見錢公據關子三百萬

芙蓉楊柳見梳妝燕子歸來覓錦梁滿目湖山  
仍似舊長橋何處弔朱孃

湖山類橐兵後汪水雲登大內芙蓉閣宮人  
梳洗處詩有楊柳兮青青芙蓉兮冥冥美人

南齊書 卷一  
四  
不見空淚零錦梁雙燕來又去夜夜蟾蜍窺  
玉屏 水心詩鈔朱孃曲憶昔翦茅長橋濱  
朱孃酒店相為鄰自言三世充拍戶官拋萬  
斛嗟長貧

又畫簪花技最工涉兒趨奉亦匆匆滑稽把色  
尋常事艷段爭如無過蟲

夢梁錄有一等手作出入宅院趨奉郎君子  
弟為幹辦襍事插花挂畫幫涉妄作謂之涉

兒 都城紀勝襍劇中先做尋常熟事一段  
名曰艷段次做正襍劇或添二人名四裝孤  
老吹曲破斷送謂之把色全以故事務在滑  
稽又隱於諫諍故隨便跣露謂之無過蟲  
乘輦何妨可祀神要將喜怒任權臣六宮歌管  
春風夜蕭寺焚香拜美人

齊東野語度宗壬子歲有事明堂將登輅雨  
至賈似道欲少候行宮使胡顯祖請乘輦上

南齊書 卷十  
四九  
從之似道必欲去顯祖竟追削顯祖本太常  
禮官以女為美人故至此有旨美人胡氏追  
毀命婦告送妙淨寺削髮為尼

圖畫新翻黃蠟箋幛歌山水潑雲煙欲從符印  
求真蹟記取書題善雅傳

清河書畫舫思陵行書子美題奉先劉少府  
新畫山水幛歌黃蠟箋真蹟 都穆鐵網珊  
瑚思陵宸翰下有行書一聯其印文曰善雅

蓋宋景獻太子書而善雅其堂名也

教駿人皆似九方邊臣重驛貢驪黃使船不用  
凌波檝驥院新編第幾綱

玉海建炎四年詔驥院差教駿五十人赴  
御馬院養馬 又建炎元年招募習水善波  
操舟便利之人令擬到軍號樓船軍詔從之

又邕州置買馬司必四尺二寸以上每百  
匹為一綱 金史尼雅滿曰南人使船如使

馬烏可敵也

角繻包髻出彤庭任子當年只六齡若到軍中備反側井泉不獨紀銀瓶

宋史本傳韓彥直世忠子六歲入見高宗命作大字即拜跪書皇帝萬歲帝拊其背曰他日令器也親解孝宗卍角之繻傳其首金陀續編初飛與張俊承詔視世忠軍往辭檜檜謂之曰且備反側檜為此語欲激其軍使

為變因以罪世忠耳飛荅曰楚州之軍即朝廷之軍也檜色變惡飛語直湖壩襍記銀餅小姊者岳武穆季女也武穆被難女欲叩闕上書邏卒攔止之遂抱銀餅墜井而死

按孝宗初追復武穆原官以禮殉葬訪求其後槩予錄用襁褓以上皆官之女少者候嫁則官其夫武穆有女安孃女夫高祚補承信郎岳雲女大孃岳雷女三孃候出嫁日夫客

與補進武校尉俱載在金陀粹編中則銀瓶  
小姊殉孝而死寧不經御旨追贈且岳珂為  
武穆孫而編中曾不一及之耶

紅頰香狹梳鵝角青鬢嬌女蒺牙魚落花軟襯  
春跌小為看風光九十餘

留青日札宋淳熙中剝削童髮必留大錢許  
項左右束以絲縵宛若博焦之狀曰鵝角  
愧郗錄近世中都閭閻鬻冠飾者率為物象

螭一角而兩足鳥翼而鴟尾通國服之謂之  
牙魚 菽林伐山南渡後妓女窄鞵弓鞋如  
良人故當時有蘇州頭杭州脚之諺

童夫人尚有童心雪色獅貓愛護深堂上甍甍  
春不管伺他風蜨臥花陰

老學菴筆記秦檜孫女崇國夫人小名童夫  
人愛一獅貓失之遍索不得 咸淳臨安志  
都人蓄貓長毛白色者名獅貓蓋不捕之貓



徒以觀美特見貴愛

糖霜水飲涼生齒暖閣春回乍減寒昨夜宿醒  
猶未醒又聞宰相罷堂餐

南宋相眼唐璘見蔣峴尚書家子弟言理宗  
丙申四月乍暖飲糖霜水過多頓甚汪之道  
有異謀欲奉上為太上皇賈似道聞之密告  
其姊貴妃轉聞亟逐之 宋季三朝政要紹  
定元年三月上飲宴過度史彌遠臥病故時

人譏之曰陰陽眠變理天地醉經綸 經濟  
類編董宋臣逢迎上意宮中進倡優傀儡諸  
戲以奉帝為娛樂 糖霜譜跋晦叔作糖霜  
譜余聞之且久偶獲七篇盡讀於大慈之方  
丈院紹興二十四年卧雲菴守元書

龍檐歸寧鹵簿齊賜筵意思繡釘梨同時眷屬  
皆恩賚生色文羅翡翠篔

武林舊事后出宮至祥曦殿上升龍檐出和

南齊書卷之十一  
寧門至皇后家賜筵皇后繡高釘十楮果子  
意思十件又皇后散付本府親屬宅眷翠冠  
翠扇翠篋環刺繡領生色羅金銀錢金盆盞  
婕妤寺水注方塘高揭銀鉤寫鳳皇皇羞殺易書  
供芥虜松門仍榜狀元郎

四朝聞見錄方家峪有劉婕妤寺泉自鳳山  
而下注為方池上揭鳳皇泉三字乃于湖張  
紫薇孝祥所書夏執中為后兄呼為夏國舅

至寺中謂于湖書未工遂自書三字易之孝  
宗幸寺中不復他語但詔左右以芥虜為薪  
止用孝祥書

三千玉貌各含愁羅帶相攜赴碧流明月夜寒  
彈怨語琵琶聲咽故宫秋

宋元通鑑元人索宮女內侍及諸樂官宮女  
赴水死者以百數 水雲集一菊吳山在眼  
中樓臺疊疊間青紅錦帆後夜烟江上手抱

琵琶憶故宮

亂墳誰與一盃羹深羨花宮有世情至竟餘杭  
門外路居人不識薤歌聲

成化杭州府志愍忠資福普向寺南渡初殿  
帥楊存中請建於北山鮑家田青芝塢專充  
殿司諸軍瘞所置僧以守香火 文獻通考  
諸寺院之多產者類請求貴臣改為墳院冀  
免科數詔戶部申嚴行下 成化杭州府志

杭城舊有十三門惟餘杭門在北不得出居  
人之樞

內教場開練虎賁雕戈千騎曉雲屯將臺金鼓  
黃旗動勅賜將軍射鐵盆

玉海乾道二年十一月幸白石大閱 三年  
三月宣殿前選鋒等軍馬軍九百騎入內教  
場射鐵盆鐵簾 四年十月幸茅灘大閱前  
一日於教場東列幕宿營皇帝登臺舉黃旗

諸軍呼拜者三舉白旗變方陣為備敵之形  
舉黃旗變圓陣為自環內固之形舉赤旗變  
銳陣諸軍魚貫斜列為衝敵之形舉青旗變  
直陣上親御甲冑指授方略六師歡呼犒賞  
有加焉  
錦標爭過一清堂畫鼓敲殘亂夕陽更有戈船  
迎弄處十分打扮是錢唐

武林舊事玉蓮堂原名一清堂競渡爭標於

此 都城紀勝西湖春仲浙江秋仲皆有龍  
舟爭標輕捷可觀有金明之遺風 隨隱漫  
錄余少觀金明池水戰為之目動心駭比見  
錢唐水軍戈船飛虎迎弄江濤出沒聚散如  
神以視金明池如兒戲耳 在軒集競渡擢  
歌建雲旂建雲旂土風到處總相猶朝了霍  
山朝岳帝十分打扮是杭州

上苑鶯花赴試春南宮佳兆遇魁神東風不解

相思句愁煞紅簾粉淚人

睽車志錫山許宗美以壽皇登極恩赴省詣  
太乙宮禱焉禱已周行廊廡間才舉足見二  
神位云河魁從魁宗美甚喜洎南宮揭榜何  
自然為省元而宗美以詩賦魁前場蓋符二  
魁之姓名云 林下詞選易被彥章長沙人  
寧宗朝狀元以優校為前廊久不歸其妻作  
長相思詞寄之云朝有時暮有時潮水猶知

日兩回人生長別離來有時去有時燕子猶  
知社後歸君行無盡期

臨軒安用捉刀為對使偏輸聰慧時一闋清詞  
新譜出杏花春雨有誰知

癸辛襍識寧宗不慧而訥於言每北使入見  
陰以官者代答 詞筌宋寧宗浣溪紗看杏  
花詞花似醺容上玉肌方論時事却嬪妃芳  
陰人醉漏聲遲珠箔半鉤風乍暖雕梁新語

燕初飛斜陽猶送水精卮

朝衫香褪獨徘徊睡思初濃水閣開  
怪得無人理紈扇綠陰猶自摘青梅

昨非菴日纂趙葵嘗避暑水亭作詩云水亭  
四面朱闌繞簇簇游魚戲萍藻六龍畏熱不  
敢行海水煎徹蓬萊島身眠七尺白蝦鬚頭  
枕一枚紅瑪瑙六句已成葵遂睡去有侍婢  
續云公子猶嫌扇力微行人多在紅塵道

古今女史趙葵同知樞密院朝罷歸私第而  
諸姬不見葵往訪之乃羣聚摘青梅有一姬  
善詩賦葵責令賦詩云柝聲默報蚤春回滿  
院春風繡戶開怪得無人理絲竹綠陰深處  
摘青梅

倚翠偎紅作大師畫船天外送歌兒含情無限  
闌干曲惆悵參橫月落時

談藪樓叔韶鋪初入太學與同窗友厚善休

日乃相率出城買小舟沿葦行將十里舍舟  
陟小坡行道微高下又二里得精舍門徑絕  
卑小而松竹花艸楚楚然友款於門即有小  
童應客主人繼出乃少季僧姿狀秀美進趨  
安詳殊有富貴家氣象揖客曰久別甚思款  
接都不見過何也便起推西邊小戶入華屋  
三間窗几如拭玩具皆珍奇喚侍童進點心  
素膳三品甘芳精好撤器命推窗平湖當前

數十百頃其外連山橫陳樓觀森列夕陽返  
照丹碧紫翠互相映發漁歌菱唱隱隱在耳  
騁望久之僧以麈尾敲闌干數聲俄有小畫  
舫傍湖而來二美人徑出登岸靚粧麗質王  
公家不過也僧命具酌指顧間觴豆羅陳窮  
極水陸左右執事童皆姣好杯行美人更起  
歌舞僧與友謔浪調笑歡意無間樓神思愴  
恍正容危坐噤不敢吐一語伺僧盪起挈友

臂叩所以友愠曰子但飲食縱觀何用知如  
許而觴十起巡夜已艾僧復引客至小閣中  
臥具皆備曰姑憇此遂去壁外即僧榻試穴  
隙窺則徑擁二姬就寢友醉甚大鼾樓獨徬  
徨不寐起如廁一童執燭密詢之此為何地  
童笑曰官人是親戚何須問樓反室展轉通  
宵時側耳聽聲但聞鼻息齁齁而已將曉僧  
送之門鄭重而別由他徑絕湖而歸樓惘惘

累日疑到非人間其後出處參商竟不克再  
諧

鴛鴦打散合蟬陳令古詞章集混成一段霓裳  
一歌曲愛他三十六番新

癸辛襍識故都德壽宮舞譜其中皆新製曲  
多妃嬪諸閣所進內有左右垂手雙拂合蟬  
舞頭舞尾打鴛鴦塲等曲皆前所未聞亦可  
想見承平和樂之盛也 齊東野語混成集



修內司所刊古今詞歌之譜靡不備具霓裳  
一曲共三十六段太后令內人歌之凡用三  
十人每番十人奏音極高妙

遺像猶思墜紫雲阜亭空見伯顏軍

案伯顏應作巴延但

與詩中平仄不協姑從其舊而於注內仍加改正

一從南北飄零後還

有梅邊生祭文

水東日記文山像上有太傅錢唐于公謙題  
云烏乎文山遭宋之季狗國忘身舍生取義

氣吞寰宇誠感天地陵谷變遷世殊事異坐  
臥小閣困於羈繫正色直辭久而愈厲難欺  
者心可畏者天寧正而斃弗苟而全南向再  
拜含笑九泉孤忠大節萬古攸傳我瞻遺像  
清風凜然于公每懸此像於座側數十年如  
一日也 夢占類考文天祥大父夢一兒乘  
紫雲而下已而復上行生天祥名雲孫字天  
祥後以字行字履善及廷試第一理宗見其

名曰天之祥乃宋之瑞也字之曰宋瑞 隄  
嚙集文文山詩註巴延至皋亭山除樞密使  
右丞相奉旨詣北軍講解見巴延陳大誼留  
營中不遣 文山全集空坑之敗夫人與佛  
生柳小孃環小孃顏孺人黃孺人皆為俘至  
元帥所已失佛生必有愛其俊秀養為己子  
矣 吳文正公集跋文丞相與妹書一代三  
百年有此臣一家數十口有此女臣不二君

女不二夫臣盡節而死女全節自生不愧於  
天不作於人可傳千萬世卓哉曼卿出其門  
藏此帖甚珍之 書系天祥過南安遣人告  
墓以弟壁之子陞為嗣又寄弟詩曰親喪君  
自盡猶子是吾兒 宋遺民錄宋太學生廬  
陵王鼎翁作生祭文丞相文歷陳其可死之  
義又反覆古今所以死節之道激昂奮發累  
千五百餘言錄數十本驛途山店俱貼之大

義在速文丞相死國然丞相從容就死固不  
係鼎翁之文而鼎翁之志可悲矣鼎翁名炎  
午號梅邊所著有吾汶稟

桑海英風不可攀南朝寂歷舊江山惟餘幾輩  
才人在詩卷長留天地間

淵穎集吳萊桑海遺錄序云淮陰龔開聖子  
撰文宋瑞陸秀夫二傳叙其前後死節精忠  
激烈誠有在於天地而不在今古者予故私

列二傳以發其端詢之故老徵之襍記題曰  
桑海遺錄以待太史之采擇焉 天地間集

謝翱所編其詩為家鉉翁文天祥文及翁謝  
枋得鄭協柴望徐直方向新之王仲素謝鏞  
陸鏗何天定王粲之范協吳子文韓闕林景

昭凡十七人明宋濂著謝先生傳云天地間  
集五卷蓋未完書也 月泉吟社潛齋吳渭

清翁集渭以故宋義烏令入元不仕退居吳

溪延致方韶父謝臯羽吳子孟作月泉吟社  
四方吟士從之以田園雜興命題凡得二千  
七百三十五卷三子為其評校選中二百八  
十名甲乙其名次出一榜各有賞給今列其  
詩者僅六十名題名多隱號間有重名因詩  
為次第一羅公福杭清吟社三山連文鳳也  
第二司馬澄翁義烏馮澄也第三高宇杭州  
梁相也第四僊邨人註古杭白雲社第五山

南隱逸義烏劉應龜也第六子進分水魏新  
之也第七粟里金華楊本然也第八倪梓義  
烏陳堯道也第九全泉翁孤山社全璧也第  
十呂淡翁東陽呂文老也第十一方賞桐江  
方德麟也第十二鄧草邇三山劉汝鈞也第  
十三魏子大註武林九友會第十四喻似之  
分水何鳴鳳也第十五躡雲建德梓州翁合  
老仲嘉也第十六玉華吟客分水林子明也

第十七田起東崑山劉蒙正也第十八唐楚友孤山社白斑也第十九識字耕夫武林社秦州周暎也第二十學古翁桐江趙必范也第廿一社翁釣臺姚潼翔也第廿二騎牛翁三山高鎔也第廿三天目山人義烏吳瑀也第廿四安定書隱義烏胡南也第廿五槐窗居士浦陽黃景昌也第廿六姜仲澤金華姜霖也第廿七陳柔著武林社陳必曾也第廿

八方尚老桐江方子靜也第廿九朱孟翁東陽人也第卅愛雲僊杭白雲社趙必折也第卅一陳希邵義烏陳舜道也第卅二劉時可雙溪人也第卅三岳重武林九友會僧了慧也第卅四雲東老吟義烏許元發也第卅五避世翁義烏洪貴叔也第卅六觀我金華楊舜舉也舜舉即本然之字第卅七徐端甫義烏人也第卅八龜潭朱釋老金華人也第卅

南齊書 卷十一  
九樵逸山人桐江李萼也第四十柳圃月泉  
陳君用也第四十一臨泉僧志寧杭人蔡潭  
也第四十二吟隱俞自得金華人也第四十  
三東湖散人註古杭人第四十四仇近村古  
杭仇遠也第四十五陳緯孫註即分水何鳴  
鳳第四十六陳鶴皋註即月泉社陳君用第  
四十七冷清建德王進之也第四十八感興  
吟註桐江人第四十九王進之建德人也即

上冷清第五十元長卿義烏陳希聲也第五  
十一聞人伯仲即陳希聲第五十二戴東老  
註月泉社人第五十三子直註即魏新之第  
五十四襲慶茗水陳文增也第五十五九山  
人註寓杭第五十六桑柘區金華人也第五  
十七柳州註月泉社人第五十八草堂後人  
杭人也第五十九君瑞桐江人也第六十青  
山白雲人杭人也已上詩皆全後又列摘句

有無機老農子問田農夫唐人機軸忘懷老  
人五雲山人老農劉存存石姥寄客雙澗雲  
水白雲人傅宣山自家意思柳耆俞如山跨  
犢者山野人盤隱末子扶杖夫廷雲翁自適  
郭建德駱佾賓陳帝臣晚靜竹蓑笠翁俞楚  
處藍田道人林泉生傅九萬才人其間或有  
名或無名大抵皆宋末遺老也舊有黃顥序  
明正德中田汝耔重序刊行 谷音清江杜

本伯原輯遼東王澮洛陽程自修瑯琊冉琇  
河東元吉曲阜孟鯁廣漢安如山成都王者  
襄陽師嚴廣陵張琰漢陽汪涯建安詹本四  
明皇甫明子長沙丁開括蒼鮑輓京口崔瑒  
姑孰魚潛瑞陽柯芝柯茂謙廣陵邵定豫章  
熊與蘇宜春晏七大庾孫璉臨江楊應登揚  
震盱江曾澈又無名氏番陽布衣瀟湘漁父  
閩清野人羅浮狂客凡二十五人無名氏四

人詩一百首蜀郡張槊跋云皆宋亡元初之節士多幽人清詠之辭題曰谷音者山谷之音野史之類也 宋遺民錄程敏政編自序云宋末王鼎翁謝臯羽唐王潛三子其名不載於宋史因輯其遺文以備史事并附錄張毅甫方韶卿吳子善龔聖予汪大有梁隆吉鄭所南林景曦諸人之作而係庚申君事實於後凡十五卷 樂府補題集中倡和作者

為王聖與周公瑾王理得馮祥父唐英發呂和甫李商隱練行之唐王潛趙正卿李師呂張叔夏仇仁近凡十三人又無名氏二人共詞三十七首合為一卷陳維崧四六序云嗟乎此皆趙宋遺民之作也粵自雲迷五國橋讖啼鵲潮歇三江營荒夾馬壽皇大去已無南內之笙簫賈相難歸不見西湖之燈火文不備錄





清室不刊言

卷一

七